





元, 脱 脱 等撰

中 華 書 局

卷三六五至卷三八〇(傳)第 三 三 册

宋史卷三百六十五

列傳第一百二十四

岳飛 子雲

貰其財者不責償。 派生時,有大禽若鵠,飛鳴室上,因以爲名。未彌月,河決內黃,水暴至, 岳飛字鵬舉,相州湯陰人。世力農。父和,能節食以濟饑者。 有耕侵其地,割而與之;

母姚抱飛坐甕中,衝濤及岸得免,人異之。

斤,

弩八石。

學射於

周同,

盡其術,

能左右射。 少負氣節,沈厚寡言,家貧力學,尤好近氏春秋、孫吳兵法。生有神力,未冠,挽弓三百 同死,朔望設祭於其冢。 父義之,曰:「汝爲

時用,其徇國死義乎。」

列

傳 第

一百二十四

岳飛

遭卒僞爲商入賊境, 賊掠以充部伍。 宣和四年,真定宣撫劉韐募敢戰士,飛應募。 飛遣百人伏山下,自領數十騎逼賊壘。 相有劇賊陶俊、賈進和二丁,飛請百騎滅 賊出戰,

獗 陽北江 賊來追 之,伏兵起,先所遣卒擒俊及進和 Ü

過, 敗。 往 心。」霽是其言。 日:「敵 李 遷秉義郎,隸留守宗澤。 然好野戰,非萬全計。」因授以陣圖。 固渡嘗敵, 康 雖 一衆,未 至 相 ·知吾虛實,當及其未定擊之。」乃獨馳迎 敗之。從浩 獗 因 劉浩 見,命招賊 解東京 戰開德、曹州皆有功,澤大奇之,曰:「爾勇智才藝,古良將 圍,與敵相持於滑南,領百 吉倩, 倩以衆三百 |飛日:「陣而後戰,兵法之常,運用之妙,存乎一 敵。 八 十 ·人降。 騎 有梟將舞 習兵河上。 補 承信郎。 刀而前,飛斬之, 。敵猝至, 以 飛嚏 鐵 騎 其徒 不能 敵

之師 聞,以越職奪官歸 南,恐不足繫中原之望。臣願陛下乘敵穴未固,親率六軍北渡,則將士作氣,中原可復。」書 日集,彼方謂吾素弱,宜乘其怠擊之。黃潛善、汪伯彥輩不能承聖意恢復,奉車 康王卽位,飛上書數千言,大略謂:「陛下已登大寶,社稷有主,已足伐敵之謀, 而 駕 日益 勤王

飛 城 日:「勇不 受圍, 君 計 殆 河 非行伍中人。」飛因說之曰:「國家都汴,恃 比 則諸城或撓或救,金人不能窺河南,而京師根本之地固矣。 足恃,用兵 招 討使張所,所待以國士,借補修武郞,充中軍 在先定謀,欒枝曳柴以敗 開,莫敖采樵以致絞,皆謀定也。」所矍然 河 北以為固。 ·統領。|所問日:「汝能敵 荷馮 招撫誠能提兵壓境, 據要衝, 峙 幾何 列 重

飛唯命是從。」所大喜,借補武經郎。

遂拔 擒 金 軍皆驚,飛堅臥不動,金兵卒不來。食盡,走彥壁乞糧,彥不許。飛引兵益北,戰于太行 蔣 新 命從王彥渡河,至新鄉,金兵盛,彥不敢進。 鄉。翌日,戰侯兆川,身被十餘創,士皆死戰,又敗之。夜屯石門山下,或傳金兵復至, 拓跋耶烏。居數日,復遇敵,飛單騎持丈八鐵槍,刺殺黑風大王,敵衆敗走。 飛獨引所部鏖戰,奪其纛而舞,諸 軍爭奮, 飛自知 山

與彥 有 際,復歸宗澤,爲留守司統制。 澤卒,杜充代之,飛居故職

駐軍竹蘆渡,與敵相持,選精銳三百伏前山下,令各以薪芻交縛兩束,夜半,爇四端而 年,戰胙城,又戰黑龍潭,皆大捷。 從閭勍保護陵寢,大戰汜水關,射殪金將,大破其

舉之。金人疑援兵至,驚潰。

東明。 飛曰:「吾爲諸君破之。」左挾弓,右運矛,橫衝其陣,賊亂,大敗之。 三年,賊王善行、曹成、孔彥舟等合衆五十萬,薄南薰門。 借補 英州刺 史。 王善圍陳州,飛戰于淸河,擒其將孫勝、孫淸,授眞刺史。 飛所部僅八百,衆懼不敵, 又擒賊杜叔五、孫海于

成遣輕騎劫憲 **半**萬 杜 充將 衆不可。」「充 還建康 臣犒 3,飛曰:「中原地尺寸不可棄,今一舉足,此地 軍銀帛,飛進兵掩擊之,威奔江西。 不聽,遂與俱歸。師次鐵路步,遇賊 張用, 時命一充守健康,金人與成合寇烏江, 至六合遇李成,與戰,皆敗之。 非我 有,他日 欲 復取之,非

沈閉門不出。 飛泣諫 請 視 師,充竟不出。 金人遂由馬家渡渡江,充遣飛等迎戰, 王變先遁,

諸將皆潰,獨飛力戰 會

會

完

民

是

。

。

諸

將

多

行

剽

掠

,

惟

飛

軍

秋

毫

無

所

犯

。 **兀朮趨杭州,飛要擊至廣德境中,**

戰皆 亂 縱 擊,大敗之。 [捷,擒其將]王權,俘簽軍首領四十餘。 駐軍鍾村,軍無見糧,將士忍饑,不敢擾民。 察其可用者 ,結以恩遣還, 金所籍兵相謂曰:「此岳爺爺 令夜斫營縱火, 派

之, 又遣 儿 辯 兀朮攻常州, 宜興令迎飛移屯焉。 士馬皐、 林聚盡降其衆。 有張威武者不從,飛單騎入其營,斬之。 盜郭吉聞飛來, 遁入湖, 飛遣王貴、傅慶追 避地者賴以 破 軍。」

爭

來降附。

康爲要害之地, 里。 术 圖飛像祠之。 兀朮趨建康,飛設伏牛頭 次龍灣、飛以騎三百、步兵二千馳 金 人再攻常州 宜選兵固守, 飛四 一戰皆捷;尾襲於鎭江東,又捷; 山待之。 仍益兵守准, 至新 夜, 拱 城,大破之。 令百人黑衣混金管中擾之, 護腹心。」 帝嘉! 兀朮 戰于淸水亭, 納。 奔淮西,遂復 兀朮 歸, 金兵驚, 又 建康。 大捷, 横屍十五 飛邀 撃于靜 自相攻擊。 飛奏「建

敗之。 討戚方, 飛以三千人營于苦嶺。 **|**方遁, 俄益兵來, 派自領兵千人, 戰數十合, 皆捷。

辭,乞淮南東路一 會張俊兵至,方遂降。 重難任使, 花宗尹言張俊自浙西來,盛稱飛可用,遷通、泰鎭撫使兼知泰州 收復本路州郡, 乘機漸進,使山東、河北、河東、京畿等路次第 新

而復。

恃, 退 尋抵 泰州失守待罪 詔 飛還守通、泰, [承州,三戰三捷,殺高太保,俘酋長七十餘人。 |光世等皆不敢前,飛師孤力寡,楚遂陷。 會金攻楚急,詔張俊援之。 保柴爐,戰于南霸橋,金大敗。 有旨可守卽守, 俊辭,乃遣飛行,而命劉光世出兵援飛。 如不可,但於沙洲保護百姓,伺便掩擊。 渡百姓於沙上,飛以精騎二百殿, 金兵不敢近。 飛屯三整為楚援, 飛以泰無險 派以 可

朱家山 伏,以 後, 呼 馬 曰:「不從賊者 潛 若以騎兵自 紹 成 出 紅 興 走 羅 賊 又斬其將 完 蘄州 右,突其陣 爲 年, 幟, 降爲齊。 上流絕生米渡,出其 上刺 張俊請飛同計李成。 坐 趙 萬 ·,所部從之。 吾不 「岳」字,選騎二百隨 成聞進敗, 汝殺。」坐 進大敗,走筠州 而降者八萬餘 不意, 自引兵十餘萬來。 時成將馬進犯洪州, 幟而 破之必矣。」飛請自爲先鋒, 前 人。 賊易其少,薄之,伏發,賊敗走。 飛抵城東, 進以餘卒奔成于南 飛與遇於樓子莊, 連營西山。 賊出 城, 俊大喜。 飛日:「賊貪而 布陣十 康。 大破成軍 派 五 夜引 떘 一里,飛設 重鎧 統 不慮 追斬 使 兵

列

張 用 寇 江 西西 用亦相人,飛以書諭之曰:「吾與汝同里,南薰門、鐵路步之戰, 皆汝所悉。

今吾在此 ,欲戰則 出,不戰則降。」用得書曰:「果吾父也。」遂降

統制。 城門, 察使。 江、淮 賊望見,相戒勿犯。 建寇范汝爲陷邵武,江西 平, 俊奏飛 功第 一,加 賊黨姚達、饒靑逼建昌,飛遣王萬、徐慶討擒之。 安撫李回 神武右軍 檄飛分兵保建昌 副統制,留洪州 軍 彈壓盜賊,授親衞大夫、 皮 撫州, 派遣 人以「岳」 升神武]字幟 副 建州 軍 植

路安撫都總管, 加剿除,遙起之衆未可遽殄。」許之。 至一茶陵,奉韶招之,成不從。 年,賊曹成擁 付金字牌、 衆十餘萬,由江西 黄旗 |飛奏:「比年多命招安,故盜力強則肆暴, 招 成。 歷湖湘,據道 成聞飛將至,驚曰:「岳家軍來矣。」即 、賀二州。 命飛權 力屈則就招, 知 潭州 分道 ٠ 兼權 而 荷不 荆湖 遁。 派

藏嶺 走據 飛命士蓐食,潛趨遶嶺,未明,已至太平場,破其砦。 「姑反茶陵。」已而顧諜若失意狀,頓足而入,陰令逸之。諜歸告成,成大喜,期翌日來 北藏嶺、上梧關, |飛入賀州境,得||成諜者,縛之帳下。 連控隘道,親以衆十餘萬守蓬頭嶺。 遣將迎戰,飛不陣而鼓,士爭奮, 飛出帳調兵食, 飛部才八千,一鼓登嶺,破其衆,成奔連州 成據險拒飛,飛塵兵掩擊,賊大潰。 奪二隘據之。成又自桂嶺置砦至北 吏曰:「糧 盡矣, 奈何?」飛陽

謂張憲等曰:「成黨散去,追而殺之,則脅從者可憫,縱之則復聚爲盜。 癘者, 嶺表平。 撫其衆,愼勿妄殺,累主上保民之仁。」於是憲自賀、連,徐慶自邵、道,王貴自郴、桂,招降者 二萬,與飛會連州。 授武安軍承宣使,屯江州。 進兵追威,威走宣撫司降。時以盛夏行師瘴地,撫循有方,士無一人死 甫入境,安撫<u>李回</u>檄飛捕劇賊馬友、郝通、劉忠 今遣若等誅其酋而

李通、李宗亮、張式,皆平之。

餘賊 登山 乃專命飛平之。 起。」不果行。 至三四, 省皆 ,賊衆亂,棄 三年春,召赴行在。 一破降之。 帝乃曲赦。人感其德,繪像祠之。餘寇高聚、張成犯袁州,飛遣王貴平之。 石洞。 時處、古盜連兵寇掠循、梅、廣、惠、英、韶、南雄、南安、建昌、汀、邵武諸郡,帝 山而下,騎兵圍之。 初,以隆祐震驚之故,密旨令飛屠虔城。飛請誅首惡 洞高峻環水,止一徑可入。飛列騎 江西宣諭劉大中奏:「飛兵有紀律,人恃以安,今赴行在,恐盜復 賊呼丐命,飛令勿殺,受其降。 山下,令皆持滿,黎明, 授徐慶等方略,捕諸 一而赦脅從,不許;請 遣死 土疾馳 郡

使, 又改神武後 軍 都 統制,仍制置使,李山、吳全、吳錫、李橫、牛皐皆隸焉

秋,

入 見,

帝手書「精忠岳飛」字,製旗以

以賜之。

授鎭南軍承宣使、

江南西路沿江制置

偽齊遣 李成挾金人入侵,破襄陽、唐、鄧、隨、 野諸州及信陽軍, 湖寇楊么亦與偽齊通,

傳

第

百二十

四

岳 飛

欲 順 流而下,李成又欲自江西陸行,趨兩浙與么會。 帝命飛爲之備

襄陽。 皐曰:「爾以 列騎江岸,右列步平地,雖衆十萬何能爲。」舉鞭指王貴曰"「 憲、徐慶復隨州。飛趣襄陽,李成迎戰,左臨襄江,飛笑曰:「步兵利險阻,騎兵利 江 以 如飛者。」遂授黃復州、漢陽軍、德安府制置使。 。」抵郢州城下,僞將京超號「萬人敵」, 除 心膂之病。 四年,除兼荆南、鄂岳州制置使。 劉豫 益成兵屯新野,飛與王萬夾擊之,連破其衆 騎兵擊其步卒。」合戰,馬 李成遠遁,然後加兵湖湘,以殄羣盜。」帝以諭趙鼎,鼎曰。「知上流利害, 應槍而斃,後騎皆擁 飛奏。「襄陽等六郡爲恢復中原基本,今當先取六郡 乘城拒飛。 飛渡江中流,顧幕屬曰:「飛不擒賊,不涉此 飛鼓衆而登,超投崖死,復郢州,遣張 入江, 爾以長槍步卒擊其騎兵。」指牛 步卒死者無數,成夜遁,復 平曠。 成 左 無

萬, 足,即過江北剿戮敵兵。」時方重深人之舉,而營田之議自是 直濤 飛奏"「金賊所愛惟子女金帛, 中原,恢復故疆,誠易爲力。 志已驕惰, 襄陽、隨、郢地皆膏腴,苟行營田 劉豫僭僞, 興 人心終不忘宋。 矣。 其利爲厚。 如以精兵二十 臣候糧

以身免。賊黨高 行軍有紀律,未知能破敵如此。」又復唐州、信陽軍 進兵鄧州,成與金將劉合孛堇列砦拒飛。 仲退保鄧城,飛引兵一鼓拔之,擒高仲,復鄧州。帝聞之,喜曰:「朕素聞岳飛 飛遣王貴、張憲掩擊,賊衆大 潰, 劉合孛堇僅

爲襄陽府路隸飛,飛移屯鄂,授淸遠軍節度使、湖北路、荆、襄、 乞令飛屯鄂、岳,不惟江西藉其聲勢,湖、廣、江、浙亦獲安安。」乃以隨、郢、唐、鄧、信陽並 襄漢平,飛辭制置使,乞委重臣經畫荆襄,不許。趙鼎奏「湖北鄂、岳最爲上流要害, 潭州制置使,封武昌縣開

錢,免官私逋負,州縣官以招集流亡爲殿最。」 「岳」字旗與「精忠」旗,金兵一戰而潰,廬州平。 兀朮、 劉豫合兵圍廬州,帝手札命飛解圍,提兵趨廬,僞齊已驅甲騎五千逼城。 飛奏:「襄陽等六郡人戶闕牛、糧,乞量給官 飛張

夫,單騎按其部,拊佐背曰:「子知逆順者。 令如山, 若與之敵, 萬無生理, 不如往降。 北人,不習水戰,飛曰:「兵何常,顧用之何如耳。」先遣使招諭之。賊黨黃佐曰:「岳節使號 武昌郡開國侯;又除荆湖南北、襄陽路制置使,神武後軍都統制,命招捕楊公。飛所部皆 可乘者擒之,可勸者招之,如何?」佐感泣,誓以死報 五年,入覲,封母國夫人,授飛鎭寧、崇信軍節度使,湖北路、荆襄潭州制置使,進封 果能立功,封侯豈足道?欲復遣子至湖中,視其 節使誠信,必善遇我。」遂降。飛表授佐武義

也, 兵有深機,胡可 時張浚以都督軍事至潭,參政席益與浚語,疑飛玩寇,欲以聞。浚曰:「岳侯,忠孝人 多言? 」盆慙而止。 黃佐襲周倫砦,殺倫,擒其統制陳貴等。

列傳

第

白

= +

四

平, 急,伏四起擊賊,賊走。 遷 武 斬汝。」士安宣言:「岳太尉兵二十萬至矣。」賊見止士安軍,倂力攻之。 飛設伏, 功大夫〔三〕。 統制任士安不稟王慶令,軍以此無功。 飛鞭士安使餌賊, 曰:「三日 士安戦 賊不

使 水 日 戰 孤 미 立 我 破賊。」||浚曰:「何言之易?」||飛曰:「王四廂以王師攻水寇則難,||飛以水寇攻水寇則易。 會召浚還防秋,飛袖小圖示浚,浚欲俟來年議之。 一,而 短彼長,以所短攻所長,所以難。 後以王師乘之,八日之內,當俘諸 若因敵將用敵兵, 奪其手足之助, 離其腹心之託, **酋。」浚許之。** 派曰:「已有定畫,都督能少留,不八

田 授 上 亟 水,其行 何 大 一流而 遣 ,籍少壯爲軍,果八日而賊平。 水, 來 夫 ′;禮 兵擊之, 也。」杖之,復令入湖。 派 牛鼻擒 遂 下 遇 如 如 擇 飛,旁置撞竿,官舟迎之輒 甚厚,乃復遣 [鼎州。 斬之。 水淺 賊 奔港中, 虚,遣 黄佐 派 入賊 招楊欽 為筏)善駡者挑之,且行且駡。 歸 湖中。 **灅**,餘 所拒。 是夜,掩賊營,降其衆數萬。 來降,飛喜曰:「楊欽驍悍, 凌嘆曰:「岳侯神算也。」初,賊恃其險曰:「欲犯我者,除是 酋 兩 官軍 驚 日, 碎。 曰:「何神也 欽 乘筏,張牛革 飛伐君山 說余端、劉詵 賊怒 木爲 以蔽 俱 來 (四)等降,飛詭罵飲日:「賊 追, 巨筏, 降。 么負 旣 () 矢石, 則草 降,賊腹心潰矣。」表授飲武義 飛親行 固 塞諸港 不服,方浮舟湖中,以 舉巨木撞其 木 壅積, 諸砦慰 汉,又以腐 舟輪 撫之,縱老弱 舟, 礙 盡 木 不 不盡降, 壞。 輪激

飛來。」至是,人以其言爲識。 :疾乞辭軍事,不許,加檢校少保,進封公。 獲賊舟千餘, 鄂渚水軍爲沿江之冠。 還軍鄂州,除荆湖南北、襄陽路招討使。 詔兼廝、黃制置使,飛以

未置監司,州縣無以按察。」帝從之,以李若虛爲京西南路提舉兼轉運、 六年,太行山忠義社梁興等百餘人,慕飛義率衆來歸。 飛入覲,面陳:「襄陽自收復後, 提刑, 又令湖北、

襄 る陽府路 自 [知州、通判以下賢否,許飛得自黜陟。

已至伊 河北路 志 又遣人焚蔡州 憂,降制 也。」 張浚 飛移 。、洛,則太行一帶山砦,必有應者。」飛遣楊再興進兵至長水縣,再戰皆捷,中原響應。 起復, 至江上會諸大帥,獨稱飛與韓世忠可倚大事,命飛屯襄陽,以窺中原,曰:「此君素 首遣王貴等攻號州,下之,獲糧十五萬石,降其衆數萬。)軍|京西,改|武勝、定國軍節度使,除宣撫副使,置司襄陽。 糧。 |飛扶櫬還廬山,連表乞終喪,不許,累詔趣起,乃就軍。 張浚曰:「飛措 命往武昌調軍。 又命宣撫河東,節 :畫基· 大,令 居母 制

聞韶卽日啓行, |俊、||光世不足任,命||飛東下。 兵 、東下,欲使飛當其鋒,而已得退保。張浚謂:「岳飛一 九 (月,劉豫遣子麟、姪院分道寇淮西(亞)劉光世欲舍廬州,張俊欲棄盱眙,同奏召飛以 未至, 鱗敗。 飛自破曹威、平楊么,凡六年,皆盛 |飛奏至,帝語||趙鼎曰:「劉麟敗北不足喜, 動,則襄漢何所制?」力沮 一夏行師,致目疾,至是, 諸將知尊朝廷爲可 |其議。帝慮 甚;

列

傳

第一

百二十

四

岳

飛

召貴等還

還軍。 喜。」 途賜札,言:「敵兵已去准,卿不須進發,其或襄、鄧、陳、蔡有機可乘,從長措置。」 飛乃 時僞齊屯兵窺唐州,飛遣王貴、董先等攻破之,焚其營。 奏圖察以取中原,不許。 派

除宣撫使兼營田大使。從幸健康,以王德、酈瓊兵隸派,詔論德等曰「聽飛號令,如朕親 欲斃然。 今所乘者,日不過數升,而秣不擇粟,飲不擇泉,攬轡未安,踊踴疾驅,甫百里,力竭汗喘,殆 不息不汗, 然非精潔則不受。介而馳,初不甚疾,比行百里始奮迅,自午至酉,猶可二百里。 七年,入見,帝從容問曰:「卿得良馬否。」飛曰:「臣有二馬,日啖獨豆數斗,飲泉一斛, 此其寡取易盈,好逞易窮,駑鈍之材也。」帝稱善,曰:「卿今議論極進。」拜太尉,繼 若無事然。 此其受大而不苟取,力裕而不求逞,致遠之材也。 不幸相繼以死。 褫鞍甲而

後分兵濟、滑,經略兩河,如此則劉豫成擒,金人可滅,社稷長久之計,實在此舉。」帝答曰: 關,以號召五路叛將。叛將既還,遣王師前進,彼必棄汴而走河北,京畿、陝右可以盡復。 國攻中國,粘罕因得休兵觀釁。臣欲陛下假臣月日,便則提兵趨京、洛,據河陽、陝府、潼 「有臣如此,顧復何憂,進止之機,朕不中制。」又召至寢閣命之曰:「中興之事,一以委卿。」 飛數見帝,論恢復之略。又手疏言:「金人所以立劉豫於河南 [Ҟ],蓋欲荼毒中原,以中

命節制光州。

念耶? 宣撫判官,監其軍。 軍。」浚艴然曰:「浚固知非太尉不可。」飛曰:「都督以正問飛,不敢不盡其愚,豈以得兵爲 相下,一旦揠之在上,則必爭。呂尙書不習軍旅,恐不足服衆。」後曰:「張宣撫如何?」 飛 曰:「暴而寡謀,尤瓊所不服。」浚曰:「然則楊沂中爾。」飛曰:「沂中視德等爾(+),豈能馭此 |德淮西軍所服,浚欲以爲都統,而命||温此以督府參謀領之,如何?」||飛曰:「德與瓊素不 飛方圖大舉, 即日上章乞解兵柄,終喪服,以脹憲攝軍事,步歸,廬母墓側。 脧怒,奏以脹宗元爲 會秦檜主和,遂不以德、瓊兵隸飛。詔詣都督府與張浚議事,浚謂飛曰:

還言:「將和士銳,人懷忠孝,皆飛訓養所致。」帝大悅。 飛奏:「比者寢閣之命,咸謂聖斷已 來督戰。 効可必。」又奏:「<u>錢</u>塘僻在海隅,非用武地。 願陛下建都上游,用<u>漢光武故事,親率六軍,往</u> 堅,何至今尙未決?臣願提兵進討,順天道,因人心,以曲直爲老壯,以逆順爲強弱,萬全之 伺 .便擊瓊,期於破滅。」不許,詔駐師江州爲准、浙援。 帝累詔趣飛還職,飛力辭,詔幕屬造廬以死請,凡六日,飛趨朝待罪,帝慰遣之。宗元 庶將士知聖意所向,人人用命。」未報而酈瓊叛,浚始悔。飛復奏:「願進屯淮甸,

飛知劉豫結點罕,而兀朮惡劉豫,可以間而動。 列 傳 第 百二十 24 岳 會軍中得兀朮諜者,飛陽責之日:「汝

非吾 服。 其不備,長 納書,戒勿泄。 今多以會合寇江爲名,致四太子于淸河。汝所持書竟不至,何背我耶。」 諜冀緩死,即詭 乃作蠟書,言與劉豫同謀誅兀朮事,因謂諜曰:「吾今貸汝。」復遣至齊,問舉兵期,刲 軍中人張斌耶?吾向遣汝至齊,約誘至四太子,汝往不復來。吾繼遣人問,齊已許我, 驅以取中原。」不報 諜歸,以書示兀朮,兀朮大驚,馳白其主,遂廢豫。 飛奏:「宜乘廢豫之際,擣 股

乎 ? 」檜銜之。 秋,召赴 」會金遣使將歸河南地,飛言:「金人不可信,和好不可恃,相臣謀國不臧, 八年, 還軍鄂州。 行 在,命詣資善堂見皇太子。|飛退而喜曰:「社稷得人矣,中興基業,其在是 |王庶視師||江、淮,飛與||庶書:「今歲若不舉兵,當納節請閑。」||庶甚壯 恐貽後世

寄之也。」檜白帝止其行。 以輕騎從酒埽,實欲觀釁以伐謀。 開 不虞,而不可論 府儀同三司,飛力辭,謂:「今日之事,可危而不可安;可憂而不可賀;可訓兵飭士,謹備 九年,以復河南,大赦。 [功行賞,取笑敵人。」三詔不受,帝温言獎諭,乃受。 |飛表謝, 寓和議不便之意,有「唾手||燕雲,復讎報國」之語。 又奏「金人無事請和,此必有肘腋之虞,名以地歸我,實 會遣土優謁諸陵,飛請

十年,俭人攻洪、亳,劉錡告急,命飛馳援,飛遣張憲、姚政赴之。帝賜札曰:「設施之

常厥居,以示無忘復讎之意。」帝得奏,大褒其忠,授少保, 京、汝、鄭、願昌、陳、曹、光、蔡諸郡;又命梁興渡河,糾合忠義社,取河東、北州縣。 使,尋改河南、北諸路招討使。 東援劉錡,西援郭浩,自以其軍長驅以闞中原。 方,一以委卿,股不遙度。」飛乃遣王貴、牛阜、董先、楊再興、孟邦傑、李寶等,分布經略西 未幾,所遣諸將相繼奏捷。 將發,密奏言:「先正國本以安人心,然後不 大軍在[9] ,諸將分道出戰,飛 河南府路、陝西、河東北路招討 又遣兵

戰數十合,賊屍布野。 王、蓋天大王與韓常之兵逼郾城。 之,大懼, 韶飛審處自固。飛曰:「俭人伎窮矣。」乃日出挑戰, 且駡之。 兀朮怒, 合龍虎大 <u></u>
兀朮大懼,會龍虎大王議,以爲諸帥易與,獨飛不可當,欲誘致其師,併力一戰。中外聞 飛遣子雲領騎兵直貫其陣,戒之曰:「不勝,先斬汝!」鏖

自以輕騎駐郾城,兵勢甚銳。

將王剛以五十騎覘敵,遇之,奮斬其將。 行,官軍奮擊,遂大敗之。 兀朮大慟曰:「自海上起兵,皆以此勝,今已矣!」兀朮益兵來,部 .五千騎來,飛戒步卒以麻札刀入陣,勿仰視,第斫馬足。 拐子馬相連,一馬仆,二馬不能 初,兀朮有勁軍,皆重鎧,貫以韋索,三人爲聯,號「拐子馬」,官軍不能當。 是役也,以 飛時出視戰地,望見黃塵蔽天,自以四十騎突戰,

敗之。

奕、雲將背嵬戰于城 [城再捷,飛謂雲曰:「賊屢敗,必還攻潁昌,汝宜速援王貴。」旣而 西。 雲以 騎兵八百挺前決戰,步軍張左右翼繼之,殺兀朮婿夏金吾 兀术果至, 貴將遊

統

軍粘罕索字堇,兀朮遁去。

|朮對 廷。 金兵 | 壘而 興 (累敗,兀朮等皆令老少北去,正中興之機。 陣, (會太行忠義及)兩河豪傑等,累戰皆捷,中原大震。 遣聽將以背嵬騎五百奮擊, 大破之, 」派進軍 兀朮遁還汴京。 朱仙鎮,距汴京四 飛奏三興等過河, 飛檄陵臺令行視諸陵 + 人心願歸朝 五 里, 與兀

王鎭、統領崔慶、將官李覬崔虎華旺等皆率所部降, 金 行,兀朮欲簽軍以抗飛,河北無一人從者。乃嘆曰:「自我起北方以來,未有如今日之挫衂。」 父老百姓爭挽車牽牛,載糗糧以餽義軍,頂盆焚香迎候者,充滿道路。 盡 王師,李通、胡清、李寶、李興、張恩、孫琪等舉衆來歸。金 |帥鳥陵思謀素號桀黠,亦不能制其下,但諭之曰:「毋輕動, |磁、相、開德、澤、潞、晉、絳、汾、隰之境,皆期日興兵, 皆密受飛旗膀,自北方來降。。途將軍韓常欲以五萬衆內附。 先是,紹興五年,飛遣梁興等布德意,招結兩河豪傑,山砦章銓、孫謀等斂兵固堡,以待 以至禁衛龍虎大王下忔查千戶高勇之 與官 人動息,山川險要,一時皆得其實。 1軍會。 俟岳家軍來卽降。」金統制 派大喜,語其下曰:「直抵 其所揭 自燕以南,金號令不 旗以「岳」為號

黃龍府,與諸君痛飮爾!」

疾走 留五日以待其徙,從而南者如市,亟奏以漢上六郡閒田處之。 <u>沂中等歸,而後言飛孤軍不可久留,乞令班師。 一日奉十二金字牌,飛憤惋泣下,東向再拜</u> 人悉知之。相公去,我輩無噍類矣。」飛亦悲泣,取詔示之曰:「吾不得擅留。」哭聲震野,脈 曰:「十年之力,廢於一旦。」飛班師,民遮馬慟哭,訴曰:「我等戴香盆、運糧草以迎官軍, (渡河、豪傑向風、士卒用命、時不再來、機難輕失。」/檜知飛志銳不可回、乃先請張俊、楊 方指日渡河,而燴欲畫淮以北棄之,風臺臣請班師。 飛奏三金人銳氣沮喪,盡棄輜重,

兵柄,不許,自廬入覲,帝問之,飛拜謝而已。 者、岳少保且不免、況欲成功乎?」兀朮悟、遂留。 破吾十萬,京城日夜望其來,何謂可守?」 生曰:「自古未有權臣在內,而大將能立功於外 方 飛旣歸,所得州縣,旋復失之。 飛力請解

方在近, 而敝 趣飛應援,凡十七札。 十一年,諜報金分道渡淮,飛請合諸帥之兵破敵。 時飛方苦寒嗽,力疾而行。 未暇遠圖 一,欲乞親至蘄、黃, |飛策|金人舉國南來,巢穴必虚,若長驅京、洛以擣之,彼必奔命,可坐 又恐帝急於退敵,乃奏:「臣如擣虚,勢必得利,若以爲敵 以議攻卻。」帝得奏大喜,賜札曰:「卿苦寒疾,乃爲朕 兀朮、韓常與龍虎大王疾驅至廬,帝

列

傳第

百

+

. [2]

岳飛

小 行 心 或 恭 爾忘 謹 一、不專 身 誰 進退爲得體。 如 卿者?」師至廬州,金兵望風而遁。 兀朮破濠州 ,張俊駐軍黃連鎭,不敢進; 飛還兵于舒以俟命 楊沂中遇伏而 帝 又 賜 札 .;以 敗,帝 派

命飛救之。金人聞飛至,又遁。

叉用參 時 政 和 議 王次翁計, 旣 決,檜 患飛異己,乃密奏召三大將論功行賞。 俟之六七日。 旣至,授樞密副使,位參知政事上,飛固請還兵柄。 韓世忠、張俊已至, 飛獨後 檜

月,詔同俊往楚州措置邊防,總韓世忠軍還駐鎭江。

鋭 教飛 飛 俊疑飛漏言,還朝,反倡 分其背嵬軍,飛義 圍 了,帝授||飛兩鎭 淮西之役,俊以前途糧乏試 初,飛在 勿苦降意 一諸將 節, 中年最少,以 不肯,俊 金人攻淮 俊益 言飛逗遛不 恥。 大不悅。 西, 楊么平, 列校拔起,累立顯功, 飛、飛不爲 俊分地也,俊始不敢行,師卒無功。 進,以乏餉 及同行楚州城, 飛獻 傻、世忠樓船各一,兵械 止,帝賜札 爲辭。 俊欲修城為備 世忠、俊不能平,飛屈已下之,幕中輕 褒 至 視 諭 世忠軍, 有 日:「轉餉 畢備, 俊知世忠忤檜, 飛聞 飛日:「當戮力以 艱 世忠 命卽行,遂解廬州 阻, 大悅,俊反忌 卿不 ·復 欲 圖 顧。」 與飛

著下大理寺,將以扇搖誣世忠。 會世忠軍吏景著以與總領 飛馳書告以檜意,世忠見帝自明。 胡 紡言:「二 樞 密若分世 忠 軍 恐 至 俊於是大憾飛, 生 事。」紡 上 之朝, 遂倡 檜捕 復,豈可爲退保計?」慘變色。

飛議棄山陽,且密以飛報世忠事告膾,膾大怒。

主 | 楫交章彈論,大率謂:「今春|金人攻淮西,飛略至舒、蘄而不進,比與||俊按兵淮上,又欲棄山 必及禍,故力謀殺之。以諫議大夫万俟禼與飛有怨,風禼劾飛,又風中丞何鑄、侍御史羅汝 陽而不守。」飛累章請罷樞柄,尋還兩鎭節,充萬壽觀使、奉朝請。檜志未伸也,又論張俊令 書曰:「汝朝夕以和請,而岳飛方爲河北圖,必殺飛,始可和。」膾亦以飛不死,終梗和議,已 劫王貴、誘王俊誣告張憲謀還飛兵。 |善爲師」之語,惡其欺罔,恚曰:「君臣大倫,根於天性,大臣而忍面謾其主耶!」||兀朮遺||檜 初,檜逐趙鼎,飛每對客嘆息,又以恢復爲已任,不肯附和議。 讀檜奏,至「德無常師,

离。

离迹:

飛與憲書,

令虚申探報以動朝廷,

雲與憲書,

令措置使

飛還軍; 裂裳以背示鑄,有「盡忠報國」四大字,深入膚理。旣而閱實無左驗,鑄明其無辜。 |恰遣使捕飛父子證||張憲事,使者至,飛笑曰:「皇天后土,可表此心。」初命|何鑄鞠之,飛 且言其書已焚。 改命万俟

御札藏 獄。 歲暮,獄不成,膾手書小紙付獄,卽報飛死,時年三十九。 派 之以滅迹。 坐繫兩月,無可證者。 又逼孫革等證飛受詔逗遛, 或教离以臺章所指准西事爲言,禼喜白檜,簿錄飛家,取當時 命評事元龜年取行軍時日雜定之, 雲棄市。 籍家貲,徙家嶺南。 傅會其

列傳第一百二十四 岳飛

幕屬

于鵬等從坐者六人。

優請以百口保飛,禼亦劾之,竄死建州。 初 |飛在獄,大理寺丞李若樸何彥猷、大理卿薛仁輔並言飛無罪, 禼俱劾去。 布衣劉允升上書訟飛寃,下棘寺以死。 宗正 凡傅成其 ஹ|土

獄之將上也,韓世忠不平,詣檜詰其實, **檜曰:「飛子雲與張憲書雖不明,其事體莫須**

獄者,皆遷轉有差。

服者惟飛,至以父呼之,諸酋聞其死,酌酒相賀 有。」世忠曰:「『莫須有』三字,何以服天下?」 時洪皓在金國中,蠟書馳奏,以爲金人所畏

平矣。」 辭曰:「敵未滅,何以家爲?」或問天下何時太平,飛曰:「文臣不愛錢,武臣不惜死,天下太 受,)玠益敬服。少豪飲,帝戒之曰:「卿異時到河朔,乃可飮。」途絕不飮。帝初爲飛營第,飛 家無姬侍。吳玠素服飛,願與交驩,飾名姝遺之。|飛曰:「主上宵旰,豈大將安樂時?」卻不 飛至孝,母留河北,遣人求訪,迎歸。母有痼疾,藥餌必親。 母卒,水漿不入口者三日

麻 鹵 掠。 縷以 師 卒 每休舍,課將士注坡跳壕,皆重鎧習之。子雲嘗習注坡,馬躓,怒而鞭之。卒有取民 ·有疾, 束 **芻者**,立斬以徇。 躬爲 調 樂; 諸將遠戍,遣妻問勞其家,死事者哭之而育其孤,或以子婚其 卒夜宿,民開門願納,無敢入者。 軍號「凍死不拆屋,餓 死不

凡有頒犒,均給軍吏,秋毫不私

可。」調軍食,必蹙額曰:「東南民力,耗敝極矣。」<u>荆</u>湖平,募民營田,又爲屯田,歲省漕運之 敵爲之語曰:「撼山易,撼岳家軍難。」張俊嘗問用兵之術,曰:「仁、智、信、勇、嚴,闕一不 善以少擊衆。欲有所舉,盡召諸統制與謀,謀定而後戰,故有勝無敗。猝遇敵不動,故

帝手書曹操、諸葛亮、羊祜三事賜之。飛跋其後,獨指操爲姦賊而鄙之,尤檜所惡也。

既復,光世始至,飛奏先賞光世軍。好賢禮士,覽經史,雅歌投壺,恂恂如書生。 世忠以書來說,飛復日:「均爲國家,何分彼此?」世忠嘆服。襄陽之役,詔光世爲援,六郡 曰:「將士効力,飛何功之有。」然忠憤激烈,議論持正,不挫於人,卒以 張所 死,飛感舊恩,鞠其子宗本,奏以官。李寶自楚來歸,韓世忠留之,寶痛哭願歸飛, 此得禍。 每辭官,必

中丞汪澈宣撫荆、襄,故部曲合辭訟之,哭聲雷震。 猖獗,太學生程宏圖上書訟飛寃,詔飛家自便。 其後悉官之。 檜死,議復飛官。 建廟於鄂,號忠烈。 万俟离謂金方願和,一旦錄故將,疑天下心,不可。 及紹興末,金益 淳熙六年,謚武穆。嘉定四年,追封鄂王。 初,檜惡岳州同飛姓,改爲純州,至是仍舊。 孝宗韶復飛官,以禮改葬,賜錢百萬,求

五子:雲、雷、霖、震、霆。

雲,飛養子。 列 第一百二十 年十二,從張憲戰,多得其力,軍中呼曰「贏官人」。飛征伐,未嘗不與,數 . 四 F

帶御器械,飛又力辭之。終左武大夫、提舉醴泉觀。死年二十三。孝宗初,與飛同復元官,以 |浚廉得其實,曰:「后候避寵榮,廉則廉矣,未得爲公也。」奏乞推異數,飛力辭不受。 嘗以特 襄漢平,功在第一,飛不言。逾年,銓曹辯之,始遷武翼郎。 立. 類昌大戰,無慮十數,出入行陣,體被百餘創,甲裳爲赤。以功遷忠州防禦使, 旨遷三資,飛辭曰:「士卒冒矢石立奇功,始沾一級,男雲遽躐崇資,何以服衆?」累表不受。 功, 葬,贈安遠軍承宣使 飛輒隱之。每戰,以手握兩鐵椎,重八十斤,先諸軍登城。 楊么平,功亦第一,又不上。 脹 。攻下隨州,又攻破鄧州, 飛又辭;命

禮祔 十五御札辯驗彙次,凡出師應援之先後皆可考。 獄,檜令親黨王會搜其家,得御札數篋,束之左藏南庫,霖請於孝宗,還之。霖子珂,以准西 上之。震,朝奉大夫、提舉江南東路茶鹽公事 忠訓 鄭、閤門祗侯,贈武略郎。 霖,朝散大夫、敷文閣待制,贈太中大夫。初,飛下 霆,修武郎、閤門祗侯。 嘉定間,爲籲天辯誣集五卷、天定錄二卷

者,一代豈多見哉。 仙鎮,有詔班師,飛自爲表答詔,忠義之言,流出肺腑,眞有諸葛孔明之風,而卒死於秦檜之 論 日:西漢而下,若韓、彭、絳、灌之爲將,代不乏人,求其文武全器、仁智幷施如宋岳飛 史稱關雲長通春秋左氏學,然未嘗見其文章。飛北伐,軍至汴梁之朱

宋殺 手。 檀道 蓋飛與檜勢不兩立,使飛得志, 濟 道濟 下獄 嗔目曰:「自壞汝萬里長 則金讎 可復,宋恥 城 」高宗忍自棄其中原 可雪; **檜**得志, 則飛有死而 故忍殺飛, 昔劉 땎

校勘記

寃哉

嗚

呼冤哉!

- 賈進 和 岳珂金陀粹編卷四行實編年、章穎宋南渡十將傳卷二岳飛傳都作「賈進
- 王善 原作「黄善」,據本書卷二五高宗紀 、繫年要錄卷一九改;下文同。
- 2 近是。 |法 武功大夫 載 武 、義大夫至武 金陀粹編卷六行實編年作「武經大夫」。 功大夫相差六階, 黄佐由此功而驟升 按黄佐 大階 原是武義大夫, 可 疑, 似 以 遷 本書卷 一階作武 二六 九職官 經大 夫
- 余端 劉 詵 本書卷二八高宗紀、金陀粹編卷六行實編年都作「全琮 劉 詵
- 丢 渡十將 劉 豫遣子麟 傳卷二 姪犯 岳飛傳「猊」上都有「姪」字,據 分道 短淮 西 「姪」字 ,原脫。 補 按劉 犯 是劉 豫之姪,金陀粹編卷七行實編年、宋南
- (4) 沂 河南 中 視 德 原 作「江 等 爾 一南」,顯 德 原 誤; 作 事 金陀粹編卷 據金陀粹編卷七行實編年、宋南渡十將傳卷二 乞出師箚子作 河河 南 <u>.</u>; 據 改。

例

傳

第

百

+

70

校

勘

記

岳飛傳改。

(公)景著

宋史卷三百六十六

列傳第一百二十五

劉錡 吳玠 吳璘子獎

高俅薦,特授閤門祗侯。 管從仲武征討,牙門水斛滿,以箭射之,拔箭水注,隨以一矢窒之,人服其精。 高宗卽位,錄仲武後,錡得召見,奇之,特授閤門宣贊舍人,差知岷州,爲隴右都護。 劉錡字信叔,德順軍人,瀘川軍口節度使仲武第九子也。 美儀狀,善射,聲如洪鐘。 宣和間,用 與

略使兼 渭, 走德順軍 夏 【人戰屢勝,夏人兒啼,輒怖之曰:「劉都護來! 自將救環。 知渭州。 彦琪 未幾,金攻渭, 遁 後合五路師潰于富平, 歸渭,降金。 **崎留李彥琪捍洧,親率精銳還救渭,已無及,進退不可,乃 崎貶秩知縣州兼沿邊安撫** 慕洧以慶陽叛,攻環州。 」張浚宣撫陝西, 一見奇其才, 以爲涇原經 後命 鏑救之, 留別將守

列

傳

第

百

=

十五

劉節

使,主管侍 軍,扈從赴金陵。七年,帥合肥,八年,戍京口。 右、中軍與游奕,凡六軍,每軍千人,爲十二將。 解潛、王彥兩軍交門,俱罷,命嫡兼將之。嫡因請以前護副軍及馬軍, 以錡名聞。召還,除帶御器械,尋爲江東路副總管。六年,權提舉宿衞親軍。 紹 興三年復官、爲宣撫司統制(三)。 衞馬軍司 金人攻拔和尙原,乃分守陝、蜀之地。 前護副軍,卽彥八字軍也。 九年,擢果州團練使、龍神衞四廂都指揮 通爲前、後、左、 於是錡始能成 會使者自蜀 帝 駐平

金人果敗盟 方食、暴風 司三千人,皆攜其孥,將駐于汴,家留順昌。 十年,金人歸三京,充東京副留守,節制軍馬。所部八字軍纔三萬七千人, 拔坐帳,齒曰:「此賊兆也,主暴兵。」卽下令兼程而進,未至,五月,抵順昌三百里, 來侵。 **嫡自臨安派江絕淮**,凡二千二百里。 將發, 至渦 益殿

老稚輜重,相去尙遠,遣騎趣之,四鼓乃至。及旦得報,金騎已入陳行己。 鏑 與將佐舍舟陸行,先趨城中。 則能與君共守。」規曰:「有米數萬斛。」斷曰:「可矣。」時所部選鋒、遊奕兩軍及 庚寅,諜報金人入東京。 知府事陳規見鏑問計

銳爲殿,步騎遮老小順流還江南。」續曰:「吾本赴官留司,今東京雖失,幸全軍至此,有城可 錡 |與規議斂兵入城,爲守禦計,人心乃安。召諸將計事,皆曰:「|金兵不可敵也,請以精

字軍,今日當爲國家破賊立功。」 寘家寺中,積薪於門,戒守者曰:「脫有不利,卽焚吾家,毋辱敵手也。」 京,軍士扶攜老幼而來,今避而走,易耳。然欲棄父母妻子則不忍;欲與偕行,則敵翼而攻, 守,奈何棄之?吾意已決,敢言去者斬!」惟部將許淸號「夜叉」者奮曰:「太尉奉命副守] 斥堠,募土人爲間探。於是軍士皆奮,男子備戰守,婦人礪刀劍,爭呼躍曰:「平時人欺我八 何所逃之?不如相與努力一戰,於死中求生也。」議與斷合。 **鏑大喜,鑿舟沉之,示無去意。** 分命諸將守諸門,明

里。」錡夜遣千餘人擊之,連戰,殺虜頗衆。旣而三路都統葛王慶以兵三萬,與龍虎大王合 周 兵薄城。崎令開諸門,金人疑不敢近。 、圍順昌, 齒豫於城下設伏, 擒千戶阿黑等二人, 詰之,云:「韓將軍營白沙渦, 距城三十 (匝蔽之),城外有民居數千家,悉焚之。凡六日粗畢,而游騎已涉潁河至城下。 時守備一無可恃,屬於城上躬自督厲,取僞齊所造癡車,以輪轅埋城上; 又撤民戶扉, 壬寅,金

置使。 以步兵 城,或止中垣上。 初,崎傅城築羊馬垣,穴垣爲門。 、邀擊,溺河死者不可勝計,破其鐵騎數千。 **崎用破敵弓(四)翼以神臂、強弩,自城上或垣門射敵,無不中,敵稍卻。復** 至是,與淸等藏垣爲陣, 金人縱矢, 皆自垣端軼著于 特授鼎州觀察使、樞密副都承旨、沿淮制

以往, 終夜自戰,積屍盈野,退軍老婆灣。 犯金營。 百 人,夜斫其營。 或請銜枚,錡笑曰:「無以枚也。」命折竹爲嘂,如市井兒以爲戲者,人持一以爲號,直 順 自受圍已四日,

金兵益盛,乃移砦於東村,

距城二十里。 電所燭則皆奮擊,電止則匿不動,敵衆大亂。 是夕,天欲雨,電光四起,見辮髮者輒殲之。 百人者聞吹聲卽聚,金人益不能測, 。金兵退十五里。 飾遣驍將閻充募壯士 嫡復募百人

成誤國之罪。」衆皆感動思奮,曰:「惟太尉命。」 又來,吾軍一動,彼躡其後,則前功俱 年,正爲緩急之用,況已挫賊鋒,軍聲稍振,雖衆寡不侔,然有進無退。 朮 至,會諸將於城上問策,或謂今已屢捷,宜乘此勢,具舟全軍 兀朮在汴聞之,卽索靴上馬,過淮寧留一宿,治戰具,備糗糧,不七日至順昌。 廢。 使敵侵軼兩淮、震驚江、浙, ·而歸。 **嫡**曰:「朝廷養兵十五 則平生報國之志,反 且敵營甚邇,而兀朮

以兩國講好,使守康京圖逸樂耳。」」已而二人果遇敵被執,兀朮問之,對如前。 歸,以文書一卷繫于械,錡懼惑軍心,立焚之。 路騎中,汝遇敵則佯墜馬,爲敵所得。 「此城易破耳。」卽置鵝車砲具不用。 <u></u>
鏑募得曹成等二人,諭之曰:「遣汝作間,事捷重賞,第如我言,敵必不汝殺。 翌日,倚登城,望見二人遠來,縋而上之,乃敵械成等 敵帥問我何如人,則曰:『太平邊帥子,喜聲伎, 今置汝綽 朝廷

請與太子戰、且謂太子必不敢濟河,願獻浮橋五所,濟而大戰。」兀朮曰:「諾。」乃下令明日 兀朮至城下,責諸將喪師,衆皆曰:「南朝用兵,非昔之比,元帥臨城自見。」 斷遣耿訓以 兀朮怒曰:「劉錡何敢與我戰,以吾力破爾城,直用靴尖趯倒耳。」訓曰:「太尉非但

府治會食。 遲明,斷果爲五浮橋於潁河上,敵由之以濟。

陣以待,諸酋各居一部。衆請先擊韓將軍,斷曰:「擊韓雖退,兀朮精兵尚不可當,法當先擊 **崎遣人毒潁上流及草中,戒軍士雖渴死,** 毋得飲于河者; 飲,夷其族。 敵用長勝軍嚴

<u></u> 兀朮。 兀朮一動,則餘無能爲矣。」

數矢,戰不肯已,士殊死鬥,入其陣,刀斧亂下,敵大敗。是夕大雨,平地水深尺餘。 數百人出西門接戰。俄以數千人出南門,戒令勿喊,但以銳斧犯之。 馬饑渴,食水草者輒病,往往困乏。方晨氣淸涼,斷按兵不動,逮未、申間,敵力疲氣索,忽遣 時天大暑,敵遠來疲敝,嫡士氣閒暇,敵晝夜不解甲,嫡軍皆番休更食羊馬垣下。 統制官趙墫、韓直 追身中 敵人

兀朮拔營北去, 崎遣兵追之, 死者萬數。

卻。 牟,周匝綴長簷。三人爲伍,貫以韋索,每進一步,卽用拒馬擁之,人進一步,拒馬亦進,退不可 官軍以槍標去其兜牟,大斧斷其臂,碎其首。 方大戰時,兀朮被白袍,乘甲馬,以牙兵三千督戰,兵皆重鎧甲,號「鐵浮圖」; 敵又以鐵騎分左右翼,號「拐子馬」,皆 戴鐵兜

列

軍所 器 如平 IIF,積 時,敵披靡不敢近。 爲之,號「長勝軍」,專以攻堅,戰酣然後用之。自用兵以來,所向無前 如 戰自 Ш 辰至申,敵敗,遽以拒馬木障之,少休。城上鼓聲不絕,乃出飯羹,坐餉戰士 食已,撤拒馬木,深入斫敵,又大破之。棄屍斃馬,血肉枕藉,車旗 至是,亦爲崎

心,分路追討,則兀朮可禽,汴京可復;而王師亟還,自失機會,良可惜也。 列, 山谷,然營中讙譁, 摊衆還汴。 兵力擊之。 金人震恐喪魄,燕之重寶珍器,悉徙而北,意欲捐燕以南棄之。」故議者謂是時諸將協 持燭照夜, 是役也,嫡兵不盈二萬,出戰僅五千人。 杒 河北軍告官軍曰:「我輩元是左護軍,本無鬥志,所可殺者兩翼拐子馬爾。」故斷 捷聞,帝喜甚,授嫡武泰軍節度使、侍衞馬軍都虞侯、知順昌府、沿淮制置使。 兀朮平日恃以爲強者,什損七八,至陳州,數諸將之罪,韓常以下皆鞭之,乃自 其衆分番假寐馬上。斷以逸待勞, 終夜有聲。 金遣人近城竊聽,城中肅然, 金兵數十萬營西北,亙十五里, 以故輒勝。 無雞犬聲。 時洪皓在燕密奏:「順昌之 兀朮 每暮,鼓聲震 帳前 甲兵環

江,綺還太平州,岳飛以兵赴行在,出師之謀寢矣。 七月,命爲准北宣撫判官,副楊沂中,破敵兵於太康縣。 未幾,秦檜請令沂中還師鎭

十一年,兀朮復簽兩河兵,謀再舉。帝亦測知敵情,必不一挫遂已,乃詔大合兵于淮西以

待之。 關之險以遏其衝,引兵出淸溪,兩戰皆勝。 二丈,錡命 金人攻廬、和二州,錡自太平渡江,抵廬州,與張俊、楊沂中會。 ·曳薪疊橋,須臾而成,遣甲士數隊路橋臥槍而坐(E)。會)汀中、王德、田師中、張子 行至柘阜,與金 人夾石梁河 而敵已大入,錡據 面 陣。 河通巢湖,廣

敗; 諸軍鼓躁。 **崎與德等追之,又敗於東山。** 翌日,兀朮以鐵騎十萬分爲兩隅,夾道而陣。 金人以拐子馬兩翼而進。 敵望見曰"「此順昌旗幟也。」卽退走。 **德率衆鏖戰,沂中以萬兵各持長斧奮擊之,敵大**

蓋之軍俱至

俊,而歸以順昌之捷驟貴,諸將多嫉之。 <u></u>
<u></u>
<u>
衛駐和州,得旨,乃引兵渡江歸太平州。</u> 俊與沂中爲腹心,而與斷有隙,故柘阜之賞,斷軍 時並命三帥,不相節制。 諸軍進退多出於張

獨不與。

鼎足而營,或言敵兵已去,嫡又謂曰:「敵得城而遽退,必有謀也,宜嚴備之。」俊不從,命)近 浙中欲進戰,嫡謂俊曰:「本救濠,今濠已失,不如退師據險,徐爲後圖。」諸將曰:「善。」三帥 居數日,議班師,而濠州告急。 俊與沂中、崎趨黃連埠援之,距濠六十里,而南城已陷。

中與德將神勇步騎六萬人,直趨濠州,果遇伏敗還。 遲 明 | 鏑軍至 一藕塘,則沂中軍已入滁州 俊軍已入宣化。 嫡軍方食, 俊至,日:「敵兵已

列 傳 第 百二十 无 劉 錼 四〇五

29 . 〇 六

敵, 近, 子之助,吾提 宣撫 何 試 「觀之。」 適壓下皆曰:「兩 錡 兵不滿二萬,獨足取勝; 曰:「楊宣撫兵安在?」俊曰:「已失利還矣。」嫡語俊"「無 大 帥軍已渡, 況今得地 我軍 利,又有銳兵邪 何苦獨 戰? ? _ |錡 」遂設三覆以待之。 曰:「順昌 恐,錡 孤 請以 城,旁 步 卒禦 無 俄 赤 而

爾。」崎與俊

益 不

相 下。

慘至,曰:「諜者妄也,乃戚方殿後之軍 事 ? 爲宣撫,爾乃判官, **遂**罷宣撫 未嘗劫砦。」呼一人出對。 長揖上馬去。已,皆班師,俊、沂中還朝,每言岳飛不赴援,而嫡戰不力。 夕, 判官,命知荆南府。岳飛奏留崎掌兵,不許,詔以武泰之節提舉江州 俊軍士縱 何得 火劫崎軍,崎檎十六人,梟首槊上, 斬吾軍?」 嫡曰:「不知宣撫軍,但 崎正色曰:「崎爲國家將帥,有罪,宣撫當言于朝,豈得與卒伍 餘皆 斬 动砦賊 逸。 錡 見俊, 爾。」俊曰:「有卒歸,言 俊怒謂錡曰:「 太平 秦檜主其說 對 我

患。 荆 南 崎 統 府 始 鎭 命塞之,斥膏腴 江 荆 陵 南 縣 凡六年,軍民安之。魏良臣言錡名將,不當久閑。 東有黃潭,建炎間, 田 數千畝, 流民自占者幾千戶。 有司 決水入江以禦盜,由是夏秋漲溢,荆、衡間皆 詔崎遇大禮許奏文資,仍以其姪 乃命知潭州, 加太尉 復 被 水 帥

將 無在者, + 乃以錡爲江、淮、浙西制置使, 年, 金主亮調 軍 六十萬,自將 南來,彌望數十里,不斷 節制逐路軍馬。 八月, 飾引兵屯揚州 如銀壁,中外大震。 建大將旗 時宿

汜爲

江

東

路

兵

馬

副

都

監

| 绮自楚州退軍召伯鎭,金人攻眞州,錡引兵還揚州,帥劉澤以城 戶高景山攻揚州,斷遣員琦拒于皂角林, 鼓,軍容甚 一肅、觀者歎息。 以兵駐淸河口,金人以氊裹船載粮而來,錡使善沒者鑿沉其升。 陷圍力戰,林中伏發,大敗之,斬景山,俘數百人。 不可守,請 退軍 瓜洲 金萬

捷奏,賜金五百兩、銀七萬兩以犒師

|汜以千五百人塞瓜洲渡,又令李横以八千人固守。 自淸河口退師揚州,以舟渡眞、揚之民于江之南,留兵屯瓜洲 先是,金人議留精兵在淮東以禦錡,而以重兵入淮西。 韶鏑專防江, 齒遂還鎭江 大將王權不從崎節制,不戰而 鏑病,求解兵柄,留其姪

不從, 見錡 病劇,以李橫權嫡軍。 氾 十一月,金人攻瓜洲,汜以克敵弓射卻之。時知樞密院事葉義問督師江、淮,至鎭江 拜家廟而 行。 金人以重兵逼瓜洲,分兵東出江皐,逆趨瓜洲。 汜先退,横以孤軍不 義問督鎭江兵渡江,衆皆以爲不可,義問強之。 汜固請出戰, 錡 魏友、後軍統制王方死之,横、汜僅以身免。

方諸 軍 渡江 而北也 绮 ·使人持黃、白幟登高山望之,戒之曰:「賊至舉白幟,合戰舉二幟, 能當,亦卻

,失其都統制印,左軍統制

何必 勝 贊 則 問。 舉 軍 一黄 事 《幟。」是 **虞**允文 朝 延養兵三十年, 自采石 日二幟舉,踰時,斷日:「黃幟 來,督舟師與金人戰。 技不施,而大功乃出一儒生,我輩愧死矣!」 《人不舉,吾軍殆矣。」|錡憤懣,病益甚。 允文過鎮江, 謁鏑問疾。 **錡執允文手曰:「**疾 都督府

列

傳

第

百

= +

五

劉

鍋

吳

玠

衣諭飾徙居別試院,斷疑汜累己,常懼有後命。 召詣闕, 提舉萬壽觀。 錡假都亭驛居之。 金之聘使將至,留守湯思退除館以待, 三十二年閏二月,錡發怒,嘔血數升而卒。 遣黃

贈開府儀同三司,賜其家銀三百兩,帛三百匹。

後諡武穆。

書曰:「完顏亮死於此。」金主多忌,見而惡之,遂居龜山,人衆不可容,以致是變云。 將,問其下孰敢當者,皆隨姓名其答如響,至斷,莫有應者。。金主曰:「吾自當之。」然斷卒以 病不能成功。 錡 慷慨深毅,有儒將風。金主亮之南也,下令有敢言錡姓名者,罪不赦。 世傳輸通陰陽家行師所避就,衛在揚州,命盡焚城外居屋,用石灰盡白城壁, 枚舉南朝諸

將。 讀書能通大義。 從討方臘,破之,及擊河北羣盜,累功權涇原第十將。 吳玠字晉卿,德順 未冠,以良家子隸涇原 軍隴干人。父葬水洛城云、,因徙焉。 軍。 政和中, 夏人犯邊,以 靖康初,夏人攻懷德軍,玠以百 少沉毅有志節, 功補進義 副 知兵善騎射, 尉, 稍擢 隊

前鋒,進據清溪嶺,遊擊大破之,追奔三十里,金人始有憚意。 建炎二年春,金人渡河,出大慶關,略秦雍,謀趨 涇原。 都統制曲端守麻務鎮,命玠爲 權涇原路兵馬都監兼知懷德

餘騎追擊,斬首百四十級,擢第二副將。

軍 |人攻延安府,經略使||王庶召曲端進兵,端駐邠州不赴,且曰:「不如蕩其巢穴,攻其必

救。」端遂攻蒲城,命玠攻華州,拔之。

處置使張浚巡關陝,參議軍事劉子羽誦玠兄弟才勇,浚與玠語,大悅,卽授統制,弟璘掌帳 三年多,劇賊史斌寇漢中,不克, 引兵欲取長安, 曲端命玠擊斬之,遷忠州刺史。 宣 撫

前

親兵

禦使。 沒惜 分才,尋以為秦鳳副總管兼 店包,而 ハ整軍 几 年 復戰,玠軍 春, 擁兵邠州爲援。 升涇原路馬步軍副總管。 一敗績。 端退 金兵來攻,玠擊敗之,撒離喝懼而 屯涇原,勃玠違節度,降武 知鳳翔府。時兵火之餘,玠勞來安集,民賴以 金帥 婁宿與撒離喝長驅入關, 顯大夫,罷總管,復 泣,金軍 中目爲「啼哭郎君」。 端遣玠拒于彭原 生。 知懷德 轉忠州防 軍 金 張

平行,進薄玠營。 將 制 又會諸將議戰,玠曰:「兵以利 曰:「我衆彼寡,又前阻葦澤,敵有騎 九月,浚合五 一路兵, 軍遂大潰,五路皆陷,巴蜀大震。 欲與金人決戰,)於言宜各守要害, 須其弊而 動,今地 一勢不利,未見其 不得施,何用他徙? 可。 」已而敵驟至,輿柴囊土,藉掉 宜擇高阜據之,使不可勝。」諸 乘之。 及次富平,都統

玠收散卒保散關東和尚原,積粟繕兵,列栅爲死守計。 或謂玠宜退屯漢中, 扼蜀口以

列

傳第

百二十

五

在 入 原 Į, 上, 鳳翔民感其遺惠, | 野日]:「我保 此, 敵決不敢越我而進,堅壁臨之,彼懼吾躡其後,是所以保蜀 相 連 坐 與夜 民冒禁如故,數年然後 「輸芻粟助之。 **玠償以銀帛** 止 ,民益喜,輸者益多。 金人怒, 也。 ごり

伏兵渭

河

邀殺之,且令保伍

得合。 先期 步 戦 至 紹 大 陣 興 敗 元年,金將沒立自 北山 `移砦黃牛,會大風雨雹,遂 京索戦 了,玠命諸將堅陣待之, 鳳翔 別將烏魯折合自階、成 道去。 更戰迭休。 沒立方攻箭筈關,玠復遣將擊退之,兩軍終不 Ш 出 谷 路狹 散關, (多石) 約日會和尙原。 馬不能行, 金 烏魯折 、舍馬

察使。 者, **玠知之,召諸將歃** 始 居母 金人之入也,玠與璘以散卒數千駐 喪,起復,兼陝西 血 盟 , 勉以 諸 路 都 忠 統 義 制 將 土皆感泣 原 Ĩ, 朝問 ,願爲用。 隔絕,人無固 張浚錄其功, 志。 有謀劫玠兄弟北 承 制 拜 明 州

觀

選 勁弓強弩,分番 造浮梁跨渭, 僅以身免。 度其困 金 人自 1起海 且走,設伏於神坌以待。 張浚承制以玠爲鎭西軍節度使,璘爲涇原路馬步軍副總管。 自寶雞結連珠營, 角,狃常勝,及 [迭射,號「駐隊 與則 [矢」,連發不絕,繁 壘石 戰 金兵至,伏發, 輒北 為城 , , 憤 夾澗 甚, 如 興官 謀 衆 雨 必 大亂 注 軍 取 珍。 拒 敵 縱兵 稍卻, 婁宿 + 月, 夜擊,大敗之。 死, 則以奇兵旁 攻和 兀朮 尙 **詹諸道** 原 兀术既敗,遂 了擊,絕 兀朮中流 阶 命 兵 其 千 諸 將 糧

首 河東歸 ||燕山; 復以撒離喝爲陝西經略使,屯鳳翔,與玠相持。

復令游 扼其衝,不得逞,將出奇取之。 年,命玠 騎出熙河以綴關師古,撒離喝自商於直擣上津。 兼宣撫處置使 司 時所在河池、金人用叛將李彥琪 都統制, 節制興、文、龍三州。 三年正 金 月,取金州 、駐秦州 久窺蜀, 睨仙 以璘駐兵和尚原 人關以 戸, 長驅趨 綴)外;

洋、漢,興元守臣劉子羽急命田晟守饒 風關,以驛書招玠入援

先者既 敢死 高 壑 I 以 闘 |地曰:「爾來何速 士, 玠自河池日夜馳三百里,以黃柑遺敵曰:「大軍遠來, 饒風。 死, 人千銀,得士五千,將夾攻。 後者代攻。 諸軍 耶 不支,遂潰,玠退保西縣。 ! 」遂大戰饒風嶺。 會所小校有得罪奔金者,導以祖溪間路,出關背,乘 金人被重鎧,登山仰攻。 [摧壓,如是者六晝夜,死者山積而敵不退。 敵入興元, 劉子羽退保三泉,築潭毒山以自 聊用 止 渴。」 ` 一人先登則二人擁後; 撒離喝大驚, 以杖

金 人始謀,本謂 未幾, 金 人北歸,) 介 在 西 邊,故道險東來,不虞 玠急遣兵邀于武休關,掩擊其後軍, 雖入三郡,而失不償得。 墮澗死者以千計,盡棄輜重去。 進玠檢校少

保,充利州路、階成鳳州制置使。

列

傳

第

百

_

+

五

吳

玠

匹 年二月,敵復大入,攻仙人關。 先是, 磷在和尚原, 餉饋不繼; **玠又謂其地去蜀遠**

萬 命 . 騎 棄之,經營仙 入侵,自鐵山 . 鑿崖開道,循嶺東下。 人關右殺金平, 創築 一壘, **) 所以萬人當其衝。磷率輕兵由七方關倍道而至,** 移原兵守之。 至是,兀朮 、撒離喝及劉夔率十 興

七晝夜,始得與玠合。

介其間 金兵轉戰 地 ,謂 敵 首 諸將曰:「死則死此,退者斬!」金分軍爲二,兀朮陣于東,韓常陣于 左縈右 攻玠營,玠擊走之。 繞,隨機而發。 又以雲梯攻壘壁,楊政以撞竿碎其梯,以長矛刺之。 戰久,璘軍 ·少憊,急屯第二隘。 西。 | | | | | |

相連 也, 遁。 兵。 樓,以酒 吾得之矣。」 金自元 統 魚魚 玠遣統制官張彦 領王喜、王武 缶撲滅之。 貫而 (帥以下,皆攜 翌 上。 日 璘以 命攻西北樓, **阶急遣** · 率銳士,分紫、白旗入金營,金陣 劫横 一、駐隊矢迭射,矢下如雨, **学來**。 山 統領 劉夔乃豫之腹心 田 姚仲登樓酣戰,樓傾,以帛爲 晟以長刀大斧左右擊,明炬 河池 扼歸 死者層 路, 本謂蜀可圖 亂。 又敗之。 積, 敵踐而 奮擊 四山, 金生兵踵至,人被重鎧,鐵鈎 ,射韓常, , 繩, 以郭震戰不力,斬之。 既不得逞, 登。 挽之復正 震鼓動 撒離喝駐馬 中左目, 度阶終不 地。 金 明日 璘率鋭卒 金人始宵 人用火攻 四 |視日 可犯, 是役 大出

奉寧保定軍節度使,雖自防禦使升定國軍承宣使,楊政以下遷秩有差。 捷 聞 ,授玠川、陝宣 撫副使。 四月、復鳳、秦、隴三州。 七月,錄 仙 人 關 六年,兼營田大使, 功, 拜 檢校 少师、 則

還

據

鳳翔

,授甲士田,爲

久留計,自是不妄動。

易保平、靜難節。 七年,遣裨將馬希仲攻熙州,敗績,又失鞏州,玠斬之。

札以賜,至,則玠病已甚,扶掖聽命。帝聞而憂之,命守臣就蜀求善醫,且飭國工馳視,未 以玠功高,授特進、開府儀同三司,遷四川宣撫使,陝西階、成等州皆聽節制。 至,玠卒於仙人關,年四十七。贈少師,賜錢三十萬。 調戍兵,命梁、洋守將治褒城廢堰,民知灌溉可恃,願歸業者數萬家。 **) 新興敵對壘且十年,常苦遠餉勞民,屢汰冗員,節浮費,益治** 屯田、歲收至十萬斛。 九年, 金人請和。 遣內侍奉親 叉

求小近利,故能保必勝。御下嚴而有恩,虛心詢受,雖身爲大將,卒伍至下者得以情達,故 士樂爲之死。 **)** 断善讀史,凡往事可師者,錄寘座右,積久,牆牗皆格言也。 用兵本孫、吳,務遠略,不 選用將佐,視勞能爲高下先後,不以親故、權貴撓之。

選據形 中國 人輒分。 士卒,不及金人之堅耐。 ,便,出銳卒更迭撓之,與之爲無窮,使不得休暇,以沮其堅忍之勢。 蓋自昔用兵所未嘗見,與之角逐滋久,乃得其情。 至金人,則更進迭退,忍耐堅久,令酷而下必死,每戰非累日不決,勝不遽追,敗不 吾常以長技洞重甲於數百步外,則其衝突固不能 蓋金人弓矢,不若中國之勁利; 至決機於兩陣之 相及。 於是

間,則隣有不能言者。」

作廟于仙人關,號思烈。 金 晚節 人一意睨蜀,東南之勢亦棘,微玠身當其衝, 頗多嗜欲,使人漁色於成都,喜餌丹石, 淳熙中,追封涪王。 子五人"拱、扶、撝、擴、揔。 拱亦握兵云 故得咯血疾以死。 無蜀 久矣。故西人至今思之。諡武安, 方富平之敗, 秦鳳皆

全伏發, 練使。 駐 之戰,斷沒立 師 河池 吳璘字唐卿,玠弟也。 ,璘專守原。 金兵大敗, 與烏 魯折合兵,使不得合, 兀朮中流矢遁。 及兀术大入, 少好騎射,從所攻戰,積功至閤門宣贊舍人。 玠兄弟以死守之。 張浚承制以隣爲涇原路馬步軍副都總管, 金 人遁, 璘功居多,超遷統制和 敵陣分合三十餘,璘隨機 尚原軍馬, 紹興元年,箭筈關 而 升康州 應,至 於是) 團 神

之,急修第二隘 階路入援。 命璘棄原別營仙 磷奮曰:「兵方交而退,是不戰而走也、吾度此敵去不久矣,諸君第忍之。」 震鼓易幟,血 三年,遷榮州防禦使、知秦州,節制階、文。 先以 \ 書抵 人關,以防金人深入。 璘冒圍轉戰, 跡, 謂殺 金平地闊遠, 會於仙 人關 四年, 前陣散漫, 兀朮、 敵果極力攻第二隘, 是歲,所敗於祖溪嶺,時隣獨 撒離喝果以大兵十萬至 須後 陣阻隘, 諸將: 然後 有請 可以 關下, 別擇形勝以守 在和 必 勝。 尚原, 璘自武、 が 從 玠

軍,璘爲左 露 布獻 護軍統制。 捷,遷定國軍承宣使、熙河蘭廓路經略安撫使、知熙州。 九年,升都統制(云),尋除秦鳳路經略安撫使、知秦州。」玠卒,授璘龍 六年,新置行營兩護

神衞四廂

都指揮使。

我移 屯,控其要害,遲其情見力疲,漸圖進據。」炤從之, 延,楊政帥 時金 軍陝右, 人廢劉 |熙河,璘帥秦鳳,欲盡移川口諸軍於陝西。 蜀口空虚, 豫, 歸河南、陝西地。 敵若自南山要我陝右軍, 樓炤使陝,以便宜欲命三帥分陝而守, 命隣與楊政兩軍屯內地保蜀, 直擣蜀口,我不戰自屈矣。 璘曰:「金人反覆難信,懼有 當 以郭浩帥鄉 郭浩 且依 他變。 山爲 軍

屯延安以守陝。

奏謂:「當外固 存亡之秋也。 如是,萬一果然,則我當爲伐謀之備,仙人關未宜遽廢,魚關倉亦宜積糧。」於是璘僅以牙校 日:『要入蜀不難,棄陝西不顧,三五歲南兵必來主之,道路吾已熟知,一發取蜀 橋 爾,騎兵疾馳,不五 旣 而胡世將以 一歡和, **隣家族固** 四川制置權宣撫 內修守禦。 日至 不足恤, 川 口。 今日分兵,當使陝、 如 國 吾軍 司事,至河池, 事何! -遠在 」時朝廷恃和忘戰,欲廢仙 一、緩急 璘見之曰"「金大兵屯河中府,止隔大慶 蜀相接,近兵宮賀仔課 不可追 集,關隘 人關。 不葺,糧運斷絕,此 知撒 必矣。」 於是世將抗 離 喝密謀 敵

列

隊 赴秦州 • 留大軍守階、成山砦,戒諸將毋得撤備。 世將尋眞除宣撫,置 泂

命田 口 帥 敵後,遠近震恐。 斬 田 晟 晟以三千人 批 與楊政 |璘請 金人敗盟,詔璘節制陝西諸路軍馬。 以百 同至,參謀官孫渥謂河池不可守,欲退保仙人原,璘厲聲折之曰:「懦語沮 、迎敵。 時楊政在鞏,郭浩在鄜延,惟璘隨世將在河池。 口保破敵。」世將壯之,指所居帳曰:「世將誓死於此!」乃遣渥之涇原 | 隣又遣姚仲拒于石壁砦, 敗之。 撒離喝渡河入長安,趨 韶同節制陝西諸路軍 世將急召諸將議,惟 鳳翔 陝右諸 軍 涇原 隔

姚仲 扶風 之,復秦州及陝右 隣以 力戰破之,授鎮 ,復攻拔之,獲三將及女眞百十有七人。 書遺金 將約戰,金鶴眼 那 西軍節度使,升侍衞步 郎君以三千騎衝璘軍,璘使李師顏以 軍 撒離 ·都虞侯。 喝怒甚, 十一年,與金統軍胡盞戰剡家灣,敗 自戦 百通坊,列陣二十里。 、驍騎撃走之。 鶻眼 璘遣

諸

猶竊議曰:「吾軍其殲於此乎?」璘曰:「此古束伍令也, 法 傷 百步內, 則 每戰,以長槍居前, 更代之。 杒, 則神 胡盞與習 臂先發; 遇更代 示 祀 則以鼓爲 心合軍五 坐不 七十 得起 ·步,強弓倂發; 萬 節。 屯劉家圈 次最 騎,兩 強 翼以 一,)) ,)) ,)) ,) 豆, 次陣 次強 蔽 如之。 於前 弩, 凡 跪膝以俟; 軍法有之,諸君不識爾 世將 陣 陣,以 成 問策安出, 而 騎 拒 退, 馬 次神 爲 謂之『疊 限 臂 璘曰:「有新 弓。 鐵 鈎 陣 約 相 得車戰餘 賊 連 立疊陣 誻 相 將 俟 搏 其

意,無出於此,戰士心定則能持滿,敵雖銳,不能當也。」及與二會遇,遂用之。

城, |璘以疊陣法更休迭戰,輕裘駐馬亟麾之,士殊死門, 金人大敗。 降者萬人,胡盞走保臘家 問所以攻,姚仲曰:「戰于山上則勝,山下則敗。」隣以爲然,乃告敵請戰,敵笑之。 駭愕曰:「吾事敗矣。」 習不祝善謀,胡盞善戰,二酋異議。 | 隣圍而攻之。城垂破,朝廷以驛書詔隣班師,世將浩敷而已。明年,竟割和尙原以與 撤戍割地,皆秦檜主之也。 **酋老於兵,據險自固,前臨峻嶺,後控臘家城,** 謂我必不敢輕犯。 | 隣先以兵挑之,胡盞果出鏖戰。 。 先 一 日, 璘夜半遣 璘會諸將

命之。 都統制 利州 都 和 議方 統制 路 十二年, 安撫 爲 職 堅,而磷治 事 東西路,以璘爲 使如故。二十一年,以守邊安靜,拜少保 (10)。二十六年,領興州駐 入覲,拜檢校少師、階成岷鳳四州經略使,賜漢中田五十頃。十四年,朝議析 改判興州。 軍經武,常如敵至。 西路安撫使,治興州,階、成、西和、鳳、文、龍、興七州(も)隸焉。 渡江以來未有使相爲都統制者, 十七年,徙奉國 軍節度使,改行營右護軍爲御前諸 時隣已爲開府儀同三司 箚 御前 故改 諸 時

三十一年,金主亮叛盟,拜四川宣撫使。 列 第一 百二十 五 吳 璘 秋,亮渡淮,遣合喜爲西元帥,以兵扼大散關,

遊騎 河 使 東 王 招 攻黃牛 剛 討 中 使。 來 的拱歸蜀,以助西師。 會璘計事 隣以病還興州,總領王之望馳書告執政,謂璘多病,猝有緩急 璘 卽 ,璘尋移檄契丹、西夏及 肩 興 上殺金平,駐軍青野原,益調內郡兵分道 凡五書未報。 山 東、 璘已力疾,復上仙人關 河北,聲金 人罪以致討。 而 進, 授以 ,蜀勢必危。 未 幾,兼 方 陜 制置 西 請

移

河池 知夔州 呼「相公來」, 風 傳 復 雷 呼 失, 百 騎嘗敵。 「某將戰 三十二年,璘遣姚仲取澤,王彥屯商、號、 竟無成功。 李師顏代之,遣子挺節制軍馬。 金 人拔營去,凡八日而克。 不力」, 觀望客嗟,矢不忍發。 敵一鳴鼓,銳士空壓躍出突璘軍。 金人據大散關六十餘日, 人益 **濫奮搏**, 敵大 '敗,遁入 璘按行 **隣**入城, 挺與敵戰於瓦亭,敗之。隣自將至城下,守陴者 ,相持不能破。 ·諸屯, 人壁。 陝、 市不改肆, **璘軍得先治地,無不一當十。** 黎明, 華,惠逢取熙河。 預治黃河戰地(11),斬不用命者, 師再出, 仲舍鞏攻德順已踰四旬, 父老擁馬迎拜不絕。 敵堅壁不動。 或久攻不下,或旣 至暮,璘 會天大 璘尋還 | | | | 先以

急 北嶺,令諸 增 几 兵至 月, 七萬。 軍持滿引行 原州 受圍, 五 月, 隣命姚仲以德順之兵往 仲與敵戰 以 盧士敏兵爲前陣,所統軍六千爲四陣, 于原州 之北嶺 接, 仲 璘自趨 敗績 鳳翔視師。 初 仲自德順 姚志兵爲後 諸將雖力戰, 至原 拒。 由 九 隨 龍 敵 地 泉 攻 便

始,璘出 利 原,璘亦貽仲書,謂原圍未卽解,且還德順。 以列,與敵鏖戰,開合數十。 師,汪之望嘗言:「此行士卒銳氣,不及前時,仲年來數奇,不可委以要地。」及仲至 會輜重隊隨陣亂行,敵兵衝之,軍遂大潰,失將三十餘人。 書未達而仲敗, 隣亦無功還。 尋奪仲兵,欲斬

之,或勸而

止,械緊河池獄

侵岷 殿,許朝德壽宮。 遂 韶 璘 退 師 。 下, 鎭 使相踵,又命皇子入謁。 敵極力爭之,殺傷太半,終不能克。 上親札報可。 兩宮宴餞甚寵。 州 沈介爲四川安撫、制置使,與璘議不協,兵部侍郎胡銓上書,語頗及璘。璘抗章請朝 而完顏悉烈等兵十餘萬果來攻。萬戶豁豁復領精兵自鳳翔繼至。 |孝宗受禪,賜璘札,命兼陝西、河東路宣撫招討使。 了隣提兵至祁山,金人聞之,退師,遣使來告曰:「兩國已講和矣。」會詔至,俱解去。 未半道,請罷宣撫使及致仕,皆不允。 敵乘其後, 隣將士死亡者甚衆, 三路復爲敵有。 高宗見璘,歎曰:「肸與卿,老君臣也,可數入見。」」璘頓首謝。兩宮存勞之 璘入辭德壽宮, 泣下。 拜太傅,封新安郡王。 時議者以爲兵宿於外,去川口遠,恐敵襲之,欲棄三路。 高宗亦爲之悵然,解所佩刀賜之,曰:「異時思 越數日,詔仍領宣撫使,改判興元府。 乾道元年詣闕,遣中使勞問,召對便 | 隣策金人必再爭德順, 亟馳赴城 拜少傅。 隆興二年多,金人 **璘築堡東山以守**, 及還

股, 視此可矣。」

信王。 璘 至漢中,修復褒城古堰,溉田數千頃,民甚便之。三年,卒,年六十六。贈太師,追封 上震悼,輟視朝兩日,賻贈加等。 高宗復賜銀千兩。初,璘病篤,呼幕客草遺表,命

直書其事曰:「願陛下毋棄四川,毋輕出兵。」不及家事,人稱其忠。

名亞於)珍。 敗而二勝也。」 璘 剛勇,喜大節,略苛細,讀史曉大義。代兄爲將,守蜀餘二十年,隱然爲方面之重,威 高宗嘗問勝敵之術,隣曰:「弱者出戰,強者繼之。」高宗曰:「此孫臏三駟之法,

知兵者取焉 軍爲陣心、左右翼,以馬軍爲左右肋,拒馬布兩肋之間,至帖撥增損之不同,則係乎臨機。」 戰制其堅忍,制其重甲,則勁弓強弩,制其弓矢,則以遠尅近,以強制弱。布陣之法,則以步 兵,曰堅忍,曰重甲,曰弓矢。吾集蕃漢所長,兼收而幷用之,以分隊制其騎兵;以番休迭 嘗著兵法二篇,大略謂:「金人有四長,我有四短,當反我之短,制彼之長。 四 長日騎

竊憂之。」剛中不以爲然,斷果無功,以憂憤卒。 非嘗試,難知其才。以小善進之,則僥倖者獲志,而邊人宿將之心怠矣。」子挺。 王剛中嘗談劉錡之美,璘曰:「信叔有雅量、無英概,天下雷同譽之,恐不能當逆亮,璘 璘選諸將率以功。有薦才者,璘曰:「兵官

守之宜,挺占對稱旨,超授右武郎、浙西都監兼御前祗侯,賜金帶。 挺字忡烈,以門功補官。從隣爲中鄓將,部西兵詣行在。 高宗問西邊形勢、兵力與戰 專差利路**鈴**轄, 改利州

東路

前

軍同統制,繼改西路。

制 經略、安撫使。 **遂驚**敗。 亦掎角爲援,轉戰竟日。 >彦出兵殊死戰,挺率背嵬騎盡易黃旗繞出敵後,憑高突之。敵譁曰:「黃旗兒至矣!」 王師旣復秦州, 紹 興三十一年, 挺不自爲功,狀彥第一,士頗多之。」璘亦引嫌,倂匿其功。 金將合喜字堇介叛將張中彥以兵來爭,挺破其治平砦。 金人渝盟,璘以宣撫使總三路兵禦之,挺願自力軍前,璘以爲中軍統 挺令前軍統制梅彥麾衆直據城門,衆弗喻,彥亦懼力不敵。 擢榮州刺史,尋拜熙河 已而 南市 挺督 城 賊

門,挺遣別將盡奪其馬,金衆遂潰。 精兵數萬自鳳翔來會。 明年,挺被傲與都統制姚仲率東西路兵攻德順。 仲駐軍六盤,挺獨趨瓦亭, 挺勒兵追之,禽千戶耶律九斤、孛堇等百三十七人。 `身冒矢石,衆從之。」金人捨騎操短兵奮 金左都監空平凉之衆以援合喜,又遣

將咸曰:「西北坡陀地易攻,若分兵各當一面,宜得利。」挺曰:「西北雖卑而 挺誘致之,至所治戰地,盛兵蹙之,敵不能支,一夕遁去。鞏州久不下,挺以選鋒至城下,諸 土堅,東南幷河

金人果大至,

金

人懲前衄,悉兵趨德順。

列

僔

盡 多沙礫善圮。 夜半 ·,其將雷 且兵 千戶 分則 約 少,以少當堅城,可得而下乎?」乃命悉衆擊東 降,黎明,城破。 以 功授 團練使, 又 以 瓦亭功授郢州 南 陬。不二 防禦使 日 ,樓櫓俱

得前 兵 守。 十 -餘萬 孝宗 敵 會朝 不 拜 武 能 . 列 即位,加璘 栅 昌軍承宣使, 爭,乃益修攻具,爲大車匿戰 廷主議和,詔 以拒。 兼陝西、 尋 西師解嚴,父子遂旋 加龍神衛四廂 河東路招計宣 騎數千睨 士其中,將塡 東 都指揮使、熙河路經略安撫使中軍統制,時年二 Ш 撫 使。 璘 軍 命挺領 隍 騎 而 必再爭德順 迎擊, 進。 挺命 卻之。 掄 ",至 自 大木植 遂據東山 河池 中道 金 車 人 築堡以 果合

將 爹 | 隣卒, 起復金州 寝。 軍。 乾道 朝廷方議置神武中軍五千人以屬御前,命挺爲都統制。 拜主管侍衞步軍司公事 元年,升本軍都統制。 一都統、金房開達安撫使,改利州東路總管。 三年,以父命入奏, 拜侍衞親步軍指揮使,節制興州 挺力求終喪,服除,召爲左衞上 挺力陳不當輕變祖宗法,事 軍馬。

度使。 西 互 南 又不敢,我以全力乘其弊,蔑不濟者。 挺 自以馬給之,所得多下駟。 初,軍 每 燕見從容,嘗論兩淮形勢曠漫,備多力分, 中自置互市於岩昌,以來羌馬,西路騎兵遂雄天下。 挺至,首陳利害以聞,乞歲市五百匹,詔許七百 帝頗嘉納。 宜擇勝地扼以重兵,敵仰攻則不克, 淳熙元年,改 自 張松 興州 典権牧,奏絕軍 都統,拜定江軍節

於是始井井然。 摧鋒、選鋒、策選鋒、遊奕; 始,武興所部就餉諸郡,漫不相屬。 四年,入覲,除知興州、利州西路安撫使。 武興以西至縣爲左、右、後三軍 挺奏以十軍爲名、自北邊至武興列五軍,日 ,而駐武興者前軍、中軍 密修皂郊堡,增二堡,繕戎器,儲 踏白、 營部

地 活 相 · 殆數千萬。 爲 **添乘除**。 年多,特加檢校少保。 歲久屯他徙,廩賜不易舊,至有同部伍而廩相倍蓰者,挺哀爲中制上之。 **蜀自諸軍宿師,凡廩賜,官率糴三之一,視價高下給之,名曰「折估」,隨所屯** 成州、西和歲大侵,挺力爲振恤,諭總賦者分軍儲以佐之,全

于兩庫, 敵終不覺。

熙二三二年,水暴發入城。 同 儲之策,由 創 爲之。 光宗 御軍雖嚴, 即位,御筆獎勞。 .是糧糗不乏。 而能時其緩急, 四年春,以疾乞致仕,韶加太尉。卒,年五十六。贈少師、開府儀 挺旣振被水者,復增築長隄,民賴以安。 而西和、階、成、鳳、文、龍六州器械弗繕,挺節冗費,屯工徒,悉 士以不困。 郡東北有二谷水, 詔問備邊急務,即建增 挺作二隄以捍之。 紹

宗亦曰:「挺是朕千百人中選者。」歲時問勞不絕, 璘 故部 挺 少 曲 拜 ,起勳閥,弗居其貴,禮賢下士,雖遇小官賤吏,不敢怠忽。 於庭下,輒降答之,卽失律,誅治無少貸。 被遇尤深厚。 隣嘗對孝宗言,諸子 光宗賜內府珍奇, 拊循將士, 人人有 中惟挺可任。 恩。

列

傳

第

百

= +

五

吳

璘

校

勘記

子五人,曦,其次也。曦仕至太尉、昭信軍節度使,以叛誅,見別傳。

于常勝,驕心侈歟!抑三世爲將,釀成逆曦之變,覆其宗祀,蓋有由焉。 全圖,以功名終,盛哉!挺累從征討,功效甚著,有父風矣。然跡晚頗荒淫,隣多喪敗,豈狃 或謂其英概不足,雅量有餘,豈其然乎。 吳玠與弟隣智勇忠實,戮力協心,據險抗敵,卒保 論曰:劉錡神機武略,出奇制勝, 順昌之捷,威震敵國,雖韓信泜上之軍,無以過焉。

校勘記

(1) 瀘川軍 武傳作「瀘川軍」,據改。 「川」原作「州」。 按瀘州的軍額是「瀘川」,見本書卷八九地理志;本書卷三五〇

 Ξ 宣撫 撫 司、都督府、樞密院皆置。」章穎宋南渡十將傳卷一劉錡傳作「宣撫 司統制 「司」原作「使」。 按本書卷一六七職官志「諸軍都統制」條說:「神武五軍及川陝宣 浜司」,據1 改。

金騎已入陳 不得和「陣」字通、據改。 「陳」原作「陣」。 按此處指的是陳州, 見繁年要錄卷一三五、北盟會編卷二〇一,

- 破敵弓 宋南渡十將傳卷一劉錡傳、北盟會編卷二〇一作「破胡弓」。
- 遣甲士 隊路橋臥槍而坐 「路」、繋年要錄卷一三九、北盟會編卷二〇五作「過」。
- (子) 至 水洛城 數 原作「永洛城」,據琬琰集上編卷一二明庭傑吳武安玠功蹟記、本書卷八七地理志改。
- 都作「彭店原」,琬琰集吳武安玠功蹟記作「彭店」。

本書卷二六亮宗紀作「彭原」,

北盟會編卷一

九五載王編吳玠墓誌銘及同書卷一三七

(中)

彭原店

- (云) 六年新置行營兩護軍璘爲左護軍統制九年升都統制 也說:「十七年,.....改行營右護軍爲御前諸軍都統制。」疑此處「左」當作「右」。 「六年,創軍名行營右護軍,爲行營右護軍統制軍馬。 '……九年春,改行營右護軍都統制。」下文 琬琰集上編卷一四王曮吳 武順王碑作:
- (五) 階成西和鳳文龍興七州 紹興十四年三月改西和州, 正作「西和」,據補。 「西」字原脫,琬琰集吳武順王碑七州中無「西和」而有「岷」。 見本書卷三〇高宗紀,此處「和」當作「西和」。 繫年要錄卷一五二 按岷州
- (10) 二十一年以守邊安靜拜少保 見琬琰集吳武順王碑、宋會要職官一之五及一三。此誤。 按吳璘本年未拜少保而是加拜太尉;直至二十九年始除少保,
- 列 預治黄河 「夾河」。 傳 第 . 戰地 百 二 十 「黄河」,於地里上不合,吳武順王碑、 五 校 勘 記 本卷吳挺傳、 繫年要錄卷一九八都作

宋史卷三百六十六

(言紹熙 (三) 會天大風雷 原作「紹興」。按此處所記是光宗時事,不應用紹興紀元,今改。 「雷」,琬琰集吳武順王碑、繫年要錄卷一九八都作「雪」。

一四二六

宋史卷三百六十七

列傳第一百二十六

李顯忠 楊存中 郭浩 楊政

檢。 而果生顯忠,立於蓐,咸異之。 初,其母當產,數日不能免,有僧過門曰:「所孕乃奇男子,當以劍、矢寘母旁,卽生。」已 李顯忠,綏德軍青澗人也。 初名世輔,南歸,賜名顯忠。 由唐以來, 世襲蘇尾九族巡

馬悉折其足。 累琦,當與時俱。」有敵人夜宿陶穴,顯忠縋穴中,得十七人,皆殺之,取首二級,馬二匹,餘 更求一人,顯忠請行。 年十七,投效用,隨父永奇出入行陣。 庶大奇之,補承信郎,充隊將,由是始知名。 永奇曰:「汝未涉歷,行必累琦。」顯忠曰:「顯忠年小,膽氣不小,必不 金人犯鄜延,經略王庶命永奇募間者,得張琦; 轉武翼郎,充副將。

金人陷延安,授顯忠父子官。 永奇聚泣曰"「我宋臣也,世襲國恩,乃爲彼用邪! 」會劉

列傳第

百二十六

李顯

忠

豫 豫 我亦不朽矣。」顯忠至東京,劉麟喜之,授南路鈴轄, 廢,兀朮以萬騎馳獵淮上,與顯忠獨立馬圍場間。 朮歸朝。 令顯忠 帥 俊還,顯忠馳問之,爲竹刺傷馬而止。 馬 軍赴東京,永奇密戒之曰:「汝若得乘機,卽歸本朝,無以我故貳其志。 兀朮授顯忠承宣使、知同州 乃密遣其客雷燦以蠟書赴行在。 顯忠戒吳俊往探准水可度馬處, 事成, 欲執

遺人告永奇。永奇即挈家出城,至馬翹谷口,爲金人所及,家屬二百口皆遇害。是日,天昏 得害我骨肉,皆許之,遂推之下山崖,追兵爭救得免。顯忠攜老幼長驅而北,至鄜城縣,急 渡,與追騎屢戰,皆勝。 洛、渭,由商、虢歸朝。 由蜀至吳,報歸朝事。 大雪,延安人聞之皆泣下。 顯忠 至鄜省侍,永奇教顯忠曰:「同州入南山,乃金人往來驛路,汝可於此 元帥撒里曷來同州,顯忠以計執之,馳出城。 第報我知,我當以兵取延安而歸。」顯忠赴同州, 卽遣黃士成等持書 顯忠憩高原,望追騎益多,乃與撒里曷折箭爲誓,不得殺同州人,不 至洛河, 舟船後期不得 擒其會,渡

千騎,晝夜疾馳,奄至其帳,擒之以歸。 爾能爲立 願得二十萬 顯忠僅以二十六人奔夏國。 一功,則 「不靳借兵。」時有酋豪號「青面夜叉」者,久爲夏國患,乃令顯忠圖之。 人生擒撒里曷,取陝西五路 厦人問故。顯忠泣,具言父母妻子之亡,切齒疾首,恨不卽 夏主大悅,卽出二十萬騎,以文臣王樞、武臣略訛爲 協于夏,顯忠亦得報不共戴天之讎。 夏主日: 請三

陜 西 招撫使,顯忠爲延安招撫使,時紹興九年二月十四日 世。

在耀州 勇少壯 鐵鷂 ||陜 ||西。 赦書 几 一顯忠 一萬 子軍 疋。 列拜,顯忠大哭,衆皆哭,百姓哭聲不絕。 顯 已得延安府,見講和赦書,招撫可以本部 忠引兵至延安,總管趙惟淸大呼曰:「鄜延路今復歸宋矣,已有赦書。」顯忠與官吏觀 今旣到此,乃令我歸耶? 聞 來。 又擒害其父母弟姪者,皆 顯忠揭榜招兵,以「紹興 顯忠來, 顯忠以所部拒之,馳揮雙刀,所向 一夕遁去 」顯忠知勢不可,乃出刀斫 九年」爲文書。 斬于東城之內。 軍歸國。」够訛 乃以舊部八百餘騎往見王樞、略訛 披靡,夏兵大潰, 每得一人,予馬 行至鄜州 够訛 ,已有 不從,曰:「初, ,不及,擒王樞縛之。夏 殺死 一匹,旬日間得萬 馬步軍 蹂賤無慮萬 四萬餘。 經略乞兵來取 ,諭之日: 人,皆聽 撒里 獲馬 人 以

又撫之,犒以銀絹,詣行府受告敕、 至 加 一套,又賜田鎭江,以崔阜輩充將佐 河 池 四川 縣 (1)宣撫吳玠遣張振 見玠,玠撫之曰:「忠義歸 水無論 朝, 金帶,除指揮使、承宣使。 云:「兩 惟君 第 國 一。」從行使臣 見議和好, 不 -可生事 崔皐等六 至行在, ,可量引軍赴行 白 高宗撫勞再三,賜名 餘 人 列 拜 庭下, 在。」 玠

軍 、張俊 兀 术 〈會。 犯 河 南, 顯忠至孔城鎮 命顯忠爲招撫司 ,與敵戰,敗之。 前 軍都統制, 兀朮謂韓常曰:「李世輔歸宋,不曾立功,此人 與李貴同破 靈壁縣。 兀朮 犯合肥,手詔

忠

敢 勇, 宜. | 且避之。 」乃焚廬 江 一而走。 顯忠欲追之與死戰, 俊以奉旨監護, 慮失顯忠,

軍還

統制 復策,忤秦檜意。 太后至 一臨安,顯忠入覲,加保信軍節度使、浙東副總管。 金使言顯忠私遣人過界,遂降官奉祠, 台州 居住。 顯忠熟西邊山川險易,因 復寧國 軍 節 度 (使,升都 E 恢

百倍,以大刀斫敵陣,敵不能支,殺獲甚衆,掩入准者不 將小韓將軍兵五千人戰于大人洲, 十九年, 金渝盟,詔顯忠以本部捍禦。 敗之。 俄又增兵萬餘來, 遣統制官章永壽等以二百騎至安豐軍 山 計 顯忠率騎軍出, 自 旦至午,氣 與金

選銳 是有采石之捷,語在允文傳。 統 細 軍駐和之鷄籠山,將濟采石。 金主亮犯淮西,朝廷命王權拒于合肥。 人渡江,盡復准西州郡。 顯忠退軍沙上,得楊存中報:「車駕至平江,可速進兵。」顯忠 朝廷韶以顯忠代權,命虞允文趣顯忠交軍,軍中大喜, 軍至橫山澗,與金射鵬軍戰,統制頓遇重傷, 權退保和州, 又棄軍渡江, 和州失守。 章永壽死 金 主 親 於

之,敵兵敗走。 金主亮切責諸將不用命、諸將弑之而還。

顯忠 淮西制置使(三)、 是役也,顯忠所將 京畿等處招討使、擢太尉、寧國軍節度使、主管侍衞馬軍司公事,赴 一萬九千八百六人行賞有差,張振功爲最。 詔賜顯忠五子金帶。

行在。

宿、 耿 撫 京 使。 亳 孝 趨汴 宗 押 世 即位 金 隆輩皆欲挈 由 主 褒新 賜田 立, 百頃, 通 Щ 地還于朝。 關 東 陜 兼權池州駐箚御前諸 河 翮 北豪傑鑫 陝旣 金懼, 通 一,則 귮 起, 請 鄜 耶律 和 延 軍都統 諸種 顯忠 路熟 制,節制 兵 陰結金統軍蕭琦爲內 知 、數十二 顯忠威名 萬 軍 據數郡 馬。 ,必皆響應; 隆 之地, 興元 應 年,兼准西 太行 且 請 欲 出 Ш 起 忠 師 其 義 自 招

舊部

曲

可得數萬人,以

取

河

東

意,不 戚 來 大 拒, 周 時 戮 與戰, 張浚開都督府,四月, 仁及蒲察徒穆 人, 敗之。 中原歸 琦 皆出降。 復背城 附者踵 命顯忠渡江督戰。 列 接。 宏淵 陣, 時邵宏淵 顯 恥 忠 功不自己出 心躬率將 圍 虹縣 上: 乃自豪梁渡淮,至陡溝, 廖戦 ; 未下, 又有降千戶訴宏淵之卒 **琦**敗走, 顯忠遣 靈 遂復 壁降卒開 靈壁,)琦背約, 奪 諭 入 其 城 禍 佩刀 用 拐 福 宣 布 子 金 馬 顯 德

忠立

|斬之,由是二將益

不相

能

宏淵 斬首 楊椿 | 虜數 至 六 月,兵傅宿州 謂 千人 顯忠 一城 擒 開北門,不踰 日:「招撫 八十餘人, 城, 金 減關 人來拒,顯忠敗之,斬其 時 遂復宿州 拔其城 西 將 軍 也。 宏淵 舉寄居官劉時攝州事。 顯忠閉營休士 等殿後,趣之, 左 翼 都 一,爲攻 統及首 乃始 〉城計, [虜數 捷聞, 渡濠 宏淵等不從。 千 登城。 授顯忠開府儀同三 人,追奔二 城中 巷戰, + 顯忠 餘 5 叉

列

傳

第

百

+

六

李

題

忠

鐵

(犒士,士皆不

悅

司、 殿前 都 指 揮 使、 妻周 氏 封國夫人。 宏淵欲發倉庫犒士卒,顯忠不可, 移軍出城, 以見

宏淵 虜五 撒 大敗, 遂退走。 千餘人。 并力夾擊 宏淵按兵不動,顯忠獨與所部力戰百餘合, 金 | 帥字撒自 俄增兵復來逼城,顯忠用克敵弓射卻之。 [南京率步騎十萬來,晨薄城,列大陣。 統制 李福 、統領李保各以所部退避,皆斬以徇。 顯忠親帥軍遇于城南,戰數十合,字 殺左翼都統及千戶、萬戶,斬首 翼 日, 敵 益 兵 顯忠謂

志。 制荔澤、建康統制張淵各遁去。 左士淵、統領李彥孚亦遁。 至夜,中軍統制周宏鳴鼓大髞,陽謂敵兵至,與邵世雍、劉侁各以所部兵遁; 宏淵顧衆曰:「當此盛夏,搖扇於淸凉猶不堪,况烈 顯忠移軍入城,殿司前軍統制張訓通、馬司統制張師顏、池州統 日中彼甲苦戰乎?」人心遂搖 繼 而 ",無鬥 統制

耶? 自城外掩擊,則敵兵可盡,金帥可擒,河南之地指日可復矣。」宏淵又言:「金添生兵二十萬 兵二十餘人已上百餘步,顯忠取軍所執斧斫之,敵始退卻。 儻我軍不返,恐不測生變。」 顯忠知宏淵無固志,勢不 何沮撓若此!」是舉,所喪軍資器械殆盡,幸而金不復南。 金人乘虛復來攻城,顯忠竭力捍禦,斬首虜二千餘人,積屍與羊馬牆平。 可孤立, 歎咤曰:「天未欲平中原 顯忠曰:「若使諸軍相與掎角, 顯忠以軍還,見後,納印待 城東北角敵

責授果州團練副使,潭州安置。 後朝廷知其故,移撫州

兩。 乾道 提舉台州崇道觀。 改元,乃還會稽,復防禦使,觀察使、浙東副總管,賜銀三萬兩,絹三萬匹, 召除威武軍節度使、 左金吾衞上將軍, 賜第京師。 上奇其狀貌魁 綿一萬

命繪像閣下。 復太尉。乞祠,提舉興國宮,紹興府居住,歲賜米二千石。

之。 七月卒,年六十九。 淳熙四年,召赴行在,提舉萬壽觀,奉朝請。 贈開府儀同三司,諡忠襄。 入見,給眞奉,賜內庫金,再葺前所賜第賜

楊存中本名沂中,字正甫,紹興間賜名存中, 代州崞縣人。祖宗閔,永興軍路總管,與

唐重 同守永興,金人陷城,迎戰死之。 父震,知麟州 (建寧砦,金人來攻,亦死於難

貴,焉用俯首爲腐儒 存中 ·魁梧沈鷙,少警敏, 哉 ! 」於是學孫、吳法, 誦書數百言, 力能絕人。 善射騎。 宣和末,山東、河北羣盜四起, 慨然語人曰"「大丈夫當以武 存中應 功取富

募擊賊,積功至忠翊郎。

兵入援,後隸張俊部 靖康元年,金人再圍汴京,諸道兵勤王,存中與張俊、田師中從信德府守臣梁揚 曲 上 問將於俊,俊以存中對。 召見,賜袍帶。 時元帥府草創,存中書 加 以 萬

夜扈衞 曰:「酌此 入,擊殺數百 寢幄, 血漢。」存中請復往,帝止之。 不 頃 帝 刻 乘高望見,介胄盡 去 側 帝知其忠謹,親信之。 赤,意其被重創。 存中曰:「此賊膽碎,即成擒矣。」遂大破之,復任城, 劇賊李昱據任城, 召視之,皆汚賊血,壯 久不克, 之, 存中以數騎 飮 以酒,

州團練使,尋爲御前右軍統領。 以全。 建炎二年,討賊徐明于嘉興,先登。 遷榮州刺史。高宗南渡, 金人攻明州,又從俊與田師中、趙密殊死戰,破之。 以勝捷 軍從張俊守吳門,苗、劉之變,又從俊赴難 主帥將屠城,存中力諫止之,戮其渠魁 而 已, 以奇功 郡 遷 貴 賴

遷閣門祗

遷文州防禦使、御前中軍統制。

攻,俘八千人。諸將夜見存中曰:「戰未休,降卒多,忽有變,奈何?非盡殲之不可。」存中 願以騎見屬,公以步兵居前。」慘從之。 位 曰:「殺降吾不忍。」諸將轉告俊,竟夜坑之。 乘勝追至九江,成遂遁去。 遷宣州觀察使 均 觀,追至筠州。 ·勢敵,非招討督之,必不相爲用。」俊然之。整軍至豫章, 存中率兵數千,首破賊于玉 興元年,從俊討李成。諸將議,多欲分道進,存中曰:「賊勢如此,兵分則力弱, 賊驍將以衆十萬來援,夾河而營。 存中謂俊曰:「彼衆我寡,擊之當用奇, 存中夜銜枚渡筠河,出西山,馳下擊賊,俊以步兵夾 又諸將

二年春,進神武中軍統制,宰相呂頤浩袖敕以授存中。

俊奏留存中軍中,上日:「宿衞

親兵。 至 重 時 如 中軍卒不滿五千,疲癃者居半。 臣 一么麽, 一旦位 **|與之抗,實不自安。|** 存中請拘神武卒借出於外者歸軍中, 不許,遣中使宣押, 乃視事 兼提舉宿 由是軍政 衞

年,嚴州妖贼繆羅據白馬源,殺王官, 存中討平之。 除帶御器械,加保信軍承宣使、

寖修。

權 一發遣 郎 延 路 馬步軍副總管

韓世 |密 爾 忠 府助 六 存中武 爲 年,爲龍神衞四廂都指揮使、密州觀察使。 世忠 用 (勇,不減於密,盍令存中助之。」)浚請於朝, 世忠 圍准陽,從浚乞張俊將趙密爲助,俊 先是,張浚至一視師,謀渡淮以圖 拒之。 故有是命。 趙鼎 語浚曰:「世忠所欲者趙 於是存中以八隊萬人, 劉豫,倚

趨督

定遠縣,存中以兵二千襲敗于越家坊。 廬 去。 + 且使統制吳錫以勁騎五 月 浚遣人諭之曰:「一人渡江, 陂 衆十萬已次濠、壽間,浚命張俊拒之,使存中往 ,存中與劉猊戰于藕塘,大破之。 千突其陣。 刨 ·斬以狗。」光世不得已還廬駐兵,與存中相 旣 而 陣亂, 稅之初入也,淮西宣撫使劉光世欲棄廬州,退保 與倪 兵遇 存中鼓大軍乘之, 之 藕塘, 賊 據 山 泗州與俊合。 列陣,矢下 自以精騎衝其脅,大呼 及至泗,則光世 如 應。 雨。 賊 存中急 先 含 犯

存 #

日、「破 賊 存 中躍 舟 数百 (国)日: 馬叱之,皆怖 賊 艘,車數千 「適見髯將 」賊錯 而降。 出愕駭視 兩 軍 , 鳞在順昌,孔彥舟方圍光州 銳 前 不 可當 軍 統制張宗顏 果楊殿前 自 也。」即以數騎 泗 來, ,聞之皆拔砦遁去,北方大恐。 乘背擊之, 遁 去。 賊 大敗。 餘黨萬人僵立 猊 以首 抵 失措, 所得

淮 尋 南 兼 颌 四 捷 路 馬 聞 制置使,將以撫定酈瓊諸軍,不果行,語在汪德傳。 步 ,帝遣中使勞賜,謂宰執曰:「卿輩始知股得人也。」除保成軍節度使、 帥。 存中 _奏"「祖宗置三衙,鼎列相制,今令臣獨總,非故事也。」不 九年,遷殿前 副 都指 、殿前 允。 揮使 七年,爲 都虞候,

졹 騎 詭 守 令 春 面 宿 渡 潰 來 + 准 告敵騎 自 參 歸 將 金 議 泗,人心 人叛盟取河南,命存中為淮 五 數百 官曹勛 百 . 騎 屯 始 夜襲柳子鎮 不知 柳子鎭 安。 存中存 冬, 引 存中欲卽擊之, 亡, 兵 黎明, 還 以 行 聞, 不 在 北宣 見敵 朝 無副 廷 或以爲 而還。 震 使,引兵至 涩, 不可, 於是有權宜 金 人以精兵 宿州 存中 不 退保 (伏歸 以步 聽。 之命 路 軍 留 存中 退 \pm 屯于 滋 旣 知之, 蕭保 而 泗 存中自 遂 以 金 人横

統制 萬 卒 戍 十 田 准 (III) 年,兀 與金 141 張子 术 一人戦 恥 ·蓋爲統制官。 于 順 柘阜,敗 昌之敗, 復謀 之。 金人以拐子馬翼進,存中曰:「敵恃弓矢,吾有以屈之。」使 時 來 張 侵。 俊 詔 爲 宣 大 撫 合兵于淮 使, 存中 西以待之。 爲 副 使, 劉 於是存中 錡 爲 判 官 以 殿 王 德 司 兵 三 爲 都

萬 人操長斧,如牆而進,諸軍鼓譟奮擊,金人大敗,退屯紫金山。 是役也,失將士九百人,金

人死者以萬計,而[豫圍猶未解]。

此? 存 足而營,遣人俟敵,曰:「已去矣。」と自以爲功,謂為毋往,命存中與德偕至濠。列陣未定, 依,人懷歸心,勝氣已索,此危道也。不若退師據險,俟其去,爲後圖。」諸將皆曰:「善。」鼎 倉皇復回, 撫濠梁之民,取宣化歸金陵,楊太尉則渡瓜洲還臨安。」明日,命二帥行。 兼 中 起城中, 領 日, 殿前 」存中曰:「戰爾,相公與太尉在後,存中當居前。」嫡曰:「本來救濠,濠旣已失,進無所 以策麾軍 俊 韓世忠大軍至,已無及矣。 與存中、錡先議班師。 都 邀錡會于黃連埠,距濠六十里,聞城陷矣,召存中、錡謀之。 錡謂存中:「何以處 金 指揮使,蓋錄 人伏騎萬餘分兩翼出。 ·白:「那 回!」諸 柘皇之功而揜濠梁之敗 會有云濠路已通者,俊謂崎曰:「吾欲與楊太尉耀兵准上,安 軍以爲 存中乃自宣化渡江 令其走也,遂散亂 存中顧德曰:「何如?」德曰:「德小將,焉敢預事? 也。 歸行在。 南奔,無復紀律,金人追殺甚衆。 加檢校少保、開府儀同三司 課報金攻濠甚急, 後

年,存中請詣 二十年 年 ,徽宗梓宮攢 ', 封 太學謁 法國 先聖 公。 八水固 , 帝 二十八年,拜少師,恩數視樞密使。 曰:「學校旣興, 武 陵,命存中 都護。竣事,拜少傅,以保傅爲管軍自存中始。十四 人亦知崇尚, 如 存中以 漢 羽 林)凡重: 士皆通孝經,況其他 地皆有統制官

列

傳

第

三日

+

六

楊

存中

獨荆、襄無之,請于朝,於是荆南、襄陽初置諸統制

一十朋、殿中侍御史陳俊卿相繼以爲言。 存中在殿巖凡二十五載,權寵日盛,太常寺主簿李浩、敕令所删定官陸游、司封員外郎 三十一年,罷爲太傅、醴泉觀使,進封同安郡王,

賜玉帶,朝朔望。

洲 聞 之,上章乞冤,密竟代之。 與允文輕舟渡江以何敵。 命存中往京口,爲守江計。 時 金主亮有南侵意,存中上備敵十策。 未幾,邊聲日急,九月,詔 及金 虞允文自采石來會,存中與之協力拒敵,敵不能濟。金主亮 一人請和,存中奏俟彼得新主之命,無遽許之。 步帥趙密謀奪存中權,因指爲喜功生事。 存中爲御營宿衞使。 劉汜戰敗于瓜 存中

兄弟 使復 宣撫使,給 之好 請 帝 和 如 建康"韶 ,存中請拘之江口, 、舍不書黃、命遂寢。 如是 則和議 存中扈 可從; 湿,因語宰相曰:「楊存中唯命東西,忠無與二,殷之郭子儀也。」金 不 移書審問,若能 -然,請 未幾,仍奉 斬 其使,亟 洞 歸我族屬,還舊壤,損歲幣,復白溝之界,以通 圖恢復。 會駕還,以存中爲江、淮、荆、襄路

界之。 下兵秦雍。 隆 興元 存中入對,日:「和尚原,隴右之藩要也。 囊議予金人,吳隣力爭不從。 年,王師潰于符離 ,復起存中 爲 今隣在遠,不及知。 御營使。 敵得之,則可 二年,金 以睥睨漢川 人再入關,議 臣若不言、非特負陛下、亦有 割蜀之和 我得之,則 尚原以 μŢ 以

媿於隣。近者,王師盡銳而後得,願毋棄。」

勒。 兵在揚州,或勸存中擊之。存中不敢渡,獨臨江固壘以老之。 !帥協和,互相策應,卿之力也。」會<u>金兵已深入,朝議欲舍准保江,存中</u>持不可,乃已。 時諸軍各守分地,不相統一 未幾,金人復攻淮甸,詔 存中同都督江、准事。 ,存中集諸將調護之,於是始更相爲援。 **锡思退罷**,升都督, 陛辭, 賜坐, 帝親札賜之曰: 賜玉鞍

權事,豫戒大臣。及竣事,又曰:「楊存中之罷,朕不安寢者三夕。」 濠、廬之役,親筆戒之曰:「若不便進,當行軍法。」<u>趙密代領殿帥,則舉唐崔祐甫奪王駕鶴兵</u> |州者三萬九千畝。二年,卒,年六十五。以太師致仕,追封和王,諡武恭。 爲之出涕,賻錢十萬。 金人尋請盟。 乾道元年班師,加昭慶軍節度使,復奉祠。 高宗假借諸將,眷存中尤深,嘗曰:「朕於存中, 時興屯田,存中獻私田在楚 撫綏之過於子弟。」 高宗追念舊臣,

流落置、隴,存中日夜禱祠訪問,間關數千里,卒迎以歸。 介,震諡忠毅,賜廟日顯忠,日報忠。 勇選,不私部曲之舊。 以爲舊臣,尤禮異之,常呼郡王而不名。父、祖及母皆死難,存中旣顯,請于朝,宗閔諡忠 存中天資忠孝敢勇,大小二百餘戰,身被五十餘創。宿衞出入四十年,最寡過。 李顯忠以罪斥,存中奏爲統制官,後爲名將。 又以家廟、祭器爲請,遂許祭五世,前所無也。祖 御軍寬而有紀,所用將士,專以才 嘗以尅敵弓雖勁而蹶 母劉 孝宗

第

百二十六

楊

存

中

郭

勝,後: 張難、遂以意 獻於朝 創馬皇弩,思巧製工,發易中遠,人服其精。 廷,更築室焉。 又葺園亭于湖山之間,高宗爲書「水月」二字。 嘗營居鳳山 十年 而 所居建閣以藏 就 極 山 川之

御書, 孝宗題 工部侍郎; 日「風雲慶會之閣」。 **倓簽書樞密院事、昭慶軍節度使。**

葺平 砦 脇,怒不 百 騎 欽宗 抵 郭浩字充道,德順軍隴干人(至)。父任三班奉職。 靈州城下,夏 ·拔,奮力大呼,得賊乃已; 敵據塞水源,以渴我師, 卽 位 進安州 人以千騎追之,浩手斬二騎,以首還。充渭州 團練使。 以种師道 浩率精騎數百奪之。 諸軍從之,敵遁去,由是知名。 薦,召對,奏言:「金人暴露, 徽宗時,充環慶路第五將部將, 敵攻石尖山,浩冒 兵馬都監。 累遷 日久思歸, 乞給 中州公刺 陣 而前,流矢中左 從种 師道 史。 進築 嘗率

慮 間 夏 道 馳滑臺 X 必 乘 間 ,時其半度, 盜 邊 一,願 選將設備。」 `可擊也。」會和戰異議, 不能 已而 果攻涇原路,取 用。 西安州 帝問 西 懷德 事, 軍。 浩日:「臣在 紹聖開 任: 拓之地,復 已聞警, 輕兵

建炎元年,知原州。二年、金人取長安、涇州守臣夏大節棄城遁、郡人亦降。 浩適夜半

盡

失之。

种

師

中制

置

河

東,

辟以

自

隨

至 郡 所將 財二百 人,得金 人不殺,使之還, 曰:「為語 汝將 日 我郭浩 也 欲 戦卽 來 決戰。」金

引 去。 升本 路兵馬鈴 轄、 知 涇州 權主 管 鄜 延 路 經 略 安 撫

道之德靜,置司 去,夏人復 時 敵交侵, 來,權 招 帥 鄜延 收散亡, 耿 友諒僅以身免, 之東皆金 與敵對 人, 壘 西 一 年, 北 路盡 卽 夏境, 敵不 陷 能 其 犯。 屬 朝廷 再除 者惟保安 涇原路 兵馬鈴轄、 軍、 **徳靜** 知 砦。 涇州 浩 間

他 方捍禦,蜀以安全。 敵 敵 所。 鋒 可討者, 方銳,且當分守其地,掎 張浚為宣 後復以浩舊官移知 浚意向 撫 || 處置 之。 第功, 一使,以浩爲 諸 帥 遷 鳳 恥於不武, 正 角相援,俟釁而 翔府,寓治寶鷄 任防禦使 秦鳳路 莫敢 提 點 出言。 縣 動 刑 獄、 又退保和尚 浚不 權 後檄 經 - 聽, 略 五 師 使、 路 出果敗,五 原。 帥 知秦州 悉 所部 金人抵原下, 兵會于富平, 路 時後經略 俱陷 帥 浩與吳玠 ·陝西 府 浩 皆徙 [,有言 獨 置 旝

獄宋 邠 萬 破破 州 和尚 萬 觀察使,徙知興元府。 紹興元年, 年 原 陰與敵境通 進窺 金 川口 人破饒 ,抵殺金平, 利所鞫不同, 風嶺 飢民相聚米倉山爲亂,浩討 ,盜梁、洋,入 **浩與吳玠大破之。** 由是與浩意不協 人鳳州 攻和尚原。浩與吳隣往 平之。 遷彰武軍 朝廷乃徙浩知金州 徙 知 承宣使。 利 州 援,斬獲萬 玠 金 人以步 兼 按本路提 永興軍路經 騎 點 十餘 刑

略使。

一一四四二

給 朝 廷, 金州残 **浩獨積贏錢十萬緡以助戶部**, 《弊特 甚 口無幾,浩招輯流亡, 朝廷嘉之,凡有奏請,得以直達。 開營田,以其規置頒示諸路。 九年,改金、洋、 他軍以匱急仰

房州節制

宣撫使胡世將召浩及吳隣、楊政會仙人原,授以攻取之策。 辟浩樞密院都統制、節制陝西軍馬。 知金州,仍永興路經略安撫使、節制陝西河東兼措置河東路忠義軍馬。 金 人還河南地,以浩爲龍、神衞四廂都指揮使,充陝西宣諭使、知金州。 十年,拜奉國軍節度使。 浩遣裨將設伏破之。 五路陷,徙知夔州, 十一年,金人內侵, 樓炤行關中, 未行,移

爲東西兩路,以浩爲金房開達州經略安撫使兼知金州、樞密院都統制,屯金州,仍建帥府。 浩辭曰:「臣父子起身行陣,不敢忘本,願還文資。」帝嘉其意,別與一子閻職。 十五年,卒,年五十九。 十四年,召見,拜檢校少保,還鎭,賜以御府金器、繡鞍,仍官一子文資,賜田五十頃。 贈檢校少師,諡恭毅。 淳熙元年,賜立廟金州 是歲,分利州

其母奇之,曰:「孝於親者必忠於君,此兒其大吾門乎?」宣和末,應募爲弓箭手。 政字直夫,原州臨涇人。崇寧三年,夏人舉國大入,父忠戰歿,政甫七歲,哀號如成

初 因 拒夏人,稍知名。 建炎間,從吳玠擊金人,九戰九捷。 累功至武顯 鄭

敵,日 大夫。 聽,政益 餘人、甲士八百六十人。 紹 數十合,士卒無不 十月, !興元 感奮 年 金兵大集,號十萬, 春、金 人趨和尙原,又攻箭筈關, 一當百。 拜恭州刺史。 復出奇兵斷其糧道,敵少卻, 自實鷄列栅至原下。 時有嫉政者,以母妻尚留北境,不宜屬以兵權,玠不 政 引兵 大破之,斬千戶 吳玠與相持累日 遮擊之,獲萬戶及首領 一、酋長二。 , 以 政統 領 遷右 將 兵迎 三百 武

) 野戰關下,凡六日。 獨穀在其中。 二年,金合步騎數千栅魚龍川口,政帥精兵劫破之。 三月,金大軍來攻,城且下,政擊敗之。 改明州觀察使 選知鳳州 升隴州團練使,移知方山原 三年,金攻饒風關,政從 7,軍儲

督 意,夜斫其營。 蜀 戰益急,政命卒以神臂弓射之;又選甲士千餘出山谷,斷其兵,使不得進退;又出敵不 阨塞,當堅守,時出奇擊之。」)所用其言。 几 年,撒离喝夏精兵十萬,欲道 敵遂遁去,追至河池而還。 仙 人關 授龍 金人變態多端,政隨機應之,連日百餘戰。 入蜀,至上奢田 神衞四廂都指揮使、環慶路經略安撫使。 玠築壘于關外,政曰:「此 地爲 敵 帥

經 |略安撫涇原兼帥環慶、利路。三鎭事叢集,剖決無滯。 母留敵境,間遣人省視之,母惟勉

列

傳

第

五

一年,金人攻准,玠命政帥

師乘機牽制,

至秦州,

戰而拔,撫定居民,秋毫無犯。

改

以 忠 九 年 春, 和 議 成,始得迎母及兄弟歸。 乞祠 以便養, 不許。 詔 封其母感義郡 夫人,

以 政 為 熙 河 一蘭鞏路經略安撫使、知熙州,進武康 塚軍承宣: 使

渭水上,以拒敵衝,凡大戰七,斬獲甚多。 政偕統制楊從義劫金人于鳳翔府城南砦,敗之,獲戰馬數百。 功效顯著。」拜武當軍節度使。 + 徙利州,又徙興元。 會金人渝盟, 川、陝宣撫副使胡世將奏:「鳳翔之捷,政奮不顧 政建迎敵之策, 兼川、陝宣撫副使司都 母卒, 起復, 遂帥師趣寶 統 雞

殺,通檢走至城門而橋已絕,遂擒之。 對壘,又敗金萬戶通檢于寶雞。時通檢居渭北,政欲攻拔其城,通檢將精甲萬衆出,政帥勇 取之策,政出和尙原,浩出商州以爲援,隣駐秦州。 士鏖戰,遣裨將突出陣後,登山執幟。 十一年秋,金將胡盞、習不祝合軍五萬來攻,政與吳隣、郭浩會于仙人原。 金軍見之,大呼曰:「伏發矣!」乃驚潰。 政乘勝掩 政引兵夜入隴州界, 遂趨吳山, 與金 世將授以 攻

檢 校 和議 少保,賜田 (成,帝召)政還,軍民詣部使者借留。及入見,條奏詳明,帝善之。 十三年,還鎭,加 五 十頃。 十四年一分利 州爲東西兩路,政屯興元府。久之,拜太尉。二十七

政 守漢中十八年,六堰久壞,失灌溉之利,政爲修復。漢江水決爲害,政築長堤捍之。凡 年,卒,年

六十。

贈開府儀同三司,諡襄毅。

璘 利 於民者不敢以軍旅廢。 分道建帥,執門下之禮益恭,世頗賢之。 休兵十餘年,未嘗升遷將士,上下安之。 政故爲吳璘裨將、及與

和 幸者歟? ·議,頻失事機,人心沮喪,不得如吉甫、方叔,受祉 楊存中出入淮甸,無大勝負,典兵最久,貴寵獨隆,然頗能 論曰:李顯忠生而神奇,立功異域,父子破家狗國,志復中原,中罹讒構, 郭浩、楊政克左右野、隣兄弟,保全川蜀。 數君子皆人所屬倚 振旅以成中興之業,惜哉 知幾,不阽禍 以成功者 屢遭 敗,其亦有 ,奈何撓於 一廢黜, 傷 天

校勘記

- 四 Ш 原作「四州」,據本書卷三六六吳玠傳、章穎宋南渡十將傳卷三李顯忠傳改。
- 淮 西 制 置使 ~ 淮西 原作「淮南」, 據本書卷三二高宗紀、繫年要錄卷一九四改。
- **=** 張 浚 原作「張俊」,據繁年要錄卷九九、北盟會編卷一六九改。
- 李 ·繫年要錄卷一〇六、 一朝綱要卷二三都作「李諤」。
- (E) 德 順 軍 隴干人 「德順」二字原倒。 按宋無「順德軍」,本書卷八七地理志「德順軍」條:「慶曆三

列

傳

百二

+

六

校勘記

年,即渭州隴干城建爲軍。」據改。

(台)中州

按宋無中州,本書卷八九地理志夔州路有忠州,疑「中」乃「忠」字之訛。

一一四四六

ş. -

宋史卷三百六十八

列傳第一百二十七

王德 王彦 魏勝 張憲 楊再興 牛皐 胡閎休

間,遣德諜之,斬一

一蜀而還。 曰:「臣就縛時,止見一夜叉耳。」時遂呼[應爲「王夜叉」。 執偽守姚太師,左右驚擾, 德手殺數十百人, 衆愕眙莫敢前。 |王德字子華, 通遠軍熟羊砦人。以武勇應募, 隸熙帥姚古。會金人入侵, 古軍懷、 補進武校尉。|古曰:「能復往乎?」|德從十六騎徑入隆德府治, 古城姚獻于朝,欽宗問狀,姚

討李成,德以百騎覘賊,至蔡州上蔡驛口橋,賊疑爲誘騎,擁衆欲西。 主帥,倂兵圍之。 大至矣! 建炎元年,以勤王師倍道趨闕,改隸劉光世,平濟南寇李昱、池陽寇張遇。 」賊駭遁,追殺甚衆。 德突圍擁<u>光世</u>還軍,遂襲敗李成。 成奔新息,收散卒復戰。 授武略大夫。 賊見光世張蓋行陳,不介胄, **德麾騎大呼曰:「王師** 光世將先鋒 知爲

列傳第一百二十七 王德

圍 和州,太守張績求援於德,德兵傅城下,賊不意其至,大潰。 三年春, 遷前 軍統領,屯天長。 金人攻揚州,西軍多潰,德趨宣化。 遲明接戰,斬昱,俘其兵騎萬 會叛將張昱、 張彦

濟自采石

德至浦城,斬苗 大江 特原之,編管郴州。 而世忠必欲德爲之使, ,徇國急變。」遂以軍屬光世。 光世方謀討苗、劉之逆,迎至建康,謂德曰:「江都之擾,諸軍不竄則盜。公可仗義夜涉 瑀,擒馬柔吉送行在。 遣親將陳彥章邀德於信州。 會苗、 世忠訟其擅殺,下臺獄,侍御史趙鼎按德當死,帝命 、劉走閩中, 詔德追 **彦章拔佩刀擊德,德殺彦章,** 擊,隸韓世忠。 德欲自致 、功名, 諸市

經。 夫、榮州刺史。 諸校曰:「念經聞吾宿留,必不爲備。」倍道而趨,一鼓擒之,獻俘于朝。 行次饒州,會賊劉文舜圍城,德引兵赴之,文舜請降。 時 光世 屯九江,得楊惟忠所失空頭黃敕,即以便宜復德前軍統制, | 德納而 誅之,自餘不戮 韶還舊秩,加武顯大 造平信州妖賊王念 人。 謂

德馳叱之; 恃 以自 几 一年,光世鎭京口 重鎧者直前刺德,德揮刀迎之,卽墮馬。 分軍 ·扼險,渡江襲金人,收眞、揚數郡。旣而又遇敵于揚州 ,以德爲都統制。 金兵復南,光世將退保丹陽, 衆褫駭,因麾騎乘之,所殺萬計。 北, 德請以死捍江, 有被重鎧突陣者, 諸將

先命合軍持滿,陳始交,萬矢齊發,牛皆返奔, 日, 餘黨復索戰, 興 (元年,平秀州水賊邵青。 諜言將用火牛, 初,德與戰于崇明沙,親執旗麾兵拔栅以入,青軍大潰。 德笑曰:「是古法也,可一 敗衆殲 焉。 不可再, |青自 縛請命, 德獻俘行 今不知變, 此 成 擒 帝 耳 他

及麾下,徒步立道左, 三年, 光世宣 |撫江、潍,當移屯建康,命韓世忠代之。 抗言曰:「擅殺陳彥章, 王德迎 馬頭 請 **德從數十騎自京口逆世忠,** 死。」世忠下馬握其手曰"「知 度將 公

見便殿問勞,褒賞特異。

遷中亮大夫、同州

觀察使

好漢,鄕來纖

介不足置懷。」

乃設酒盡

歡而

別。

是冬,

知鞏州、

熙河蘭

廓路兵馬

鈴轄

越江 襲 明年 奪之,追 知 至桑根 | 蘭州 ,徙屯池陽及當 擒女眞萬戶盧字一人,千戶 塗 ,爲行營左護 十餘 軍 前 軍統 制。 五年,改環慶副 金兵掠江 北,破 總管 滁 州

楊沂 之、亦拔砦遁。 中、 六年冬,劉豫遣麟、倪驅鄉兵三十萬,分東西道 統 制 張宗顏 徳追至 |壽春,弗及,獲其糧舟四 田師 中及德等分兵禦之, 」百艘。 大敗猊兵于藕塘, 入寇 第功, 中外甚恐, 除武康軍承宣使, **犯挺** 議欲爲保 身 走; 江計 眞 麟 拜 在 相州 順 昌 殿 聞 帥 觀

其衆,以酈瓊副 年 ·, 改 熙 之。 河 蘭 鄭路副 瓊 與德故等夷,恥屈其下, 總管、 行營左護軍 都 統制, 率衆叛從劉豫。 駐 師合肥 八年 會光世 命 靇 隸張俊, 宣 撫,詔 名其軍 徳盡

察使。

「銳勝」。

使、龍神衞四廂都指揮使,再遷侍衞親軍馬步軍都虞候,封隴 父。 耶律温以三千人阻水邀戰。 旗臥鼓, 以逆順 王貴會,莫不糜碎, 曰:「今兵威已振,請乘破竹之勢,進取|東都。」|俊難之,乃班師。 時 十年 ,乃自縋而 · 叛將酈瓊屯亭,聞應至,謂三路都統制曰:「夜叉未易當也。」途 騎引去。 ٠, 解潁昌 圍,俊檄德就取宿州。 下。 因潛師宿州,夜半,薄賊營。 爾何爲者。」賊遂投兵降。 德叱其子順先登, 溱率温降, 造詣行在。 應策馬先濟,步騎從之,遙謂賊曰:「吾與金人大小百戰,雖名 德倍道自壽春馳至蘄縣,與敵游騎遇,遂入城, 馬秦、耶律温馳入,閉門城守。 敵將高統軍詰朝壓汴而陳,僞守馬秦、 西郡侯。 德乘: 策功第一 遁。 勝趨 ,拜興 亳州, 德 入 亳 州 德至,呼秦 (寧軍承宣 俊會于城 白|俊 同 諭

之,使稍安,則惟非吾有矣。」慢獨豫未許。 拔 宣撫北渡。」俊乃許德卽渡采石,俊督軍繼之。 不守,是謂唇亡齒寒也。 和州,晨迎俊入。敵退保昭關,又擊走之,追至柘阜,與金人夾河 十一年,金人自合肥入侵,游騎及江。 敵數千里遠來,餉道決不繼,及其未濟急擊之,可以奪氣, 德請益堅,曰:「願父子先越江,俟<u>和州</u> 俊議分軍守南岸,德曰:「准者,江之蔽也, 宿江中,德曰:「明旦,當會食歷陽。」已而夜 .而軍 下,然後 若遲 棄准

諸將帥皆集,惟張俊後至,統制田師中欲待之,德怒曰:「事當機會,復何待!」徑上馬。

山,德復尾擊之。 節度使、建康府駐箚御前諸軍都統制,歷浙東福建總管、荆南副都統制。 被 兀朮以鐵騎十餘萬夾道而陣,德曰:「賊右陣堅,我當先擊之。」麾軍渡橋,首犯其鋒。 (甲躍馬始出,德引弓一發而斃;乘勝大呼,令萬兵持長斧,如牆而進。 劉錡(1)謂德曰:「昔聞公威略如神,今果見之,請以兄禮事。」召拜淸遠 二子琪、順,亦以廳勇聞。 二十五年,卒, 敵大敗,退屯紫金 __ 酋 軍

檢校少保,再贈少傅。

宗臨軒閱試,補下班祗應,爲淸河尉。 金 王彦字子才,上黨人行。 人攻汴京,彥慨然棄家赴闕,求自試討賊。 性豪縱,喜讀韜略。 從涇原路經略使种師道兩入夏國,有戰 時張所爲河北招撫使,異其才,擢爲都統 父奇之, 使詣京師, 隸弓馬子弟所。 功。 徽

制。 使率裨將張翼、白安民、岳飛等十一將, 部七千人渡河,與金人戰。 敗之,復衞州 新鄉

縣、傳檄諸郡。

獨保共城西山 相率刺面,作「赤心報國,誓殺」金賊」八字,以示無他意。 金 人以爲大軍至,率數萬衆薄彥壘,圍之數匝。 ,遣腹心結兩河豪傑,圖 再 舉。 金人購求彥急,彥慮變,夜寢屢遷。 **彦以衆寡不敵,潰圍出。 彦益感勵**, 撫愛士卒, 諸將散歸, 其部 與同甘 曲 覺

列 傳

舉 百 如 ,告期, 里 鐵石, 一,皆受彦約 於東京留守宗澤。 卡易圖也。」

金人乃間遭勁騎撓

彥糧道,

彥勒兵待之,

斬獲甚衆。

 兩 河 東。 響應,忠義民兵首領傅選、孟德、劉澤、焦文通等皆附之,衆十餘萬, 金人患之,召其首領,俾以大兵破彥壘。首領跪而泣曰:「王都統砦堅 綿亙數 刻日大

請使議 憤 爲 宿 平寇前 激,大忤時相意 兵近 |澤 甸 召彥會議,乃將兵萬餘渡河,金人以重兵襲其後而不敢擊。 和 將 ,以衞根本。 彦見<u>黃潛善、汪伯彦,力陳兩河忠義延頸以望</u> 軍,彥知瓊有逆節,稱疾不就,乞致仕,許之。 ,遂降旨免對,以彥爲武翼郎、閤門宣贊舍人,差充御營平寇統領。時范瓊 **彥即以所部兵馬付留守司,量帶親兵** 王師,願因人心,大舉北伐。 趨 行在。 既至汴京,澤大喜,令彥 時已遣宇文虛中爲而 言辭

也 路 初 俱 至 。」浚幕: 失。 漢中, 知 樞 不若且 府不然其言。 密 會諸 院 事 將議,彥獨以爲不可,曰:「陝西兵將上下之情,皆未相通,若少不 屯利 ,張浚宣撫川、陝,奏彥爲前 、閬、興、洋,以固 **彦**卽請爲利路 鈐 根本, 敵入境, 華,俄改金均房州安撫使、知金州 軍統制。 則檄 |浚與金 | 少 | 宣 | 相持于 | 富 | 平 | 五路 兵來援, 萬 不捷, 利 欲 未大失 大舉, 則五

乘勢西向,均、房失守,直擣金州白土關,衆號三十萬。 時 中原盜 賊鑫起,加以饑饉 一,無所資食; 惟蜀 富饒,巨盜往往 仲,彥舊部曲也,以申檀請於彥 窺覬。 桑仲旣陷 淮安、襄

敵,大事去矣。敢言避者斬!」卽勒兵趨長沙平,阻水據山,設伏以待。 曰:「仲於公無敢犯, 將士失色,或請避之。彥叱曰:「樞相張公方有事關陝,若仲越金而至梁、洋,則腹背受 麾,士殊死鬥,賊敗走。 願假道入圖就食耳。」彥乃遣統領官門立爲先鋒擊之。 **彦休士進擊**,追奔至白磧,復房州 賊見官軍少,蟻附搏 賊銳甚, |立 |戦

彦執幟一

郊距郡 果善戰,彥與戰不利,關陷。 紹 城二十里,路坦夷,彥募敢死士易麾幟,設奇以待。 興元年九月,權京西南路副總管李忠反,擾京西,遂攻金州諸關。 |彥退屯||秦郊,令將士盡伏山谷間,焚||秦郊積聚,僞若遁者。 忠走降劉豫 閱再宿,賊至秦郊,官軍逆戰,大 賊衆皆河朔人,驍

敗之,追襲至秦嶺,遂復乾祐縣以歸。

相持 桑仲,然小者猶 分三道以離吾勢, 攻住口關(三),一 初,桑仲旣敗還襄陽,乃鳩集散亡陷鄧州, 一月,大戰六日,贼太敗,仲爲其下 不減數萬,彥悉討平之。 法當先破其堅,則脆者自走。」遣副將焦文通 出馬郞嶺, 一擣洵陽, - 所殺。 前軍去金州不三十里。 又有王闢、董貴、祁守中阻兵窺蜀,勢雖不及 凶焰復熾。 南攻德安,西據均陽,分衆三道: 2 集住口 彦曰:「仲以我寡彼衆,故 , 自以親兵營馬郎。

復秦州。 是多,偽齊秦鳳經略使郭振以數千騎掠 張浚承制以彥節制商、號、陝、華州軍馬。 白 石鎭,彥與關師古倂兵禦之,賊大敗,獲版,

洵陽。 大敗之,復金州。 **這與吳玠禦之,不能卻,關破,**彦收餘兵奔達州。 三年正月,兀朮入侵,浚召彥與吳玠、 統制官郭進死之,彥退保石泉縣。 凌承制進<u>彦</u>保康軍承宣使(E)兼宣撫司參議, 彦不受。 劉子羽會于興元。 金人入金、均,彥趨西鄉。 五月, 彥遣兵至漢陰縣, 與劉豫將周貴戰, 撒離曷自上津疾馳,不一 二月, 金人攻饒 風關, 日至

買牛千七百頭,授官兵耕, 路安撫使,彥以岳飛嫌辭。 五年四月, 差知荆南府,充歸、峽、荆門公安軍安撫使。 營田八百五十頃, 分給將士有差。 | 凌奏|| 彦爲行營前護副軍都統制、督府參謀軍 彦因荆南曠土措置屯田, 六年二月,知襄陽府、京西南 事 自蜀

州觀察使、 遂以爲浙西、淮東沿海制置副使, 卒于官,年五十。 軍中,軍士交鬥於市, 六月,以八字軍萬人赴行在。 知邵州。 **廖入辭,帝撫勞甚厚,曰:「以卿能牧民,故付卿便郡,行卽召矣。」九年,** 言者論其軍政不肅,貶秩二等。 以所部屯通州之料角。 至鎭江,聞母喪,上疏乞解官,不許。 彦不自安,乞終餘服。 七年正月,彥因遣將捕亡者於解 韶免喪服,趣入對, 二月,復洪

而使之治郡,士議惜之。 彦)稱名將,當建炎初,屢破大敵,威聲振河朔。 時方撓於和議,遽召之還,又奪其兵柄 將死,召其弟姪,以家

財均給之。

年,金人將南侵,聚芻糧,造器械,籍諸路民爲兵。勝躍曰:「此其時也。」聚義士三百,北 魏勝字彥威,准陽軍宿遷縣人。 多智勇,善騎射,應募爲弓箭手,徙居山陽。 紹興三十

渡淮、取漣水軍、宣布朝廷德意、不殺一人、漣水民翕然以聽。

按堵。 與其子安仁率牙兵拒守,勝整軍與安仁父子戰譙門內,殺安仁及州兵千餘,擒文富,民皆 寬大愛民之意。城上民聞之,即開門,勝遣勇銳者登城樓,餘自門入,莫有禦者。獨文富 勝令城外多張旗幟,舉煙火爲疑兵;又遣人向諸城門,諭以金人棄信背盟,無名興師,本朝 遇,勝迎擊走之,追至城下。衆驚傳水陸悉有兵,城中大恐,文富閉門守,驅民上城禦之。 遂取海州。 郡守渤海高文富至聞勝起,遣兵來捕勝。距海州南八十里大伊,與金兵

戰士; 盟,未有發其端者,莫敢以聞 聞之響應,句日,得兵數千。 勝權知州事,遣人諭朐山、懷仁、沭陽、東海諸縣,皆定。乃蠲租稅,釋罪囚,發倉庫,犒 分忠義士爲五軍,紀律明肅,部分如宿將。 即具其事報境上帥守,冀給軍裝器甲。 勝自兼都統制,益募忠義以圖收復,遠近 時即守雖知金人將渝

列傳

第一

百二

十七

魏

勝

勿 動 金人生兵復集,競登屋擲瓦擊之,成軍幾敗。 左 軍 成 從 制 勝, 董 成 率所部千餘人直入沂州 謀出西 北取沂州,勝先遣間還,知金兵數萬至沂,以我軍器甲未備, 巷戰,殺其守及軍士三千餘, 勝欲斬成,以其驍勇,釋之。 衆悉降, 得器甲數 戒成

伏 ,于隘,陣以待。 金 人遣同知海州事蒙恬鎭國以兵萬餘 衆殊死戰,伏發,賊大敗,殺鎭國,馘千人,降三百人, 取 海 州,抵州北二十里新 橋 軍聲益振。 勝帥 兵出 迎之,設 山東之

民咸欲來附,勝傳檄招諭,結集以待王師之至。

下。 馬飲血,勝默禱而雨驟作。 圍 知其爲將也,以五 金兵追之,馬中矢踣,步而入砦,無敢當者。 金人又急攻,絕其水,砦中食乾糒,殺牛 金人多伏兵, 勝兵遇伏, 皆赴砦。 一百騎圍之數重。勝馳突四擊,金陣開復闔。 金人襲之,勝單騎而殿,以大刀奮擊。 戰移時,身被數十槍,冒刃出 勝提兵往救之,陣于山 金人望見勝,

橋 抵城下,勝出戰皆捷。金分兵四面攻之,勝募士登城以禦,矢石如雨者七日,金兵死傷多, 金人攻益急,周山爲營,勝度其必復攻海州,因間出砦趨城中。金人果解蒼山圍,自新

週去。 勝嘗出戰,矢中鼻貫齒,不能食,猶親禦戰。

勝 起義久,朝廷尚未知。 沿海制置使李寶遣其子公佐由海道覘敵,至州,始遣忠義將

朱震、褚道詣行在,白勝姓名于執政、始知勝之功焉

之。 遣 熾,操舟者皆登岸走。 此金國兵也, 初命造海艦,欲分軍入蘇、杭,悉以中原民操舟檝。 人邀之,同擊金人于新橋,大敗之。 及寶 金主亮舉兵渡准,慮勝睨其後,分軍數萬來攻。 (舟入島中, 適北風勁, 舟不進。 俾皆入舟中。 金兵在舟中者,坐以待縛,載之檻車,悉獲其舟。 舟忽至,金人不知,寶縱火焚其舟。 金兵未退,寶知金舟將遁,復以兵登舟備海道。 有頃反風,金人艬舟于岸,操舟者望見寶舟,謬云 會李寶帥舟師往膠西,破金人舟艦 民家送衣裘者相告語,俟王師至卽背 舟以赤油絹爲帆, 風順火 金主

斂兵 戰。 敗。 降。 敢 追 入 |勝開 寶旣 金 爾等宜 、城,金兵追將及,勝獨乘馬逐之,叱曰:「魏勝在此 兵 捷, 、攻之踰時,乃少遣士出,憑險隘 門 出論 早來歸, 勝亦還州爲捍禦計。 之日:「汝主 必獲爵賞。」時金兵已逼關 | 叛盟失信,無故 金兵至,營于城北砂巷,列陣將攻關門,先遣人說勝使 擊之。 興兵,我朝以仁義之師,來復舊疆,汝主 金人知 勝登關門張樂飲酒,犒軍士, 不可攻, 」聞之皆辟易,士卒後入者不復 率軍 ·轉而 渡河, 襲關 令固 一守勿出 渡淮 後。 勝 必

竟日,終不能近。 勝 軍已入城,金兵徑趨城 有新募士 守河者、不知兵(台),金兵遽過河,勝恐絕河路、吸收軍入城。 東,欲過 砂堰 圜城爲營。 勝先已據堰備之,金軍不 得過,拒 金

兵 奏 城 功授閤門祗候,差知海州兼山東路忠義軍都統。 山東忠義 追 有不得入者, 至東門外黃 土坂 由 I城南入 勝單騎逐之,大叱之,金兵五百皆望風退。 一西門。 金兵復自 西南來襲, 遣其子昌同峒峿山首領張榮,持旗榜往 勝從後 叱之,金兵駭散, 勝 叉 追 十數里, 手殺數人。 十: 得入

海 厲 |州爲長垣,包州城于中,使不能出。 及底死,乃解去。 土卒, 金 |兵自|新橋、關子門、砂堰之敗,殺傷者衆。 竭力捍禦,矢石交下。城上鎔金液,投火牛。 一日黎明, 金兵不能前, 乘昏霧, 多死傷, 几 面 薄城急攻。 ,乃拔砦走。距 勝激

儲。 名, 軍,未嘗 密付諸將,遇鏖戰即揭之,金兵悉避走。 初,勝起義時,無州郡糧餉之給,無府庫倉廩之 勝經 膀 善用大刀,能左右射,旗揭曰「山東魏勝」,金人望見卽退走。 .畫市易,課酒権鹽,勸糶豪右。環海州度視敵兵攻取處,築城浚隍,塞關 日 懈 弛,恆如寇至。 方糾集遠邇,犒勞士卒,期約有日,會金主亮被弑,金兵北 勝爲旗十數, 隘, 書其姓

疑 皆精銳。 周其實貧,使之感激。 初 , 亮聞勝在海 獲金諜者,犒以酒食,厚賂造還。 |州,知不可取,曰:「少須,他時取之易耳。」|亮旣殞,勝益得自治軍旅,人 自是山東、河北歸附者衆,得金人虛實,悉以上聞。 有自北方來歸者,與之同臥起,共飮食,示以不 又第其忠義

歸

", 王師

亦南還矣。

士功能,假授官資,因李寶轉達于朝,悉如所請。

衆合寶 金 (軍大破之,斬首不可計,堰水爲之不流, 人遣山 東路都統、總管以兵十萬攻海州。 餘悉奔潰。 時寶帥海舟水陸并進,抵城北砂巷, 勝獨率兵追北二十里,至新橋 勝率

又破之,盡獲其鞍馬器甲。

寶亦駐

海州,為進取

計

勝 擇 兵 率衆 盛 勇 集 悍 金 士三千餘騎,拒于石闥堰,金軍不能 ,勝力拒之,自旦至暮,金兵不能奪。 鏖戰,殺數千人,餘皆遁去,下令守險勿追。 人復遣五斤太師發諸路兵二十餘 萬來攻海州, 進。 勝令步卒整隊前行,自爲殿。 逮夜始還,留千人備險隘。 報寶,寶以防海道,登舟,不復發兵。金 先遣一軍自州西南斷勝軍餉道。 金兵十萬來奪,

植 金 號 雲梯 兵 動 環 地 時 ,城中 置置 城 百姓以寶既登舟,懼金兵大至,皆欲 圍 | 砲石 數 亦懼。 重 ·, 四 面 ,勝與郭蔚 勝入 合圍 (城, 諭以賊勢退怯 負 分兵備禦。偃旗 土 塡 壕。 勝俟其近 之狀, (仆鼓, 寂若無 入城,統制)城,鳴鼓張 固 一守可保 郭蔚 人。 閉 無虞,乃開門 旗,矢石 金 城門不納。 軍 鷩 俱 疑, 發,繼以 數 人民 盡 日 納之。 不敢 牛馬蔽野,呼 火牛、 攻, 居 金液, 無 已乃 何,

出 凡 擾之,使不 晝夜, 金兵 得休息。 竟 不能 又間 近。 夜發 於是罷攻,修營壘, · 兵劫其營,或焚其 絕河 文具 道, 謀爲固 守。 勝俟其不備掩擊,或獨

旣 mi 金 人倂力急 攻, 勝 告急於李寶。 寶以聞, 還報城中, 已命張子蓋率兵來解圍 金

列傳

第

百

+

七

魏

朥

勝 人 日:「受詔 出 亦 知子 軍 城 蓋 解 北 圍,不知其他。」遂率軍還。 砂 軍 巷,與金軍 Ė. 至 有 大戰 退 意 斬首不 頃 Ź, 子蓋 ·可計, 城中 先帥 疑懼,欲隨王師出,勝親邀 追 數 騎 兵 + 至 里 , , 餘 勝 兵皆 出 與子 遁 蓋 勝 議 與子蓋 於道而 戰 事 諭之,至 議 且 促 進 其 討 步 連水 卒

時 都督 張浚 在 建康 , 招勝 詢以 軍 務。 轉閣門宣贊舍人,差充山東路忠義 女軍都統: 制

鎭 江 府 駐 箚 御前 前 軍統 制 仍知 海 州 勝還

軍,與偕還

於都 使, 箚 節 督,惑之。 旣 隆 制 興 而 本 督 元 路 府 年, 軍馬, 知和仲 呼勝 詔以 海州 至鎭江計 鎭 所 江 誣, 駐箚。 御前同統 罷之,復勝舊職, 事, 和仲忌勝,陰誘忠義 罷 制 其 魏全來守海州, 職, 改京 仍遣鎮江 東路馬步軍 軍使不安。 御前後軍屯海州 督府亦遣 副總管、都督府統制 賈和仲充山東、 勝與辨是非, ,代前軍還鎮 和 河 北 建 仲 路 康 又讒 江 府 招 勝 駐 撫

中, 虚 勝 實立 既 還 見, 海 故 州 鎭撫 西南 受敵最 一方,民安其 劇。 勝 政。 築重城,圍 改 忠州 Ш 刺 在內,寇至 史。 海 州 則 城 先據之,不能 西 南枕狐 山, 敵至, 害。 登 山 | 瞰城

敵 車 叉可 用 勝 人 嘗 以禦箭 推 自 轂 創 簇 如 **[II** 意 蔽 列 戰 陣則 五 車 十人。 數 如如 百 意 兩, 車在 行 砲車 則 「外,以旗蔽障,弩車當陣門,其上寘床子弩,矢大如鑿 載 數 輺 十兩 重器 車 甲, 上爲獸 عاد 則 爲 面 營, 木 牌,大槍數 掛 搭 如 城 壘, -[-人馬 垂氊 不能 幕 軟 近, 每

間 弓弩箭 矢能 稍 憩 砲 射數人,發三矢可 一, 近 士卒不疲,進退 陣門則刀斧槍 2俱利 數百 手突出 步。 伺 便出擊,盧有拒遏,預爲解脫計, 砲車在陣中, 施火石 ,交陣則出 |騎兵,兩 嚮掩擊, 砲,亦二百 得捷拔 步。 夜習不 陣 兩陣相近,則 追 使人見。 襲, 少卻 陣間 以其製 則入 發 陣

于朝,

詔諸軍

遵其式造

其 實 勝 欲 使 陣 (解,以 率 運 在 劉 謂 楚州 諸 寶、 糧 事 二年, 馬 士卒 往 聞 軍 死 舟 知 泗州 拒於准陽, 高 以議 年 載 贈 曰:「我當 相 器 保 距 郵), 由 74 寧軍 四 軍 甲糗糧 和 十五 撤海州 + 淸 劉 節 死 里, 敏措 河 自 此,得 度使, 自 口 Up 堅謂 置盱眙 入淮 戍, 清 至 河 申, 方講和 諡 脫 命勝知楚州 勝 出, 忠壯 者 勝 重 歸 知其謀,欲禦之,都統 欲侵邊。 負 楚州 報 ,決無戰 、未決。 天子。」 時 |准 帶, 以本州官吏及部兵赴新治。 南 勝 事 金 乃令步卒居前, 未 **規知之**, 立, 迄 軍 勝專一措置清河 平, 增生兵來,勝 不 詔 發 於鎮 身帥 一兵。 制 劉 江府 忠 寶以方議 騎為 義士 與之 勝 П 江 矢 殿, 盏 拒于 力戰,又 鎭 時 一, 救 和 至准 立,廟, 和 · 不 清河口。 詔 議尙未決, 不至,猶 勝同准東路安撫 許。 造 陰 賜 東 人告急 十八 金 號 依 |金 褒忠, 騎 金兵乘 兵詐稱 土阜為 里,中 於寶。 軼境,

倡 俟 承 事 信 定 更 郞 而 於 賜 戦 銀 沒 F 處。 兩 絹 且令 千 匹, 有 司 宅 刻 木 晶 以 斂, 田 口 葬 頃 于 鎭 其後使者過准東, 江 官其二子,郊 始得 武 功 其詳 大 夫、 忠 還言于朝。 州 刺

口

列

傳

第

百

+

七

魏

朥

張

巚

以 劉 寶 不 出 救 兵, 削 兩鎮節鉞,沒入家貲,貶瓊州 死。 勝所糾集忠義,有爲賈和仲誘隸別屯

及撤戍隔絕者,尚五千餘人,入京口屯駐前軍。

「人材須用而後見,使魏勝不因邊釁,何以見其才? 郊 添差揚州兵馬鈴轄。 淳熙十五年,孝宗語樞臣曰:「魏勝之子, 」韶郊添差兩浙西路馬步軍副總管 當與優異。」又曰:

張憲, 飛愛將也。 飛破曹成、憲與徐慶、 王貴招降其黨二萬。 有郝政率衆走沅州, 首被

口布,爲成報讐,號「白巾賊」,憲一鼓擒之。

萬、 董先各出騎突擊,賊衆大潰,遂復鄧州 飛遣憲復隨州,敵將王嵩不戰而遁。 進兵鄧州,距城三十里,遇賊兵數萬迎戰。

楊 再興 十年,金人渝盟入侵,憲戰潁昌、戰陳州皆大捷,復其城。 與戰,死之。 憲繼至,破其潰兵八千,兀朮夜遁。 憲將徐慶、李山復捷于 兀朮頓兵十二萬于臨潁縣, 臨潁 東

破其衆六千,獲馬百匹,追奔十五里,中原大震。

巃 以優賞,卒無人應。 秦僧主和 ,命飛班師,憲亦還。 聞飛嘗欲斬王貴,又杖之,誘貴告飛。 未幾,層與張俊謀殺飛,密誘飛部曲 貴不肯,日:「爲大將寧免以賞 ,以能 告飛 事

罰用人,苟以爲怨,將不勝其怨。」檜、俊不能屈,俊劫貴以私事,貴懼而從。 時又有王俊者,

善告計,號「鵰兒」,以姦貪屢爲憲所裁。 檜使人諭之,俊輒從。

俊,以爲密院 、妄言憲謀還派兵、令告王貴,使貴執憲。 檜、 俊謀以憲、貴、俊皆飛將,使其徒自相攻發,因及飛父子,庶主上不 無推勘法。 俊不聽,親行鞫煉,使憲自誣,謂得雲書, 成,告燴械憲至行在,下大理寺。 憲未至,俊預爲獄以待之。屬吏王應求白張 命憲營還兵計。 疑。 俊自爲狀付 憲被掠

無全膚,竟不伏。

其書皆 至。 十二年, **膾奏召飛父子證憲事。** 万俟禼 :無有,乃妄稱憲、貴已焚之矣,但以 追復龍神衞四廂都指揮使、閬州觀察使,贈寧遠軍承宣使,錄其家。 誣飛 使于鵬(t)、孫革致書憲、 俊手自具獄 帝曰:「刑 所以止亂, 衆證 貴, **吳**獄。 令虚· 勿妄追證,動搖人心。」層矯詔召飛父子 申警報以動朝廷,雲與憲書規還飛軍 語在飛傳。 憲坐死,籍家貲。

張憲欲 虜婦 人佐 楊 殺之,再興 再 興, 酒 賊曹成將也。 再興率 日:「願執我見岳公。」遂受縛。 -衆直 入其營, 紹興二年,岳飛破成,入莫邪關。 官 軍 卻, 殺順夫, 飛見再興,奇其貌, 又殺飛弟飜 第五將韓順夫解鞍脫甲,以所 成 釋之,日:「吾不汝殺、 敗 再 興 走 躍 入澗

列

第

百

+ 七

楊

妆 以 忠 義 報 或 再興 拜

盡 俘 復 . 將 吏百 西 洲 京 山 險要。 襄 陽 餘 以 黨奔潰。 又得偽 圖 中原 造 齊所留馬 明 再興至 日,再戰于孫洪澗,破其衆二千,復長 萬 西京長 匹, 一獨聚數 水縣之業陽,殺孫都統及統制滿在,斬 + 萬。 中 凉 響應。 水,得糧二萬石以給 復至 一蔡州 焚賊糧 五 白 餘 軍

來,頓 孛 數 十合 ·堇、千戶百人。 派 兵 敗 十二 敵不 金 人于 萬于 支。 郾城 臨潁 再興 |再 興 戰 兀朮怒, 、以單 死,後獲其屍, 再 興以三百騎 騎 **八其軍** 合龍 虎 ٠, 大王、蓋 焚之,得箭鏃二升。 遇 擒 敵 兀 朮 于 小 天大王 不 商橋,驟與之戰,殺二千餘人,及萬戶撒八 ·獲,手殺數百人而還。 及韓常兵逼之。 飛遣子雲當 兀朮憤甚, 敵 併 力 復 鏖戦

保 統 西 . . . 南 領 義 路 牛皐字伯遠 郎 0 提 金 點 杜 充 再 刑 攻京 留 獄 守東京, 西 金 人攻江 魯 | | | 十 皐 山 討 人。初爲 ·餘戰皆捷 西 劇 賊 楊進 自 射士,金 荆 于 門 加 魯山 北 果州 人入侵, 歸, 敗之。轉西道招撫使。 團 皐潛 練 戰 皐 聚 使。 \equiv 軍 一捷,賊黨奔 于 衆與戰,屢勝, 京城留守上官悟 寶豐 之宋村,擊敗 潰 累遷 偽齊乞師 西 道 辟 楽州 芝。 總管 爲 H 于金入寇 刺 統 翟 轉 史、 興 和 制 \forall 州 表 兼 防 京 軍 補

禦使,

充五軍都統制。

又與字堇戰魯山鄧家橋,

|皐 設伏要地, 自屯丹霞以待。 敵兵悉衆來, 伏發,俘其酋豪鄭務兒。 遷安州觀察使, 尋除

蔡 唐 州 信 陽 軍 鎭 撫 使、 知蔡州 遇)敵戦 輒勝, 加 親衞 大夫

郢 隨 州 州 安撫使,尋改神武後軍中 會 ,飛遣皐行,裹三日糧。糧未盡,城已拔,執嵩斬之,得卒五千,遂復隨州 岳 飛 制置 江西、 湖北, 部統 將由 領。 襄、 偽齊使李成 漢規中原, 合金人入寇, 命鼻隸飛軍。 破襄陽 飛喜甚, 六郡 即辟爲唐鄧 李成 敵將 在襄陽 王嵩 在 襄

飛遣皐以騎兵擊破之,復襄陽。

也。 大振 「牛皐在 』阜追擊三十餘里,金人相踐及殺死者相半,斬其副 金 此, 八攻淮 爾輩胡爲見犯? 西,飛遣阜渡江 .」衆皆愕然,不戰而 , 自提兵與阜 ·會。 潰 時僞 飛謂 齊驅甲騎 都統及千戶五 皐 曰:「必追之, 五 千薄廬州 人,百戶數 去而 皐遙謂金將日: 復來, 一人, 軍聲 無益

擒 司 左軍統制,加龍、神衞四廂都指揮使 飛斬首 廬州 平, 函送都督行府。 進中侍大夫。 從平楊么,破之。 除武泰軍承宣使,改行營護聖中軍統制,尋充湖北、京西 么 技窮,舉鍾子儀投于 水,繼 乃 自仆。 皐 捘 水

樞 行 金 府以阜兼提舉一行事務。 人渝盟,飛命阜出師戰汴、許間,以 宣 |撫司罷,改||別駐箚御前左軍統制,升|||定府路馬步軍 功最,除捧日天 武四廂都指揮使、 成德 軍 承 宣 使,

四六五

副 統 總管,轉寧國軍承宣使、荆湖南路馬步軍副總管

官 至 一侍從, 紹 興 十七年上巳日,都統制田師中大會諸將, 幸不啻足。 所恨南北通和,不以馬革裹屍, 阜週毒, 亟歸, 顧死牖下耳。」明日卒。 語所親曰:「皐年六十一 或言秦檜使

毒

州 師中 興 捷 政 取 興 追 會 于 捷 河 至 示. 太行 東 亚 京 李 于中牟。 初 邦 |皐云 西 興 州 比 傑、李寶 檜主 之邵原 捷 忠義 州 于 捷 縣。 和,未幾, 河南 及 手 張 等經略 兩 黄河上。 憲 , 金張 未幾, 府, 復 河豪傑趙 潁 太保、成 捷 昌、淮寧府; 李寶捷于曹州, 東 金渝盟入侵, 于永安軍 孟邦傑復永安軍, 西京、汝、鄭、願、陳、曹、光、察諸郡; 雲、李進、董榮、牛 太保等以所部降, ; 王貴之將楊成 梁興 帝手札賜飛從便措置。 捷于宛亭, 捷于渤海 在河 其將 顯、張峪等破 北 取 楊遇復南 又 復鄭州 懷、 破破 金高 衞 太尉 金 城軍, 州 扇; 張 飛乃命學及王貴、 人 應、韓清復 又遣梁興 大破 兵 于 董先、姚 垣曲 于 又 濟 與 兀 北軍 劉 源 渡河, 西京。 政捷 叉 政 /捷于 ·, 斷 喬握 捷 于潁昌 于 糾合忠 董先、 山 沁水 西京。 阜 及 堅等復 東 義社 (元), 傅 楊 河 銐 再

帛

馬綱之路,金人大擾。

未幾,岳飛還朝,下獄死,世以爲恨云

胡閎休字良殼,開封人。 宣和初,入太學。 時方諱兵,閎休著兵書二卷。 靖康初,創知

兵科,閎休應試,中優等,補承信郞。

懷檄而走, 遷,范瓊散勤王師,閎休曰:「勤王師可進不可退。」檄令隨軍而無靖康年號,閎休得之泣下, 金人圍城,閎休分地而守。二帝詣金營, 從辛道宗勤王。 南渡, 以忠義進兩官。 **閎休欲結義士劫之**, 湖湘盗起,或曰招之便、或曰討之便, 何奧禁止之。二帝北

飛辟閎休爲主管機宜文字。以誅鍾子儀功,進成忠郎。

飛被誣死,閎休發憤杜門,佯疾十年,卒。 有勤王忠義集藏于家。 孫照,德安太守。

以戰沒,或以憤卒,而 甲兵糧餉之資,提數千烏合之衆,抗金人數十萬之師,卒完一州,名震當時,壯哉! 于諸將,無援而 一彥棄家赴國,累破堅敵,威振河朔; 論 日:王德素有威略,蚤隸劉光世,審其不可恃,晚從張俊,竟以功名顯,其知所擇哉。 戰死,亦可惜矣。 憲以不證飛獄寃死,悲夫! 張憲等五人皆岳飛部將,爲敵所畏,亦一時之傑也,然或 晚奪兵柄,使之治郡,用違其材,惜矣。 魏勝崛起,無 然見忌

列傳

第

百二十

七

胡

閎

休

校

勘記

校勘記

- 劉錡 原作「劉琦」,據繫年要錄卷一三九、北盟會編卷二〇五改。
- E 上黨人 繫年要錄卷八、北盟會編卷一九八載汪彥行狀都作「河內人」。 前書叉說:「世爲高平

大姓,後徙居厚懷。」上黨、高平皆屬河東路。 草懷即懷州、宋爲河內郡防禦。

- 住 口關 原作「注口關」,據繁年要錄卷五〇、北盟會編卷一四九、卷一九八改。下同。
- 保康軍承宣使 按繫年要錄卷六六、北盟會編卷一九八王彥行狀都作「保大軍承宣使」,王彥

除 保康軍承宣使在紹興六年,見繫年要錄卷九八及同上行狀。 疑此有誤。

(美) 高文富 章顯宋南渡十將傳卷四魏勝傳、李幼武四朝名臣言行錄別集卷一 三魏勝條都作「高文

多

- (台)不知兵 「兵」字原脫,據宋南渡十將傳卷四魏勝傳補。
- (1) 于鵬 原作「子鵬」,據繁年要錄卷一 四三、岳珂金陀粹編卷八行實編 年改。
- 沁水 原作「心水」,據北盟會編卷二〇七、金陀續編卷二二襄陽石刻事蹟之一改。

宋史卷三百六十九

列傳第一百二十八

張俊 從子子蓋 張宗顏 劉光世 王淵 解元 曲端

政和七年,從討南蠻,轉都指揮使。 張俊字伯英,鳳翔府成紀人。 好騎射,負才氣。 宣和初,從攻夏人仁多泉,始授承信郎。 起於諸盜,年十六,爲三陽弓箭手。 平軍州賊李太

及河朔、山東武胡羣寇,功最,進武德郎。

部數百人突圍而出,且行且戰,至鳥河川,再與敵遇,斬五百級。 中以日不利,急令退保。 援,屯榆次。 靖康元年,以守東明縣功,轉武功大夫。 金人攻太原,城守,命制置副使种師中(1)往 金人以數萬騎壓之。 **俭人諜**俊計不行,悉兵合圍,攻益急。 俊時爲隊將,進擊,殺傷甚衆,獲馬千匹,請乘勝要戰。師 榆次破,師中死之。 俊與所

金人圍汴京, 高宗時爲兵馬大元帥,俊勒兵從信德守臣梁揚祖勤王。 高宗見俊英偉,

列

傳第

百

=+

八

張纶

州 擢 元 命 印府後 俊爲都統制討之。 軍統制,累功 轉榮州刺史。 與數騎突圍撓戰,諸軍爭奮,賊遂殲。進桂州團練使, 建炎元年正月,從高宗至東平府。 時劇賊李昱據克 尋加貴州防

謀爾。 中書舍人張澂,自汴京齎蠟詔,命高宗以兵付副帥還京,高宗問大計,悛曰:「此俭人詐 今大王 居外,此天授,豈可徒往?」因請進兵,高宗許之,遂如濟州

禦使(三)。

出 高宗涕泣 姦謀自破。」途徙州治。 開 高宗以俊忠勞日積 啓乾龍 不許。俊曰:「大王皇帝親弟,人心所歸,當天下洶洶,不早正大位, 節,迫夜,有告高宗,欲俟元帥謁香劫以叛。 遷拱衞大夫。 賊術窮,黎明,引軍北遁,俊勒兵追殺之。 旣而|汴|京破,二帝北遷,人心皇皇, 羣議集諸軍屯備,俊曰:「元帥不 進徐州觀察使。 無以稱 俊懇辭勸進,

司, 除帶御器 目 白 以俊爲御營前軍統制, 耿 南仲奏之,表三上。 械。 遣還京迎隆祐太后。 高宗發濟州 俊便道 扈行。 權秦鳳兵馬鈴轄。 至應天府, 高宗始即 零奉太后及六宮以歸, 位 初置御營

皆平之。 時江、淮羣盜蜂起,俊討杜用于淮寧, 落階官、 除正 任 觀察使。 二年,升秦鳳路馬步軍副總管,尋破秀州賊數萬,縛 趙萬、郭青于鎭江, 陳通于杭州 蔣和尚等于蘭

徐明斬之。

進武寧軍承宣使。

俟 國勢定, 帝 如 湯州 大舉未晚。」俊又請移左藏庫于鎭江。 召諸將議恢復,俊曰:「今敵勢方張,宜且南渡,據江爲險;練兵政,安人心, 旣 而敵掩至,已逼近甸,俊亟奏飭甲乘,從

帝

如

臨安

罪,俊 引 惟 前 赴 于內殿,帝嘉勞久之,拜鎭 所部 以 秦 軍 鳳 ,俊以精兵翼之,光世次之。 苗 死報 泣 傅、 八千 ,命他將領餘兵。 拜, 劉正彥反,俊時屯兵吳江縣。 人至平江。 國。」劉 且曰:「此須侍郎 光 世以所部至,俊釋舊憾。 張浚語俊以傅等欲危社 俊知其僞, 西軍節度使、御前 濟以機術,毋驚 戰于臨平, 拒不受。 傅等矯詔加俊捧日、天武四廂都指揮使,以三百人 右軍都統制,尋爲浙東制置使。 傳等兵敗, 開城以 動 三軍洶洶, 韓世忠來自海上,俊借 一稷,泣 乘輿。」呂頤浩至,俊見之,亦涕泣曰:「今日 製行下,俊大慟。 俊諭之日「當詣張侍郎 出。 世忠、俊、光世入城,見 軍 浚諭 與之俱。 以 決策起兵問 求決。」卽 世忠為

密皆殊死戰。 城下 義 引兵至。 誰 先; 金 俊使統 人分兵深入,渡江攻浙,杜充棄建康,韓世忠自鎭江退保江陰。 卿捨朕,則前 兀朮攻臨安, 制劉寶與戰,兵少卻,其將党用、丘橫死之,於是統制楊沂中、田 沂中舍舟登岸力戰, ;功俱廢。宜戮力共扞敵兵,一戰成功,當封王爵。」癸卯除夕, 金兵至 帝御樓船如温州,留俊於明州以拒敵。 殿帥李質以班直來助,守臣劉洪道率州兵射其旁,大破 帝賜親札曰:「朕非卿,則倡 帝如 明州,俊自越州 師中、統 領 趙

列

毋

驕

惰

慮敵

必

再

殺 數 千人。 金 呼人 至, 下令清野,多以 至砦計事 |俊 令小校往。 輕 舟 伏 、弩,閉關自守。 金人與語,欲如越州請降,俊拒之。 戒將士

大當 74 金 年 人奔北,死 E 旦,忽 西 於江 風 起, 者 金 無數,夜拔 人乘之, 砦 果 去, 復 文明 屯 餘姚 州 , 俊與劉 且 言請濟師 洪道坐城樓上,遣兵 於 元术。 後 七 日,敵 掩擊,殺

傷

引 兵 趨 入台州 明州 居民去者十七八。

月 制 陳思恭隸之, 改御 未 幾 前 [羣盜 江、 五. 軍 浙羣盜蠭 悉平, 且令 爲 神 兩浙 改江 武 軍 起, 宣 , 南招討使 俊即 無使周 授俊 本軍為神武右軍 兩浙 望 以 西 兵屬 路、 江南 俊, 東路制 ·都統制,除檢校少保、 劉 光 世、 置使, 韓 世 忠之外, 以所 部 招 定江 諸)收羣 將皆受節 昭慶 **盗** 軍 命後 節 度 度 軍 統 六

江 范宗 紹 湖湘 興元 尹 、請遣將致討,俊慨然請行,遂改江、准路招討 十餘州 年,帝至會稽 連兵數萬,有席卷東 時金人殘 南 意 孔 多造 彦 舟 據 符讖蠱惑中外, 武陵、張用據 使 襄漢; 圍 江州 李成 久未解,時 尤 悍, 方患 彊 據 十月,

浙西

以 賊 次矣。」 細 書狀報之,賊以俊爲怯。 成 黨 乃斂兵,若無 馬 進 在 筠州 人者, 豫章介江、筠之間,俊聞命就道,急 金鼓不動, 俊課知賊怠,乃議戰。 令將士登城者斬。 岳飛爲先鋒,楊沂中由上流徑絕生米 趨 居月餘 豫章 , , 進以大書牒來索戰 且 日:「 我 已 得 洪州

騎數千 渡,出賊不意,追奔七十里,至筠州。 授沂中及陳思恭, 俾從山後夾擊,以午爲期。 賊背筠河而陣,俊用楊沂中計,親以步兵當其前, |俊與賊鏖戰至午,精騎自山馳下, 賊 精

駭亂退走,大败。

衆數萬俱潰,馬進爲追兵所殺,成北走降劉豫,諸郡悉平。 據 興 直 全功。」 俊未拜親韶 一趨山 石幢坡,憑山以木石投人。俊先遣游卒進退,若爭險狀以誑賊,俊親冒矢石,帥衆攻險,賊 國軍等處羣盜聞俊兵至,皆遁去。 旣 [椒,殺伏奪險,乘勝追至江州 復筠州、臨江 ,已追至北奉新 .軍,捷奏,帝賜御筆,謂:「宜乘賊勢已衰,當官軍已振,驅除剿戮,速收 樓子莊。 俊引兵渡江至黃梅縣,親與成戰。成懲奉新失險之敗, 成勢迫,絕江而遁,號俊爲「張鐵山」。復江州。 賊黨商元據草山,挾 拜太尉。 、險設 伏, 俊遣步兵從間道 已而

敵將引 也,以天下兵守一州,非也。 將 渡,遂薄諸 建 康 何之?惟向前進一步, 几 [年十月, 金人與劉豫分道入侵。 先是諜至,舉朝震恐,或請他幸。 去, 而 淮 俊繼遣王進 改准 ,大敗之,獲其 西宣撫使。 曰:「敵旣無留心,必逕渡滩去,可速及其未濟擊之。」進往,敵果北 庶可脫。 瀕江相距逾月, 敵不得入。 公但堅前議足矣。」遂以俊爲兩浙西路、 當聚天下兵守平江,徐爲計。」鼎曰:「公言避非策,是 俊遣張宗顏潛渡至六合, 出其背。 江南東路宣撫使,屯 俊謂趙鼎曰:「避

列傳

第

度使。 灣遇猊大兵,與戰,殺獲略盡,降者萬餘人,猊僅以身冤。 王瑋、田 了犯濠 五. 帝曰:「卿議論持重,深達 年,劉麟入寇,俊與楊沂中合兵拒于泗州。 師中等, 、壽,韶倂以淮 自定遠軍次越家坊,遇劉猊左右軍,擊走之。 西屬俊, 楊存中亦聽節制,與俊合兵拒敵。 之敵情; **兼聞挽強之士數萬,報國如此,股復何慮。」又曰:** 六年,改崇信、奉寧軍節度 拜少保,加鎭洮、崇信、奉寧軍節 俊率大軍鼓行而前,至李家 俊分遣存中與張宗顏 劉麟兵十

拜 世忠、俊,陛下倚此二大將,譬 可一手不盡力邪? 少傅[四] 七年,改 淮南 西路宣撫使任了置司盱眙。 」命俊自盱眙屯廬州。 如兩虎,固當各守藩籬,使寇不敢近。」帝曰:「正如左右手,豈 八年,金人請寢兵,許之。 俊與韓世忠入見,議移屯。 賜俊「安民靖難功臣」 秦檜奏:「臣嘗語

羣

臣

謂股待

.卿獨厚,其仰體眷懷,益思勉勵。」

鹿邑等地,師還。 繼 而 俊引軍入城,金人棄城遁,父老列香花迎俊,遂復亳州,留統制宋超守之。 金人三路都統自東、南兩京分道來侵,抵亳州 九 年多至, 金復渝盟, 年, 酈瓊在亳州, 再破河南,圖順昌府,命俊策應劉錡。 俊以大軍至城父, 北渡 河, 都統制王德下 俊收宿、亳諸軍擊之、盡 俊督軍渡江,金人引退。 符離, 乘 俊引軍還壽 勝趨亳與俊 復 衛眞、

春,進少師,封濟國公。

江 錡 巢縣,遂復昭關。 於全椒。 先登,俊宿中流。 會兵,敗金人于柘皋。 ,論諸將曰:「先得和州者勝。」
三德願爲諸軍先, 一年二月,兀朮入合肥,漸攻壓陽,江東制置大使葉夢得見傻,請速出軍。 未幾, 敵斷 使左軍統制趙密偃兵篁竹,出六丈河以分金勢。 德抵城下, 石 梁以 拜樞密使。 近担俊, 金人退屯昭關。 俊疾作,力疾引衆涉流登岸,追擊之。 俊知朝廷欲罷兵,首請納所統兵。 後三日,復敗金將韓常于含山 士鼓譟而 行。 敵已據之, 德率衆渡 張守忠以五百騎敗金人 議賞宿、亳功,俊部 王德與楊存中、劉 命關師 俊遣兵渡 古復 梁石

家, 權付俊。 罷爲鎭洮、寧武、奉寧軍節度使,充醴泉觀使。 亦俊力也。 俊 力贊和議,與秦檜意合,言無不從。 歲餘,俊無去意 加太傅,封廣國公,尋進益國公。 ,故檜使邈攻之。 尋進封清 薦士大夫監司、郡守者甚衆,雖劉子羽自謫籍起 初,檜以俊助 十二年十一月,以殿中侍御史江邈論之, 河郡王 和議, 一,奉朝 請 德之, 故盡罷諸將,以兵

將王德、

田師中、劉寶、李横、馬立、張澥六人同日首受上賞。

軍 秩者十三人。 二十一年多,帝幸其第,拜太師,以其姪清海軍承宣使子蓋爲安德軍節度使,其他子弟 十三年, 敕修 甲第, 遣中使就第賜宴, 侑以敎坊樂部。 十六年, 改鎭靜江 、寧武、靜海

列 傳 第 百二十 八 張 饄 遷

南渡後,

俊握兵最早,

屢立戰功,與韓世忠、劉錡、岳飛並爲名將,

四七五

世稱張、韓、劉、岳。

一一四七六

獨 然豪、壽之役,俊與錡]助膾成其事,心術之殊也, 有隙,獨以楊沂中爲腹心,故有濠梁之劫。 遠哉 帝於諸將中眷俊特厚, 然警敕之者不絕口。 岳飛寃獄,韓世忠救之,俊 自淮西入

見,則教其讀郭子儀傳; 召入禁中, 戒以毋與民爭利,毋興 八土木。

二十四年六月薨,年六十九。 **駿視朝三日**, 斂以 一品品 服, 帝臨奠哭之慟。 追封循王。

子五人:子琦、子厚、子顏、子正、子仁。

子蓋字德高。 父宏,應募從俊軍河上。金人破開德府,宏戰死。 子蓋初從韓世忠討苗

傅,補承信郎,累功遷武功郎。

|俊撃/祝于 紹 興 (六年,劉猊大舉入寇,過定遠縣,將趨宜化窺江,詔遣俊會劉光世軍剿 ,藕塘,授閤門宣贊舍人。明年,改昌州刺史、江南東路馬步軍都總管。 十年,金人 子 蓋從

再取 河南 l",以興 、復宿、亳功,遷登州防禦使兼宣撫司衙兵副統制

金 人退屯昭關。 年二月, 會劉錡自東關 兀朮入廬州 引兵出清溪邀擊金人,俊遣子蓋與崎會,大戰於柘阜,敗之, 攻含山縣,漸攻歷陽。 除興 俊遣兵渡江,子蓋從王德馳入和州 寧軍承宣使。 和議成,改建康府駐

約御前 軍 一勢赫 諸軍都統制。 兀 朮 復 改褒州 十三年, 子蓋又敗之于周梁橋, 授龍神衞四廂都指揮使、 兩浙西路馬步軍都總管。 帝幸俊

第,授子蓋安德軍節度使。

金人復整軍來戰,子蓋 率精銳數千騎擊之,謂麾下曰:「彼衆我寡,利在速戰。」遣統制張 **思**取略陣,**即中流矢,** 漕臣襲濤謂之曰:「敵衆十倍,兵力不支,宜張虛聲攻准陽,使之必救,則海州可解。」子蓋 日:「事急矣! 曰:「彼若不救,將如之何?」乃亟趨漣水,取便道以進。次石湫堰,金人陳萬騎於河東,子 三十二年春,金人攻海州急,以子蓋爲鎭江府都統往援之,即日渡江,馳至楚州 」奮臂大呼,馳入陣,諸將繼之殊死戰。 再率精銳擊之,獲其車馬、鎧仗萬計,退屯泗州 賊大敗,擁溺石湫河死者半,圍遂解。 准

將蕭鷓巴、耶律造哩將其衆來降。 孝宗 贈太尉, 諡恭出 (即位, 召對,賜鞍馬、鎧甲、束帶,且令招集勇敢,相時而動。 尋以疾還鎭江,授檢校少保、淮東招撫使,未上,卒,年五 子蓋受命還,招金大

子蓋從慘征討藕塘、柘阜,雖多奏功,未能出諸將右,惟海州 捷可稱云。

監関郷 張宗顏 酒稅,積官至涇原副將、權殿前司統轄。 字希賢,延安人。父吉,爲涇原將,解宣威城圍,死之。 御營軍統制張俊選爲統領,從俊討浙西寇 宗顏以父恩補三班借職,

列

傳

秀州 軍 校 徐 明 辽 城 叛 宗顏 夜 襲其城, 明遁 0 轉忠 州 刺 史, 遷 御 前 中 軍 統

求劾宗顔 玉 城 隆 不 進 觀 金 ", 敗之。 勍又掠建州 攻 三將並出, 明 州 遷環慶路馬步軍副總管、神武 宗顔 不能 宗顔 破其前 平數千之潰卒, 趨 南 軍 劍州 盜 楊勍 與勍遇,遂 何以示 破 松溪, 右軍統制, 敵 歸。 命宗顔 貶二 盜 改麟州 獝 秩。 及 未 李捧、 卒, 觀 從俊討李成 謬 繁使 陳思恭 言已 撃 退 討 則成 之。 侍 將 宗顔 御 馬 史 次浦 沈 進 與

州 屍 准 防 满 西 梁使。 急。 野 僞 |齊挾|金人攻宣化鎭,俊遣|宗顏潛渡江,出其後襲之,不勝。 猊 督府 僅 繼以兵襲擊淮北, 以 張浚遣楊沂中與俊合,檄宗顏 身遁 擢 龍 神 衞 復遷崇信軍承宣使、宣撫司前 四廂 都指 揮 使、武信軍承宣 自 泗州為後繼 使 軍統制 與猊遇于李家灣,大破之,橫 俊庇之,以捷 偽齊入寇, 聞 詔張俊 遂 加 沂 解

傳金 知 此 廬 州 張 , 鉄 總 Ш 帥 第也 事 紹紹 敵數百 興 九年卒,年四十四 騎 抵 城下, 宗 顏 以 騎 贈保靜軍節度使,盜壯敏。 百 餘 禦之,敵退。 有至自准北者,

防禦使 劉 光 方臘 世 字 平叔 反 延慶爲宣撫 、保安 軍 人,延 司都 慶 統 次 子。 遣光世自將一 初以蔭 補 軍趨衢、婺, 班 奉職,累陞 出 其 鄜 不意 延 路 破之。 兵 馬 都 賊 監 平, 蘄 州

耀州觀察使,陞鄜延路兵馬鈴轄

宣 使。 時 延慶 有 事 造諸將擣虛趨燕,以光世 燕薊 ,光世從延慶取易州 爲後 ,授奉國軍承宣使。 繼 光世 一不至,諸將失援 金將郭藥師降,除威武、 而潰,降三官 奉寧軍承

取 也 河 卽 出出 麾 賊張迪掠濬州境,詔光世討之。光世曰:「賊烏合,非有紀律,佯北以邀之,其亂可 一騎退。 賊競進,光世引騎貫其中, 賊大潰。復承宣使,充鄜延路馬步 /軍副總管。

靖

康

元

年,金兵攻汴京,夏人乘間寇杏子堡。

堡有

兩山對峙,

地險阨,光世據之,敵至

敗 之,別道 以 有 蕃 詔 去。 止 官來自汴京,謂 勤 擢 趨 一件 王 虢 衞 一兵,光世以爲宜 遂 馬軍都虞候。 至濟州 二帝決 謁康王, 圍南 速進,不可以詔示衆。 金再攻汴京,光世入援,聞范致虚傳檄諸路, 去,衆稍安,進屯 命爲五 軍都 提舉 陝府。 旣 而 潰兵至, 致虚欲合五路兵進與金戰,光世 具言京 城 事 議引兵會之。 衆懼, 光世 難 會 矯

州,遇 李昱 德 救之得 王 望其 遷奉 即皇帝位 趸。 陣 國 軍 日:「官軍 遇循 節 ,命爲省 慢使。 江 而 不整,可 上,光世整兵追至 平鎭江 視 陵寢使,尋爲提舉御營使 破 叛兵,改滁濠太 也。」 一時湖水涸 江 州,斷其後軍 年州、 ,賊越湖 司 無為軍 出官軍 ·破之。 行事務、行在都 江 後,官 寧府制 遇 復 東 軍 下 置 亂 巡 -, 又追 使。 光世 檢使。 討 擊於江寧。 幾被執,王 張 斬 遇於池 山 東 賊

一年,以 功 加 檢校 少保, 命討李成。 光世以王德爲先鋒,與成遇於上蔡驛口橋,敗之。

列

傳

第

百

__

+

八

劉

光

世

成 ル 人者以 收 散 其官爵 卒 與之。 光世 辺 士爭奮 儒 服 臨 万,再 軍,成遙見白 戰皆捷,成 遁 袍青蓋, 倂兵圍之, 德 ,執其謀主 陶 子 思。 潰 加 圍 檢 拔 校 光 少 世 傅 以 出。 下令得

置 使,屯鎮 帝 在 揚州 江 府,控扼 金騎 掩至天長, 江 口。 尋加檢校太保、殿前都 光世 迎敵 《,未至 而 軍 潰。 指 揮 使 帝倉卒渡江,命光世爲行在五軍制

遇苗 不從; 仲 降之。 追 翊、馬柔吉軍于臨平,與韓世忠等破之。 苗、 傅至崇安縣,盡降其衆,傅僅以身免。 呂頤浩遣使至鎭江 劉 爲 命光 世爲江東宣撫使,守太平及池州,受杜充節制。 說之,乃引兵會于 丹陽。 逆將范瓊被執,張浚使光世撫定其衆,又招賊 至行在,遷太尉、御營副使。 置使。 兵進,光世以選本爲游擊,仍分軍殿後 張浚在平江,馳書諭以勤王 光世言受沈節制有不可者 光世遣王德 助

蔽 退 保 如 可使匹馬不還。」 虔州 光世 此 隆 横 祐 太后 旣 行 者 至 馮 檝 一,以前 在 日 南昌 貽書光世,言:「賊深 置 無抗 酒 光世不能用, 高 議 近,後 者謂 金 金 無 人自 人自 襲逐 自信州引兵至南 遺州 入,最兵家之忌。 嘶、 也 渡江 黄渡江, 太 尉 爣 選 凡三日, 陸行二百里可至, 康 一精兵 進 無 酈 自 則 知之者。 瓊圍固始縣, 將 距 Ц, 退 而 比 則背 命光世移屯 開 金 光世遣 人至,遂 江, 路 令 百 歸, 無 人招降之, 江州 遁 伏兵掩 利 太 爲 屛 而

(`,帝怒,詔

毋

入光世

一殿門,光世始受命

又遣王德擒妖賊王念經于信州。

忠、俊兼領。 控制一路,若但守鎭江,則他郡有警,不可離任。 便求佚,中外所憤,帝釋不問,加寧武軍節度使、開府儀同三司以遣之。 司。」時光世慮金人必過江,故預擇便地,帝覺之,止許增辟通判。 名其軍, 時光世部曲 時韓世忠、張俊兼領浙西制置使,光世復言本路兵火之餘,不任三處需求,遂罷世 命充御前巡衞軍都統制。召赴行在,授浙西安撫大使、知鎭江府。 .無所隸,號「太尉兵」,侍御史沈與求論其非宜。 望別除守臣,光世專充安撫使,從便置 會御營司廢,乃以「巡衞」 右諫議大夫黎確疏其擇 光世乞便宜行事, 光世言:「安撫

承、楚,光世知其衆思歸,欲攜貳之。乃鑄金銀銅錢,文曰「招納信寶」。獲敵不殺,令持錢 遭王德、酈瓊將輕兵以出,時奏殺獲而已。 楚州破,命光世節制諸鎭,力守通、康。完顏昌屯 文示其徒,有欲歸者,扣江執錢爲信。 時金兵留淮東,光世頗畏其鋒,楚州被圍已百日,帝手札趣光世援楚者五,竟不行;但 歸者不絕,因創「奇兵」、「赤心」兩軍,昌遂拔砦去。

屯田 兼淮南宣撫使,領眞揚通承楚州、漣水軍。 ,迄不行。 脹俊討字成,又命光世分兵往舒、蘄擣其巢穴,光世以江北盜未平爲辭。 紹興元年,金人渡淮,眞、揚州皆闕守,命光世兼淮南、京東路宣撫使,置司揚州,措置 郭仲威謀據淮南以通劉豫,光世遣王德擒之,并

列

傳第

其衆。 范宗尹言:「光世軍多冗費,請汰其罷軟者。」帝曰:「俟作手書與之,如家人禮 庶幾

不疑」

聚衆千 撫使 可爲瑞,此 即 光世以枯秸生穗爲瑞,聞于朝。帝曰:「歲豐人不乏食,朝得賢輔佐,軍有十萬鐵騎 餘,掠 ,給錢糧,增將吏,皆從其請。 外不足信。」准北人多歸附者,命光世兼海、泗宣撫使以安輯之。五湖捕魚人夏寧 人爲食,郭仲威餘黨出沒淮南,邵青據通州,光世皆招降之。 仍給鎭江府、常州、江陰軍苗米三十七萬斛,爲軍中一 光世請鑄准東宣 乃

歲費 領 浙 西 以繒帛、方物爲獻,帝命分賜六宮,中丞沈與求以爲不可, 爲 年,復命移屯揚州,時至鎭江視師。 根本計。 右司諫方孟卿劾之,乞召宰執與議,使之必往,光世獨以乏糧爲辭。 光世不奉詔,入朝言:鄰寇有疑,或致生事,願仍 命還之。

成 世 1111 軍月 功, 軍 糧 呂 費二千萬緡, 乞差官考覈。 不足,若驟移,必潰,先犒軍 頤 浩 詔 與光世有故怨, 兩漕臣措置鎮江 頤浩將出視師, 酒 脱務, 而後料簡 詔御史江躋、度支胡蒙至軍 助其軍費; 首言光世兵冗不練,乞移其軍還闕。 可也。」頤浩至鎭江,光世軍果告乏, 又罷織御服羅 點校, , 省 七 終不得實。 百 萬緡以助之。 頤浩 帝方倚其 帝曰:「光 奏光

寧武、寧國軍節度使。

光世奏部將喬仲福、斯賽防江有勞,詔進一

官,許回授。

光 世固乞轉行,給事中程瑀持不可, 又言光世兵未渡江、金人或渡淮、江、浙必震。

世方遣人按行宜興湖洑之間,以備退保。 韶以章示之,光世 一遷延如故

途趨白鷺店。 下,姦人入城焚府庫,光世擒之,皆云世忠所遣。 命光世與韓世忠易鎮,同召赴闕,授檢校太傅、江東宣撫使。 世忠遣兵襲其後,光世以聞。 帝遣使和解,仍書賈復、寇恂傳賜之。命爲江 世忠屯登雲門,光世引兵出,懼其扼己,改 世忠旣至鎮江城

東、准西宣撫使,置司池州,賜錢十萬緡。

築劉龍城 世忠 賊 俊、韓世忠權相敵,且持私 二帥 乃退。 泣 南 辺 皆復書致情。 劉豫將王彦先揚兵准上,有渡江意云。 少嫌 謝 渡 後, (十) 請 光世奏鄜延李脩充閤門祗侯,言者論其涉 不釋,然烈士當以氣 以窺准西 以所置准東田 諸大將封妾自 光世始移軍太平州以援世忠。 光世 隙, 帝遣侍御史魏矼 易淮 遣 I此始。 王師晟 義 西 和許,先國家而 田 會改 [,給事 破之, 公神武 中晏敦復 加保靜軍節度使,遂領三鎭 軍爲行營護軍 光世扼馬家渡,遣酈瓊屯無爲軍,爲濠、廬援, 至軍中,諭以滅怨報國。 後私 金兵退, 私,罷之。 言其擾民而 響。」復諭 光世 , 以光世所部稱左護軍 金人、劉豫入侵,時光世、張 入覲,遷少保。 。 以 光 武 止; 又請並 分寇恂、賈復之事 光世乃移書二帥, 封 其三妾爲孺 帝曰:「卿與 劉

張浚撫淮上諸 屯, 劉豫挾金人分道入侵,命光世屯廬州以招北軍, 與韓世忠、 張俊鼎

太平州 敗之。 子孫,將卒多出其門,罷之恐拂人心。」遂遷護國、鎭安、保靜軍節 斬以徇。」光世不得已,駐兵與沂中相應, 立,楊沂 張浚入對,言光世驕惰不戰,不可爲大將,請罷之。 中將精卒爲後距。 浚命 呂祉馳往軍中督師, 劉猊 驅鄉民僞爲金兵,布淮境。 光世 已舍廬州退,浚遣人厲其衆曰:「若有一人渡江, 遣王德、酈瓊領兵自安豐出謝步 帝命與趙鼎議,鼎曰:「光世將家 光世奏廬難守,密干趙鼎,欲還 l'度使。),遇金將三戰,皆 卽

劉豫。 之。初,光世麾下多降盜,素無紀律;至是,督府命呂祉節制其軍。 賜甲第一區,以兵歸都督府。公輔又言光世雖罷,而遷少師,賞罰不明; 賜罷斥。 又繳還賜第之命。帝曰:「光世罷兵柄,若恩禮稍加,則諸將知有後福,皆效力矣。」卒賜 右司諫陳公輔劾其不守廬州,張浚言其沈酣酒色,不恤國事,語以恢復,意氣怫然,乞 光世引疾請罷軍政,又獻所餘金穀于朝。拜少師,充萬壽觀使,奉朝請,封榮國公, 酈瓊殺祉, 中書舍人勾龍如淵 驅諸軍降

以 軍多潰。 援劉錡 如淵時 九 年,用講 進至和州,秦檜主罷兵,召還。 爲中丞,再論光世不可遣而 光世 和恩,賜號「和衆輔國功臣」,進封 請 李顯忠爲前 軍都統,又請王德自隸。 啃 光世入見,爲萬壽觀使,改封楊國公。 十年,金 雅國公、陝西宣撫使。 人圍順昌,拜太保,爲三京招撫處置使, 德不願 受其節制; 弟光遠疏其短于言 顯忠行至宿、泗, 疾革,乞免

其家科役,中書舍人張廣格不下。 卒,年五十四。 贈太師,官其子孫、甥姪十四人,諡武僖。

乾道八年,追封安城郡王。 光世在諸將中最先進。律身不嚴,馭軍無法,不肯爲國任事,逋寇自資,見詆公論。 開禧元年,追封鄜王

建炎初,結內侍康履以自固。 入對,言:「願竭力報國,他 日史官書臣功第一。」帝曰:「卿不可徒爲空言,當見之行事。」 又蚤解兵柄,與時浮沈,不爲秦檜所忌,故能竊寵榮以終其

身,方之韓、压遠矣。

將部將、權知鞏州寧遠砦。諸羌入寇,經略司討之,表淵總領岷山蕃兵將,興師城澤州。 王 | 淵字幾道,熙州人,後徙環州。善騎射。應募擊夏國,屢有功,累遷熙河蘭湟路第三

悉衆來爭,淵奮擊,大破之,追至邈川城〔云〕。移同總領湟州蕃兵將兼知臨宗砦,坐法免。 羌

言,賊果追之,伏弩卒發,應弦而倒。 「賊謂我遠來,必易我。明日爾逆戰而偽遁,我以強弩伏數百步外,必可得志。」 宣和三年, 劉延慶討方臘,以淵爲先鋒。 逐北至淳安,賊據幫源峒,遂圍而平之。 賊將據錢塘, 勢張甚。 淵諭小校韓世忠曰: 授閣門宣贊 世忠如其

列傳第一百二十八 王淵

舍人、權京畿提舉保甲兼權提點刑獄公事

猶 以出 繼 塞 從 遷武 延慶攻契丹。 功大夫、果州團練使。 重兵壁盧溝南,遣淵等數千人護餉道,戰敗爲敵所獲。 又從楊惟忠、辛興宗破羣盜高托山等,遷拱衞大夫、寧 已而 逃歸,

靖康元年,爲<u>眞</u>定府總管,就遷都統制。 吳湛據趙州叛, 淵討平之。 金人攻汴京, 河

州觀察使

東、 北宣撫使范訥統勤王兵屯雍丘,以淵爲先鋒。 尋以所部歸康王 一府。

忠、韓世忠以河北兵,劉光世以陝西兵,張俊、苗傅等以帥府及降羣盜兵,皆在行朝,不相統 改捧日、天武四廂都指揮使,進保大軍承宣 納謁曰:「參冢宰相公。」|邦昌始易紫袍延之政事堂,淵慟哭宣教。 明年, 始置御營司,以淵爲都統制,扈從累月不釋甲。帝如揚州,授龍、神衞四廂都指揮使, 張邦昌僭立, 康王如濟州, 命淵以三千人入衞宗廟。 使 淵至汴都,以朝服見邦昌, 康王卽皇帝位,淵與楊惟

陳通 一般抗州,降張遇於楊子橋;期年,羣盜略盡。 時羣盜蠭起,以淵爲制置使平抗賊,提兵四出 ,所向皆捷。 遷嚮德軍節度使。 平軍賊趙萬於鎭江,誅杭賊 惟趙萬、陳通等已招

其降,而復盡誅之。

光世見帝泣告。「淵專管江上海船,每言緩急決不誤事。 建炎三年二月, 金人攻揚州, 帝倉卒渡江, 淵與內侍康履從至鎭江。 今臣所部數萬, 二千餘騎,皆不能 奉國 軍節度使劉

濟。」淵忿其言,斬江北都巡檢皇甫佐以自解。 中書侍郎朱勝非馳見淵督之,乃始經畫,已

無所及,自是淵失諸將心。

少,乞括民匠營繕。尋自平江赴行在,拜簽書樞密院事,仍兼都統制。 先據姑蘇,將若之何?不如錢塘有重江之險。」議遂決。 帝欲如鎭江以援江北,羣臣亦固請。 淵獨言:「鎭江止可捍一面,若金人自通州渡(な), 命淵守姑蘇, 言戎器全缺,兵匠甚 命下,諸將籍籍。

淵。 而內侍康履頗用事,及淵入樞府,傅、正彥以其由宦官薦,愈不平。 先是,統制官苗傳自負世將,以淵驟用,頗觖望;劉正彥嘗招互盜丁進,亦以賞薄怨 俟淵入朝,伏兵殺

之,倂殺康履,遂成明受之變。

淵時年五十三。

聞之,乃命冤奏事簽書,仍解都統制,以慰衆心。

司,累加少保,官其子孫八人。 不具,帝輟所御紫茸茵以賜。 祿,曷若爲富商大賈邪。」初,帝在|南京,聞|淵疾,遣中使|曾澤問疾。 淵爲將輕財好義,家無宿儲,每言:「朝廷官人以爵,祿足代耕,若事錐刀,我何愛爵 然其平羣盜多殺降,與康履深交,故及於禍。 紹興四年,又官二人。乾道六年,諡襄愍。子倚。 澤還,言其惟慢茵褥皆 贈開府儀同三

|炎三年,隸大將|韓世忠麾下,擢偏將。||世忠出下邳,聞||金兵大至,士皆駭愕。 其生口,知敵動息。俄逢騎數百,身自陷陣,橫刺酋長墜馬,餘皆遁去。授閤門宣贊舍人。 解元字善長,保安軍德淸砦人。疎眉俊目,猿臂,善騎射。起行伍,爲淸澗都虞侯。 元領二十騎擒

傅、劉正彥之變,從世忠追至臨平與戰,賊勢旣衰,擒于浦城。

前軍。 窮矣。」世忠然之,遣元率兵五百,長戟居中,翼以弓矢,自下趨高,賊衆莫支。乃據望樓,立 壯銳于四山,視其指呼而出戰。一一既得其形勢,歸告世忠曰:「易與爾,若奪據其望樓,則按 營三十里而陣。元獨跨馬涉水薄賊砦,四顧周覽。 赤幟,四面並進,賊遂平。改相州觀察使。 十,以長鈎扳艦。 四年三月,金人攻浙西,世忠治兵京口,邀其歸路,以海艦橫截大江。金人出小舟數 繼從討閩寇范汝爲,轉討湖外諸盜。 |元在別舸躍入敵舟,以短兵擊殺數十人,擒其千戶。 時劉忠據白面山,憑險築壘。世忠討之,距賊 賊因山設望樓,從高瞰下,以兵守之,屯 授忠州團練使,統制

其歸路。金人果走城下,伏發,金人進退無路,乃走嶽廟,元追之,獲百四十八人,止遺二人。 先出掩之。伏要路者,視我麾旂,則立幟以待,金人必自嶽廟走,伏者背出。」又決河岸遏 翌日必至城下,遣百人伏要路,百人伏|嶽廟,自以四百人伏路隅。今曰:「俟|金人過,我當 紹興四年,金人、偽齊合兵入侵。世忠自鎭江趨揚州,命元屯承州。 金人至近郊,元度

稍懈,俄伏發,擒黑頭虎。 時城中兵不滿三千,金萬戶黑頭虎直造城下約降。 改同州觀察使。六年,從世忠出下邳,以數百騎破敵伏兵,授保順軍承宣使。 '未幾,金兵四集,冗戰卻之,追北數十里,金人赴水死者甚衆。 元匿其兵,以微服出,僞若降者。 全人

俄 [而救至,後部疑懼,元回顧曰:「我在此,若等無慮。」衆乃安。 十年,略地准陽,至劉冷莊(10),騎纔三百,當敵騎數千。 元揮戈大呼,衆爭奮,敵披靡。 轉戰自辰至午,敵退,成列

進侍衞親軍馬步軍都虞候,尋授保信軍節度使。卒,年五十四。 明年,世忠罷兵柄爲樞密使,以元爲鎭江府駐箚御前諸軍都統制,以統其衆。 贈檢校少保。 又明年, 而還。

加龍、神衞四廂都指揮使。

屬文,長於兵略。 曲端字正甫,鎭戎人。父渙,任左班殿直,戰死。 歷秦鳳路隊將、涇原路通安砦兵馬監押,權涇原路第三將。 端三歲,授三班借職。 警敏知書,善

無守將,經略使席貢疾怕林功,奏端知鎭戎軍兼經略司統制官。 薄,兵大潰,端力戰敗之,整軍還。 夏人入寇涇原,帥司調統制李庠捍禦,端在遣中。 夏人再入寇,西安州、懷德軍相繼陷沒。 | 库駐兵柏林堡, 斥堠不謹, 為夏人所 鎭戎當敵要衝,

副 金 將 人自 吳玠據淸溪嶺,與戰大破之。 建 鞏 炎 東 元 年 端時治兵涇原,招流 月 婁宿攻陝西 端乘其退,遂下兵秦州 民潰 二年正 (卒,所 **芦** 過 入長安、 人 、供糧 鳳翔, 秸, , 而 義 道 不 關、 兵已復長 ·拾遺。 隴 大震。 安、 金游 鳳翔 騎入境 一月,義 統領官 兵起, 端遣

劉

亮自

鳳翔歸,端斬之。

六月,以集英殿修撰知

延安府。

將 任 叉 不 欲 了。 這陝西節制司將官賀師範趨耀,別將王宗尹趨白水,且令原、慶出師爲援, 劉仕忠、 稱已奏乞回避,席貢別遣統制官龐世才將步騎萬 屬底。九月,金人攻陝西, 王 一庶爲龍 寇鯶來與師範會。

庶欲往耀督戰,已行,會龐世才兵至別,端中悔,以狀白庶, 圖 . 閣待制,節制 庶召端會瘫、耀間,端辭以未受命。 陝西六路軍馬。 **遂授端** 八來會。 吉州 團 庶無 練使, 如之何,則檄貢 庶以鄜延兵先至龍坊,端 充節制司都統制, 二帥各遣偏 勒端還舊 端 雅

太原 行意 進, 丽 敗 又遣 兵乎 軍前,庶 十 一 則金騎長驅、無陝西矣。 權 月, 使臣、進 轉 」彬曰"「不及 運 金諜 乃止。師範輕敵不戒,卒遇敵于八公原,戰死,二將各引去,端遂得涇原兵柄 判官張彬爲端隨軍 士十數輩往 知端、庶不協,併兵攻鄜延。 也。」端日:「綱 一説端, 端計全陝西與鄜延一路敦輕重,是以未敢卽行,不如蕩賊巢 應 端不聽。 副,問以 召 天下兵,不度)師期。 庶知 時端盡統涇原精兵,駐淳化。 事急,又遣屬官魚濤督師,端陽許 端笑謂彬曰:「公視端所部,敦與李綱 而往 一,以取敗。 今端兵不滿萬,不 庶 日移文趣其 ;而實 無 救

穴、攻其必救。」乃遣吳玠攻華州,拔之。端自分蒲城而不攻,引兵趨耀之同官,復迂路由邠

之三水與玠會襄樂。

金攻延安急,庶收散亡往援。温州觀察使、知鳳翔府王瓊將所部發興元,比庶至甘泉,

聽,何也?」因起歸帳。 馬承受公事高中立同見帳中。良久,端聲色俱厲,問應延安失守狀,曰:「節制固知愛身,不 及帳下,僅數騎而已。 倚以自 而延安已陷。 知愛天子城乎?」庶曰:「吾數令不從,誰其愛身者?」端怒曰:「在耀州屢陳軍事,不一見 [副,端彌不平。 |庶無所歸,以軍付內,自將百騎與官屬馳赴襄樂勞軍。|庶獨以節制望端,欲 端猶虛中軍以居底,庶坐帳中,端先以戎服趨于庭,旣而與張彬及走 端號令素嚴,入壓者,雖貴不敢馳。 庶留端軍,終夕不自安。 庶至, 端令每門減其從騎之半,

扈也,公爲則自爲。」端意阻,復歸軍。 已失之,春秋大夫出疆得以專之,請誅庶歸報。」亮曰:「使事有指,今以人臣擅誅于外,是跋 端欲卽軍中殺庶,奪其兵。 夜走寧州,見陝西撫諭使謝亮,說之曰:「延安五路襟喉,今 明日,庶見端,爲言已自劾待罪。 端拘縻其官屬,

字率兵召躞,謂中学曰:「變不聽,則斬以來。」中字至慶陽,變已去,遽遣兵要之,不及而止。 一變將兩軍在慶陽,端召之,變不應。 會有告變過那軍士劫掠者,端怒,命統制官張中

奪其節制使印,庶乃得去。

列

傳第一百二十八

曲 端

初, 叛 賊 史斌 圍興元不克, 引兵還關中。 義兵統領張宗諤誘斌如長安而散其衆,欲徐

圖之。端遣吳玠襲斌擒之,端自襲宗諤殺之。

端 使、 州 收攬英傑, 郭浩權 疑 宣 不 撫處置使司 ·九月, 鄜 以端 延 議 經略司公事。 者喧言端反,端無以 遷康州防禦使、涇原路經略安撫使。 在 都 陝 統 西屢與敵角,欲仗其威聲。 制、 知渭 自謝亮歸,朝廷聞端欲 州。 自 端登壇受禮,軍 明。 會張浚宣撫川、陝,入辭,以百口明端不反。 承制築壇,拜端爲威武大將軍、宣州觀 斬王庶,疑有叛意,以御營司提舉召端 土 時延安新破,端不欲去涇原,乃以知涇 一歡聲 一如雷 没自

河東 然將 端言復命 糧 患 粘罕併兵 於我,我常 諸 土 路 浚 則我爲主 一精銳 兵 雖 波 不 欲 了不減 ·合,財 用端, 而 爲客 不主端說 來, **一,彼爲客,不一二年必自困斃,** 不足; 前 然 ,彼常爲主 何以待之? 未 日 測端意 我不 今兵已合,財已備, 今當 」端曰:「不然,兵法先 可勝,亦止合 , 遣張彬 反之,按兵據險,時出 以招塡禁軍爲名, 五 婁宿以孤 一路兵 口 舉而滅也。 較彼己, 事; 軍深入吾境,我合諸 偏 然將士無以大異 指 渭州 祭之。 師以 今敵可勝, 擾其耕穫。彼不得耕, 萬 輕舉, 彬見端問曰:「公常 止 (於前 妻宿 後憂方大。」彬以 路攻 之不難。 孤 况 軍 必 金 取糧 人 事 ; 因

四年春,金人攻環慶,端遣吳玠等拒于彭原店, 端自將屯宜祿, 既而金軍復

振, 玠小卻, 端退屯涇州, 金乘勝焚邠州而去。 玠怨端不為援, 端謂玠前軍已敗,

險以防衝突,乃劾玠違節制。

習水戰。 前疑,竟以彭原事罷端兵柄,與祠,再責海州團練副使、萬州安置口 是秋,兀朮窺江、淮,浚議出師以撓其勢。 金人新造之勢,難與爭鋒,宜訓兵秣馬保疆而已,俟十年乃可。」端旣與浚異,浚積 端曰:「平原廣野,賊便於衝突,而我軍 未嘗

出 力最多 是年,凌爲富平之役,軍敗,誅趙哲,貶劉錫。 了, 旣卻退之後, 先自聚集,皆緣前帥曲端訓練有方。 敍端左武大夫, 興州居住 凌欲慰人望,下令以富平之役,涇原軍馬

端難 欲復 用端 制 紹 興 端嘗 元年正月,敍正任榮州刺史,提舉江州太平觀,徙閬州 **)** 野與端有憾,言曲端再起,必不利於張公,王庶又從而間之。 作詩題柱曰:「不向關中興事業,却來江上泛漁舟。」庶告浚,謂其指斥乘興, 於是後自興州移司閬州 浚入其說,亦畏

於是送端恭州獄。

逮。 Q 旣 」呼「天」者數聲; 武 至 臣 陝西士大夫莫不惜之,軍民亦皆悵悵,有叛去者。 一,隨令獄吏縶維之,糊其 康隨 者嘗忤端,鞭其背,隨恨端入骨。 端有 馬名「鐵象」, 口 ,熁之以火。 日 1馳四 百 浚以 端乾渴 里,至是連 隨提點變路刑獄,端聞之日:「吾其死 求飲,予之酒,九竅流 浚尋得罪,追復端宣 呼 鐵象可惜」者又數聲,乃赴 州觀察使、諡 Щ 而 死 年 几

列

第

百二十

八

曲端

校勘記

壯愍。

端有將略,使展盡其才,要未可量。 然剛愎,恃才褒物,此其所以取禍云。

主和 世忠進,其攻城野戰,未嘗敗衄 從有勞,遂至 之韓、岳益遠矣。 命,師律不嚴,卒致酈瓊之叛。 心 |膂爪牙之寄,其平||苗、||劉,雖有勤王之績,然旣不能守|越,又棄||四明,負亦不少。矧其附||膾 ,謀殺岳飛,保全富貴,取媚人主,其負戾又如何哉?光世自恃宿將,選沮卻畏,不用 論 日:南渡諸將以張、韓、劉、岳並稱,而俊爲之冠。 動違節制, 驕盈,失將士心,自取覆敗。 然子蓋、宗顏號俊子弟,著海之功,泗上之捷,亦足稱焉。 張浚殺之雖冤、蓋亦自取焉 迎合憎意,首納軍權, ,有可稱者。不幸早世,惜哉 况結托康履與光世一 爾。 雖得善終牖下, 然夷考其行事,則有不然者。 曲端剛愎自用, 轍,烏足道哉。 君子不貴也。 王淵以總率扈 輕視其上, 勞 解元 始由 俊受 方 韓

校勘記

制置副使种師中 「副」字原脫。 按本書卷二三欽宗紀靖康元年五月:「河北、 河東路制置副使

种師中與金人戰於楡次,死之。」 靖康要錄卷七所載略同。 據補

8 貴州 六本傳改。 防禦使 「貴州」原作 「桂州」, 據周麟之海陵集卷二三張俊神道碑、章穎宋南渡十將傳卷

淮南 西路宣撫使 「宣」原作「安」,據繫年要錄卷一一三、宋南渡十將傳本傳改。

区区 }紀 賜俊安民靖難功臣 繫年要錄卷一二五;海陵集張俊神道碑也繫於「九年」。 一拜少傅 按張俊拜少傅和賜功臣號,事在紹興九年正月,見本書卷二九高宗 此處繫於「八年」之下,誤。

是紹 九年冬 興十 年五 按本書卷二九高宗紀,「金人叛盟」,「兀朮入東京」,「金人陷南京」,「金人陷西京」, 月間事; 「張俊葉亳州 引軍還壽春」, 是閏六月間事。 海陵集張俊神道碑 記本條 都

(六) 王彦先揚 「王彦先」; 兵淮 卷四七五劉豫傳同年十月,也有「賊將王彦先 上有渡江意 「王彦先」 原作 「王彦光」。 自亳引兵至壽春,將窺江南」語。據改 按本書卷二七高宗紀紹興三年十月作

事

也在

十年。

此「九年冬」誤。

(七) 劉龍城 劉」字原脫 ,據本書卷四七五劉豫傳、繫年要錄卷一〇〇補

(元) 邈川 下文之「臨宗砦」也屬湟州,此「邈州」當爲「邈川」之誤、據改。 城 原作「邈州城」。 按本書卷八七地理志 熙河蘭湟路無「邈州城」而有邈川城,即湟州,

つない 通州 原作「通川」,據繫年要錄卷二〇改 二十八

列

傳

第

百

校

勘

記

劉冷莊

海州團練副使萬州安置 原作「劉令莊」,據琬琰集上編卷一三韓忠武王碑、宋會要兵一四之三〇改。 「副」字原脫,「萬」下原衍「安」字,據本書卷二六高宗紀、繁年要錄卷

三六删補。

69

一一四九六

来更卷三百七

列傳第一百二十九

王友直 李寶 成閔 趙密 劉子羽 呂祉 胡世將

鄭剛中

時金人尚在揚州,久不報 鼓而克,撫定衆庶,諭以紹興年號。 得衆數萬,制爲十三軍,軍置都統制、提舉、提點、提轄、訓練統之。九月戊子,進攻大名,一 何害於理。」迺矯制自擬承宣使、河北等路安撫制置使,餘擬官有差,徧諭州縣勤王。 紹興三十一年,金人渝盟,友直結豪傑,志恢復。 王友直字聖益,博州高平人。父佐,以材武稱。 乃與王任、馮穀、張昇、牛汝霖列奏于朝,欲領衆南歸。 友直年十二,隨父游,諳兵法。 謂其衆曰:「權所以濟事,權歸於正,

未幾,

友直將由壽春涉淮而濟,道拜敕書,勉以率衆擣敵腹心,掎角應援。 除友直檢校少保

列 傳 第

百 二 十

九

王

友 直

祕 天 閣 雄 軍 牛汝霖 節 度 使 通 直 王 郞 任 天平軍節 直 祕 閣, 職 度使,馮穀左 任 各從舊,得 通議 便宜 大夫、徽猷閣 行 事 時三十二年 直 學士, ·正月 張昇 右 日 朝 也 奉 ·大夫、 直

遂, 歸 師 旋 「陳、改復州防禦使、以忠義 悔 與敵遇,相拒 不襲擊之。 高宗 |准 北 視 敵兵來益 師江 軍統制隸鎮江 上,見于金陵,賜金帶、章服 衆, 友直 卽 都統司 1率所部 渡淮 ,錫賚及二子。 旣 而 審金主 亮 友直恥前 Ē] 斃, 所 遇乃

以 自 表。 越四月,詔偕統制張子蓋援海州。 潛由 小逕背敵 陣,因其輜重,扼歸道橋,左右枕水。 方接戰,友直張一旗, 張子蓋知友直已乘敵後,麾軍 大書「宋忠義將河北王九郎」

進擊,敵潰

走,

盡溺死,

圍遂解。

轉宜

州觀察使。

自

制 戍者 隆 孝宗受禪,友直與統制宋寧數出奇轉戰。 敵至 二年九月, , 輒 退保 和 金人犯邊,宣諭使王之望 州,友直 孤 軍堅守。 金兵駐黃山 命以前軍戍昭關, 張浚都督江、淮, ,鼓柝相聞 · '; 益 友直不踰時即 一見喜之,辟建康前軍統 整暇 自 行。 他 軍 同

侍衞親· 軍統 友直 母子 乾道 制 請 步軍都指揮使。 相 元 洞 失, 年 移鎭江 手 至是, 詔 慰 訪得之, 勞。 一御前 朝廷議遣馬、步二司移屯重地, 四 諸 年, 乃與其妻李攜二女自 軍 統制,俄 繇京口 入覲, 改步司 進 左軍統 神 准 龍 而 制兼 衞四 丞相虞允文欲先發步司 還, 厢 左 錫 聽 都指 予 衞 加 上將 揮使,主管步 厚。 軍 叉 (明年 初 /汽准 口 除 友直請以 公事 北之戰, 御前 透遷 諸

司先。 及馬帥李顯忠屯金陵,友直奏馬軍道途轉徙,困斃已甚。 有旨冤移步司。

轉承宣使,旋除殿前副都指揮使。

使。 節度使,贈檢校少保。 進殿前指揮使,賜第中都,賜田平江,燕射咸預。晚節宴安,軍政稍失律,授宜州觀 尋罷宮觀,徙居信州。 淳熙元年,授奉國軍節度使。 以郊祀恩內徙,三奉祠,復武寧軍承宣使。卒,年六十一,追復 四年,總殿步司大閱于茅灘,鎧仗精明,號令閑肅。 察 明

正兵也。 造舟,且爲 高宗謂宰臣 舟 《幾何?」曰:「堅全可涉 是必能事者。」迺授浙西路馬步軍副總管, 李寶, 旗幟甲仗亦粗備。 鄉導。 河北人。嘗陷金,拔身從海道來歸。金主亮渝盟,淮、浙姦民倪詢、梁簡等江一教金 [日:「李寳頃因召對,詢以 金使蘇保衡造舟于路河。 風濤 事急矣,臣願亟發。」賜寳衣帶、鞍馬、尙方弓刀、戈甲及銀絹 者,百二十艘。」「兵幾何?)北事,歷歷如數。 明年,以保衡為統軍,將繇海道 駐箚平江, 且以一介脫身還朝,陛對無 」曰:「僅三千,皆閩、浙弓弩手,非 令與守臣督海舟捍禦。 襲浙江。 高宗問 一毫沮 諜聞

萬數。

遂 官 加 一發 鐵 邊 蘇 石 士 一寧偕往 月 州 , 不 變矣。」酹 次江 大洋 行三日 寶 先遣 將 酒自誓, 啓行, , 其子公佐 風 、甚恶, 軍士爭言 風 刨 舟散 一,謂曰:「汝爲潛伺敵動靜虛實, 止 西北風力尚 明 不 口 日 收。 散 舟 實 勁, 忧 復 ·慨顧左右曰:「天以是試李寶邪?寶心 迎之非 利 毋誤。」公佐受命,即 寶下令, 敢沮 : 者斬。 與將

汝等。」 獎其 敵 士氣 世 Ē 辺 修 忠 雲 百 上 合 倍 一寧自 義 郡 Ξ 因 事 界 勝, 握槊前 勉 輩各署旗 圍 趣 密州 心以共立 衆乘機 海 州 行 口 與俱發 , 旌塵數 , (),集義 一功名, 進。適 遇 得 敵奮 敵 耗 |勝 勇, - -大 擊, 甚悉, 感泣 里 風 爭應援, 復作,海 將 寶 土賈 且言公佐 乃維 、麾兵登岸, 多者數萬 勇 濤 舟 如 犒 無 巨挾 Ш 士 不 以 實神 一,遣 魏勝得海州。 劍 當 辯 畫 干。 寶 色不爲動 者 地, 列名上 几 敵出 出 令曰:「此 招 諸 寶喜曰:「吾兒不負乃翁矣。」 不 納降 意,亟 朝,檄所部會密之廖西 風少殺,始縱 非復 附 引 聲振 吾境 去。 山 了,力戰 舟泊抵 勝 東。 H 城 豪傑 與否在 迎, 東海 命 加

帆,帆皆油纈,彌亘數里,風浪捲聚一 敵 兵入舟 風 自 至 廖 柂 中,使不 樓 西 中 石 來 日 知 王 如 鍾鐸聲,衆 敵 師 舟 猝 Ē 至。 出 海 咸 風 口 駛 奮 , 舟疾,過 隅,窘束無復行次。 引 泊 唐島 舟 握 Ш 刃 相 待 薄 距 虜, 戰 僅 鼓聲震疊,海波騰躍。 — 山 敵 操 舟 時 者 北 皆 風 中 盛, 原 遺 寶禱 民, 敵大驚,掣矴舉 于 遙 見實 石 日 紿 俄

登其舟,短兵擊刺,殪之舟中。 上于朝, 然倉卒,舟不獲艤,溺死甚衆。 寶亟命火箭環射,箭所中,煙焰旋起,延燒數百艘。 獲其統軍符印與文書、器甲、糧斛以萬計。 餘所謂簽軍,盡中原舊民,皆登島垠,脫甲歸命,以故不殺。 俘大漢軍三千餘人,斯其帥完顏鄭家奴等六人,禽倪詢等 餘物衆不能舉者,悉焚之,火四晝夜 火所不及者猶欲前拒,實叱壯十躍

乃還 玉 下倡矣。」詔獎諭,書「忠勇李寶」四字,表其旗幟。 軍駐東海,視緩急爲表裏援。 寶將乘勢席卷,公佐切諫,以爲金主亮方濟准,聞通、泰已陷,得遠失近,且有腹背憂。 遣曹洋輕舟報捷。上喜曰:「殷獨用李寶,果立功,爲天 除靜海軍節度使、沿海制置使,賜金器、

未可期,錢唐之危可憂也。 **亮聞廖西之敗,大怒,召諸酋約以三日渡江,於是內變殺**亮。 實戰具精利,宰臣陳康伯取其長槍、克敵弓弩,俾所司爲式製之。 寶之功亦大矣。 向微唐島之捷,則亮之死 卒,贈檢校少保。

成閔字居仁,邢州 |靖康初,劉韐爲眞定帥,募勇士捍<u>俭</u>兵,閔在麾下。 高宗卽位,

列

閔 領 数百 騎 至 揚州 會 上 一南渡, 韓世 |忠追苗傅及襲兀朮、討范汝爲, 閔皆 在戎行, 又以力

戰 卻 敵,積 功至武 功 大夫、忠州 刺史。

嘉歎勞勉。 從 世忠入見,世忠指閔曰:「臣在南京,自謂 旋以取 海州 功,擢磁州團練使。 関棣州防禦使、殿前遊奕軍 召見,賜袍帶、 天下當先,使當時見此人,亦避一頭矣。」上, 統制,歷遷保寧軍承宣使 錦帛, 加贈玉· 一束帶。 時 方 與金

盟,世忠罷兵,入爲

樞密使,

詔進

盟,詔閥提禁旅三萬鎭武昌 餘萬緡、 紹興二十四年, 義倉和糶米六十三萬石備軍用,仍賜金器、劍甲臨遣之。 拜慶遠軍節度 一,命湖北 使。 守、漕創砦屋三萬間以待之,發折帛米錢茶引共百 尋丁 母 憂,詔起復, 贈其 母 鄭國夫人。 閔至鄂, 未幾, 金主亮將 進屯 川 · + 應 敗

回 [援准 意擣上流,於是韶閔發鄂州張威、華旺軍回駐鄂 士卒有怨言,閔斬之。未幾,除淮東制置使,駐鎭江。 八月 除湖北、京西制置使, 閔喜於得歸, 冒雨兼程趨健康,士卒多道死, 節制兩路軍馬。 九月, 兼京西、 朝廷所 既而言者論諸軍皆聚鎭江,恐敵 給犒 河北招討使。 師物奄 記歸己, 十 一 不及 月 詔

人笑之曰:「寄聲成太尉,有勤護送。」時虜氣已奪,日虞王師之至,委棄戈甲、粟米山積、諸 亮 閔引兵渡江趨揚州。 及金人自盱眙渡淮北 去,閔列兵南岸, 軍 土 一味聲相聞。 念

軍 多仰以給。 惟閱軍多浙人,素不食栗,死者甚衆。

道初,聽自便,歸湖州; 劾之,猶超拜太尉,主管殿前司公事。 閔 淳熙元年卒,年八十一。 至 一泗州,奏已克復淮東。 尋詔復節,都統鎭江諸軍。 贈開府儀同三司。 專入朝,凡侍從、卿監、

閤門、內侍,皆有賂遺。 尋復爲御史論列,罷太尉,婆州居住,奪慶遠節 子十一人。 九年,請祠,致仕,治園第于平江。 左正言劉度 乾

趙密字微叔,太原淸源至人。 政和四年,用材武武崇政殿,授河北隊將,戍燕。 高宗

以大元帥開府,檄統先鋒援京師。

揚州 候。 俊置靖勝軍 建炎 士民隨 元 年,從張俊討任城寇李昱,俊輕騎先行,遇伏,密奔射斃數人,乃脫。 乘 興渡江,衆數萬, , 以密統之。 平賊董青、趙萬 密露立水濱, 、徐明 麾舟濟之。 等, 累功轉 苗 傅之 武)變,破赤心軍于 節郎、左 軍 統領 擢閤門祗 金兵陷

犯明州 俊遣 密及楊沂中與殊 死戰,敗之,進武 功大夫,陞統制

康 州 刺 紹 史,總管 興元年,李成、馬進擾江、淮,俊復遣密大破之,成、進皆 涇原馬步軍 平張莽蕩, 尋韶入衞。 十年, 金犯亳、宿, I北遁。 賜 金帶,轉親 從俊營合肥, 衞 大夫、 出西

一一五〇三

列

第

百

二 十

九

趙

密

劉

子

羽

路。時水潦暴漲,涉六晝夜始達宿,與敵遇,敗之。

遁。 密乃引兵出六丈河,斷其歸路,又敗之。 明 年,敵分兵犯際、濠,密進擊之,且命張守忠以五 進中 衞、協忠大夫,和州團練、防禦使。 百騎出全椒縣,伏篁竹間, 敵疑, 尋拜 宵

宣州觀察使,爲龍、神衞四廂都指揮使, 主管侍衞 步 軍

之耳。」守忠用其計,明降。 明年,領殿前都指揮使,獻本軍酒方六十六所,積錢十萬緡、銀五萬兩助 海寇朱明暴横,密授張守忠方略曰:「海興陸異,窮之則日月相持,非策之善,要在拊定 進定江軍承宣使、崇信軍節度使,以年勞轉太尉,拜開 軍用,詔獎之。 府儀同三

論選從官視舟師,徹禁旅防守,密不爲動,迄如所料。 隆興二年,進少保致仕。 俄報金復犯准、詔密再爲殿前都指揮使。 和議成,罷爲醴泉使。 初,敵聲言航海, 朝 上疏告老,以萬壽觀使奉朝

乾道元年九月,致仕。卒,年七十一。贈少傅。

機宜文字佐其父。破睦賊、入主太府、太僕簿、遷衞尉丞。 劉 字 羽字彦修,建之崇安人,資政殿學士韐之長子也。 幹守真定,子羽辟從。 宣和末,齡帥浙東,子羽以主管 會金人入,

父子相誓死守,金人不能拔而去,由是知名。 除直祕閣。 京城不守,齡死之,旣免喪,除祕

閣修撰、知池州。

一,除樞密院檢詳文字。 以 書抵宰相,論天下兵勢,當以秦、隴爲根本。 改集英殿修撰、知秦州。 未行, 召赴行

其材。 光世 下, 將之兵也。」 堂議事,爲設飮食,食已,諸公相顧未發。 密謀誅之。一日,命張俊以千兵渡江,若備他盜者,使皆甲而來。 田 建炎三年,大將范瓊擁強兵江西,召之弗來,來又不肯釋兵。 有敕,將軍可詣大理置對。」 撫其衆, 衆皆投刃曰:「諾。」 數瓊在圍城中附金人迫二帝出狩狀。 有旨分隸御營五軍,頃刻而定。 瓊愕不知所爲,子羽顧左右擁置 子羽 坐無下,恐瓊覺,取黃紙趨前,舉以麾瓊曰: 且曰:「所誅 因召俊、瓊及劉光世赴都 知樞密院事張浚、與子羽 止 | 興中,衞以俊兵,送獄 瓊爾 **瓊竟伏誅。** 汝等固天子自 浚以 此

遂 兵 阴 议 北 年 至富 進。 、除徽猷閣待制。 |浚宣撫川、陝,辟子羽參議軍事。 平 子羽以非本計,爭之。沒日:「吾寧不知 與金 人遇,戰 金 一人窺江、准急,浚念禁衞寡弱,計所以 不利。 金人乘勝而前,宣撫司退保興州 至秦州,立幕府,節度五路諸將,規以 此?顧今東南之事 分撓其兵勢者, 方急, 人情大震。 不得不爲是耳。」 五 年而後出師。 遂合五路之

列傳第一百二十九 劉子羽

命吳玠 庶幾猶 不相 望,內安全蜀之心 栩 JII 卽 口 自 聞 有 官 栅 或可以 請 鐵 屬 進退 和尚原 Ш 有 奉 命 建策徙治變州者,子羽叱之日:「孺子可 失計,悔將何及。 棧道之險,未敢遽窺耳。 北 補前 一。 守 出,復以單騎至秦州 愆而 急遣官屬出關,呼 大散關,而分兵悉 贖後咎, 今幸敵 奈何 今不 乃爲此言乎? ?召諸 方肆 守諸險塞 召諸亡將。 下掠,未 將 堅守、縱 ,收集散亡,分布險隘 逼 金 諸亡將聞命 ,斬也 使深 近 」渡然子羽 人知有備 郡。 入,而吾僻 宣 四 川全盛 司 引 言, 大喜, 但當留駐 去 , 處變、峽,遂 而 , 堅 悉 諸參佐 敵欲入寇久矣, 壁 以 興州 固 其衆來 壘 無 與關 敢 外繫關中之 觀 行 會。 釁 者。 中 而 撀 直 子 動。 낈

皆饑 兼 內外聲援,浚許之。 知 興元府。 , 明年,金 興元 帥 臣閉糴 人復聚兵來攻,再爲玠所 子羽 至漢中,通 一二鎭 明年, 派病之。 別

以 商輸粟,二鎭遂安。 秦鳳) 所、 彦皆願得 子羽守漢中, 浚乃承 經略使戍河池 敗。 浚移治遺 除寶文閣直 , 州, 王彦以金、均、房鎮撫 子羽請獨留 學士。 制拜子羽利 河池 使戍 調 護 州路經 金州 諸將 略使 以 鎭 通

募死 跡。 玠 是多,金人犯金州 大驚,即 由間 道自 战境而 祖溪關入,繞出玠後。 東,日夜馳三百里至饒 三年正 月 ,王彦失守,退保石泉。 **) 野邊邊子羽去,子羽不可,而留所同守定軍山** 風 列營拒 守。 金 子羽 悉 力仰 亟移兵守饒 攻, 死 風 傷 嶺 山 積 馳 更

o

難之,遂西。

羽據胡床,坐于壘口。諸將泣告曰:「此非待制坐處。」 子羽曰:「子羽今日死于此。」敵尋亦 以潭毒山形斗拔,其上寬平有水,乃築壁壘,十六日而成。金人已至,距營十數里至。 間道會子羽,子羽留所共守三泉。」針曰:「關外蜀之門戶,不可輕棄。」復往守仙人關。 在 仙 子 羽焚興元,退守三泉縣,從兵不滿三百,與士卒取草牙、木甲食之,遺)計書訣別。])))) |子 子

引去。

乃止。 | 羽盡斬之, 而留其一, 縱之還, 曰"「爲我語賊, 欲來卽來, 吾有死爾, 何可招也! 萬且作,亟遁去。子羽出師掩擊,墮溪澗死者不可勝計,餘兵不能自拔者,悉降 子羽預徙梁、洋公私之積,至是,金人深入,餽不繼,又腹背爲子羽、玠所攻,死傷十五六,疫 自俭人入梁、洋,四蜀復大震。 張浚欲移潼川,子羽遗浚書,言己在此,俭人必不南,浚 撒離曷由斜谷北去,子羽謀邀之於武休,不及,旣回鳳翔,遣十人持書旗招子羽,子 」先是,

前者死,後者被其甲以進,又死,則又代之,其爲必 始,金人攻閩,所選士卒千取百,百取十; 子羽還興元。 四年,坐富平之役,與浚俱罷。尋爲言者所論,責授單州團練 戰被重鎧,登山攻險,每一人前,輒二人推其 取計 如此。 |後 衄 師, 卒全蜀 子

副

使,白州安置(台)。

護諸 將 新 除 JII 至是,上 陝宣 一疏論 撫 副 使吳玠 子羽之功,請納節贖其罪。 7,始爲 裨將 未 知名。 詔聽子羽自便。 子羽 獨奇之, 言於後,後與語 明年,復元官 大悅 ,提舉江 使盡 州

觀

肅 朝。 督 玠 諭 府 密奏請 子羽 参議 指 張 且 還 軍 罷之,而 與都 ': |金 朝,議合兵大舉,乃請召子羽, 事 與主管機宜文字熊彥詩同撫諭川、 轉 人 未 運 以 使趙開 其兵 口 뮵 屬 計 子 宜 事 羽。 益 ,併察邊 兵 屯 子羽辭,乃以徽猷閣 田, 備虚 令諭旨 以俟機會。」時 實以聞 一西帥, 陝。 時時 時吳玠 以集 待制 五年多也 張浚以淮西 英殿修撰知鄂州 知泉州 屢 軍前 安 明 漁 年 乏糧 使 秋 劉 , 光 與 故 未 彥 令子 世 幾 驕 權 羽 山 不 還 見 都

使議 皆 金 密 使 X 徒 入寇, 張 章 鎭 和 七 江 浚 疏 年 薦 中 復 撫以 瓢 准 徽 子羽 論 忽 及結 西 鮘 恩 如 酈 復元 閣 信,雖兵 風 瓊 吳玠 待 雨 级, 官 制 事 今 張 秦檜 知 民 ·,今方倚 久 後罷 鎭 雜 遲 江 居, 風 回, 相 府 諫 無) 恐不 必 兼 官 敢 有 八年,御史常同 沿 論 他意 相 江 罷 侵 安 之, 自 者。 撫 安。」 復提 蓋 使。 旣 金 |同 舉 而 人 金 論 疏 以 金 太 人入寇, 再 子 平 柘皐之敗 人 不 上,以 初 觀 十罪,上 至 子羽 散 , 浚 官安置 欲急 問 批 建 子 出 議 和 羽 「白州 潭州 凊 也 野, 子 安置 羽 未 准 + 東 」。趙 之人, 年, 異 樞 時

六年,卒。 子烘,自 有 傳 吏部郎朱松以子熹託子羽,子羽與弟子暈篤教之, 異時卒

呂祉字安老,建州建陽人。 宣和初,上舍釋褐。 建炎二年,爲右正言,以論事忤執政,

通判 明州

紹興元年,盜起湖南、北,爲荆湖提刑,祉旣至,招捕有方,踰年盜平。進直祕閣,尋召

赴行 在。 淮南宣撫使韓世忠將出 師,辟祉議軍事,除直徽猷閣,充參議官,辭不行

與通判府事吳若、安撫司準備差遣陳充共議,

三年,

作東南防守利便三卷上之,大略謂、立國於東南者,當聯絡淮甸、荆、 在海隅,移蹕江上,然後可以緊南北離散之心。」 陞直龍圖閣、知建康府。 祉到官, 蜀之勢,今臨安僻

北於度外,非命帥宣撫兩准之意,且恐失中原心。唯當急遣諸將,且乞親御六師,庶幾上下 犯 承州。 四 [年多,金人攻淮,江左戒嚴,獨韓世忠統銳卒在高郵。 融上章言:「宜遣兵爲世忠援。」旣而援兵不至, 世忠退保鎮江。 金既陷漣水,破山陽、盱眙,遂 祉再上言:「置江

五年,召爲中書門下省檢正諸房文字,尋除兵部侍郎兼戶部侍郎、 給事 中。 六年,一 遷刑

車駕至平江,金

人退

師。

協

列 傳

第

百二十

九

呂 祉 心,可以不戰而勝。」於是降詔親征。

守江 部侍 劉光 世 防 郎 在合肥,欲移屯太平州,軍已行,乃命賦馳往軍前,督其還。七年,遷兵部尚書,陞督 海 都 督府參議軍事,俄遷吏部侍郎。劉豫分道入寇,時車駕駐平江,或請回臨安,且令 脏 獨抗言:「士氣當振,賊鋒 可 挫,不可遽退以示弱。」劉麟衆十萬,已次濠、壽。

了,往

府參謀 則大 隸督 瓊爲 之副。 相 府。 浚 誑 軍 以劉光世持不戰之論,罷之,乃命行營左護軍前統制王德爲都統制,又以統制官 · 事 八月,復命賦往廬州節制之。 然張丞相但喜人向前,儻能立功,雖有大過亦闊略,况此小嫌乎? 瓊與德素不協,社還朝,瓊與德交訟于都督府及御史臺,乃命德還建康,以其軍 准西撫諭諸軍 祉至廬州, 瓊等復訟德。社論之曰:「若以君等爲是, 當力爲諸公 酈

辨之,保無他慮。」瓊等感泣

劉豫 劉錡 及,為瓊所執 統制官張璟曰:「諸兵官有何罪,張統制乃以 置,盡得祉 ,擁<u></u>
融次三塔,距准三十里。 爲副,置司 小定, 所言,大怨怒。 **融乃密奏乞罷瓊及統制官斯賽兵權。** [廬州; 環及兵馬鈴轄喬 召瓊赴行在。 會朝廷命張俊爲准 仲福 心下馬曰:「劉豫逆臣,我豈可見之。」衆逼心上馬, 統統 瓊懼,遂叛。 制劉永、衡友死之。 如許 西宣 事聞之朝廷邪? 撫使,置司 諸將晨謁 其書更漏語於瓊, 祉 盱眙 瓊遂率全軍「七」 , 坐定, Ш 楊 見之大驚,欲返走,不 瓊袖出 存中為 瓊令人遮証所遣郵 四萬 淮 文書,示中軍 西制置使, 人渡淮降

「死則死於此 . 」又語其衆曰:「劉豫逆臣,爾軍中豈無英雄,乃隨酈瓊去乎?」衆頗感

動, 凡千餘人環立 **六**行。 瓊恐搖動衆心,急策馬先渡,祉遇 害。

時有得祉括髮之帛歸吳中者,其妻吳氏持帛自縊以徇葬, 聞者哀之。 慶元間, 韶立廟

賜額,以旌其忠云。

部侍 監察御史、福建路撫諭使。入境,韓世忠已平賊。 以便宜發兵討平之。除兵部侍郎,復知鎭江。 書舍人,賜三品服, 郎, 胡 世將字承公,常州晉陵人,宿之會孫。 改刑部,出知洪州,兼江西安撫、制置使。 兼修政局。 坐言者落職奉祠。 登崇寧五年進士第。 屬建昌兵變,殺守倅,嬰城以叛, 未幾,除徽猷閣待制、知鎭江府,入爲禮 遷尙書右司員外郎,又遷起居郎, 范汝爲寇閩,以世將爲 世將 遷 中

制置使,兼 饟連, 遡 未幾,召爲給事 嘉 陵 知 江 成 都府。 千餘里,半年始達。 中兼侍講,直學士院,復遷兵部侍郎。 宣撫吳玠以軍無糧,奏請踵至。 於是奏用轉般摺運之法,軍儲稍充,公私便之。 世將既被命入境,約所會議。 尋以樞密直學士出爲四川安撫 蜀之

紹興 、九年,)))) () 以世將爲實文閣 學士、宣 撫川、陝。 時關陝 . 初復,朝廷分軍移屯熈、

列

傳

第

百

二 十

九

胡世

將

鄭

剛中

五五 <u>_</u>

秦、 隣、 田 鄜 晟 延 出 諸 鳳翔 道 明 郭浩出 年 夏, 金 奉天,楊政 人陷同 州 由 赤谷 入 、長安, 歸 河 諸路 池 皆震。 不 數 日, 蜀 兵 隣 、旣分, 捷 于 右 聲援 壁 及 幾 扶 絕, 風 乃遣 金 大 逡巡 將 吳

不 ・敢度隴 分屯之軍得全師 而還。 詔 除端 明 殿 學

振 未幾,瘍發於首。 + 一年秋,朝廷復用兵。 除資政殿學士致仕,恩數視簽書樞密院 會 母 喪,命 起 復。 遂 復 隴 州 破岐下 事。 諸 卒,年五 屯 , 又 取 一十八, 華、 虢 命 有司 兵 威 給 稍

葬事

鄭 剛 中字亭仲, 婺州金華人。 登進士 甲科,累官 爲 、監察御史, 遷 殿 中侍 御史。 剛 中

秦檜薦 于 朝 /,檜主 和 議,剛中不敢言。 。移宗正 少卿,請去,不許,改祕 書 少

司

侍

息。

復遣

岡

諭

使,

諭 諸 將 金 稲 歸 兵,尋 侵 疆 檜遣 充 陝西 岡 中爲宣 [分畫地 界使。 諭 '參謀官 金使烏陵贊謨 及還,除禮部 入境、欲盡取階、成、岷、鳳、溱、商六 中爲川、陝宣

岡 1 力 爭 不 從; 又欲 姑 取 商 、秦,於大散關 立界, 剛 中又堅不 從。 繼除川、陝宣撫副 使

商之半、 儿 朮 遣 棄和 人 力 尙 求 原以與金 和 尙 原 剛 中 朝 恐 廷命剛中去「陜」字,為 敗 和 好, 以和 尚原自 四川 紹 興 宣 四 年後 一撫副使。 不係 吳玠 剛中治蜀,頗有方 地分, 於是 割

內 楊 略 政不從, 與 宣 興、 撫 洋 一 舊在綿、 呼政語之曰:「剛中雖書生,不畏死 諸 關聲援相接,乞移 |関間, 及胡 世將代吳玠, 司利州 自 是省費百萬 就居河池 」聲色俱厲,政 一,饋餉 剛 中 不繼。 卽 始 至 聽 命 剛中奏: 卽 欲移 利州在 屯一 軍 潭毒

F.-] 少 都 師 統 句 雖 尊 入 7,循 、謁,必庭參然後就 都 統制 耳,儻變常禮,是廢 坐。 吳隣 陸檢校 軍容。」行 少師來謝, 禮 一如故。 語閣 吏, 乞講鈞敵之禮。 剛 中

秦州 界,凡三千餘頃,歲收十八萬斛。 奏 蠲 几 川 雜 征, 又請減 成都府路 對羅及宣 先是,川 П 撫 屯兵 司 激賞錢 + 萬, 分隸三大將:吳隣 時剛中於階、成二州營田 屯 興 州 楊 抵 政

錢 安 郡 鳳 屯 型興元 監 /無 為 州 爲 楊 東 從儀 紹 而 路 府, 興監 命浩爲金、房、開、 治 郭浩 亦領沿 興元,命政爲安撫; 屯金州 時軍已罷,移屯 邊安 無。 皆 達州 1建帥 剛中請分利州為東、 安撫; . 節 ; 內郡,剛中言逐路各有漕司, 以興、階、成、 而統制官知 諸裨將領安撫者皆罷。 西和、文、隴、鳳 成州 西路,以興元府、利閬洋巴劍州 王彦、 知階州 都 七州爲 從之。 漕宜 姚仲、 麗。 西路, 弛變路酒禁,復利 從之。 知 治興州 西 和 州 大安軍 程 命隣 位後、 知

剛中。 司 秦檜怒剛中在蜀專擅, - 棄牒 剛中語 定無 人日 司, ["「孤危之迹,獨賴上知之耳。」|檜聞愈怒, 剛中怒, 令侍御史汪勃奏置 由是有隙。 不棄頗求剛中陰事 四川財賦總領 逐 罷 言於檜, 官,以趙不棄爲之, 責 (桂陽) 檜陽召不棄歸 軍 居住; 不隸宣 再責濠 因 撫

列 傳

第

百二

+

九

隩

剛

中

校

勘

記

州 團 |練副使,復州安置; 再徙封州,卒。

廖西 一成閔、 論 曰:自紹興和議成,材武善謀之士,無所用其力。 趙密皆足以斬將搴旗、劉子羽轉戰屢勝、呂祉不從劉豫、胡世將、鄭剛中威震 若王友直之矯制起兵,李寶之立功 巴

蜀,皆中道以殁,是以知宋不克興復也。

校勘記

(一) 倪詢 梁簡 等 繫年要錄卷一九三、中興小紀卷四〇、 四朝名臣言行錄別集下卷李寶條都作「倪

荀、 商簡 、梁三兒等」。

 Ξ 王 爲應援。」 世修 按中興小紀卷四〇記此事說:「時山東豪傑王世隆、明椿、劉異輩、皆各以義旗聚衆、爭 又北盟會編卷二三七記李寶敗金人於陳家島事說:「先是有劉岜彪、溫皋、趙開 「修」字疑爲「隆」字之訛

清河 太原淸源人 四人,聚衆于京東,與王世隆合,共攻成 屬河北路 清 恩州,淸源屬河東路太原府,見本書卷八六地理志。 源」原作「淸河」。 李幼武四朝名臣言行錄別集下卷一二趙密條作「淸源」。 據改。 按

陽軍。」

(台) 白州安置 (+) 全軍 列 數十里」。 傳 第 原作「金軍」,據本書卷三六〇趙鼎傳、繁年要錄卷一一三注改。 百二十 「白州」原作「泉州」,據本書卷二七高宗紀、琬琰集下編卷二三劉子羽墓誌銘改。 九 校 勘 配

<u>(</u>

距營十數里

書「紹興」紀元。

(智) 三年正月

按本書卷二七高宗紀載,金人陷金州、入興元以至去興元,都繫在紹興三年,此處失

朱熹朱文公文集卷八八劉子羽神道碑作「營數十里間」,中興戰功錄作「距我師

宋史卷三百七十一

列傳第一百三十

白時中 徐處仁 馮澥 王倫 宇文虚中 湯思退

用。 政和六年,拜尚書右丞、中書門下侍郎。 白 時中字蒙亨,壽春人。 登進士第,累官爲吏部侍郎。 宣和六年,除特進、太宰兼門下,封崇國公,進 坐事,降秩知鄆州, 已而復召

慶國。

乞宣 (投入)
(以)
(以)
(以)
(以)
(力)
(力)</p |粹中曰:「萬事須是涉歷,非公嘗目擊守城之事,吾輩豈知首尾邪…」 一付祕書省。時燕山日告危急,而時中恬不爲慮。 始,時中嘗爲春官,詔令編類天下所奏祥瑞,其有非文字所能盡者,圖繪以進。 圜丘禮成,上言休氣充應,前所未有, 金人入攻,京城修守備,時中謂字文 時中進

欽宗卽位, 列 傳 第 召大臣決策守京師, 百 Ξ + 白 時 中 徐 問 覷 誰 1-可將者。 李綱言"「朝廷高爵厚祿蓄養大臣,蓋將 __ Fi. 七

殿學士、中太一宮使。 兵出 用之有 戦 事之日。 平 綱 曰:「陛下儻使臣,當以死報。」於是以綱爲右丞,充守禦使。時中尋罷爲觀文 時中輩雖書生,然撫將士以抗敵鋒,乃其職也。」時中勃然曰:「李綱莫能將 御史劾時中孱懦不才,詔落職。 未幾,卒。

開 對。問:「邑有盜賊乎?」曰:「有之。」上謂處仁不欺,除宗正寺丞、太常博士。 示 恩信,蠻感泣,誓不復反。 徐處仁字擇之,應天府穀熟縣人。中進士甲科,爲永州東安縣令。蠻人叛,處仁入峒, 知濟州 金鄉縣。 以薦者召見,徽宗問京東歲事,處仁以旱蝗

黄帝 裁決 如流 迎 時 '初置算學, 徙 日推策,數之始也,祖黃帝爲宜。」擢監察御史,遷殿中、右正言、給事中。 囚繫常空。 知永興軍 議所祖,或以孔子贊易知數。 進戶部尚書,繼拜中大夫、尚書右丞。 處仁言:「仲尼之道無所不備, 丁母憂,免喪,以資政殿學士 攝開 非專門比。 封

陽,落職知斷州。 平價,適以增之。」轉運使阿貫意,劾其格德音,倡異論 並 貨使陝西 ,欲平物價,處仁議不合,曰:「此令一傳,則商賈弗行,而積藏者弗出, 久之,以顯謨閣直學士知潁昌府。 民有得罪宮掖者,雖赦不原,處仁爲奏 ,侵辱使者。 詔 處仁赴闕。 尋改 知河 名爲

知青州

童貫乘是擠之,奪職,提舉鴻慶宮。 復延康殿學士、知汝州,再奉鴻慶祠、知徐州,召爲

體泉觀使。

南都 者謂:「今設局曰『裕民』,豈平日爲不裕民哉?」乃罷局,出處仁知揚州。 費,罷橫斂,百姓旣足,軍儲必豐。」上稱善,詔置裕民局討論振兵裕民之法。 理前語,處仁言:「昔周以冢宰制國用,於歲之杪,宜會朝廷一 兵民皆困,不及今謀之,後將有不勝圖者。」上曰:「非卿不聞此言。」明日,除侍讀。 徽宗訪以天下事,處仁對曰:「天下大勢在兵與民,今水旱之餘,賦役繁重,公私凋弊, 歲財用之數,量入爲出,節浮 未幾,以疾奉祠歸 蔡京不悅, 進 讀罷,

情遂安。 慘而怯,盜無輕重悉抵死,小有警,輒閉城以兵自衞。 命之地,脫有非常,吾助君死守。」語聞于朝,起爲應天尹。 方臘爲亂,處仁亟見留守薛昂,爲畫守戰之策。 因語昂曰:「睢陽蔽遮江、淮,乃國家受 處仁至,即大開城門,徹牙內甲兵,人 河北盜起,徙大名尹。 前尹王革

徽宗賜手詔曰:「金人雖約和,然狼子野心,易扇以變,有當行事以聞。」處仁上備邊 進觀文殿學士,召爲寶籙宮使,特陞大學士。舊制,大觀文非宰相不除,前二府得

除,自處仁始。

三十

徐

處仁

「國不競亦陵,且定武陛下之潛藩,不當棄。」與吳敏議合。|敏薦處仁可相,拜太宰兼門下 奏宜伏兵濤、滑, 奏至,朝廷適下親征詔書,以李綱爲行營使。 欽宗卽位 ,金人犯京師,處仁儲糧列備, 擊其半濟,必可成功。 召爲中書侍郎。入見,欽宗問割三鎭, 合銳兵萬人勤王; 即移書綱,言備禦方略。 奏乞下詔親征,以張國 金人請和而歸,處仁 處仁言:

乃以處仁爲扈駕禮儀使,統禁旅從出郊,迄二聖還宮,部伍肅然。 仁曰:「陛下仁孝,思奉晨昏,屬車西還,天下大慶,宜郊迎稱賀。 童 |貫部勝捷軍衞||徽宗東巡,貫旣貶,軍士有惡言。||徽宗將還,都人洶懼,或請爲備。 軍士妄言,臣請身任之。」 處

侍郎

該 夫人才力不容頓異,豈有前不能決一職 憂去,不果行,及當國,卒奏行之。 上,有條以條決之,有例以例決之,無條例者酌情裁決; 初,處仁爲右丞,言:「六曹長貳,皆異時執政之選,而部中事一無所可否,悉稟命朝廷。 而後 可共政者乎? 乞詔自今尚書、侍郎不得輒以事 不能決,乃申尚書省。」會處仁以

應奉之徒復縱,臣爲陛下惜之。」乃抵主藏吏罪。 下 - 鑒近 聶 患 Ш [為戶 事 必由三省。 部尚書兼開封尹,庫 今以珠爲道君太上皇后壽,誠細故, 有美珠,山密語寧德宮宦者,用特旨取之。 且美事 然此端 一開,則前日 處仁奏:「陛

恪、 耿南仲、 宮使。 處仁言論,初與吳敏、李綱合,尋亦有異議。 |聶山 尋知東平府,提舉崇福宮。 欲排去二人而代之位,諷言者論之,與敏俱罷,處仁以觀文殿大學士爲中 高宗卽位,起爲大名尹、北道都總管,卒于 嘗與敏爭事,擲筆中敏面,鼻額爲 郡 黑。 唐

爲姦細,殺其長子庚。 爲防秋計,處仁謂金人豈能復來,不宜先自擾以示弱。 言以金人出境,社稷再安,皆由聖德儉勤,致有天人之助。 處仁在宣和間,數請寬民力以弭盜賊。 幼子度,吏部侍郎。 尹大名,以剛廉稱。 南都受園時,處仁在圍城中,都人指 种師道請合諸道兵屯河陽諸州 及爲首相,無大建明,方進

退 居二 馮 一十年,范祖禹薦於朝,官終祠部郎中。 康 澥字長源,普州安岳人。 父山, 元年,解爲左諫議大夫。金人圍太原,朝廷命李綱宣撫兩河,澥奏罷之。 熙寧末,爲秘書丞、通判梓州, |獬登進士第,歷官入朝,以言事 鄧綰薦爲臺官,不就, 再 謪 金人要

宗室郡 獬 割三鎮,高宗自康邸 扈從。 \pm 高報 張邦昌 謝使,解 僭位, 出使,除癣知樞密院事,充副使,不果行,尋除尚書左丞。 與獬有舊,取之歸,以獬康邸舊臣,命爲奉迎使,爲總領 與曹輔以樞密爲副,留金營三日 歸,詔 暫權門下侍郎。 欽宗 迎駕儀物使。 金人犯闕,詔 詣 金營,

列

傳

第

建炎初,除資政殿學士、知潼川府。 言者論解嘗汙僞命,奪職, 已而復官。 紹興三年,以資

政殿學士致仕,卒。

家,及入諫省,奏官其一子。 | 解爲文師蘇軾,論西事與蔡京忤。 然議論主熈、豐、紹聖,而排鄒浩、李綱、楊時,君子少之。 郡人張庭堅以言事斥象州死,妻子流離 解力振:

工倫 功,除命太峻,奏補修職郎,斥不用。 <u></u>
欽宗解所佩夏國寶劍以賜,倫曰:「臣未有官,豈能彈壓?」遂自薦其才。 法,幸免。 王倫字正道,莘縣人,文正公旦弟勗玄孫也。家貧無行,爲任俠,往來底、洛間, 可除兵部侍郎。」倫下樓,挾惡少數人,傳旨撫定,都人乃息。 汴京失守, 飲宗御宣德門, 都人喧呼不已, 倫乘勢徑造御前曰: 「臣能彈壓之。」 宰相何麋以倫小人無 **欽宗取片紙書曰**。 數犯

舍人朱弁副之, 建炎元年,選能專對者使金,問兩宮起居,遷朝奉郎,假刑部侍郎,充大金通問使,閤門 見金左副元帥宗維議事,金留 不造。

兩宮始知高宗已卽位矣。 有 商 人陳忠,密告倫二帝在黃龍府, 久之, 粘罕使鳥陵思謀卽驛見倫, 語及契丹時事。 倫遂與并及洪皓以金遺忠往黃龍府潛通意 倫曰:「海上之 一,由是

爲此 足以 英俊并用,期必復古。 先大聖惠顧盟好,不許。 日:「比 一,兩國約爲兄弟,萬世無變。 言耳。」倫曰:「使事有指,不然來何爲哉?人定者勝天,天定亦能勝人, ·慰先大聖之靈,幸執事者贊之。」思謀沉思曰:「君言是也,歸當盡達之。」已而點罕至, 上國遣使來,問其意指,多不能對。 盍思久遠之謀,歸我二帝、太母,復我土疆,使南北赤子無致塗炭,亦 厥後舉兵以禍吾國,果先大聖意乎?况亘古自分南北,主上恭 雲中之役,我實饋師,贊成厥功。 思謀傳侍郎語欲議和,決非江南情實,特侍郎自 上國之臣,嘗欲稱兵南來, 惟元帥察之。」

堂稟議,倫陳進取之策,不合,復請祠 故,驕倨少損,遂拜詔。 甚悉,帝優獎之。除右文殿修撰,主管萬壽觀,官其二弟一姪。 三年,韓肖胄使金還,金遣李永壽、王詡繼至。二人驕倨,以倫充伴使,倫與道雲中舊 紹興二年, 粘罕忽自至館中與倫議和,縱之歸報。 訖事,倫復請**祠**。 劉光世求倫參議軍事,辭。 是秋,倫至臨安,入對,言金人情僞 時方用兵討劉豫, 宰相趙鼎請召倫赴都 和議 中

粘罕不答。

是後,宇文虚中、魏行可、洪皓、崔縱、張邵相繼入使,皆拘之。

高 公繪副之。 」倫奉詔以行,因附進太后、歐宗黃金各二百兩,仍以金帛賜宇文虛中、 七年春,徽宗及寧德后計至,復以倫爲徽猷閣待制,假直學士,充迎奉梓宮使,以朝請郎 入辭,帝使倫謂金左副元帥昌曰:「河南地,上國旣不有,與其付劉豫,曷若見

列

張叔夜家屬之在金國者。

命, 則祈請梓宮也。」豫脅取 倫 至 雕陽, 劉豫館之, 疑有 不已。 他謀,移文取國書。 會迓者至,渡河見撻懶於涿州, 倫報曰:「國書須見金主面納,若所銜 具言豫邀索國書無狀,且

謂:「豫忍背本朝,他日安保其不背大國。」

議 可以平達。」 倫入對,言 俭人許還梓宮及太后, 是年冬,豫廢。 倫及高公繪還,左副元帥昌送倫等曰:「好報江南, 又許歸河南地, 且言廢豫之謀由已發之。 自今道塗無 壅, 和

帝大喜,賜予特異

辭,引 計 許 郎 中張 事。 和, 初, 至都堂授使指二十餘事。旣至金國, 後遣倫還, 且命太原少尹鳥陵思謀、太常少卿石慶(□來議 通古爲江南詔諭使,偕倫來。 八年秋,以端明殿學士再使金國,知閤門事藍公佐爲之副,申問諱日,期還梓宮。 倫旣見昌,昌遣使偕倫入燕見金主亶,首謝廢豫,次致使指。金主始密 金主屬爲設宴三日,遺簽書宣徽院事蕭哲、左司 事 至行在,倫往來館 與羣臣定議 rþ

使 奏 通 事 砜 朝 國好 時 論 哲等驕倨,受書之禮未定。 以金使肆嫚,抗論甚喧,多歸罪倫。十一月,倫至行在,引疾請祠,不許,趣赴內殿 凡事當於彼中反覆論定,安有同使至而後議者?」倫泣曰:「倫涉萬死一生,往 御史中丞勾龍如淵詣都堂與秦檜議,召倫責曰:「公爲

曰:「此 來 虎 口 則不 者數四,今日 敢 不勉。」倫見通古,以一二策動之。 中丞 |乃責倫如此。」|檜等共解之曰:「中丞無他,亦欲激公了此事 通古恐,遂議以膾見金使于其館, 耳。倫 受書以

歸。金許歸梓宮、太母及河南地。

宋,二人必陰結彼國。 使,既又以倫 具言于朝,乞爲備。 五月,倫自汴京赴金國議事。 九年春,賜倫同進士出 為東京留守銀開封尹 兀朮遂命中山府拘倫,殺宗磐及撻懶 今使已至汴, 身、端明殿學士、簽書樞密院事,充迎梓宮、 初,兀朮還,密言於金主曰:「河南地本陸懶、宗磐主謀割之與 勿令踰境。」倫有雲中故吏隸兀朮者潛告倫,倫即遣介 倫至東京,見金右副元帥兀朮,交割地界,兀朮還燕。 奉還兩宮、交割 地

拘 問 及貸之還,曾無以報,反間貳 盟,與民休息,使人奉命通好兩國耳。」旣就館,金主復遣紹文諭倫曰:「卿留雲中已無還期, 有上國邪?」倫曰:「比蕭哲以國書來,許歸梓宮、太母及河南地,天下皆知上國尋海上之 |倫 倫:「知撻懶罪否?」倫對:「不知。」又問:「無一言及歲幣,反來割地,汝但知有元帥,豈知 以俟報, 十月,倫始見金主于御子林,致使指。金主悉無所答,令其翰林待制耶律紹文爲宣勘官, 己而 遷 之河間,遂不復遣 (我君臣耶? 」乃遣藍公佐先歸,論歲貢、正朔、誓表、册命等事,

+-金渝 盟,兀 术 等復 取 河南 倫居 河間六載,至十四年,金欲以倫爲平凝三路都轉

列傳

第

百三

王

倫

宇文

虚

中

五二六

間 日 將命被留,欲汙以僞職,臣敢愛一死以辱命!」遂就死,年六十一。於是 倫 不 厚路使少緩,遂冠帶 得倫骨以歸,官給葬事。 止,人皆哀之。 詔贈通議大夫,賜其家金千兩、帛千匹。 南鄉,再拜慟哭曰:「先臣文正公以直道 後諡愍節 子述與從兄遵間入金境,至河 輔相 兩朝,天下所知 金杖其使,俾縊殺之。 河間地震,雨 臣今 雹

修官、同知貢舉,遷中書舍人。 宇文虚中字叔通,成都華陽人。 登大觀三年進士第,歷官州縣,入爲起居舍人、國史編

先計強 恭順 係茲 以虚中爲參議官。 <u>順藉百勝之勢,虛喝驕矜,不可以禮義服,不可以言說誘,持下莊兩鬥之計,</u> 宣 舉 和 弱 今捨恭順之契丹,不羈縻封殖,爲我蕃籬,而遠踰 一,豈可 ",策虚 間,承平日久,兵將驕惰, 輕議? |實,知彼知己,當圖萬 虚中以廟謨失策,主帥 且中國 與契丹講和,今踰 察攸、 童貫貪功開邊,將興燕雲之役,引女直夾攻契丹, . 全。 :非人,將有納侮自焚之禍,上書言:「用兵之策,必 今邊圉無應敵之具,府庫無數月之儲,安危存亡, 百年,自遭女眞侵削以來,嚮慕本 海外,引強悍之女眞以爲鄰域。 引兵踰境。 切

百年怠惰之兵,當新銳難抗之敵,以寡謀安逸之將,角逐於血肉之林。 臣恐中國之禍未有

虚中建十一策,上二十議,皆不報

寧息之期也。」王黼大怒,降集英殿修撰,督戰益急。 斡离不、粘罕分道入侵, 童貫聞之, 憂懣不知所爲,

禦之事,將帥可以任之。」即命虛中草詔,略曰:「言路壅蔽,面諛日聞,恩倖持權,貪變得志, 改過,可便施行。」虚中再拜泣下。 路並進,事勢若此,奈何?」虛中奏:「今日宜先降詔罪己,更革弊端,俾人心悅,天意回,則備 爲遁歸之計,以九月至汴京。是日,報點罕迫太原,帝顧虛中曰:「王黼不用卿言,今」金 上天震怒而股不悟,百姓怨懟而股不知。」又言出宮人、罷應奉等事。帝覽詔曰:「今日不吝 即興虛中及范訥等謀,以赴闕稟議

鄭州 歸,收合散卒,得東南兵二萬餘人。以便宜起致仕官李邈,令統領於汴河上從門外駐兵。 衞 大學士、軍前宣諭使。 京城。 ,為馬忠所敗,遂收斂爲一。 西路稍通,師道、姚古及其他西兵並得達

汴京。 時守禦難其人,欲召熙河帥姚古與秦鳳帥种師道,令以本路兵會鄭、洛,外援河陽,內 帝顧謂虛中曰:「卿與姚古、師道如兄弟,宜以一使名護其軍。」遂以虛中爲資政殿 虚中檄趣,姚古、師道兵馬,令直赴,汴京應援。 金騎至城下,放兵掠至

辨劫營非朝 會姚平仲劫金營失利,西兵俱潰,金人復引兵逼城下,虚中縋 廷意 ,乃姚平仲擅興兵,大臣皆不肯行。虚中承命卽往都亭驛,見金使王汭(三), 而入。 欽宗欲遣人奉使,

因

埃 持 É 沿書復 已至 議 市,金 和 渡 人注矢露刃, 濠 橋 道逢 一甲騎 周 匝 如水 圍 続、 雲梯 久乃 得見 鵝 洞 康王于 蔽地, 軍 冒鋒刃而 次 日, 進。 侍王 旣 至 至 敵營, 金幕 見一人 露 华 風

子者語 騾 馬之類,又 **小遜**,禮節 欲 御 [筆書定三鎭界至,方退 说信傲。 记 抵暮、遣 人 隨 虚 軍 中入城、要越王、李邦彦、吳敏、李綱 曹晟

及

議和 往 忍割棄。」諸 金 之罪, 令 虚 固 141 竉 要三鎭, 再往 知 清州 , 「樞 必請 虚 尋落 中 密 康王 泣下 不 ·稍空,我 職 歸。 不言, 本 疝 虚 金帥 亦不稍空。」如 山 建炎元 再 變 出, 色, 年,竄 明日 虚 1 #1 , 韶 日:「太宗殿 從康 國 州 人稱「脫 王還, 空」,遂 在 除簽書樞密院事 太原 解兵 ,上皇祖 北 去。 陵 作. 言 自 保州 1者劾 是义三 以 詎

皓至 **功碑** 虚 海 r‡1 爲 不 通 進 京, 年 問 μſ 階 使, 歸。」於是獨 見而 詔 金紫 求 王 甚鄙之。 使絕 光 貺 爲 祿 域者, 副 大 留。 大, 累官翰 虚 明年 虚 中 金人號爲 國 中 有才 春 林 應 學士、知 詔, 藝, 金 人並 復資 金 師 人加 制 遣 政 -誥 歸, 殿 以 兼 然因是而 大學士, 官爵, 太常: 虚 中 卿, 卽 日:「 爲 受之, 知 封 祈 「奉命北· 東北之士皆憤恨陷北,遂密 河 請 內 與韓昉輩俱 使, 郡 開 來 楊 國 祈 可 請 公, 輔 二帝 掌 副之。 書 金太太 詞 命。 脯 尋 明 帝 文 睿 未 以信 以 德 還 劉 鰰 洪

金 人每欲府侵,虚中以費財勞人,遠征江南荒僻,得之不足以富國。 王倫歸,言:「虛中

義結

約,

金人不

覺

[]

|中沮 奉使日久, 和 議 守節不屈。」 悉遣其家往金國以牽制之。 遂詔福州存卹其家, 金皇統四年, 仍命其子師瑗添差本路轉運判官。 轉承旨, 加特進, 遷禮部尙書, 檜慮虚

如故

受焚死,天爲之晝晦。 官至簽書樞密院事 之,高士談圖書尤多於我家,豈亦反邪?」有司承順 鞫治無狀,乃羅織虛中家圖書爲反具。 管撰宮殿膀署,本皆嘉美之名,惡之者擿其字以爲謗訕**,** 虚 中恃才輕肆,好譏訕,凡見女眞人,輒以「礦鹵」目之,貴人達官,往往積不平。 開禧初,加贈少保,賜姓趙氏。 淳熙間,贈開府儀同三司,諡 虚中曰:「死自吾分。 風旨,并殺士談。 肅愍,賜廟仁勇, 有文集行于世。 由是媒蘗成其罪,遂告虛中謀反。 至於圖籍,南來士大夫家家有 且爲置後,是爲紹節 虚中與老幼百 口 同 虚中 日

秘書省正字。 湯思退字進之,處州人。紹興十五年,以右從政郎授建州政和縣令,試博學宏詞科,除 自是登郎曹, 貳中秘, 秉史筆

惡直醜正,必不異和議,不擿己過,始久於用。 二十五年,繇禮部侍郎除端明殿學士、簽書樞密院事,未幾參大政。 時思退名位日進,膾病篤,招參知政事董德 先是,秦檜當國

列傳第

百三十

湯思退

術, 年, 期 元 《其死,不敢受。高宗聞之,以思退不受金,非膾黨,信用之。 二十六年,除知樞密院 及思退至臥內, 觀其所爲,多效秦檜,蓋思退致身,皆膾父子恩也。」遂罷,以觀文殿大學士奉祠 拜 、 尚書右僕射;又二年,進左僕射。 屬以後事 ,各贈黃金千兩。 明年, **德元慮其以我爲自外,** 侍御史陳俊卿論其「挾巧詐之心,濟傾邪 不敢辭,思退慮其以我 事 明

太人 寧遺 吏部 威,仲賢 十二月,拜思退左僕射,浚右 密院計 奏 侍郎 隆 个仲賢 三省、 興元年,符離師潰,召思退復相。 皇恐,言 議 王之望 辱 樞 編修官 國 密院,索海、泗、唐、鄧四 無狀。 1歸當 爲 通 問 稟命,遂以忠義爲 持報 使, 上怒,會侍 書以往 知閤門事 僕射 御周操論 旣行, 龍 大淵 三省、 郡。 諫議大夫王大寶上章論之,不報。 上戒勿許 仲賢 副之, 思退欲與和,遣淮 樞密院書來。 不 將 應擅許四郡,下大理究問,召浚赴行在。 远郡。 割棄四州。 上猶欲 仲賢 西安撫司幹辦公事 張浚 至 宿州 止割海、 在 、 僕 散 揚州聞之, 泗,思退 金帥 忠義 総石 盧 遣其子 仲賢 遽奏以 懼之以 烈志 加

家,陰謀去|後,遂令|之望、|大|||驛疏兵少糧乏,樓櫓、器械未備, 襄、川、陝嚴邊備,竄仲賢] 「金無 浚以 禮 金未 如 此 口 卿猶欲 與和, 郴州。 請上幸建康 言和 思退恐, 今日 敵 , 圖進兵。 勢, 奏請以宗 非秦檜 上手批王之望 社 時 大 計 比, 奏稟上皇而 人言委四萬衆以守泗州 卿議 等

非 論 秦檜 後 行 不 從 ?禮物 ·若。」 事 並 思退 上 口 批 詔

計· 上頗惑之,乃命遂行邊,還兵罷招納。 | **凌力乞**罷政,許之。上命思退作書,許<u></u> 金四郡

徹備之罪,遂罷相,尋責居永州。 統上彥等禦之,仍命思退督江、淮軍,辭不行。 旣 而俭專事殺戮,上意中悔,思退復密令孫造論敵以重兵脅和。上聞有敵兵,命建康都 於是太學生張觀等七十二人上書,論思退、王之望、尹穡 僕散忠義自淸河口渡淮,言者極論思退急和

等姦邪誤國,招致敵人,請斬之。思退憂悸死。

之計迄行,然終以不免。 思退始終與張浚不合,浚以雪恥復讐爲志,思退每借保境息民爲口實,更勝迭負, 敵既得海、泗、唐、鄧,又索商、秦,皆思退力也。 思退

享富貴者,大有間矣。卒以輕肆譏誣,覆其家族,眞不知義命者哉。 留、及金人脅之以官,竟不受,見迫而死,悲夫!較之虛中即受其命,爲之定官制、草赦文、 綱,異脹浚,其識趣可見矣,雖有小善,何足算哉。 論曰:以白時中之孱佞,徐處仁之姦細,馮澥之邪枉, 邊思退之巧詐, 而排楊時, 誤|李 王倫雖以無行應使,往來虎 雖云冤死,亦自取焉。 口,屢被拘

律以豫讓之言,益可愧哉

校勘記

(1) 石慶 按本書卷二九高宗紀、卷三七三朱弁傳作「石慶充」,樓鑰攻魄集卷九五王倫神道碑、熊

克中興小紀卷二四作「石慶元」,繫年要錄卷一二〇作「石慶克」。

(三) 王汭 原作「王芮」,據本書卷二三欽宗紀、靖康要錄卷二改。

宋史卷三百七十二

列傳第一百三十一

王庶 朱倬 辛炳 尹穡 王之望 徐俯 沈與求

骼事,又忤之。 年二丁,登進士第,調常州宜興簿。 韶改合入官。與丞相秦檜件,出教授越州。 西財用所屬官。 幾,民告澇于郡,郡檄悼考實,乃除田租什九,守怒,不能奪。張浚薦悼,召對,除福建、廣東 朱倬字漢章,唐宰相敬則之後,七世祖避地閩中,爲閩縣人。世學易,入太學。 宣諭使明橐再薦于朝,時方以劉豫爲憂,悼因賜對,策其必敗。高宗大喜, |金將犯邊,居民求避地,|悼爲具舟給食,衆賴以濟。未 用張守薦,除諸王府教授。膾惡言兵,悼論掩 宣和五

梁汝嘉制置浙東,表攝參謀。 列 第 百三十一 倬 有羣寇就擒,屬悼鞫問,獨竄二人,餘釋不問。 一五三三

父尉崇安日,獲寇二百,坐死者七十餘人。大父謂此饑民剽食爾,烏可盡繩以法?悉除其 吾其可愧大父乎?」通判南劍。 建寇阿魏衆數千,劍鄰於建,兵慄不可用,

令朝辭上殿,蓋爲悼設也。旣對,上曰"「卿以殷親擢出爲部使者,使咸知內外任均。」又曰: **燴。」上愀然慰諭,目送之。旬日間,除國子監丞,尋除浙西提舉,且命自今在內除提舉官,** 倬重賞募卒擒獲,境內迄平。 軍食,率焚稿不傳。 上合天心。」每上疏,輒夙興露告,若上帝鑒臨。 「人不知卿,殷獨知卿。」除右正言,累遷中丞。嘗言:「人主任以耳目,非報怨任氣之地,必 除知惠州。 陛辭,因言嘗策<u>劉豫必敗,高宗記其言,問"「卿久淹何所?」</u>倬曰"「厄於 知貢舉、遷參知政事。 奏疏凡數十,如發倉廩,蠲米價,減私鹽,聚

浩、虞允文、王淮、陳俊卿、劉珙之進用,皆悼所薦也。 之。又策敵三事:上焉者爲耕築計,中焉者守備,下則妄意絕江,俭必出下策。果如所料。史 |紹興三十一年,拜尙書右僕射。||金兵犯江,|悼陳戰、備、應三策,且謂兵應者勝,上深然

安,屢求去。詔以觀文殿學士行是提舉江州太平興國宮。孝宗即位,諫臣以爲言,降資政殿 高宗自建康回鑾,有內禪意。悼密奏曰:「靖康之事正以傳位太遽,盍姑徐之。」心不自 明年致仕,卒。復元職,恤典如宰相,贈特進。孫濖,淳熙十四年登第,仕至吏部

|王綸字||德||言,] 建康人。幼穎悟,十歲能屬文。 登紹興五年進士第,授平江府崑山縣主

簿,歷鎭江府、婺州、臨安府教授,權國子正。

關庠序,修禮樂,宜以其式頒諸郡縣。」 王宮大小學教授兼權兵部郎官。言:「孔門弟子與後世諸儒有功斯文者,皆得從祀先聖,今 時初建太學,亡舊規,憑吏省記,吏緣爲姦。論釐正之,其弊稍革。 遷敕令所删定官、諸

言:「智識淺昧,不能知論。」由此罷去。 二十四年,以御史中丞魏師遜薦,爲監察御史,與秦檜論事,忤其意,師遜遂劾論,且 踰年,知興國軍。 **膾死,召爲起居舍人兼崇政殿說**

書,尋兼權禮部侍郞。

部侍郎,仍兼直院。 嘗同講讀官薦興化軍鄭樵學行,召對命官,且給筆札,錄其所著史。 **編奏守臣裕民事,乞毋拘五條,從之。** 二十六年,試中書舍人。高宗躬親政事,收攬威柄,召諸賢於散地,詔命塡委, 撰吳玠神道碑,稱上旨,賜宸翰褒寵。 **兼侍講。上喜讀春秋左氏傳,綸進講,與上意 棄直學士院、遷工** 多綸所

穡

列傳第

且賜白

金五百兩

事 陳 康 一十八 伯、 同 年 知 除同 樞 密院事陳誠之共白其事 知 樞密院事。 金將渝盟,邊報沓至,宰相沈該未敢以聞。 ',乞備禦。 已而編病肺暍,告請祠, 上遣御醫診 綸率參知政

然當時|金已謀犯江、特以善意給|綸 主不能屈。 至金,館禮甚隆。 二十九年六月,朝論欲遣大臣爲泛使覘敵,且堅盟好。 九月、還朝入見、言:「隣國 日,急召使人,金主御便殿,惟,一執政在焉, 爾 恭順和好, 皆陛下威德所致。」宰臣湯思退等皆賀。 篇請行,乃以爲稱謝使, 連發數問, 綸條對, **金**

宮留守。 |編舊疾作,力丐外,除資政殿大學士知福州,上解所御犀帶賜之。 無子,以兄綽之子爲後。 敵犯江, 編每以守禦利害驛聞, 上多從之。 三十一年八月, 卒。 明年,知建康府兼行 贈左光祿大夫、諡

院 隆 |興元年,除檣監察御史,尋除右正言。 二年五月,除殿中侍御史。 史浩、同知王祖舜薦其博學有文, 尹穡字少稷。 建炎中興,自北歸南。 召對 稱旨,二人並賜進士出身。 紹興三十二年,與陸游同爲樞密院編修官。 歷遷諫議大夫,未養 孝宗獎用西北之上, 權 知

mj

能政。 爲金所脅,又將遣王之望,張浚極言其不可。隨爲右正言,懼和議弗就,因劾浚跋扈,未幾 乞置獄,取不肯撤備及棄地者劾其罪,牽引凡二十餘人。 國家事力未備,宜與敵和,惟增歲幣,勿棄四州,勿請陵寢,則和議可成。 初,符雕師潰,湯思退復相, 後將割四郡,再易國書,歲幣如所索之數,而敵分兵入寇。 金帥移書索地、詔侍從臺諫集議。 上意中悔。 牆時爲監察御史,以爲 既而盧仲賢 牆爲侍御史, '出使,

詆誹; 凡大臣不悅者皆逐之,相與表裏,以成姦謀,皆可斬。」上雖怒言者,而一時主議之臣 者攻和議之失,且言:「穡專附大臣爲鷹犬,如張浚忠誠爲國,天下共知,牆不顧公議,妄肆 與牆,皆相繼廢黜。先是,胡銓力言主和非是,大臣不悅,命銓與牆分往浙東西措置海道。 二人挈家以行,爲言者所劾,遂皆罷,語在陳康伯傳。 時方以和爲急,擢牆爲諫議大夫。 。敵勢浸張,遠近震動,都督、同都督相繼辭行。

望初以蔭補,紹興八年,登進士第。 王之望字瞻叔,襄陽穀城人,後寓居台州。父綱,登元符進士第,至通判徽州而卒。之 列 傳 第 百三十 王 之望 教授處州,入爲太學錄,遷博士。 久之,出知荆門軍,提

舉湖 南茶鹽 ,改潼川府路轉運判官,尋改成都府路計度轉運副使、提舉四川茶馬。

陞太 之望 ()府卿 品 朝 畫無遺事。 臣薦其才,召赴行在,除太府少卿,總領四川財賦。 第括民質劑未稅者,搜抉隱匿,得錢爲緡四百六十八萬,衆咸怨之。後 金人渝盟,軍書旁午,調度百 进,

使, 贊獎命諸將乘德順, 連營慟哭,聲震原野。 政,方議罷德順戍, 之,遂取秦州, 孝宗即位,除戶部侍郎,充川、陝宣論使。 連復商、陝、原、環等十七郡。 **虞允文爲宣諭使,** 上聞而悔之。 倉卒引退。 敵乘其後,正兵三萬,還者僅七千人,將校所存無幾, 力爭不 從,上以手札命隣退師。 敵以隣精兵皆在德順,力攻之。 先是,敵帥合喜寇鳳州之黃牛堡,吳隣擊走 之望既代允文宣諭 時陳康伯秉

南也。 承大意 芦 一部侍郎、江淮都督府參贊軍事。 隆 师已。 移 興初,右諫議大夫王大寶疏之望罪,除集英殿修撰、提舉江州太平興國宮。 ,攻戰之力以自守,自守旣固,然後隨機制變,擇利而應之。」有旨留中。 竊觀天意,南北之形已成,未易相兼,我之不可絕准而北,猶敵之不可越江 之望雅不欲戰,請朝,因奏:「人主論兵與臣下不同,惟 俄兼直學 未幾,權 而

陽思退力主息兵,奏除之望吏部侍郎、通問使。尋議先遣小使覘敵,召之望還。之望首

以 因上章極言廷臣執偏見爲身謀,乞明詔在庭,平其心於議論之際。 、守備不足恃爲告,上亟罷都督府,以之望爲准西宣諭使,甫拜命,又擢右諫議大夫。 時思退主和議,後主恢

復,之望言似善,實陰爲思退地也。

遂以參知政事勞師<u></u>江、准 未行,復令之望督視,改同都督。 事 旣 旣入,俄兼同知 而視師江上。 樞密院事。 金復犯邊,途上和、戰二策,且言措置守禦之備,疏奏未達,拜參知政 敵兵交至,濠、楚守將或棄城遁,上命湯思退督江、淮 力辭不行。會太學諸生上書,上怒,欲加罪,之望救解之。 師

州太平 進。 政殿大學士,移知温州, 爲叔姪之國。 朝 之望先嘗貽書敵帥。 興國宮,居天台。 ,廷趣行,之望言:「

「三抃既還,不可冒小利,害大計。」

言者論罷爲端明殿 敵皆聽許,講解而 ?,尋復罷。 乾道元年,起知 至是,汪抃使敵軍,丼割商、秦地;許歸被俘人,惟叛亡不預; 罷。 六年冬,卒。 上聞敵師退, 福州 福建路安撫使。 令督府擇利擊之,之望下令諸將 捕海賊王大老, 學士、提舉 捷聞, 不得妄 加 世

表裏,專以割地啖敵爲得計,地割而敵勢益張,之望迄以此廢焉。 之望有文藝幹略,當秦檜時,落落不合,或謂其有守。 紹興末年, 力附和議, 與思退相

僭位,俯遂致仕。 徐俯字師川 ,洪州分寧人。以父禧死國事,授通直郎,累官至 時工部侍郎何昌言與其弟昌辰避邦昌,皆改名。 司門鄓。 俯買婢名昌奴、遇客至, 靖康 中,張 郑昌

卽

呼前驅使之。

建炎初,落致仕,奉祠

匹 厚峻實引之。近亦傳俯與宦寺倡酬,稱其警策,恐或者不知陛下得俯之由。」不報,俱遂罷 誥,眞不忝矣。緣其爲則南判司,命從中出,召爲省郞,便知制誥,遂喧朝論,時謂則南監 考之古今,非陽城、种放,則未嘗不循序而進,願姑以所應者命之。昔元稹在長慶間,擢知制 | 俯爲右諫議大夫。中書舍人程俱言:「俯以前任省郞遽除諫議, 年 ,兼權參知 紹興二年,賜進士出身,兼侍讀。 內侍鄭諶識俯於江西,重其詩,薦于高宗。 、政事。 宰相朱勝非言:「襄陽上流,所當先取。」帝曰:「盍就委岳飛?」參政 三年,遷翰林學士,俄擢端明殿學士、簽書樞密院事。 胡直孺在經筵,汪藻在翰苑,迭薦之,遂以 自元豐更制以來未之有 軍崔

師,大將 趙 鼎 曰:「知上 不宜 離 |流利害,無如飛者。」俯獨 軍 一。」俯欲許之,鼎固爭,俯乃求去,提 持不可,帝不聽。 舉洞 霄宮。 會劉光世乞入奏,鼎言:「方議出

游,有詩集六卷。 九年,知 信州 中丞王次翁論其不理郡事,予祠。 明年,卒。 俯才俊,與曾幾、

召對 ,除監察御史。 沈 與求字必先, 上疏論執政,遷兵部員外郎,自劾以爲言苟不當,不應得遷。 湖州德清人。 登政和五年進士第, 累遷至明州通判。 以御史張守薦, 上乃行其

言,除殿中侍御史。 上在 「會稽,或勸幸饒、信,有急則入閩。 與求以爲今日根本正在江、浙,宜進都建康,以

圖 恢復。 論范宗尹年少爲相,恐誤國事。上不悅,以直龍圖閣知台州。 宗尹罷,召還,再除

侍御史。

非罷去。 路,或疑凡范宗尹所引用者,將悉論出之。與求曰:「近世朋黨成風,人才不問賢否,皆視宰 相出處爲 江 西安撫、知江州朱勝非未至,而馬進寇江州陷之,與求論九江之陷,由勝非赴鎭太緩,勝 時軍儲窘乏,措置諸鎭屯田,與求取古今屯田利害,爲集議二卷上之,詔付戶部看詳。 時方多事,百司稽違,與求援元豐舊制, 進退。今當別人才邪正而言之,豈可謂 請許臺諫官彈奏,上從之。 時所用皆不賢哉? 」人服其言。 與求再居言

|永宗兄弟,爲致身之資。 呂 頤浩再相,御營統制辛永宗、樞密富直柔、 上遂出永宗,而蹟、直柔亦相繼罷黜。 右司諫韓璜屢言其短。 與求劾直柔附會

列

一五四二

與求奏:「今爲何時而有此。」時已暮,疏入,上命追取斥還。 使 其事,义擅穿皇城便門。與求劾益專恣,請治其罪。 大臣 無 .益修兵政,助成中興之勢。」|浙西安撫劉光世來朝,以繒帛、方物爲獻,上已分乞六宮, 偏重之勢。 遷 御 史中丞。 今兵權不在朝廷,雖有樞密院及三省兵房、尚書兵部,但行文字而 時禁衞寡弱,諸將各擁重兵,與求言:「漢有南北軍,唐用府兵,彼此相維 內侍馮益請別置御馬院,自領 已。願詔

之地。 拘收水手,優給錢糧而存養之,以備緩急。」 秀州金山, 諜報劉豫在淮陽造舟,議者多欲於明州向頭設備。 臣聞海舟自京東入浙,必由泰州石港、通州料角崇明鎮等處,次至平江南北洋,次至 次至向頭。 又聞||料角水勢湍險,必得沙上水手方能轉運。 與求言:「使賊舟至此,則入吾腹心 宜於石港、料角等處

中丞邪 不言,前後幾四百奏,其言切直,自敵己已下有不能堪者。 侔大禹,今康國欲以微物累盛德,乞斥而焚之,仍顯黜康國。」從之。與求歷御史三院,知 兩 ڔ٠ 浙轉運副使徐康國自温州進發宣和間所製間金、銷金屏障什物,與求奏曰"「陛下儉 」移吏部尙書兼權翰林學士兼侍讀,遂出爲荆湖南路安撫使、知潭州。 上時有所訓敕,每日:「汝不識沈 引疾丐祠 無

|年〔三〕,出知鎭江府兼兩浙西路安撫使。復以吏部尚書召,除參知政事。|金人將入寇,

以賜。 乘虛擊之,彼必有反顧之憂。」上曰:「當如此措置。」 人屢試之策,不足信也。」因奏:「諸將分屯江岸,而敵人往來淮甸,當遣岳飛自上流取間道 上論輔臣曰:「殷當親總六軍。」與求贊之曰:「今日親征,皆由聖斷。」上意決親征,書庫攻 上曰:「朕以二聖在遠, 屈己通和。今豫逆亂如此, 安可復忍?」與求曰:「和親乃金

事,乞送尚書省。 遂丐祠, 罷, 出知明州 張嫂復欲出視師,不告之同列。 五年,兼權知樞密院事。 有旨從之。 時張浚視師江上,以行府爲名,言知泰州邵彪及具營田 與求不能平, 曰:「三省、樞密院乃奉行行府文書邪?」六年, 及得旨,乃退而數曰:「此大事也,吾不與聞,何以居位? 利害

七年,上在平江,召見, 除同知樞密院事; 從至建康,遷知樞密院事。 薨,贈左銀青光

禄大夫,諡忠敏。

徽宗嘉之,除祕書郎。三館士建議東封,汝文曰:「治道貴淸淨。 師麼、漢之侈心,非所願也。」責監宿州稅。久之,召除著作郎,遷起居郎。 翟汝文字公巽,潤州丹陽人。 登進士第,以親老不調者十年。 今不啓上述三代禮樂,而 **擢議禮局編修官**,召對,

典雅 之法,王人雖微, 任, 出 ,廣共園間 皇太子就 知襄州 時稱之。 移 傳,命汝文勸講,除中書舍人。 序諸侯上。不可卑近列而 知濟州,復知唐州,以謝章自辨罷。 命同修哲宗國史,遷給事 汝文言於上,師成 諷宰相黜汝文,出守宣州 中。 尊陪臣。」上途命如舊制。 言者謂汝文從蘇軾、黃庭堅游,不可當贊書之 高麗使入貢,詔班侍從之上,汝文言:「春秋 未幾,起知陳州 內侍梁師成強市百姓 召拜 中書舍人,外制

黨與。 密歲貢牛黃,汝文曰:「牛失黃輒死,非所以惠農,宜輸財市之,則其害不私於密。」上從之。 欽宗即位,召爲翰林學士,改顯謨閣學士、知越州兼浙東安撫使。 汝文曰:「祖宗法度,獲私商不詰所由,欲靖民也。 東部侍郎,出知廬州,徙密州。 密負海產 鹽,蔡京屢變鹽法, 今繫而虐之,將爲厲矣。」悉縱之。 盜販者衆, 有司窮治

田

東 却 誠 歲起之額蓋與越州等,杭州去年已減十二萬匹,獨越州尚如舊,今乞視戶等第減罷。」楊應 請問 請使高 和預買絹歲九十七萬六千匹,而越州乃二十萬五百匹,以一路計之,當十之三。 建炎改元,上疏言:「陛下卽位赦書,上供常數,後爲獻利之臣所增者,當議裁損。 津以窺吳越,將何辭以對?」後高麗果如汝文言。 麗 圖迎二帝, 汝文奏:「應誠欺罔君父,若高麗辭以大國假道以至滅雲, 上將幸武昌,汝文疏請幸荆南, 如杭州 金人 如浙

印,直送省部;入對,乞治堂吏受賂者。 委未决, 紹 興元年,召爲翰林學士兼侍講,除參知政事、同提舉修政局。 更緣爲姦。汝文語檜,宜責 (都司程考吏牘, 稽違者懲之。 **檜怒,面劾汝文專擅。** 右司諫方孟卿因奏汝文與 汝文嘗受辭牒,書字用 時秦檜相,四方奏請塡

相詬,至目膾爲「濁氣」。 先是,汝文在密,檜爲郡文學,汝文薦其才,故檜引用之。然汝文性剛不爲檜屈, 汝文風度翹楚,好古博雅,精於篆籀,有文集行于世。

長官立異,豈能共濟國事?罷去以卒。

懷德軍 功,進集英殿修撰,陞龍圖閣待制,節制陝西六路軍馬。 席益爲京西安撫使,益求庶自副。高宗卽位,除直龍圖閣、 |邦彥以語||蔡攸,||攸不然。以||庶爲||陝西運判兼制置||解鹽事。 太宰李邦彥夜召庶問計,庶曰:「宿將無如种師道,且夷虜畏服,宜付以西兵,使之入援。」 好,今坐視其敗亡不能救,乃利其土地,無乃基女直之禍乎?」不聽。 王庶字子尚,慶陽人。 契丹爲金人所破,舉燕雲地求援,詔師道受降。 崇寧五年,舉進士第,改秩, 知涇州保定縣。 鄜延經略使兼知延安府。 | 庶謂||師道日:「國家與遼人百年之 疆事益棘,欽宗欲幸襄、鄧,先命 宣和七年,金果入寇。 以种師道薦,通 累立戰

列

端盡統涇原勁兵,庶 雅 河 入 在坊州聞之,夜趨 渡 不 犯晉寧, 河 褟 ·欲屬 庶移 徐圖 庶 侵 恢復。」亮不能 書曰:「夏 河 東經 丹州 以未 制 鄜延以遏其衝。 ,又渡淸水河,破潼關 受命辭; 屢督其進,端訖不行,遂陷延安。 人之患 使王變旣遁歸,東京留守宗澤承制以庶權陝西制置使。 從。 小而緩,金人之患大而迫,秋高必大舉,盍杖節率兵舉義, 居數日,告身至,又辭。 金人大人,庶調兵自沿河至馮翊,據險以守。金人先已乘 金 |人詭道陷||丹州, ,秦、隴皆震。庶傳檄諸路,會期討賊。 州界廊、延之間,庶乃自當延安路。 金 語在端傳。 人知端與庶不協,併兵寇鄜 涇原 會宣諭使 統 制 謝亮 冰 驅 曲 渡

城乎? 守, 有指,今以人臣 見謝亮曰:「延安,五路襟喉,今旣失矣。春秋大夫出疆之義得以專之,請誅庶。 騎之半,比至帳下,僅數騎 旣無 初, ?」 庶曰:「吾數令不從,誰其愛身者!」 端怒,謀卽軍 所歸,遂以軍付瀴, 會韶庶守京兆,庶先以失律自劾得罷。 庶 聞圍急, |而擅誅于外,是跋扈也,公則自爲之。」|端沮而歸,乃奪|庶節制使印,又拘露 自收散亡往援。 而自將百 端厲聲問庶延安失守狀,且曰:「節制固 騎馳至襄樂勞軍,尙倚端爲助。 觀察使王躞亦將所部發興元。 丁內 一中誅庶 而奪其兵, 知愛身,不 庶至甘泉而延安已不 庶 至,端令每門 乃夜走寧州 」亮曰:「使事 知爲天子 減從 愛

時張浚自富平敗歸,始思庶及端之言可用,乃並召之。庶地近先至,力陳撫秦保蜀之

策,勸浚收熙河、秦鳳之兵,扼關、隴以爲後圖。 興庶 必不相容,端未至,但復其官,移恭州。 淡不納。 庶因謂浚曰"「端有反心。」浚亦畏端得土, 求終制,不許,乃版授參議官。 凌

始有殺端意矣。語在端傳。

奉祠 壯 于朝,陞徽 , 兩 丁取 尋起 興 $\overline{\mathcal{H}}$ · 猷閣直學士。 一,三丁取二,號「義士」,日閱於縣,月閱於州,厚犒之,不半年,有兵數萬。 年, 知遂寧,固避得請 起復知興元府、 有讒於沒者,徙庶知成都,改嘉州。 利夔路制置使。 庶以士卒單寡,籍興、洋諸邑及三泉縣強 明年,浚劾庶輕率傾險,落職 没言

曹操 紹 復 大業, 所以 六年,除湖北安撫使、知鄂州 受關羽 都荆爲 者也。」上大異之。 可。 荆州左吳右 圖, 復顯謨閣待制、 趨闕,上因燕見,庶言"「陛下欲保江南,無所事; 利盡 |南海,前臨江、漢,出三川,涉|大河,以圖中原, 知荆南府、 湖北經略安撫使, 又復直 如日

賞, 親 知 兵者不可使言兵。」 擢, 是 七 非邪 非有 年十月,以兵部侍郎召。 左右 IE 混 淆。 ·之助。」」庶頓首謝,因奏:「恢復之功十 誠能賞 又 口 陳手畫凑、 (功罰 罪,其誰 明年春,入對,上曰:「召卿之日,張浚已去, 蜀 利害。 不 ·服 ? 昔漢 上大喜, 光武 年未立,其失在偏 以兵取天下,不以 即日遷本部尚書。 聽, 在欲 趙鼎· 不急奪其費,不 閱 月, 速, 未來,此股 在 拜樞密 輕

列

傳

第

百三

+

王庶

辛

炳

副使。

歲若 使, 語。 其言甚切。 當是 不出 議 者乞遣重臣行邊,遂命庶措置江、准邊防。 師 秦檜 當納 金 節請閉。」庶壯之。 又遣張通古四來許割地, 再相,以和戎爲事。 庶還朝, 金使鳥陵思謀至,詔趣庶還。 還梓宮,歸太后。 論金人變詐, 京、 湖宣撫使岳飛聞庶行邊,遺書曰:「今 自渝海上之盟,因及飛納節之 庶日:「和議之事, 庶力詆和 議, 臣所不 乞誅 金

焉。 思庶言,追復其官,諡敏節。 十三年,御史胡汝明論庶譏訕朝政, 御 史中 丞勾龍 如淵劾庶本趙鼎所薦,欺君罔上。 子六人,之奇,乾道中,知樞密院事。 責嚮德軍節度副使, 庶罷歸, 道州 至九江,被命奪職, 安置。 至貶所卒。 徙家居

知。

凡七

」疏乞免官,乃以資政殿學士知潭州

敢言。 先是, 蹇微,乞下有司計度。 辛 炳極 察京 炳 字如晦, 廢發運 疏其弊,且以變法後兩歲所得之數, 福州侯官縣人。 司 "轉般倉爲直達綱、舟入、 徽宗以問京,京怒,以炳爲沮撓,責監南劍州新豐場,尋提舉洞霄宮 登元符 三年進士第, 率侵盜, 較常歲虧欠一百三十有二萬, 沈舟 累官至監察御 而 遁, 戶 部 史兼權 受 虚數、 殿 支益 中侍御史。 人畏京莫 廣 M

起知袁州,移無爲軍。靖康初,召爲兵部員外郎。

懦怯 俗類薄,連疏三省所行乖失數十事,請諭大臣勿廢都堂公見之禮。時屆建八州添差至百八 不能,罷之,尋以起居舍人召,辭。紹興二年,復以侍御史召。 高宗即位,除左司員外郎,辭,未幾,起直龍圖閣、知潭州。 明年,張浚調兵潭州,以炳 首言今日公道壅塞,風

十餘員 (`, 炳言: 「艱危多事之時,冗食之官無益,當罷。」從之。

蘇、湖地震,下詔求言。、炳言:「大臣無畏天之心,何事不可爲?」其言甚峻,由是宰執

呂頤浩居家待罪,炳劾罷頤浩。 除御史中丞。 時方遣使議和,炳方言:「金人無信, 知樞密院事張浚召赴行在,炳論其敗事誤國,浚坐落職 和議不可恃, 宜講求守禦攻戰之

亡,貧無以葬,賜銀帛賻其家,贈通議大夫。 |以疾請外,除顯謨閣直學士、知漳州,未赴而卒。 詔: 炳任中執法,操行淸修,今其云

辨,沮抑岳飛,異哉。沈與求止和親之議,翟汝文善料事,而膾以爲異己。 合,王綸代言辭合體要,若尹穡、王之望人品雖不同,其附和議則 論日: 秦檜晚薦士以收人望,然一時知名之士,亦豈盡可籠絡者哉!朱倬論事輒不 一爾。徐俯末與趙鼎爭 王庶論都荆州,

列

傳第一百三十一

辛炳

校

勘記

一一五五〇

當時諸臣之慮皆不及此。 考夫所寬之事,庶蓋忠義人也。 辛炳雅志淸修,又豈多見也歟。

校勘記

宣和 五年 鶴山先生大全文集卷七四朱倬神道碑同本傳。 查本書卷二二徽宗紀是年無貢舉;

其賜進 士及第出身八百五人,繫於宣和六年,通考卷三二選舉考引載宋登科記總目同。 通考並

載六年榜狀元爲沈晦;而陳騤南宋館閣錄卷七載, 朱倬正是沈晦榜進士。 可見朱倬登進士第

當在宣和六年,此誤。

 \subseteq 觀文殿學 士 「學士」上原衍「大」字,據本書卷二一三字輔表、鶴山先生大全文集卷七四朱倬神

道碑刪。

 \subseteq 四年 據本書卷二七高宗紀、卷二一三字輔表,「四年」上失書「紹興」紀元。

張 通古 原 作「蕭通古」。 按本書卷二九高宗紀、 繫年要錄卷一二二都作「張通古」; 金史卷八

三有張通古傳,據改。

宋史卷三百七十三

列傳第一百三十二

朱弁 鄭望之 張邵 洪皓子适遵

邁

之,與歸新鄭,妻以兄女。新鄭介汴、洛間,多故家遺俗,弁遊其中,聞見日廣。 朱弁字少章,徽州婺源人。少穎悟,讀書日數千言。旣冠,入太學,晁說之見其詩,奇 **靖康之亂**,

家碎于賊,弁南歸。

雲中, 建炎初,議遣使問安兩宮、介奮身自獻,詔補修武郎,借吉州團練使,爲通問副使。 見粘罕, 邀說甚切。料罕不聽,使就館, 守之以兵。 并復與書, 言用兵講和利害 至

列傳第一百三十二 朱尹

紹興二年,金人忽遣宇文虚中來,

言和議可成,當遣一人詣元帥府受書還。

與正

願正使受書歸報

虚中欲弁

天子,成兩國之好,蚤申四海之養於兩宮,則吾雖暴骨外國,猶生之年也。」倫將歸,弁請曰: 「古之使者有節以爲信,今無節有印,印亦信也。 願留印,使角得抱以死,死不腐矣。」倫解

以授治,弁受而懷之,臥起與俱

等曰:「上國之威命朝以至,則使人夕以死,夕以至則朝以死。」又以書訣後使洪皓曰:「殺行 墓』,於我幸矣。」衆皆泣下,莫能仰視。 囚之、殺之,何必易其官。吾官受之本朝,有死而已,誓不易以辱吾君也。」且移書耶律紹文 亦感動,致禮如初。 北 知其終不可屈,遂不復強。 人非細事,吾曹遭之,命也,要當舍生以全義爾。」乃具酒食,召被掠士夫飮,半酣,語之曰: 「吾已得近郊某寺地, 面臣之,吾有死耳。」金人怒,絕其餼遺以困之。,弁固拒驛門,忍饑待盡,誓不爲屈。全人 金人迫弁仕劉豫,且訹之曰:「此南歸之漸。」弁曰:「豫乃國賊,吾嘗恨不食其肉,又忍 久之,復欲易其官,弁曰:「自古兵交,使在其間,言可從從之,不可從則 旦畢命報國, 所談笑自若,曰:「此臣子之常,諸君何悲也?」

」 諸公幸瘞我其處,題其上曰『<u>有宋通問副使朱公之</u>

宗大行之文爲獻,其辭有曰:「歎馬角之未生,魂消雪窖,攀龍髯而莫逮,淚洒冰天。」帝讀 事及金國虛實,曰:「此不可失之時也。」遣李發等間行歸報。 王倫還朝,言并守節不屈,帝爲官其子林,賜其家銀帛。 其後,倫復歸, 會粘罕等相繼 死滅,弁密疏其 又以 弁奉送徽

使烏 之感泣,官其親屬五人,賜吳興田五頃。帝謂丞相張浚曰:「歸日,當以禁林處之。」八年,金 陵思謀、石慶充至,稱弁忠節,詔附黃金三十兩以賜。

皆天助中興之勢。若時與幾,陛下旣知於始,願圖厥終。」帝納其言,賜金帛甚厚。,弁又以 弭之術宜詳以講之。 全人以黷武爲至德,以苟安爲太平,虐民而不恤民,廣地而不廣德,此 運而往,或難固執;幾動有變,宜鑑未兆。 下與金人講和,上返梓宮,次迎太母,又其次則憐赤子之無辜,此皆知時知幾之明驗。 金國所得六朝御容及宣和御書畫爲獻。秦檜惡其言敵情,奏以初補官易宣敎郎、直祕閣。 校其考十七年,應遷數官,檜沮之,僅轉奉議郎。十四年,卒。 可失者幾,而幾之藏無形。惟無已也,故來遲而難遇,惟無形也,故動微而難見。 十三年,和議成,弁得歸。 入見便殿,弁謝且曰:「人之所難得者時,而時之運無已; 盟可守,而詭詐之心宜嘿以待之;兵可息,而銷 唑

氏、小校閻進、朱勣等死節事狀,請加褒錄以勸來者。 舊聞三卷、續骫骳說 金國名王貴 |弁爲文慕陸宣公,援據精博,曲盡事理。詩學李義山,詞氣 史抗行了、張忠輔、高景平、孫益、孫谷、傅偉文、李舟、五臺僧寶眞、婦人丁氏、晏 (人多遣子弟就學,)弁因文字往來說以和好之利。 卷、雜書一卷、風月堂詩話三卷、新鄭舊詩一卷、南歸詩文一卷。 有聘遊集四十二卷、書解十卷、曲消 來容,不蹈其險怪奇澀之 及歸,述北方所見聞忠臣

鄭

望之

列

Ti. 部員外郎 不受請託。 年進 鄭望之字顧道,彭城人,顯謨閣直學士僅之子也。望之少有文名,山東皆推重。 士第,自陳留簿累遷樞密院編修官,歷開封府儀、工、戶曹,以治辦稱。 兼 金部。 宦寺有強占民田者,奏歸之。 察京子欲奪人妾,使人諭意,望之拒不受。 臨事 登場。寧 一勁正, 除駕

宰相交地,親王送大軍過河。 离不以朝廷受歸朝官及賜平州張覺手詔爲辭,遣蕭三寶奴偕悅等還,以書求割三鎭,欲得 之同入見。 靖康 元年,金人攻汴京,假尚書工部侍郎,俾爲軍前計議使。 望之言金人意在金幣,且要大臣同議,迺命同知樞密院事李脫與望之再使。 既還,金人遣吳孝民與望 律

部 望之詣國王砦詰問。 不可不和。 离不以用兵詰責諸使者,邦昌恐懼涕泣,王不爲動。 侍 郎,同悅再至|金營,仍以珠玉遺|金人。|金人拘留|望之踰旬。 時高宗在康邸,慷慨請行,遂與張邦昌乘筏渡濠,自午至夜分,始達金砦。 旣而金兵退,朝廷以議和非策,罷望之提舉亳州明道宮。 會再遣宇文虛中持割地詔至,望之得還,因盛言敵勢強大,我兵削弱, 金人遂不欲留王,更請肅王,乃以兵送 會姚平仲夜劫砦不克, 斡 又除望之戶

罷, 詔望之爲戶部侍郎, 尋轉更部侍郎。 尋兼主管御營司參贊軍事。 建炎初,李綱以望之張皇敵勢,沮損國威,以致禍敗,資海州團練副使,連州居住。 論航海不便,忤旨,以集英殿修撰再領亳州明道宮。起知宣 論王雲之寃,帝爲感動,復雲元官,與七子恩澤。

大夫。 臣曰:「望之,朕故人也。」於是升徽猷閣直學士,復致仕。三十一年,卒,年八十四。贈中 紹興二年,會赦,復徽猷閣待制致仕。七年,落致仕,召赴行在。望之以衰老辭,帝謂大

州,踰年,以言章罷。

·言,邵上疏曰:「有中原之形勢,有東南之形勢。今縱未能遽爭中原,宜進都金陵,因江、淮、 蜀、漢、閩、廣之資,以圖恢復,不應退自削弱。」 張邵字才彥,烏江人。登宣和三年上舍第。建炎元年,爲衢州司刑曹事。 會詔求直

不忍聽,請止樂。」至于三四,聞者泣下。 問使,武臣楊憲副之,卽日就道。 三年,俭人南侵,詔求可至軍前者,邵慨然請行,轉五官,直龍圖閣,假禮部尚書,充通 至濰州,接件使置酒張樂,邵曰:「二帝北遷,邵爲臣子,所 翌日,見左監軍撻攬(三),命邵拜,邵日:「監軍與邵

列傳

臣 爲 國 無餘,是天意人心未厭宋德也。 初開 書去,執邵送密州,囚于祚山砦至。 南 北朝從 邊 隊,謀臣 (臣,無相拜禮。) 且以書抵之曰:「兵不在強弱,在曲直。宣和以來,我 .復啓兵端,是以大國能勝之。 。今大國復裂地以封劉豫,窮兵不已,曲有在矣。」撻攬怒,取 厥後偽楚僭立, 羣盜盖 起, 曾幾 非 何 大無兵 時 也, 電掃 帥

嘗 餉 氣 莫知所之。 大赦 《俱厲。 則 颺 明年,义送邵于劉豫,使用之。邵見劉豫,長揖而已,又呼爲「殿院」,責以君臣大義, () 許|宋使者自便還鄉,人人多占籍|准北,冀幸稍南。 去,終非大國之利」,守者密以告,|金取其書去,益北徙之|會寧府,距||燕三千里。 **豫怒,械置于獄,楊憲遂降。** 後又作書,爲金言「劉豫挾大國之勢,日夜南侵,不勝則首鼠兩端,勝則 豫知邵不屈,久之,復送于金,拘之燕山僧寺,從者皆 惟邵與洪皓、朱弁言家在江南。 如養鷹, 金 詞

崔 妲 佑 縱 神 十九九 觀。 十三年, 魏行 年, 左司 可皆歿異域未褒 和議 以數文閣待制提舉江州太平 諫詹大方論其奉使 成,及皓、弁南歸。八月,入見,奏前 贈者,乞早頒恤典。 無成,改台州崇道 興國宮。 邵倂攜崔 觀。 知池州, 後 移 使者 縱 書時相,勸其 柩 再奉 歸其家。 如陳過庭、 ·祠卒, 迎 升 清欽宗 年六十一。 司馬朴、滕茂實 秘閣修撰,主管 與諸王后 累贈

邵 負氣,遇事慷慨,常以功名自許,出使囚徙,屢瀕於死。 其在會寧,金人多從之學。喜

少

誦 佛書, 雖異域不廢。初,使金時,遇秦檜於濰州 及歸, 上書言膾忠節,議者以是少之。

後弟一下大理獄,將株連四,會膾死得免。有文集十卷。 子孝覽、孝曾、孝忠。孝曾後亦以出使殁于金,金人知爲邵子,尙憐之。

|秀軍叛,縱掠郡民,無一得脫,惟過||皓門曰:「此||洪佛子家也。」不敢犯。 下,皓白守邀留之,守不可,皓曰:「願以一身易十萬人命。」人感之切骨,號「洪佛子」。其後 直以糶。 **勔皆欲婚之,力辭。** 洪皓字光弼,番易人。少有奇節,慷慨有經略四方志。登政和五年進士第。 民坌集,皓恐其紛競,乃別以青白幟,涅其手以識之,令嚴而惠徧。 宣和中,爲秀州司錄。 大水,民多失業,皓白郡守以拯荒自任,發廩損 浙東綱米過 城

方居父喪, 輔近諫移蹕者謂誰, 虚侵軼。宜先遣近臣往經營,俟告辦,回鑾未晚。」時朝議已定,不從,旣而悔之。他日 建炎三年五月,帝將如金陵,皓上書言:「內患甫平,外敵方熾,若輕至健康,恐金人乘 金人安能久陵中夏! 頤浩解衣 巾,俾易墨衰絰入對。 張浚以皓對。時議遣使金國,浚又薦皓於呂頤浩, 此正春秋鄉、野之役,天其或者警晉訓楚也。」帝悅,遷皓五官, 帝以國步艱難、 兩宮遠播爲 召與語,大悅。 **|** 皓極言:「天道 一,帝問宰 皓

浩不樂,遂抑遷官之命

擢徽猷閣待制,假禮部尚書,爲大金通問使,龔璹副之。 令與執政議國書, 皓欲有所易, 頤

心。 人密諭之曰:「君數千里赴國家急,山陽縱有罪,當稟命于朝;今擅攻圍,名勤王,實作賊 成 以所部衞皓至南京。比過淮南,成方與耿堅共圍楚州,責權州事賈敦詩以降敵,實持叛 皓先以書抵成,成以汴涸,虹有紅巾賊,軍食絕,不可往。 時淮南盜賊踵起,李成甫就招,即命知泗州羈縻之。乃命皓兼淮南、京東等路撫諭使,俾 |皓聞||堅起義兵,可撼以義,遣

爾。」堅意動,遂強成斂兵。

給米伍 時,宜使人諭意,優進官秩,畀之以京口 春 繼 古無白頭 由 有『引衆建康』之語。今斯賽據揚州,薛慶據高興,萬一三叛連衡,何以待之。此含垢之 東京 皓 萬 至泗境, 賊。 以行。 石。 頤浩惡其直達而不先白堂,奏皓託 其黨悔悟,皓使持書至賊巢,二渠魁聽命,領兵入宿衞 迎騎介而來, 至順昌, 聞羣盜李閻羅、 龔璹曰:「虎口不可入。」皓遂還。上疏言:「成以朝廷餽餉 綱運,如晉明帝待王敦可也。」疏奏,帝卽遣使撫成, 小張俊者梗潁 事稽留,貶二秩。 上道。 |皓與 皓遂請出滁陽路, 其黨遇, 譬曉之曰:「自

命,不得奉兩宮南歸,恨力不能磔逆豫,忍事之邪!留亦死,不卽豫亦死,不願偷生鼠狗間, 皓至太原 ",留幾 一年,金遇使 人人禮 日 溥。 及至雲中,粘罕迫二使仕劉豫,皓日:「萬 里銜

願就鼎鑊無悔。」粘罕怒,將殺之。旁一會唶曰:「此眞忠臣也。」目止劍士,爲之跪請,得流

遞冷山。流遞,猶編竄也。 惟濤至汴受豫官。

然火煨麪食之。 王悟室聚落也。 默,忽發怒曰:「汝作和事官, 又數爲言所以來爲兩國事,旣不受使,乃令深入敎小兒,非古者待使之禮也。 受殺行人之名,願投之水,以墜淵爲名可也。」悟室義之而 可乾,但不能使天地相拍爾。」皓曰:「兵猶火也, 雲中至冷山行六十日,距金主所都僅百里,地苦寒,四月草生,八月已雪,穴居百家,陳 或獻取圖策,悟室持問皓,皓力折之。 悟室敬皓,使教其八子。或二年不給食,盛夏衣麤布,嘗大雪薪盡,以馬矢 而口硬如許,謂我不能殺汝耶? 弗戢將自焚, 悟室銳欲南侵,日:「孰謂海 咋 自古無四十年用兵不止者。」 」皓曰:「自分當死,顧大國無 悟室 大,我力 或答或

城, 死,故得免。 |將北來,議不合,事復中止。 留<u></u>燕甫一月,兀朮殺悟室,黨類株連者數千人,獨皓與異論幾 千兩景德所無, 「誅投附人何爲不可?」皓曰:「昔魏侯景歸梁,梁武帝欲以易其姪蕭明於魏,景遂叛,陷臺 中國決不蹈其覆轍。」悟室悟曰:「汝性直不誑我,吾與汝如燕,遣汝歸議。」遂行。 和議將成,悟室問所議十事,皓條析甚至。 東南 一不宜蠶,絹不可增也;至於取准北人。 大略謂封册乃虛名,年號本朝自有; 金三 景德載書獨可覆視。 悟室日 會莫

列

傳

祐陵 地。」又問字綱、趙鼎安否,獻六朝御容、徽宗御書。其後梓宮及太后歸音,皓皆先報 反掌 書曰:「金已厭兵,勢不能久,異時以婦女隨軍,今不敢也。若和議未決,不若乘勢進擊,再造 李微持歸,帝大喜曰:「朕不知太后寧否幾二十年,雖遣使百輩,不如此一書。」是多,又密奏 以北,意欲捐腻以南栗之。王師亟還,自失機會,今再舉尚可。」十一年,又求得太后書,遣 趙德,書機事數萬言,藏故絮中,歸達于帝。言:「順昌之役,」俭人震懼奪魄,燕山珍寶盡徙 爾。」又言:「胡銓封事此或有之,金人知中國有人,益懼。 方二帝遷居五國城,皓在雲中密遣人奏書,以桃、梨、粟、麪獻,二帝始知帝卽位 ,北嚮泣血,旦夕臨,諱日操文以祭,其辭激烈,舊臣讀之皆揮涕。 張丞相名動異域,惜置之散 紹與十年、因諜 皓聞 者

登舟。 降爲 可歸, 許使人還鄉 皓有逃歸意,乃請于參政韓昉,乞於眞定或大名以自養。 留 初 | 助遂令| 皓校|雲中進士試,蓋欲以計墮 司 皓至 燕,宇文虚中已受 金官,因薦皓。 判官。 ,皓與脹邵、 趣行 屢矣,皓乞不就職,昉竟不能屈。 朱弁三人在遣中。 酷也。 金人懼爲患, 猶遺人追之, 七騎及准, 金主聞其名,欲以爲翰林直學士,力辭之。 皓復以疾辭。 金法,雖未易官而曾經任 防怒,始易

皓官爲

中京副留守,再 未幾, 金主以生子 使者,永不 而皓已 大赦,

二年七月(四),見于內殿,力求郡養母。 帝曰:「卿忠貫日月,志不忘君,雖蘇武不能

天下者,獨皓而已。 皓旣對,退見秦檜,語連日不止,曰:「張和公金人所憚,乃不得用。錢塘 有忠節,得上眷。但官職如讀書,速則易終而無味,須如黃鐘、大呂乃可。」八月,除

微猷閣 暫居,而景靈宮、太廟皆極上木之華,豈非示無中原意乎?」檜不懌,謂皓子适曰:「尊公信 酉出使,至是還,留北中凡十五年。 過 直學士、提舉萬壽觀兼權直學士院。 一,豈可 `捨朕去邪!」請見慈寧宮,帟人設簾,太后曰:「吾故識尙書。」命撤之。 同時使者十三人,惟皓、邵、舟得生還,而忠義之聲聞于 皓自建炎已

若遽從之,謂溱無人,益輕我矣。」膾變色曰:「公無謂溱無人。」旣而復上疏曰:「恐以不與 不取,緩急何以使人?」膾大怒,又因言室燃寄聲,膾怒益甚,語在煙傳。翌日,侍御史李文 之故,或致渝盟,宜告之曰:『俟淵聖及皇族歸,乃遣。』」又言:「王倫、郭元邁以身徇國,棄之 與。金既限准,官屬皆吳人,宜留不遣,蓋慮知其虛實也。 會劾皓不省母,出知饒州。 金人來取趙彬等三十人家屬,詔歸之。 皓曰:「昔韓起謁環于鄭,鄭,小國也,能引義不 彼方困於蒙兀,姑示強以嘗中國,

鍔初不 大理獄, 明年,大水,中官白鍔宣言:「燮理乖盭,洪尚書名聞天下,胡不用。」檜聞之愈怒,繋鍔 識皓,特以從太后北歸,在金國素知皓名爾。 尋流嶺表。諫官詹大方途論皓與鍔爲刎頸交,更相稱譽,罷皓提舉江州太平觀。

列

語,責豪州團 後 一〇、諡忠宣 一日,檜 居母 亦死。 練 副使,安置英州。 他言者猶謂皓睥睨鈞衡。 帝聞皓卒,嗟惜之,復敷文閣直學士至,贈四官。 居九 年,始復朝奉郎,徙袁州,至南雄州 終喪, 除饒州通判。 李勤 又附檜 久之,復徽猷閣直學 卒,年六 誣 皓作欺世 + 死 飛

皓賙之。 貴族流落賤微者,皆力拔以出。 必 問 皓爲何官、居何地。 皓 雖久在北廷,不堪其苦,然爲金人所敬,所著詩文,爭鈔誦求鋟梓。 范鎭之孫祖平爲傭奴,皓言於金人而釋之。 性急義,當艱危中不少變。 惟爲膾所嫉,不死於敵國,乃死於讒慝 懿節后之戚趙伯璘隸悟室戲下,貧甚, 劉光世庶女爲人豢豕,贖而嫁之。 既歸,後使 (者至) 他

皓博學強記,有文集五十卷及帝王通要、姓氏指南、 松漠紀聞、金國文具錄等書。

适、遵、邁。

此 出 忠 使恩,補修職 義 适 、報也,宜升擢。」遂除敕令所删定官。 字景伯,皓長子也。 郎。紹興十二年,與弟遵同中博學宏詞科。 幼敏悟,日誦三千言。 後三年,弟邁亦中是選,由是三洪文名滿天下。 皓使朔方、适年甫十三、能任家事。 高宗曰:「父在遠方,子能自立, 以皓

改祕書省正字。

州 來 代代貢 循 南 甫 數月, 禮物,闢試聞以復舊額,蠲官田令不種者輸租。 省侍者九載。檜死皓還,道卒,服闋,起知荆門 **皓歸,忤秦檜,出知饒州,适亦出爲台州通判。** 軍。 改知徽州,尋提舉江東路常平茶鹽 應詔上寬恤四事: 垂滿,皓謫英州,适復論罷 輕茶額錢,它

言役法不均之弊。

錢糧。 康之兵數道皆集,見可而進,庶幾兵力不頓,可以萬全。」升尚書戶部郞中,總領淮東軍馬 諭 田 · 產爲官鬻,請聽其估贖之。」及底斃,适上疏曰:「大定僭號,諸國未必服從,宜多遣密詔傳 中原義士,各取州縣,因以界之。王師但留屯淮、泗,募兵積粟,以爲聲援。 會完顏亮來侵,上親征,适觀金陵,言:「本路旱,百姓逐食于淮,復遭金兵,今各懷歸而 孝宗 即位,海州解圍,符離用兵,饋餉繁夥,适究心調度,供億無闕。 遷司 俟蜀、漢、山 農少卿

時金 換授, 軍 本 一,副 朝 故國 沿革 人再犯准 恐有 使帶 史以爲官存而事廢。 十一條上之, 中 减 郎 奉之患,乞如閣 將(v),又以下則帶 羽檄沓至, 且言:「太祖、太宗朝, 書韶填委,容訪醻答率稱上旨,自此有大用意 職兼帶節度,至刺 陛下修飭戎備,不必遠 左右郎 將,其官府人吏,令有司 常以處諸將及降王之君臣,自後 史帶上將軍 取唐制,祖宗故 工,横行 遙郡帶大將 相度以 事 풆 聞。」除 可法 金旣尋盟,首爲 軍 多以 則。 ٠, 中 正 書舍人。 今徑 使帶將 皇族爲

隆

興二

年二月,召貳太常兼權直學士院。

上欲除諸將環衞官,詔討論

其制。

适具唐及

列

傳

第

百 三 十

洪

皓

要領以歸

生 辰 使。 金 遣 同簽書樞密院事高嗣先接伴, 自言其父司空有德於皓, 相 與甚驩, 得其

余堯 則 人以 諸子皆流 弼 乾道元年五月,遷翰林學士,仍兼中書舍人。 復 除用之漸 龍 圖 配嶺南。 閣 學士,适謂其皆檜黨也,隨 恐檜黨牽 秦檜稔惡自斃,不肖之孫官職仍舊, 連而進。」其命遂寢。 命繳之。 時巫伋復召, 秦塤久廢,忽予 可謂幸矣。 莫汲 (3) 擢樞密院 祠, 适奏日:「李林甫 宮觀雖 小,熉得之, 編修官, 妃

前命, 量。」 卽 計 蜀 中 東 六 但 月 取 酉 每家才得數百,恐民間 府始 鐵錢行之准上。 ,除端明殿 中取 同 班奏事。 十五五 **◇學士、** 萬緡,行 八月, 簽書樞密院事。 事 旣行,适言其不可。上問之,适曰:「今每 之廬 無以貿易。 拜參知 和二 政 一州而 且客旅 事 上渝參政錢端禮、 트_。 諫議 無 大夫林安宅以銅錢 回貨,鹽場有大利害。」上以爲然,乃寢 虞允文曰"「三省事與洪适商 州 不得千 多入北 緡, 境, 請禁之, 州 以 萬

府、 ||宅抗 浙東安撫使。 疏論 十二月, 适, 拜尙書右僕射、 旣 而 再 臺 奉 臣復 祠 合奏。 淳熙 同中書門下平章 + 三月, 年薨,年六十八,諡 除觀文殿 事 兼 **必學士、** 樞 密 使。 文 提舉江州 惠 未幾, 太平 春霖, 興 、國宮。 适引咎乞退, 尋起 知 林安 紹 興

适以文學聞望,遭時遇主,自兩制一月入政府,又四閱月居相位,又三月罷政, 然無大

建明以究其學。 或謂适黨湯思退,又謂适來自淮東,言張浚妄費,浚以此罷相。 家居十有六年,兄弟鼎立,子孫森然,以著述吟詠自樂,近世備福鮮有及 子九人"槻、柲、楮、楮、

/ 人。 / 人 。 / 人 。 / 人 。 / 人 。 / 人 。 / 人 。 / 人 。 / 人 。 / 人 。 / 人 。 / 人 。 / 人 。 / 人 。 / 人 。 / 人 。 / 人 。 / 人 。 / 人 。 / し . / し . / . . / . / . .

秦檜贈以節旄,擢用其子。 年,免喪,召對,極陳父寃,曰:「先臣與龔璹同出疆,壔仕於劉豫,以妄殺兵官爲以所誅,而 復入爲正字。 入館,自遵始。宰相寒檜子熔爲官長,謦欬爲人輕重,遵恬然不附麗。二年弗遷。 學宏詞科,中魁選,賜進士出身。。高宗以皓遠使,擢爲祕書省正字。中興以來,詞科中選卽 亡,遵孺慕攀號。 | 檜不分忠逆如此。」| 高宗悉為道謗語所起,且曰:「卿再登三館,嘗典書命,今以修注處 時南還,與朝論異,出守。
遵遂乞外,通判常、

| | 越三州。 | 紹興二十五年,

湯思退薦之, 遵字景嚴,皓仲子也。自見時端重如成人,從師業文,不以歲時寒暑輟。父留沙漠,母 八月,兼權直學士院。陽鵬舉副臺端,密薦爲御史。方賜對而父計聞。二十八 既葬,兄弟卽僧舍肆詞業,夜枕不解衣。以父蔭補承務郎,與兄适同試博 先臣拒金人之命,留十五歲乃得歸,顧南竄嶺外,臣兄弟屛跡在

奏乞以經筵官除罷及封章進對、宴會錫予、講讀問答等事,萃爲一書,名之曰邇英記

卿。」遂

拜

起居舍人。

列傳

第

百

三十

洪皓

鄓 兼 權 其後乾道 樞 密院都承旨。 間 又有祥曦殿記注,實自遵始。 舊制,修注官、經筵官許留身奏事,而近例無有。 又因面對, 論鑄錢利害, 帝嘉納之。 遵奏請復舊制,且 遷起居

節度,初不聞有遞遷侍從之例。今旨一出,使穆淸之地類皆將種,非所以示天下。望收還 宗曰:「正立法,自今功臣子孫序遷至侍從,並令久任在京宮觀。」遵曰:「侍從,朝廷高選,非 官十年始一遷,今兩人不滿歲,安得爾?」時勳臣子孫多躐居臺省,遵極言乞明有所 前 年,西淸次對皆可坐致。」太祖開國功臣子孫不過諸司,惟曹彬之子琮、瑋以功名自奮,遂爲 刺,願爲農者放還。」上皆可其奏。 如磨勘階官,安有遷序之制?」退而上奏言:「今內外將家無慮二十人,若以序遷,不出 言起居注未修者十五年,請除見修月進外,每月帶修,皆從之。 認。」又言:「瑞昌、興國之間茶商失業,聚爲盜賊。望揭牓開論,許其自新,願充軍者塡 二十九年,拜中書舍人。殿前裨將輔達轉防禦使,王綱〔む轉團練使,遵言:「近制管軍

廢罷,又無一定之論,初委運使,又委提刑,又委郡守、貳,號令不一,鼓鑄益少。竊以爲復 ,或分道置使,釐爲三司。 論 者欲復鄱陽永平、永豐兩監鼓鑄,詔給、舍議,遵曰:「唐有鼓鑄使,國朝或以漕臣兼 自中興來,置都大提點,官屬太多,動爲州縣之害。 間者亟行

置便。」

齬,反復稽延,是明與惡吏爲地也。」乃止仍舊貫。 稱職司,或東西分曹而交錯攙補,或已予復奪而指云事故,件析枚數,請凡如是者得通 須 大夫或遊宦粵、蜀,數千里外,不幸以死。 同時一章而 路 餉 舊制,致仕任子,隨所在審勑牒卽請行。 三十年正月,試東部侍郞。 满欲乃止。 巧為兩牘,或當薦五員而輒踰十數,或當舉職官而詭爲京狀,或身係常調 遵明與約,苟於大體無害,先行後審,薦員有定限,而舉者周 異時選人詣曹改秩,吏倚爲市,毫毛不中節,必巧生沮閡, 臨終謝事,其家獲歸故里已爲至難,今復因此齟 是時,從議者請,必令于元州判奏。 遮 | **適言:**「. 重複,或 而 土 劾

絳陽郭小的、安化劉孝恭二百家,遵以蜀之李特可爲至戒,願以根集未足爲解,淹引日月報 奈何指夏以爲秋,衍一以爲二,使擠溝壑乎。願量取其半,而被水害者悉免之。」金人來索 遷翰林學士兼吏部尚書。 平江、湖、秀三州水,無以輸秋苗,有司抑令輸麥。 汪澈論陽思退罷相,遵行制無貶詞,澈以爲言。遂丐去,以 遵言:「麥價殊不在米下,民困如是,

徽猷閣直學士提舉太平興國宮。

資糧、 寶駐兵平江,守臣朱翌素與寶異,朝議以遵嘗薦寶,乃命遵 、器械、舟檝皆,遵供億,寶成功而歸,遵之助爲多。 三十一年,金主完顏亮命其尚書蘇保衡由海道窥二浙,朝廷以浙西副總管李寶禦之。 車駕幸金陵,禁衞士丐索無藝,它郡 知平江。 及寶以舟師擣膠西,凡

列傳

旣而 隨與不壓。 不返,並海縣團萃巨艦及募水手、民兵,皆縶留未得去。。違因對論之,以船還商,而聽 至吳,乃相告曰:「內翰在此,汝毋復然。」先是, 朝廷盧商舶爲賊得, 悉拘入官,

水手自便,吳人德之。

彼亦可藉 宜指陳定論以聞。」遵與給事中金安節、中書舍人唐文若、起居郎周必大共爲一議,其略謂: 「不宜直情徑行,亦未可遽爲之屈,謂宜遺金繒如前日之數,或許稍歸侵地如海、泗之類,則 屈,不從則邊患未已。中原歸正人源源不絕,納之則東南力不能給,否則絕向化之心。 孝宗卽位,拜翰林學士承旨兼侍讀。 口 而來議矣。」 韶問宰執、侍從、臺諫曰:「敵人來索舊禮,從之則

張浚罷 史俱去。 異 知 隆 ,御史周躁策遵且超遷,上章致劾,上亟徙寘他官。 故事風 興元 是年七月,以端明殿學士提舉太平 止之。 (年貢舉,拜同知樞密院事(10)。 薦眉山李燾、永嘉鄭伯熊及林光朝,未及用,會湯思退爲 興國宮 壽康殿產金芝十二,同列議表賀,遵引李文靖 遵不能安位, 連章乞觅, 訖 左相 一,而 與御 次 相

餞至 民築圩凡萬數。 乾道 里,勞苦 一六年,起知 如平時,日:「君當官而行,我何怨?」聞者以爲盛德。 方多盛寒, 遵躬履其間, 載酒食親餉饁, 恩意傾盡, 人忘其勞。 信州。徙知太平州。 前守周躁以嘗論遵,聞遵來,不俟合符馳去。 圩 田壞,民失業,遵 運使張松忌 遵 追 鳩

遣朝臣覆按。於是將作少監馬希言、監察御史陳舉善狎至,黜松言,圩遂成,合四 功,妄奏圩未嘗決,民未嘗轉徙,必責圩戶自閼築,且裁省募工錢米之半。 松無所泄其忿,則別治溧水永豐圩,來調丁、米、木,數甚廣。 遵曰:「郡當歲儉,方振恤 遵連疏爭,至乞 百五五 一十有

流移,勸分乞糴,如自刲其股以充喉,不暇食,況能飽他人腹哉。」執不從。 |楚地旱,旁縣振贍者慮不早,施置失後先,或得米而亡以炊,或闔戶李藉而廩不至。

簡賓佐,隨遠近壯老以差賦給,蠲租至十九,又告糴于江西,得活者不啻萬計。 戍兵乘時盜 行宮留守。 利,曹伍剽于野,盡執拘以歸其軍。故當大札瘥而邑落晏然。徙知建康府、江東安撫使兼 孝宗諭當制舍人范成大,褒其治績,且許入覲。

退 人不能 無 言搖 慮 萬竈。 譴,請自治之。 引,上弗許。 時虞允文當國,有北征志。先調侍衞馬軍出屯,其在府者五軍,悉送其孥,謀築營砦, 淳熙元年,提舉洞霄宮。 輕重其手。 `斬之,磔于市,三軍無敢譁。 進資政殿學士以行。 偏行郊野卜砦地, 求不妨民居、不夷冢墓者, 踰年始得之。

營卒醉, 妄 孝宗怒,罷統帥, 十一月,薨,年五十有五,諡文安。 遵亦坐貶兩秩。 有晝入旗亭挺刃椎壚者,械付獄,驛上奏未下,統帥 至則揭膀,民苗米唯輸正不輸耗,聽民自持斛槩,庾 未幾,五營成,復元官,仍拜資政殿學

列

傳

辦公事,入爲勑令所删定官。皓忤秦檜投閉,檜憾未已,御史汪勃論邁知其父不靖之謀,遂 傍行, 靡不涉獵。從二兄試博學宏詞科, 邁獨被黜。 邁字景盧,皓季子也。 。幼讀書日數千言,一過目 輒不忘, 紹興 、十五年始中第,授兩浙轉運 博極 」載籍, 雖稗官虞初,釋老 幹

建議令民入粟贖罪,以紓國用,又請嚴法駕出入之儀 上居顯仁皇后喪,當孟饗,禮官未知所從,邁請遣宰相分祭,奏可。 除樞密檢詳文字。 出添差教授福州。

累遷吏部郎兼禮部。

|瓜||洲 無益 以 有以新民觀聽,毋使尾大不掉。」知樞密院事葉義問出視師,奏以邁參議軍事,)係復讎之意。」不用。 吳璘病篤,朝論欲徙吳拱代之。 邁曰:「吳氏以功握圖兵三十年,宜 京口 官 三十一年,議飲宗諡,邁曰:「淵聖北狩不返,臣民悲痛,當如楚人立懷王之義,號懷宗, 軍 興金 勝敗之數,而金陵聞返旆,人心動搖,不可。」遷左司員外郎 人相持, 遑遽失措。 會建康走驛告急,義問遽欲還,邁力止之曰:「今退師, 至鎭江,聞

名稱 上謂 以何爲正, 三十二年春, 執 政曰:「向日講和,本爲梓宮、太后,雖屈己卑辭,有所不憚。今兩國之盟已絕, 疆土以何爲準, 金主優遣左監軍高忠建來告登位,且議和,邁爲接件使,知閤門張論副 朝見之儀,歲幣之數,所宜先定。」及邁、給入辭,上又曰:

江以來,屈己含忍多過禮,至是一切殺之,用敵國體,凡遠迎及引接金銀等皆罷。 禮 |建有責臣禮及取新復州郡之議(li),邁以聞,且奏言:「土疆實利不可與,禮際虛名不足惜。」 實。」兵部侍郎陳俊卿亦謂:「先正名分,名分正則國威張,而歲幣亦可損矣。」 「股料此事終歸於和,欲首議名分,而土地次之。」邁於是奏更接伴禮數,凡十有四事。 部 :侍郎<u>黃中</u>聞之,亟奏曰:「名定實隨,百世不易,不可謂虛。土疆得失,一彼一此,不可謂 旣 而 高忠 自渡

年、起知泉州 自旦及暮水漿不通,三日乃得見。金人語極不遜,大都督懷忠議欲質留,左丞相張浩持不 兄弟敵國而歸河南地。夏四月戊子,邁辭行,書用敵國禮,高宗親札賜邁等曰:「祖宗陵寢, 之接件也,旣持舊禮折伏金使,至是,慨然請行。於是假翰林學士,充賀登位使,欲令金稱 可,乃遣還。七月,邁回朝,則孝宗已卽位矣。殿中侍御史張震以邁使金辱命,論罷之。明 如式。」抑令使人於表中改陪臣二字,朝見之儀必欲用舊禮。邁初執不可、旣而金鎖使館 己,亦何所惜。」邁奏言:「山東之兵未解,則兩國之好不成。」至燕,金閤門見國書,呼曰:「不 隔闊三十年,不得以時酒掃祭祀,心實痛之。若彼能以河南地見歸,必欲居尊如故,正復屈 進起居舍人。時議遣使報金國聘,三月丁巳,詔侍從、臺諫各舉可備使命者一人。初,邁

乾道二年,復知吉州。 入對,遂除起居舍人,直前言:「起居注皆據諸處關報,始加修

列

百

三 十 二

洪

封章進 令講讀官自今各以日得聖語關送修注官,令講筵所牒報,使謹錄之,因今所御殿名曰<u>詳</u>曦 雖有日曆、時政記,亦莫得書。 一對、宴會賜予,皆用存記。 十年間稍廢不續,陛下言動皆罔聞知,恐非命 景祐故事,有邇英延義二閣注記二一,凡經筵侍臣出處、 侍 本意。乞

記注。」制可

嫝。 門下,例不送中書,謂之『密白』,則封駁之職似有所偏,況今宰相兼樞密,因而釐正,不爲有 門下,給事中書讀,如給、舍有所建明,則封黃具奏,以聽上旨。惟樞密院旣得旨,卽 望詔樞密院,凡已被制勑,並關左右省依三省書黃,以示重出命之意。」報可 三年,遷起 居郎,拜中書舍人兼侍讀、直學士院,仍參史事。 父忠宣、兄适、遵皆歷此三 然後過 書黃過

適中 富 校婉說之,俾歸營,衆皆聽,垂櫜而入,徐詰什五長兩人,械送潯陽,斬于市。 戍 九江,是歲,或忧以至則留不復返,衆遂反戈。民訛言相驚,百姓恟懼。邁不爲動,但遣一 熟,邁移粟濟隣郡。僚屬 十一年日前,知婺州,奏:「金華田多沙,勢不受水,五日不雨則旱,故境內陂湖最當繕 六年,除知贛州,起學宮,造浮梁,士民安之。 郡兵素驕,小不如欲則跋扈,郡歲遣千人 睚 雕 殺人衷刃篡獄者,久拒捕,邁正其罪,黥流橫外。 『有諫止者,邁笑曰:「秦、越瘠肥,臣子義耶?」尋知建寧府。 辛卯歲饑、贛

語輔臣曰:「不謂書生能臨事達權。」特遷數文閣待制 也 至以飛語膀譙門。 衣,欲以緡易帛,吏不可,則羣呼嘯聚于郡將之治,郡將惴恐,姑息如其欲。邁至,衆狃前事 治。命耕者出力,田主出穀,凡爲公私塘堰及湖,總之爲八百三十七所。」婺軍素無律,春給 汝等何預?」衆逡巡散去。邁戮首惡二人,梟之市,餘黥撻有差,莫敢譁者。事聞,上 邁以計逮捕四十有八人,置之理,黨衆相嗾,鬨擁邁轎,邁曰:「彼罪人

佑 年,修葺數少,不足用。」謂宜募瀕海富商入船予督,招善操舟者以補水軍,上嘉之。以提舉 作斗門, 遇行師, 則決防送船。」又言:「馮湛創多槳船, 底平檣浮, 雖尺水可運。 今十五六 謂宜修城池,嚴屯兵,立游樁,益戍卒。又言:「許浦宜開河三十六里,梅里鎭宜築二大堰, 神觀銀侍講、同修國史。 明年,召對,首論淮東邊備六要地"日海陵,日喻伽,日鹽城,日寶應,日清口,日盱眙。

論至夜分。 邁 初入史館,預修四朝帝紀,進敷文閣直學士、直學士院。 講讀官宿直,上時召入,談 十三年九月,拜翰林學士,遂上四朝史,一祖八宗百七十八年爲一

奇,所減絹以匹計者,略 康民困於和市,卿往,爲殷正之。」邁再拜曰:「誓盡 紹 熙 (三)改元,進煥章閣學士、知紹興府。 如其數。 提舉玉隆萬壽宮。 過闕 一力。」邁至郡,覈實詭戶四萬八千三百有 奏事,言新政宜以十漸爲戒。 明年,再上章告老,進龍圖閣學士。 上

列

傳

第

百三

+

洪皓

校勘記

宋

以端明殿學士致仕,是歲卒,年八十。贈光祿大夫,諡文敏。

多。所修欽宗紀多本之孫覿,附耿南仲,惡李綱,所紀多失實,故朱熹舉王允之論,言佞臣 漁獵經史,極鬼神事物之變,手書資治通鑑凡三。有容齋五筆、夷堅志行於世,其他著述尤 | 邁兄弟皆以文章取盛名,躋貴顯,邁尤以博洽受知孝宗,謂其文備衆體。 邁考閱典故,

不可使執筆,以爲不當取覿所紀云。

高宗謂蘇武不能過,誠哉。 然竟以忤秦檜謫死,悲夫! 其子适、遵、邁相繼登詞科,文名滿 天下,适位極台輔,而邁文學尤高,立朝議論最多,所謂忠義之報,詎不信夫。 口,能全節而歸,若朱弁、張邵、洪皓其庶幾乎,望之不足議也。 論曰:孔子云:「使於四方,不辱君命,可謂士矣。」當建炎、紹興之際,凡使金者,如採虎 **皓**留北十五年,忠節尤著,

校勘記

- 史抗 原作「史玩」,據本書卷四四六本傳、繁年要錄卷一四九改。
- \exists 撻攬 按北盟會編卷二二二張邵行實、周益國文忠公集卷六五張邵神道碑、 金史卷七七都作

「撻懶」。

(三) 祚山砦 北盟會編卷二二二張邵行實、 周益國文忠公集卷六五張邵神道碑都作 「柞山砦」,疑

- (三) 十二年七月 本書卷三〇高宗紀、繁年要錄卷一四九都繫此事於十三年八月,此誤。
- (至) 敷文閣直學士 「直」字原脫,據洪适盤洲文集卷七四先君述、繫年要錄卷一七九補。
- 徽猷閣直學士 「直」字原脫,據盤洲文集卷七四先君述、宋會要職官七六之六九補。
- (七) 中郎將 「將」字原脫,據盤洲文集卷四三討論環衞官衛子、本書卷一六六職官志
- 莫汲 原作「莫伋」,據盤洲文集卷四七繳莫汲編修官箚子、同書附錄周必大洪适神道碑改。

莫

王綱 汲見紹興十八年同年小錄。 , 周益國文忠公集卷六九洪遵神道碑、繫年要錄卷一八二都作「王剛」,疑是。

(元)

8 知隆興元年貢舉拜同知樞密院事 「元年」 原作「二年」。按通考卷三二選舉考引宋登科記總

一三宰輔表,洪遵同知樞密院事在隆興元年。「二」字爲「元」字之訛,據改。

目隆興元年有貢舉,二年無;本書卷三九五樓鑰傳,隆興元年試南宮,知貢舉洪遵;本書卷二

邇英延義二閣注記 責臣禮及取新復州郡之議 「義」原作「曦」,據本書卷二八五賈昌朝傳、宋會要職官二之二一改。 「責」原作「貴」,據繫年要錄卷一九八改

列

第

百三十二

校 勘

記

一一五七六

(I) 十一年 承上文此當指乾道十一年,但乾道無十一年;下文明年提舉佑神觀兼侍講、同修國 史,十三年遂上四朝史,宋會要職官一八之五九、六〇分別在淳熙十二、三年;邁於淳熙十三年

拜翰林學士,也見何異宋中興學士院題名錄。此處當失書「淳熙」紀元。 原作「淳熙」。按上文已敍至淳熙十三年,此處不應又說「淳熙改元」。 據嘉泰會稽志卷

二,洪邁知紹興府在紹熙元年,洪邁夷堅志乙集序有「紹熙庚戌臘,予從會稽西歸」語。「淳」字

爲「紹」字之訛,據改。

紹熙

宋史卷三百七十四

列傳第一百三十三

張九成 胡銓 廖剛 李迨 趙開

省,感時遇物,悽惋于心,可不思所以還二聖之車乎?」又言:「閹寺聞名,國之不祥也,今此 今閻巷之人皆知有父兄妻子之樂,陛下貴為天子,多不得温,夏不得凊,昏無所定,農無所 同兒戲,何足慮哉。前世中興之主,大抵以剛德爲尙。去讒節慾,遠佞防姦,皆中興之本也。 戰必亡,失其故俗必亡,人心不服必亡,金皆有焉。 劉豫背叛君親,委身夷狄,點雛經營,有 吾游,當薦之館閣。」九成笑曰"「王良尙羞與嬖奚乘,吾可爲貴游客耶?」 人也。願陛下以剛大爲心,無以憂驚自沮。臣觀金人有必亡之勢,中國有必興之理。夫好 紹興二年,上將策進士,詔考官,直言者置高等。九成對策略曰:「禍亂之作,天所以開聖 張九成字子韶,其先開封人,徙居錢塘。游京師,從楊時學。權貴託人致幣曰:「肯從

列傳第一百三十三

張

九成

一一五七八

曹名字稍稍有聞,臣之所憂也。當使之安掃除之役,凡結交往來者有禁,干預政事者必誅。」 擢置首選 楊時遺九成書曰:「廷對自中興以來未之有,非剛大之氣,不爲得喪回屈,不能

心也。」

「此事左相封來。」九成曰:「主上屢下恤刑之詔,公不體聖意而觀望宰相耶?」宗臣怒,九成 授鎭東軍簽判,吏不能欺。民冒鹺禁,提刑張宗臣欲逮捕數十人,九成爭之。宗臣曰:

即投檄歸。從學者日衆,出其門者多爲聞人。

減磨勘。」從之。除浙康提刑,力辭,乃與祠以歸。 已。仁之發見,尤在於刑。陛下以省刑爲急,而理官不以恤刑爲念。欲詔理官,活幾人者與 趙鼎薦于朝,遂以太常博士召。旣至,改著作佐郎,遷著作郎,言:「我宋家法,曰仁而

閱 始 末得其情,因請覆實,囚果誣服者。 未幾,召除宗正少卿、權禮部侍郎兼侍講,兼權刑部侍郎。法寺以大辟成案上,九成 朝論欲以平反爲賞,九成曰:「職在詳刑,可邀賞

乎?」辭之。

特不可輕易以苟安耳。」恰曰:「立朝須優游委曲。」九成曰:「未有枉己而能直人。」上問以和 言,則與之和,使權在朝廷。 金 人議和,九成謂趙鼎曰:「金實厭兵,而張虛聲以撼中國。」因言十事,彼誠能從吾所 鼎旣罷,秦檜誘之曰:「且成檜此事。」九成曰:「九成 胡爲異議,

議,九成曰:「敵情多詐,不可不察。」

苗絹未輸者,九成曰:「縱未能惠民,其敢困民耶?」是歲,賦入更先他時。中丞何鑄言其矯 因在經筵言西漢災異事,檜甚惡之,謫守邵州。 既至,倉庫虛乏,僚屬請督酒租宿負、

偽欺俗,傾附 趙鼎,落職。

先是,徑山僧宗杲善談禪理,從游者衆,九成時往來其間。層恐其議己,令司諫詹大方論其 帥致籝金,九成曰:「吾何敢苟取。」悉歸之。 與宗杲謗訕朝政,謫居南安軍。在南安十四年,每執書就明,倚立庭磚,歲久雙趺隱然。 丁父憂,旣免喪,秦檜取旨,上曰:「自古朋黨畏人主知之,此人獨無所畏,可與宮觀。」 檜死,起知温州。 戶部遣吏督軍糧,民苦之,九

成移害痛陳其弊,戶部持之,九成卽丐祠歸。 數月,病卒。

九成研思經學,多有訓解,然早與學佛者游,故其議論多偏。寶慶初,特贈太師,封崇國

公、諡文忠。

答云:「湯、武聽民而興,桀、紂聽天而亡。今陛下起干戈鋒鏑間,外亂內訌,而策臣數十條, 胡銓字邦衡, 廬陵人。 建炎二年,高宗策士淮海,銓因御題問「治道本天,天道本民」,

列 傳

第一百三十三

胡 銓

皆質之天,不聽於民。」又謂:「今宰相非晏殊,樞密、參政非韓琦、杜衍、范仲淹。」策萬餘言, 避兵贛州,金人躡之,銓以漕檄攝本州幕,募鄉丁助官軍捍禦,第賞轉承直郎。 高宗見而異之,將冠之多士,有忌其直者,移置第五。授撫州軍事判官,未上, 會隆祐太后 丁父憂,從

鄉先生蕭楚學春秋。 紹興五年,張浚開督府,辟湖北倉屬,不赴。 有詔赴都堂審察,兵部尚書呂祉以賢良方

正薦,賜對,除樞密院編修官。

業,一旦豺狼改慮,捽而縛之,父子爲虜。 商鑑不遠,而倫又欲陛下効之。夫天下者, 之求,安知不加我以無禮如劉豫也哉? 盡爲左衽 宗之位爲金虜藩臣之位!陛下一屈膝,則祖宗廟社之靈盡汚夷狄,祖宗數百年之赤子 祖宗之天下也,陛下所居之位,祖宗之位也。奈何以祖宗之天下爲金虜之天下,以祖 欲臣妾我也,是欲劉豫我也。劉豫臣事醜虜,南面稱王,自以爲子孫帝王萬世不拔之 欺罔天聽,驟得美官,天下之人切齒唾駡。今者無故誘致虜使,以「詔諭江南」爲名,是 八年,宰臣秦檜決策主和,金使以「詔諭江南」爲名,中外洶洶。餘抗疏言曰 臣謹案,王倫本一狎邪小人,市井無賴,頃緣宰相無識,遂舉以使虜。專務詐誕, ,朝廷宰執盡爲陪臣,天下士大夫皆當裂冠毀冕,變爲胡服。異時豺狼無厭

還,太后可復,淵聖可歸,中原可得。」嗚呼! 自變故以來,主和議者誰不以此說咯陛下 長太息矣」 聖決不可歸,中原決不可得,而此膝一屈不可復伸,國勢陵夷不可復振,可爲痛哭流涕 陛下何如主?况醜虜變詐百出,而倫又以姦邪濟之,梓宮決不可還,太后決不可復,淵 大讎而不報,含垢忍恥,舉天下而臣之甘心焉。就令虜決可和,盡如倫議,天下後世謂 哉!然而卒無一驗,則虜之情僞已可知矣。而陛下尙不覺悟,竭民膏血而不恤,忘國 相率而拜犬豕,曾童孺之所羞,而陛下忍爲之耶?倫之議乃曰:「我一屈膝則梓宮可 夫三尺童子至無識也,指犬豕而使之拜,則怫然怒。 今醜虜則犬豕也,堂堂大國,

竊謂不斬王倫,國之存亡未可知也。 魯仲連所以義不帝秦,非惜夫帝秦之虚名,惜天下大勢有所不可也。今內而百官,外 而軍民,萬口一談,皆欲食倫之肉。謗議洶洶,陛下不聞,正恐一旦變作,禍且不測。臣 人下哉?今無故而反臣之,欲屈萬乘之尊,下穹廬之拜,三軍之士不戰而氣已索。此 口,敗之於淮陰,校之往時蹈海之危,固已萬萬,儻不得已而至於用兵,則我豈遽出虜 士卒思奮。 只如頃者醜虜陸梁,僞豫入寇,固嘗敗之於寢陽,敗之於准上,敗之於渦 向者陛下間關海道,危如累卵,當時尚不忍北面臣虜,况今國勢稍張,諸將盡銳,

列傳

第

百三十三

胡

一五八二

唐、虞,而欲導陛下爲石晉。近者禮部侍郎曾開等引古誼以折之,膾乃厲聲責曰:「侍 是蓋畏天下議己,而令臺諫、侍臣共分謗耳。有識之士皆以爲朝廷無人,吁,可惜哉一 郎知故事,我獨不知!」則檜之遂非愎諫,已自可見,而乃建白令臺諫、侍臣僉議可否, 然,倫不足道也,秦檜以腹心大臣而亦爲之。陛下有堯、舜之資,檜不能致君如

政事堂,三發問而近不答,但曰:「已令臺諫、侍從議矣。」嗚呼! 參贊大政,徒取充位如 書, 漫不敢可否事。 膾日虜可和,近亦日可和; 膾日天子當拜,近亦日當拜。 臣嘗至 衣裳之會。秦檜,大國之相也,反驅衣冠之俗,而爲左衽之鄉。則檜也不唯陛下之罪 人,實管仲之罪人矣。 孫近傅會膾議,遂得參知政事,天下望治有如饑渴,而近伴食中 有如虜騎長驅,尙能折衝禦侮耶?臣竊謂秦檜、孫近亦可斬也。 孔子曰:「微管仲,吾其被髮左衽矣。」夫管仲、霸者之佐耳,尚能變左衽之區,而爲

使、責以無禮,徐興問罪之師,則三軍之士不戰而氣自倍。不然,臣有赴東海而死爾, 臣備員樞屬,義不與檜等共戴天,區區之心,願斷三人頭,竿之藁街,然後羈留虜

寧能處小朝廷求活邪!

諫及朝臣多救之者,檜迫於公論,乃以銓監廣州鹽倉。明年,改簽書威武軍判官。十二年, 書旣上,檜以銓狂妄凶悖,鼓衆劫持,詔除名,編管昭州,仍降詔播告中外。給、舍、臺

諫官羅汝楫劾銓飾非横議,詔除名,編管新州。 十八年,新州守臣張棣計銓與客唱酬,謗訕

怨望,移謫吉陽軍。

所計,師古流袁州,廷珪流辰州,剛中謫知虔州安遠縣,遂死焉。三十一年,銓得自便。 千金。其謫廣州也,朝士陳剛中以啓事爲賀。其謫新州也,同郡王廷珪以詩贈行。皆爲人 一十六年,膾死,餘量移衡州。。餘之初上書也,宜興進士吳師古鋟木傳之,金人募其書

講、國史院編修官。因講禮記,曰:「君以禮爲重,禮以分爲重,分以名爲重,願陛下無以名 器輕假人。」 今日無班次爲辭。乞自今直前言事,不必預牒閤門,及以有無班次爲拘。詔從之。兼侍 立後殿,而前殿不立,乞於前後殿皆分日侍立;四謂史官欲其直前,而閤門以未嘗預牒,以 人主有不觀史之美; 二謂唐制二史立螭頭之下,今在殿東南隅,言動未嘗得聞; 三謂二史 除吏部郎官。 |孝宗卽位,復奉議郎、知饒州。 召對,言修德、結民、練兵、觀釁,上曰:「久聞卿直諒。」 隆興元年,遷秘書少監,擢起居郎,論史官失職者四: 一謂記注不必進呈,庶

中原,此高、光興王之計也。」 全勝。今日大勢,自淮以北,天下之亢與背也,建康則益之拊之之地也。若進據建康,下臨 又進言乞都建康,謂:「漢高入關中,光武守信都。大抵與人門,不益其亢,拊其背,不能

將李顯忠私其金帛, 言者請紓其期,遂以張浚視師圖恢復,侍御史王十朋贊之。 且與邵宏淵忿爭, 軍大潰。 十朋自勃。 上怒甚, 詮上疏願毋以小衄 克復宿州,大

爾。 武江陳蕃,天下横潰而不得聞,梁武信朱异,侯景斬關而不得聞,隋煬帝信虞世基,李密 世以趙高爲腹心,劉、項橫行而不得聞,漢成帝殺王章,王氏移鼎而不得聞,靈帝殺竇 召者張燾、辛次膺、王大寶、王十朋,今燾去矣,次膺去矣,十朋去矣,大寶又將去,惟臣在 稱帝而不得聞,唐明皇逐張九齡,安、史胎禍而不得聞。陛下自即位以來,號召逐客,與臣同 闕 了有十,而上下之情不合亦有十,且言:「堯、舜明四目,達四聰,雖有<u>共、</u>鯀,不能塞也。<u>秦二</u> 以言爲諱,而欲塞災異之源,臣知其必不能也。」 時旱蝗、星變,詔問政事闕失,|銓應詔上書數千言,始終以春秋書災異之法,言政令之

近宿州 非信賞必罰以應天不可。」其論納諫曰:「今廷臣以箝默爲賢,容悅爲忠。馴至興元之幸〔三〕, 所謂『一言喪邦』。」上曰:「非卿不聞此。」 三關。 夫一日戮七十將,豈復有將可用。而世宗終能恢復,非庸懦者去,則勇敢者出耶! 之敗,士死于敵者滿野,而敗軍之將以所得之金賂權貴以自解,上天見變昭然,陛下

事全倚張浚,而王之望、尹穡專主和排浚,銓廷責之。兼權中書舍人、同修國史。張浚之子賦 |金人求成,||銓曰:「|金人知陛下銳意恢復,故以甘言款我,願絕口勿言『和』字。」上以邊

忘戰。」 半,言不可和者銓一人而已,乃獨上一議曰:「京師失守自耿南仲主和,一聖播遷自何麇主 和,維揚失守自汪伯彥、黃潛善主和,完顏亮之變自秦檜主和。 賜金紫,銓繳奏之,謂不當如此待勳臣子。 浚雅與銓厚,不顧也。 十一月,詔以和戎遣使,大詢于庭,侍從、臺諫預議者凡十有四人。 此向來權臣誤國之言也。一溺於和,不能自振,尙能戰乎?」除宗正少卿,乞補外, 議者乃曰:『外雖和而內不 主和者半,可否者

湖、廣以絕後患。」 原之心,善矣。然處之近地,萬一包藏禍心,或爲內應,後將噬臍,願勿任以兵柄,遷其衆於 政間郭藥師自燕雲來降,未幾爲中國患。今金之三大將內附,高其爵祿,優其部曲,以繫中 古所難,六朝七得河南之地,不旋踵而皆失;梁武時侯景以河南來奔,未幾而陷臺城;宣、 先是,金將蒲察徒穆、大周仁以泗州降,蕭琦以軍百人降,詔並爲節度使。 **銓言:「受降**

二年,兼國子祭酒,尋除權兵部侍郎。八月,上以災異避殿減膳,詔廷臣言闕政急務。

列傳第一百三十三 胡鈴

此矣。 鄙夫,萬口一談,牢不可破。非不知和議之害,而爭言爲和者,是有三說焉:日偷懦,曰苟 安,日附會。偷懦則不知立國,苟安則不戒耽毒,附會則覬得美官,小人之情狀具於 自 · 靖康迄今凡四十年,三遭大變,皆在和議,則醜虜之不可與和,彰彰然矣。 肉食

今日之議若成,則有可弔者十;若不成,則有可賀者亦十。 請爲陛下極言之。何

謂可弔者十?

海內乾耗,旦始悔不用文媾之言。此可弔者一也。 敵國外患,如是者國常亡,若與虜和,自此中國必多事矣。」旦殊不以爲然。 <u>阗宗皇帝</u>時,宰相<u>李</u>沉謂王旦曰:「我死,公必爲相,切勿與虜講和。 吾聞出則無 旣而遂和,

則中原絕望,後悔何及。此可弔者二也。 中原謳吟思歸之人,日夜引領望陛下拯溺救焚,不啻赤子之望慈父母,一與虜和,

則 者三也。 兩准決不可保。 |海 、泗今日之藩籬咽喉也,彼得海、泗,且決吾藩籬以瞰吾室,扼吾咽喉以制吾命, 兩准不保,則大江決不可守;大江不守,則江、浙決不可安。 此可

紹興戊午,和議旣成,檜建議遣二三大臣如路允迪等,分往南京等州交割歸地。

弔

如初,事之愈謹,賂之愈厚,卒有逆。完之變,驚動輦轂。太上謀欲入海,行朝居民一空, 旦叛盟,劫執允迪等,遂下親征之詔,虜復請和。其反覆變詐如此,膾猶不悟,奉之

覆轍不遠,忽而不戒,臣恐後車又將覆也。 此可弔者四也。

不知何以待之。此可弔者五也。 屬決不肯但已。 夫反側則肘腋之變深, 虜決不肯但已, 則必別起釁端, 猝有逆亮之謀, 師回、趙良嗣等聚族數百,幾爲蕭牆憂。今必盡索歸正之人,與之則反側生變,不與則 紹興之和,首議決不與歸正人,口血未乾,盡變前議。凡歸正之人一切遣還,如程

然,重以蝗蟲水潦。自此復和,則蠹國害民,殆有甚焉者矣。此可弔者六也。 自檜當國二十年間,竭民膏血以餌犬羊,迄今府庫無旬月之儲,千村萬落生理蕭

使。 歲幣之外,又有私覿之費,私覿之外,又有賀正、生辰之使,賀正、生辰之外,又有泛 今日之患,兵費已廣,養兵之外又增歲幣,且少以十年計之,其費無慮數千億。而 一使未去,一使復來,生民疲於奔命,帑廩涸於將迎,瘠中國以肥虜,陛下何憚而

計較,臣切以爲議者可斬也。 側聞虜人嫚書,欲書御名,欲去國號「大」字,欲用再拜。 夫四郊多壘,卿大夫之辱,楚子問鼎,義士之所深恥; 議者以爲繁文小節不必 爲之。此其可弔者七也。

列傳

第一百三十

=

胡

一一五八八

納」二字與再拜孰重?臣子欲君父屈己以從之,則是多壘不足辱,問鼎不必恥,「獻納」 「獻納」二字,富弼以死爭之。今醜虜橫行與多壘孰辱?國號大小與鼎輕重孰多?「獻

不必爭。此其可弔者八也。

至衡璧,衡璧不已必至輿櫬, 臣恐再拜不已必至稱臣, 輿櫬不已必至如晉帝青衣行酒然後爲快。 稱臣不已必至請降,請降不已必至納土, 納土不已必 此其可弔者

事至於此,求爲匹夫尙可得乎?此其可弔者十也。

璧、輿櫬之酷,九也;無青衣行酒之寃,十也。 歲幣,一也;專意武備,足食足兵,二也;無書名之恥,三也;無去「太」之辱,四也; 戰士,下哀痛之詔以收民心,天下庶乎其可爲矣。如此則有可賀者亦十"省數千億之 無再拜之屈,五也;無稱臣之忿,六也;無請降之禍,七也;無納土之悲,八也;無銜 竊觀今日之勢,和決不成,儻乾剛獨斷,追回使者覷把、康胥等,絕請和之議以鼓

者爲婦人,今日舉朝之士皆婦人也。如以臣言爲不然,乞賜流放竄殛,以爲臣子出位 去十弔而就十賀,利害較然,雖三尺童穉亦知之,而陛下不悟。春秋左氏謂無勇

犯分之戒

自符雕之敗,朝論急於和戎,棄唐、鄧、海、泗四州與虜矣。。金又欲得商、秦地,邀歲幣,

留使者魏杞,分兵攻淮。以本職措置浙西、淮東海道。

惟高郵守臣陳敏拒敵射陽湖,而大將李寶預求密詔爲自安計,擁兵不救。證劾奏之,曰: 興國宮。 「臣受詔令|范榮備准,李寶備江,緩急相援。今|寶視|敏弗救,若|射陽失守,大事去矣。」寶懼, 時金使僕散忠義、紀石烈志寧之兵號八十萬,劉寶棄楚州,王彥棄昭關,濠、滁皆陷。

旱,左右不以告,謀國者之過也,宜令有司速爲先備。」乞致仕。 旅 [復禹績,今陛下富有四海,非特一旅,而卽位九年,復禹之効尙未赫然。] 又言:「四方多水 乾道初,以集英殿修撰知漳州,改泉州。 趣奏事,留爲工部侍郎。入對,言:「少康以一

疆爲言,上曰:「朕志也。」且問今何歸,銓曰:「歸<u>廬</u>陵,臣向在<u>嶺海</u>嘗訓傳諸經,欲成此書。」 七年,除寳文閣待制,留經筵。 求去,以數文閣直學士與外祠。陛辭,循以歸陵寢、復故

特賜通天犀帶以寵之。

列傳

第

百三十三

胡銓

廖剛

平興國宮, 鈴 歸,上所著易、春秋、周禮、禮記解,詔藏秘書省。 轉提舉玉隆萬壽宮(三),進端明殿學士(日)。 六年, 召歸經筵, 尋復元官,升龍圖閣學士、提舉太 **詮引疾力辭**。

年,以資政殿學士致仕。 薨, 諡忠簡 **有澹庵集一百卷行于世。** 孫槻、集、皆至尚書。

州 司 錄 除 剛字用中, 或 字錄 ,擢監察御史。時察京當國,剛論奏無所避。 南劍州順昌人。少從陳瓘、楊時學。 登崇寧五年進士第。 以親老求補外,出知興化軍。 宣和初,

欽宗 即位 ,以右正言召。 丁父憂,服闋,除工部員外郎,以母疾辭

入順昌 興元年, 部使者檄剛撫定。 盜起旁郡, 官吏悉逃去,順昌民以 剛遣長子遲論賊, 賊知剛父子有信義, 岡爲 剛論 從盜者使反業,旣而他盜 亦散去。 除本路提

命。

刑

獄。

紹

策之類 師往 弱枝之道。」又言:「國家艱難已極, 爲固 尋 也。 召爲吏部員外郎,言:「古者天子必有親兵自將,所以備不虞而強主威,漢北軍、唐 守計,以杜金人窺伺之意。」遷起居舍人、權吏部侍 祖宗 軍制尤嚴 願稽舊制,選精銳爲親兵,居則以爲 今方圖 新 若會稽誠非久駐之地。 郎兼 《侍講》 衞,動則 除給 請經營建康 以爲 事 中 中。 軍 親擁六 此 強 幹

備 江、淮,不知幾萬。初無儲蓄,日待哺於東南之轉餉,浙民已困,欲救此惠莫若屯田。」因獻 卧 憂, 服闋, 復 拜給 事 中。 剛言:「國不可一 日無兵,兵不 可 日 無 食。 今諸將之兵

二說,將校有能射耕,當加優賞,每耕田一頃,與轉一資;百姓願耕, 假以糧種, 復以租賦。

上令都督府措置。

觀 知婺州 時朝廷推究章惇、蔡卞誤國之罪,追貶其身,仍詔子孫毋得官中朝。 ,章僅自太府丞提舉江東茶鹽事。 剛封還詔書,謂卽如此, 何以示懲, 乃並與祠。 至是章傑自崇道

權戶部侍郎,尋遷刑部侍郎。 求補外,除徽猷閣直學士、知潭州

若招撫細 下孰敢不服。」 昭出藝祖 天下後世者也,然而未遂正名者,豈非有所待耶?有所待, 七年二月,日有食之,詔內外官言事。 故, 在天之靈,正建國 則非臣本心。」 上讀之聳然, [儲君之號,布告中外,不匿厥旨。 又奏經費不支, 即召剛趣至闕,拜御史中丞。 剛言:「陛下有建國之封,所以承天意、示大公於 盜賊不息, 事功不立, 命令不孚, 及兵驕官冗 剛言:「臣職糾姦邪, 則是應天之誠未至也。 異時雖百斯男,不復更易,天 當務大體, 願陛下

兄之可也。 時徽宗已崩,上遇朔望猶率羣臣遙拜淵聖,剛言:「禮冇隆殺,兄爲君則君之,已爲君則 望勉抑聖心, 但歲時行家人禮於內庭。」從之。

殿 前 司 強刺民為兵,及大將恃功希恩,所請多廢法。 剛知無不言,論列至於四五,驕橫

者肅然。

列

傳

奉祠 至,從官會都堂, 者,處以近藩, 去。 次翁與右諫議何鑄劾剛薦劉昉、陳淵, 檜聞之曰:「是欲置我何地耶? 剛謂億年日:「公以百口保金人,今已背約,有何面目尚在朝廷乎?」億年 」改工部尙書, 相爲朋比,以徽猷閣直學士提舉亳州 而以王次翁爲中丞。 剛乞起舊相之有德望 初, 明道 邊報

宮。 明年 子四人:遲、過 -致仕。 以紹興十三年卒。 、遂、遽,仕皆秉麾節,邦人號爲「萬石廖氏」。

李迨, 東平人也。 曾祖參,仕至尚書右丞。 迨未冠入太學,因居開封。 以蔭補官,初調

渤海縣尉。

濟州。

累月皆精練, 時州縣團結民兵,民起田畝中, 部伍如法。 部刺史按閱 不開坐作進退之節,或譁不受令,迨立賞罰 無一人亂行伍者, **遂薦之朝**, 改合入官。 以整齊之, 累遷通判

勸 進,乘興儀物皆未備,迨語熟典故,裁定其制,不日而辦。 時高宗以大元帥過濟, 郡守自以才 不及, 遜迨行州事,迨應辦軍須無闕。 上深嘆賞,即除隨軍輦運。 會 大元帥府

於國家經賦之大者載以行, 上 即位於南京,授山東輦運,改金部郎。 及上于鎭江。 時建炎三年二月也。 從駕至維揚, 敵犯行在所, 宰相呂頤浩言于上, 即取金部籍 有關 卽 日

劉正彥叛,呂頤浩、張浚集勤王之師,迨流涕謂諸將曰:「君第行,無慮軍食。」師行所至, 未幾,丁父喪,詔起復,以中散大夫直龍圖閣,爲御營使司參議官兼措置 軍前財用。 苗

食皆先具。 事平,同趙哲等入對,上慰勞之。詔轉三官,辭不拜,除權戶部侍郞。

詔許之。 四 年, 加顯謨閣待制,爲淮南、江、浙、荆湖等路制置發運使。 紹 興二年,知筠州。明年,移信州, 尋提舉江州太平觀。 尋以軍旅甫定, 乞持餘

民無 飛挽之擾,蓋所運者官舟,所役者兵卒故也。今駐蹕浙右,漕運地里不若中都之遠,而公 五. 年十月,以舊職除兩浙路轉運使,言:「祖宗都大梁,歲漕東南六百餘萬斛,而六路之

舊制 處所 私苦之,何也? 置 詔 [造船場,乞委逐州守臣措置,募兵卒牽挽,使臣管押, 庶幾害不 工部措置。 以所用之舟太半取於民間,往往鑿井沉船以避其役。 尋加徽猷閣直學士,升龍圖閣直學士,爲四川都轉運使兼提舉成都等 及民,可以漸 如温 、明、虔、吉州等 復漕 運

自熙、豐以來, 列 傳 第 白 始即熙、秦、戎、黎等州置場買馬,而川茶通於永興四路,故成都府、秦州 = + Ξ 李

路茶事,丼提舉陝西等路買

馬

皆有權茶司。 至是關陝旣失,迨請合爲一司,名都大提舉茶馬司,以省冗費,從之。

韶迨以每歲收支之數具旁通驛奏,迨乃考其本末,具奏曰:

舊額已過倍,其取於民可謂重矣。 JII 緡(k),比所支闕一百六十一萬餘緡。自來遇歲計有闕,即添支錢引補助。紹興四年, 收三千六十萬緡,比所支闕一千萬餘緡。六年,未見。七年,所收三千六百六十萬餘 價頓落, 添印五百七十六萬道。五年,添印二百萬道。六年,添印六百萬道。 見今汎料太多,引 一歲入舊額。 紹 興 緣此未曾添印。 、四年,所收錢物三千三百四十二萬餘緡,比所支闕五十一萬餘緡〔至〕。 其勸論、激賞等項窠名錢物共二千六十八萬,係軍興後來歲入所增, 兼歲收錢物內有上供、進奉等窠名一千五百九十九萬,係四 五年, 比

瞻中原之軍而有餘, 今以三千六百萬貫膽川、 九人,官員之數比軍兵之數約計六分之一。軍兵請給錢比官員請給不及十分之一,即 人,決無一年用二百六十五萬石米之理。 入一千九十一萬,過於晏所權多矣。諸窠名錢已三倍劉晏歲入之數,彼以 通計二百六十五萬石。止以紹興六年朝廷取會官兵數, 臣曾考劉晏傳,是時天下歲入緡錢千二百萬,而管權居其半。今四川權鹽權酒歲 數內官員一萬一千七員,軍兵五萬七百 陝一軍而不足。又如折估及正 計六萬八千四百 一千二百萬 色米一 四 四十 一十九

是冗濫在官員,不在軍兵也。計司雖知冗濫,力不能裁節之,雖是寬剩,亦未敢除減,此

朝廷不可不知也。

擾; 約收二十五萬餘石,若將一半充不係水運去處歲計米,以一半對減川路糴買、般發歲 計米空一,亦可少寬民力。 守邊之良策也。 利州以東計米五十八萬石,若得此三項,可盡數免川路糴買、般運,此乃恤民之實惠 十萬石, 般運事稍緩則船戶獨受其弊,急則稅戶皆被其害。 蜀 人所苦甚者, 兼用營田所收一半之數十二萬石, 三項共計五十七萬石。 糴買、 兼臣已委官於興元、洋州就糴夏麥五十萬石,岷州欲就糴二 般運也。 蓋羅買不科敷則不能集其事, 欲省漕運莫如屯田,漢中之地 每年水運應付閬、 荷科敷則不能 無

降韶獎諭。以與吳玠不合,與祠。

荷陛 吾將 乃落職與祠歸,而庾以京師降於金 其隱微, 庾不能平, 訟于朝, 九年, 下 極駡以死。 重任, 金人歸我三京,命迨爲京畿都轉運使。 萬死不足報。 〕」告者悚然而 且使人告迨曰:「北人以兵至矣。」迨曰:「吾家食國家祿二百年, 吾老 去。 矣, 降聖節,庾失於行禮,爲迨所持,庾自 人。 豈能 下穹廬之拜乎?首可斷 孟庾時爲權東京留守,潛通北使。 而膝不可屈也。 刻, 迨因此求罷去, 如 (果然) 迨察

列

傳

第

百

三 十

Ξ

李

迨

趙

開

十六年,以疾丐祠。 十八年卒。

卽 虚 室 趙開字應祥, 如京師,買田尉氏,與四方賢俊遊,因詗知天下利病所當罷行者。 普州安居人。 登元符三年進士第。 大觀二年, 權辟廱正。 如是七年, 慨然有 用舉者改秩,

通

變救弊志。

下戶支移利州水脚錢十分之三,又減蒲江六井元符至宣和所增鹽額,列其次第,謂之「鼠尾 善心計,自檢詳罷,除成都路轉運判官,遂奏罷宣和六年所增上供認額綱布十萬 宣和初, 除禮制局校正檢閱官。 數月局 罷, 出知鄢陵縣。 七年,除講議司檢詳官。 匹, 減綿州 開

帳」, 謂:「黎州買馬,嘉祐歲額纔二千一百餘。自置司權茶,歲額四千,且獲馬兵踰千人氏力,猶不 理。 給夷人,使待資次,夷人怨恨,必生邊患,爲二害。 足用,多費衣糧,爲一害。 揭示鄉戶歲時所當輸折科等實數,俾人人具曉,鄉胥不得隱匿竄寄。 併廢以還, 漕司則利害可以參究, 而無牽掣窒礙之患矣。」因指陳權茶、買馬五害,大略 嘗言:「財利之源當出於一,祖宗朝天下財計盡歸三司,諸道利源各歸漕計, 嘉祐以銀絹博馬,價皆有定。今長吏旁緣爲姦,不時歸貨,以空券 初置司権茶, 借本錢於轉運司五十二萬 故官省事

邊思不生。 則 入秦者十幾八九,猶患積壓難售。 而官買歲增。 衣糧,未免科配州縣,爲五害。 私 於常平司二十餘萬緡。 [販必衰,盜賊消弭,本錢旣常在,而息錢自足。] 権茶之初,預俵茶戶本錢,尋於數外更增和買, 如謂権茶未可遽罷,亦宜倂歸轉運司,痛減額以蘇茶戶,輕立價以惠茶商,如此 茶日濫雜,官茶既不堪食,則私販公行, 自熙寧至今幾六十年,舊所借不償一文,而歲借乃準初數,爲三 請依嘉祐故事,盡罷権茶,仍令轉運司買馬, 今關、隴悉遭焚蕩,仍拘舊額, 或遂抑預俵錢充和買, 刑不能禁,爲四害。 竟何所用?茶兵官吏坐繫 承平 茶戶坐是破產 即五害並去,而 ·時, 蜀茶之

與茶 其合同場監官除 戶自 馬之法,官買官賣茶並罷,參酌政和二年東京都茶務所創條約,印給茶引,使茶商執引與茶 一斤春 必 相貿易。 朝 和 爲錢七十,夏五十,舊所輸市例頭子錢並依舊。 隨。 茶戶十或十五共爲一保,并籍定茶鋪姓名,互察影帶販鬻者。凡買茶引, 改成都舊買賣茶場爲合同場買引所,仍於合同場置茶市,交易者必由市, 驗引、秤茶、封記、發放外,無得干預茶商、茶戶交易事 茶所過每一斤征一錢,住征一錢半。 於是大更茶 引

賞必 以馬到京實收數爲格 舊制買 馬及 三千 匹者轉 或死於道, 一官,比但以所買數推賞,往往有一 黜降有差。」比及四年冬, 茶引收息至一 任轉數官者。 百七十餘萬 開 奏「請推

緡, 買馬乃踰二萬匹。

已有,互相隱匿。 專一總領四川財賦。開見浚曰:「蜀之民力盡矣,錙銖不可加,獨権貨稍存贏餘,而貪猾認爲 張浚以知樞密院宣撫川蜀, 惟不恤怨詈,斷而敢行,庶可救一時之急。」 素知開善理財,即承制以開兼宣撫處置使司隨軍轉運使,

官者,並聽 不得減削。 頭子雜用等二十二。其釀之多寡,惟錢是視,不限數也。 所置隔槽,設官主之,麴與釀具官悉自買,聽釀戶各以米赴官場自釀,凡一石米輸三千,丼 都府法,於秦州置錢引務,興州鼓鑄銅錢,官賣銀絹,聽民以錢引或銅錢買之。凡民錢當入 |後銳意興復,委任不疑,於是大變酒法,自成都始。 先罷公使賣供給酒,即舊撲買坊場 用引折納,官支出亦如之。 法旣流通,民以爲便。 民私用引為市,於一千丼五百上許從便增高其直,惟 明年,遂徧四路行其法。 又法成

初,錢 引兩料通行纔二百五十萬有奇,至是添印至四千一百九十餘萬,人亦不厭其多,

價亦不削。

加宣 一撫使印其上卽爲眞。 宣 司 獲僞 引三十萬,盜五十人,逡欲從有司議當以死,開白逡曰:「相君誤矣。 黥其徒使治幣,是相君一日獲三十萬之錢,而起五十人之死也。」 使引傷,

凌稱善,悉如開言。

鹽 分, 者遂奏其不便, 5 每 最 後 公錢 引折 斤納錢二 又變鹽 納, **乞罷之以安遠民**, 法, 一十五,土產 別輸 其法 稱提勘合錢共六 .實視大觀東南、東北鹽鈔條約,置合同 一稅及 且曰:「如謂大臣建請, 增添等共納 十。 初 九錢 變権法, 四 分, 怨詈 所 務全事體, 過 四 每斤 場鹽 起, 至是開 征錢 市, 必須更制, -與茶法大抵 分, 復議 住征 更鹽 即乞箚 法, 相類 錢 與 Ŧī.

時沒荷重寄,治兵秦川,經營兩河, 旬犒月賞,期得士死力,費用不貲,盡取辦於開 開

張後照會。」詔以其章示後,後不爲變。

悉 知慮於食貨,算無遺策,雖支費不可計,而贏貲若有餘

餓 命 玠 閣 數以餉饋不繼訴于朝,開亦自劾老憊,丐去。 待制, 益 吳玠 爲之。 爲四川宣撫副使,專治戰守,於財計盈虛未嘗問,惟一切以軍 罷綿州 加 玠 益 兩鎭節鉞。 前執政,詔位宣撫司上,朝論恐未安,仍詔張浚視師開、襄、川、陝。 宣撫司 所仍以宣撫治兵事,軍馬聽跡移撥,錢物則委開拘收。 復降旨,都轉運使不當與四路漕臣 期,各貶二秩。 朝廷故抑揚之,使之交解間隙、趣辦餉 朝廷未許,乃特置四川安撫制置大使之名 同繫銜, 成都、潼川 期趣辦,與開異趣。 兩 尋除開徽 路 酒里

冽 傳 第 百 = + Ξ 趙 開 校 勘 記 與

都

轉

運

使

坐

應

副

軍支錢物愆

而

開

復

賏

席

益

不

和

坑坑

疏

乞將舊來

宣

撫

司

年計

應副

軍

期,不許

他

司

分

2擘支用。

叉指

陳宣撫

饋也

司 截

都

·漕運

司

錢

就

果、

遺

羅米非

是。

叉言

l應副

吳玠軍須

紹

興四

年

總爲錢

千九百五

五萬七千餘緡, 五 年視四年又增四百二十萬五千餘緡。 **蜀今公私俱困**,四向無所取給,

屬危急,實甚可憂,乞許以茶馬司奏計詣闕下,盡所欲言。 以李迨代之。 會疾作不行,提舉江州太

平觀 朝 廷旣知開與玠及席益有隙,乃詔開赴行在, 七年,復右文殿修撰、都大主管川陝茶馬。 開已病,累疏丐去,韶從所乞,提舉太平

觀。十一年卒。

論 日:秦檜執國柄, 其誤宋大計,固無以議爲也。 張九成之策, 胡銓之疏, 忠義凛然。

廖剛 請復用德望之人,豈苟阿時好者哉?李迨、趙開所謂 可使治其賦也歟?

17

校勘記

竇武 原作「何 武。 按何武爲西漢人,漢書卷八六有傳,此誤;應作「竇武」, **愛武事見後漢書**

卷六九本傳,據改。

3 鈴條,此係指唐德宗所謂「賣直」事,句上當有脫文。 馴 至 興元之幸 按楊萬里誠齋集卷 八胡銓行狀、 李幼武四朝名臣言行錄別集上卷 三胡

玉隆萬壽宮 原作「玉龍萬壽宮」,據誠齋集卷一一八胡銓行狀、周益國文忠公集卷三〇胡銓神

道碑改。

图 進端明殿學士 此下原衍「提舉」二字,據藏齋集卷一一八胡銓行狀、周益國文忠公集卷三〇

胡銓神道碑删。

Œ 比所支闕五十一萬餘緡 「比所支闕」,原作「此所支關」。 繁年要錄卷一一一 作「比所支計闕」,

「此」爲「比」字之誤,「關」爲「闕」字之誤,據改。 下五年、七年條同。

(公) 三千六百六十萬餘網 按繫年要錄卷一一一作「三千六百六十七萬餘緡」。

(半) 若將一牛充不係水運去處歲計米以一牛對減 要錄卷 一作「若將一牛樁充自來不係水運應副去處歲計米, 川路糴買般發歲計米 牛對減川路糴買、般發歲計 「米以」二字原倒。 按繁年

米」,據改。

2 且獲馬兵踰千人 按琬琰集卷三二趙開墓誌銘作「別置牽馬兵又踰千人」。

宋史卷三百七十五

列傳第一百三十四

鄧肅 李邴 滕康 張守 富直柔 馮康國

忘年交。 鄧肅字志宏,南劍沙縣人。少警敏能文,美風儀,善談論。 居父喪,哀毀踰禮,芝產其廬。入太學,所與游皆天下名士。 李綱見而奇之,相倡和,爲 時東南貢花石綱,肅

作詩十一章,言守令搜求擾民,用事者見之,屛出學。 欽宗嗣位,召對便殿,補承務郎,授鴻臚寺簿。 金人犯闕, 潚被命詣敵營, 留五十日而

上言之,且言:「一金人不足畏,但其信賞必罰,不假文字,故人各用命。朝廷則不然,有同時立 張邦昌僭位,肅義不屈,奔赴南京,擢左正言。 先是,朝廷賜金國帛一千萬,肅在其營,密覘,均與將士之數,大約不過八萬人,至是爲

列傳第一百三十四 鄧肅

功而

功又相等者,或已轉數官,或尙爲布衣,輕重上下,只在吏手。賞旣不明,誰肯自勸?欲

並置之法。」上從之。

望專立功賞一司,使凡立功者得以自陳。若功狀已明而賞不行,或功同而賞有輕重先後者,

升擢 臺諫、侍從。」上以爲然 乞於遠小處編管。 中書舍人,臺諫中有爲金人根括而被杖,一以病得冤者,其餘無不在僞楚之庭,以庶官而 有三: 諸執政、侍從、臺諫稱臣於僞庭,執政馮澥、曹輔是也,侍從者已行遣,獨李會尙爲 改名者,何昌言改爲善言、其弟昌辰改爲知辰是也。乞置之嶺外。所謂叛臣之次者,其惡 書者,顏博文、王紹是也;朝臣之爲事務官者,私結十友講册立邦昌之儀者是也;因張 諸庶官及宮觀而起爲侍從者,胡思、朱宗、周懿文、盧襄、李擢、范宗尹是也;撰勸進文與赦 臣之上者,其惡有五:諸侍從而爲執政者,王時雍、徐秉哲、吳升、呂好問、莫儔、李回是也; 者,不 朝臣受僞命者衆,肅請分三等定罪。上以肅在圍城中,知其姓名,令具奏。 可勝數,乞委留守司按籍考之,則無有遺者,願爲奉使者,黎確、李健、陳戩是也, 若夫庶官在位供職不廢者,但苟祿而已,乞赦其罪而錄其名,不復用爲 肅言:「叛 郑昌

今日 刑。」南仲嘗薦肅於欽宗,肅言之不恤,上嘉其直,賜五品服。 割 耿 南 一 鎭, 仲得祠祿歸,其子 明 日 截 兩河。 ,延禧爲郡守,肅劾:「南仲父子 及陛下欲進援京城, 又爲南仲父子所沮。 ,同惡,沮渡河之戰,遏勤王之兵, **誤國如此,乞正典**

內侍陳良弼肩輿至橫門外,開封買入內女童,肅連章論之。時官吏多託故而去,肅 范訥留守東京、肅言:「訥出師兩河, 戰無卒,守無糧,不降則走。』且漢得人傑,乃守關中,奔軍之將,豈宜與此。」]訥遂 望風先遁,今語人曰:『留守之說有四,戰、守、降、

議削其仕版,而取其祿以給禁衞, 若夫先假指揮徑徙江湖者, 乞追付有司以正其罪。

犁 肚 採納 法嚴 論 法 以 .嚴而令速,事 益 ,故倂三省盡依祖宗法。」及建局討論祖宗官制,兩月不見施行,肅言:「太祖、太宗之時, **ふ事簡**, 無 緩 因 也。 可議者,今日獻一策,明日獻一 [入對,言:「外夷之巧在文書簡,簡故速;中國之患在文書煩,煩故遲。」上曰:「正此討 賞罰之權不至濡滯。」」肅在諫垣,遇事感激,不三月凡抗二十疏,言皆切至,上多 今兵戈未息, 豈可揖遜進退, 尚循無事之時? 欲乞限以旬日, 簡而官淸,未嘗旁搜曲引以稽賞罰,故能以十萬精兵混一六合。 言,煩冗瑣碎,惟恐不備,此文書所以益煩,而政事所 期於必至,庶 自時厥後, 幾

從,綱措置不一月間,民兵稍集,今綱旣去,兩河之民將如何哉?僞楚之臣紛紛 先乞逐逆臣邦昌,然後叛黨稍能正罪,今綱旣去,叛臣將如何哉?叛臣在朝,政事乖矣,兩河 [曰:『李綱眞以身徇國者。』今日罷之,而賣詞甚嚴,此臣所以有 [李綱罷,肅奏曰·「綱學雖正而 高術疎,謀雖深而機淺,固不足以副聖意。 疑也。 且兩河 惟陛下嘗顧 百 在朝, 姓無所適 李綱

列

傳

第

百三十

四

鄧肅

李

邴

ーー大〇六

無兵,外夷驕矣,李綱於此,亦不可謂無一日之長。」執政怒,送膩吏部,罷歸居家。

紹興二年,避寇福唐,以疾卒。

以歸。 學士。 方用兵, 酬功第賞, 日數十百, 邴辭命無留難。 李邴字漢老,濟州任城縣人。中崇寧五年進士第,累官爲起居舍人,試中書舍人。 未幾,坐言者罷,提舉南京鴻慶宮。 嘗與禁中曲宴,

徽宗命賦詩,

高麗使入貢,

邴爲館伴,

徽宗遣中使持示,使者請傳錄 除給事中、同修國史兼直學士院,遷翰林 北

復徽猷閣待制。 欽宗即位、除徽猷閣待制、知越州。 踰歲,召爲兵部侍郎兼直學士院。 久之, 再落職, 提舉西京嵩山崇福宮。 高宗卽位,

賊,元唯 土、同簽書樞密院事。 苗傳、劉正彥迫上遜位,上顧邴草韶,邴請得御札而後敢作。 唯 除翰林學士。 不能 顧 也。 用, 卽詣政事堂白朱勝非, 時御史中丞鄭瑴 初,邴見苗傅, 又抗疏言睿聖皇帝不當改號,於是邴、數爲端明殿學 面諭以逆順 適正彥及其黨王世修在焉,又以大義責之,人 禍福之理,且密勸殿帥王元俾以禁旅擊 朱勝非請降詔赦,邴就都

而具。

月,起知平江府。會兄鄴失守越州,坐累落職。 士、權知行臺三省樞密院事。以與呂頤浩論不合,乞罷,遂以本職提舉杭州洞霄宮。 几 拜尙書右丞,未幾,改參知政事。 上巡江寧,太后六宮往豫章,命邴爲資政殿學 明年,即引赦復之,又升資政殿學士。

紹興五年,詔問宰執方略,邴條上戰陣、守備、措畫、綏懷各五事

淮南爲保固之地。 爲 所部舉智謀忠勇可以馭衆統師各兩三人,朝廷籍記。遇有事宜,使當一隊,毋隸大將,則 諸 即位之初,韓世忠、劉光世、張俊威名隱然爲大將,今又有吳玠、岳飛者出矣。 |呂頤浩氣節高亮,|李綱識量宏遠,威名素著,願擇其一而用之,必有以報陛下。」又言:「陛下 康民行告京東土人,知地險易,可各配以部曲三五千人,或出准陽,或出徐、泗,彼將奔命 大將統兵者數人,皆所恃以爲根本,萬一失利,將不可復用。偏裨中如牛阜、王進、楊珪、史 之不暇,此不動而分|陝西重兵之一端也。|關|陝今雖有二宣撫,其體尙輕,非遣大臣不可。 人競奮才智,皆飛、玠之儔矣。 戰陣之利五, 曰出輕兵、務遠略、儲將帥、責成功、重賞格, 大略謂:「關陝爲進取之地, 關陝雖利於進取,然不用師於京東以牽制其勢,則彼得一力以拒我。今 大將爵位已崇,難相統一,自今用兵,第可授以成算,使自 今却敵退師之後,必論功行賞,願因此詔 願詔大將,於

列傳

第

百三

十四

李邴

有 司 預定賞 格 謂謂 如得城 邑及近上首領之類,自一命至節度使,皆差次使足相當。」

聞 願 由登、萊泛海窺吳、越,以出吾左,由武昌渡江窺江、池,以出吾右,一處不支則大事 度敵人他年入寇,懲創今日之敗,必先以一軍來自淮甸,爲築室反耕之計,以綴我師。 差次其最緊處,屯軍若干人,一將領之,聽其郡守節制,次緊稍緩處差降焉,有事則以大將 類,皆預爲措畫。今長江之險,綿數千里,守備非一,苟制得其要,則用力少而見功多。 俾近上將佐領之,自成一軍,而專隸於朝廷。 糧 兼統之。 日 . 朝廷下福建造海船七百隻,必如期而辦,乞做古制,建伏波、下瀬、樓船之官,以教習水戰, 預講左支右吾之策。夫兵之形無窮,願詔臨江守臣,凡可設奇以誤敵者,如吳人疑城之 於敵。誠能得以功名自任如祖逖者,舉淮南而付之,使自爲進取,而 根本,欲保守則失進取之利,欲進 所 謂守備之宜有五, 旣 人則語熟風土,緩急可用,與旋發之師不侔矣。」 日固 根本、習舟師、防他道、講遺策、列長戍,大略謂:「江、浙爲今)取則慮根本之傷。 無事則散之緣江州郡,緩急則聚而用之。 古之名將,內必屯田 不至虚內以事 以自足,外必因 外。 去矣。 臣 願 臣

臣常寒心。 闢廣場, 所謂 措畫之方有五,日親大閱、補禁衞、講軍制、訂使事、降勑榜,大略謂:「因秋多之 會諸將,取士卒才藝絕特者而爵賞之。建炎以來,禁衞單寡,乃藉五軍以爲重 願擇忠實嚴重之將以爲殿帥,稍補禁衞之闕,使隱然自成一軍,則其馭諸將也

授之,庶冤臨時斟酌之勞,而朝廷得以專意治兵矣。 以餘力行之耳。臣謂宜專命一官,如古所謂行人者,或止左右司領之,當遣使人,舉成法而 若臂之使指矣。今諸郡廂禁冗占私役者,大郡二三千人,小郡亦數百人。臣願講求,除郡守 著豫僭逆之罪,曉諭江北士民,此亦兵家所謂伐謀伐交者。」 盡募禁軍。 兵將官自禁軍給事外,餘傔從衣糧使自僦人以役。大抵殺廂軍三分之二,而以其衣糧之數 金人自用兵以來,未嘗不以和好爲言,此决不可恃。然二聖在彼,不可遂已,姑 劉豫僭叛,理必滅之,謂宜降勑榜,明

智可用之人,隨宜任使,勿但纍以爵秩而已。凡諸將行師入境,敢抗拒者,固在勦戮。 結爲山砦以自保,今雖累年,勢必有未下者。願募有心力之人,密往詔諭。應淮北遺民來歸 善良、老弱之人,皆從寬貸,使之有更生之望。」不報。 無官而貧乏者,令沿江州郡以官舍居之,仍量給錢米三兩月,其能自營爲生乃止。內有才 者,令淮南州郡給以行由,差船津濟,量差地分人護送,毋得邀阻。 所謂綏懷之略有五,日宣德意、先振恤、通關津、選材能〔三、務寬貸,大略謂:「山東大姓 有官人先次注授差遣,

|邴閑居十有七年,薨于泉州,年六十二,諡文敏。 有草堂集一百卷。

滕康字子濟,應天府宋城人。登崇寧五年進士第,又中詞學兼茂科、除祕書省正字,遷

著作佐郎、尚書工部禮部員外郎、國子司業。

儀。 凡告天及肆赦之文,皆康爲之,辭意激切, **靖康二年,元帥府聞康習憲章,召至濟州。** 聞者感動。 康率羣臣勸進,除太常少卿,使定登極禮 除起居舍人、權給事中,進起居

鄓

· 兼討論祖宗法度檢討官,試中書舍人。

爲遷一官,實升五等,紊法之甚也。自古召亂之源,非外戚撓法,則內侍干政,漢、唐可鑑。」凡 「恩例遷官一等,謂於階官上進一階。今康義得特旨轉一官,自武義大夫躐上遙郡刺史,名 凡母后兄弟之子無爲侍從者。」武義大夫康義用登極恩,遷遙郡刺史,康又封還詞頭,言: 會顯謨閣學士孟忠厚乞用父任減年遷官い,康言:「忠厚,隆祐太后之姪也,太宗以來,

節鉞。今其所部卒伍至奪御器,逼諫臣於死地,乃止罰金,何以懲後。」詔降世忠一官。 後軍統制韓世忠以不能戢所部,坐贖金。康言:「世忠無赫赫功,祗緣捕盜微勞,遂亞 再降旨,竟不肯行。

康以其文取之,諫官李處遯論奏,遂以集英殿修撰提舉杭州洞霄宮。 牴牾, 閣而未下。宰相力主<u>彦文, 趣康行詞, 康論不已, 宰相銜之。 會布衣省試卷子不合式, </u> 知江州陳彥文用劉光世奏,錄其守城功,遷龍圖閣待制。康以光世所上彥文功狀前後

使陛下所以應天者未至,故逆臣敢萌不軌者,無先事之戒也。 諫議大夫。 審度,得無 多士解體 民之政徒爲空言,而百姓不被其恩;哀痛責躬之詔不著事實,四方不以爲信。忠佞並馳,而 未幾,移蹕錢塘,再除中書舍人,奏曰:「去歲郊禮前日食,而日官不以聞,廷臣不以告, 一二不類臣言者乎?望參稽得失而罷行之。」上再三褒論,稱其有諫臣風。 刑賞失當,而三軍沮氣。 旬日間,封章屢上,遂擢翰林學士。 臣願陛下取建炎初元以來所下詔書,所舉政 翌日,除端明殿學士、同簽書樞密院事 陛下卽位,行再歲矣,惻怛愛 事,熟思 除左

東南。 樞密院 建炎三年,宰相呂頤浩議幸武昌爲趨陝之計,旣移蹕建康,又議欲盡棄中原,徙居民於 事,康爲資政殿學士,同從衞以行。 康力持不可,上悟而止。未幾,上請太后奉神主如江西,以參知政事李邴權知三省 賜康褒詔,

許綴宰執班奏事。

張 延壽論康與因無憂國之心,至使太后涉險,爲敵人追迫,責授康秘書少監,分司南京,永 康 從 衛至洪州,劉光世護江不密,金人絕而渡,康等倉卒奉太后趨虔州。 殿中侍御 史

州居住。 未幾,許自便,復左朝請大夫,提舉明道宮。

紹興二年九月卒,年四十八。八年,追復龍圖閣學士。有文集二十卷。

列傳

第

詞學兼茂科。除詳定九域圖志編修官。 張守字子固,常州晉陵人。 家貧無書,從人假借,過目輒不忘。 以省員罷,改宣德郎,擢爲監察御史。丁內艱 登崇寧元年進士第,中 去。

急之務,付之都司、六曹。二相滋不悅,遂建議遣守撫諭京城,守聞命卽就道。 路有四,宜擇四路帥守繕兵儲栗以捍禦之。疏再上,又請詔大臣惟以選將治兵爲急,凡不 | 俊亦奏敵勢方張,宜且南渡。 汪伯彥、黃潛善以爲李成餘黨不足畏,上召百官各言所見。、葉夢得請上南巡,阻江爲守,張 建炎元年多,召還,改官,賜五品服。上在維揚,粘罕將自東平歷泗、淮以窺行在,宰臣 守獨抗疏,上防涯渡江利害六事,又別疏言金人犯准甸之

三年正月,還,奏|金人必來,願早爲之圖,上惻然。除起居郞兼直學士院。 |金人果渡准,

上幸臨安。遷御史中丞。

苗、劉旣平,詔赦百官,表奏皆守與李邴分爲之。守論宰相朱勝非不能思患預防,致賊

猖獗,乞罷政,疏留中不出,旣而勝非竟罷政。

呂頤浩初相、舉行司馬光之言,欲倂合三省,詔侍從、臺諫集議。守言光之所奏,較然

可行,若更集衆,徒爲紛紜。旣而悉無異論,竟合三省爲一。

上幸建康,呂頤浩、張浚叶議將奉上幸武昌爲趨陝之計。時方拜浚爲宣撫處置使,身

|陜、蜀,守與諫議大夫滕康皆持不可,曰:「東南今日根本也,陛下遠適,則姦雄生窺伺之 況將士多陝西人,以蜀近關陝,可圖西歸,自爲計耳,非爲陛下與國家計也。」守又陳十

害,至殿廬謂康曰:「幸閩之事,吾曹當以死爭之。」上曰:「朕固以爲難行。」議遂寢。

以斡旋機務。願更擇文武全材、海內所共推者,親罹而並用之。上書論事,或有切直,宜加 之,則雖斥逐大臣,無救於禍。 漢制災異策免三公,今任宰相者,雖有勳勞,然其器識不足 覩今日之勢與去年孰愈?而朝廷之措置施設,與前日未始異也。 前說,曰:「今罪己之詔數下,而天未悔禍,實有所未至耳。」且曰:「天時人事至此極矣,陛下 誰爲之尊禮。思之又思,兢兢栗栗,聖心不倦,而天不爲之助順者,萬無是理也。」至是復申 言動作受制於人,享嬪御之適,則思二帝、母后誰爲之使令,對臣下之朝,則思二帝、母后 酪漿之味,服細煖之衣,則思二帝、母后窮邊絕塞之寒苦,操與奪之柄,則思二帝、母后語 疏曰:「陛下處宮室之安,則思二帝、母后穹廬毳幕之居;享膳羞之奉,則思二帝、母后擅肉 褒擢以來言路。」 六月,久雨恆陰, 呂頤浩、張浚皆謝罪求去, 詔郎官以上言闕政。 俟其如維揚之變而後言 初,守爲副端時嘗上

上命呂頤浩至政事堂,諭以正人端士不宜輕去,守始受命。殿中侍御史趙鼎入對,論守無 先是,守嘗論呂頤浩不可獨任,張浚不可西去,與上意異,乞補外。除禮部侍郎,不拜,

第

百三十

70

張守

故下遷,上曰:「以其資淺。」鼎曰:「言事官無他過, 願陛下毋沮其氣。」於是遷翰林學士、知

九月,拜端明殿學士、同簽書樞密院事。扈從由海道至永嘉,回至會稽。

守奏:「福州城於晉太康三年,僞閩增廣至六千七百餘步,國初削平已久,公私困弊,請俟他 幾,知紹興府。 年。」遂止。 四年五月,除參知政事,守嘗薦汪伯彥,沈與求劾其短,以資政殿學士提舉洞霄宮。 尋以變易度牒錢百萬餘緡輸之行在,助國用。 尋以內祠兼侍讀,守力辭,改知福州。 時右司員外郞張宗臣請令福建築城, 未

以恩信,貸之使歸,願留者亦聽,則賊兵可不戰而潰。」金人旣遁,詔諸將渡江追擊,守復上 人,或借諸國,則戮之可也。至如兩河、山東之民,皆陛下赤子,驅迫以來,豈得已哉?且諭 時劉豫導金人寇准,上次平江,諸將獻俘者相踵,守聞之,上疏曰:「今以獻俘誠皆金

上既還臨安,又詔問守以攻戰之利、守備之宜、綏懷之略、措置之方,守言:

疏,以敵情難測,願留劉光世控禦諸渡。

明詔四事,臣以爲莫急於措置,措置苟當,則餘不足爲陛下道矣。臣請言措置之

大略,其一措置軍旅,其二措置糧食。

鄂、岳或荆南,擇要害之處以處之。使北至關輔,西抵川、陝,血脈相通,號令相聞,有 神武中軍當專衞行在,而以餘軍分戍三路,一軍駐于淮東,一軍駐于淮西,一軍駐

利之望,退無誅罰之憂,故朝廷之勢日削,兵將之權日重。 過五千人,棋布四路,朝廷號令徑達其軍,分合使令悉由朝廷,可以有爲也。 而賜罷,或卒然不諱,則所統之衆將安屬耶?臣謂宜拔擢麾下之將,使爲統制,每將不 唇齒輔車之勢,則自江而南可奠枕而臥也。 然今之大將皆握重兵,貴極富溢 而又爲大將者,萬一 有稱病 前無豫

政耳。 統 然,恐未至於不足也。 西,荆湖之粟以餉鄂、岳、荆南。 百餘萬, 口 多寡,爲諸將殿最四,歲覈實而黜陟之。 資,使諸路之兵首尾相應,綏懷之略亦在是矣。 何謂措置軍食?諸軍旣分屯諸路,則所患者財穀轉輸也。 出於東南轉輸,未嘗以爲病也。今宜舉兩浙之粟以餉淮東,江西之粟以餉淮 錢糧無乏絕之患,然後戒飭諸將,不得侵擾州縣,以復業之民戶 量所用之數,責漕臣將輸,而歸其餘於行在,錢帛亦 如是措置既定,俟至防秋,復遣大臣爲之 究其本原,則在陛下內修德而外修 祖宗以來,每歲上供六

鏠 十五 閩 萬。 自范汝爲之擾,公私赤立,守在鎭四年, 累請去郡,以提舉萬壽觀兼侍讀召還,甫兩月,復引病丐去,知平江府,力丐祠 撫綏彫瘵,且請于朝,蠲除福州所貸常平緡

以 歸。

列

六年十二月,召見, 僔 第 百 Ξ + 几 即日除參知政事,明日兼權樞密院事。 張 守 七年,張浚罷劉光世兵柄,

服 IIII 而媒蘗其短, 諸將之心者乃可。」 欲以呂祉 守力解上曰:「浚爲陛下捍兩淮, 往 准 臣恐後之繼者,必以凌爲鑒, 四 [撫諭諸軍,守以爲不可,浚不從,守曰:「必曰改圖,亦須得聞望素高、能 浚不聽,遂有酈瓊之變。 罷劉光世, 正以其衆烏合不爲用, 今其驗矣, 羣臣從 誰肯爲陛下任事乎?」浚謫永州,守亦引咎請 及臺諫交章論浚,御批安置嶺表,趙鼎 不即

殿大學士知婆州,尋改洪州,兼江南西路 守曰:「莫先德政,何其不悛,然後加之以兵。」因請出師屯要害。 據 (都會以經理中原,依險阻以捍禦彊敵,可爲別都以圖 八年正月,上自建康將還臨安,守言:「建康自六朝爲帝王都,江流險闊,氣象雄偉,且 安撫使。入對,時江西盜賊未息,上問以弭盜之策, 恢復。」鼎持不 既至部,揭榜郡邑,開論禍 可,守力求 去,以資政

福,約以期限,許之自新,不數月盜平。 餘萬緡。 後徙知紹 |守旣視事, 即求入覲,爲上言之,詔追還三使。 時|秦僧當國,不悅,守亦不自安, 興府。 會朝廷遣三使者括諸路財賦,所至以鞭撻立威,韓球在會稽,所斂五

守嘗薦秦檜於時宰張浚,及檜爲樞密使,同朝。一日,守在省閣執浚手曰:「守前者誤 建康謀帥,上曰:「建康重地,用大臣有德望者,惟張守可。」至鎭數月薨。

之不至,見守疏,怒曰:「張帥何損國如是?」守聞之,嘆曰:「彼謂損國,乃益國也。」卒諡文 縣供億科擾,上疏請蠲和買,罷和糴。上欲行之,時秦檜方損度支爲月進,且日憂四方財用 公矣。今同班列,與之朝夕相處,觀其趨向,有患失之心,公宜力陳於上。」守在江右,以郡

孫抑,戶部侍郎。

文,薦于朝,召賜同進士出身,除秘書省正字。 富直柔字季申,宰相弼之孫也。以父任補官。 少敏悟,有才名。 靖康初,晁說之奇其

起居舍人,遷右諫議大夫。范敦虛自謫籍中召入,直柔力言致虛不當復用,出知鼎州 建炎二年,召近臣舉所知,禮部侍郎張浚以直柔應。 韶授著作佐郎,尋除禮部員外郎、

邊任、負材武者乃遷,不可以輕授。」上謂宰相范宗尹曰:「此除出自朕意。今直柔抗論,朕 揉論:「繼先以計換授,既授之後,轉行官資,除授差遣,更無所礙。且武功大夫惟有戰功、歷 遷給事中。醫官、團練使王繼先以覃恩轉防禦使,法當回授,得旨特與換武功大夫。直

四年,遷御史中丞。直柔請罷右司侯延慶,而以蘇遲代之,上曰:「臺諫以拾遺補過爲 列 第 一百三十 70 富 直 柔

屈意從之,以伸直言之氣。」

職,不當薦某人爲某官。」於是延慶改禮部員外郎,而遲爲太常少卿。

書言非舊典,時直柔爲奉議郎,乃特遷朝奉郎。 十月,除端明殿學士、簽書樞密院事。故事 ,簽書有以員外郞爲之,而無三丞爲之者。中 自是寄祿官三丞除二府者,遷員外郎,自直

柔始,遂爲例

符,宜用欽聖韶,奏告天地宗廟,其典禮不須討論。」議遂定。 皇意,願陛下勿復致疑。」乃命禮官討論典禮。旣而王居正言:「太后隆名定位, 京,人皆知非二聖之過。」直柔曰:「陛下推崇隆祐,天下以爲當,然人亦不以爲非哲廟與上 紹興元年,詔禮部太常寺討論隆祐太后册禮,范宗尹曰:「太母前後廢斥,實出章惇、

牧九州,以待皇嗣之生,退處藩服。疏入,上大歎悟,直柔從而薦之,召赴行在,除監察御 史。於是孝宗立爲普安郡王,以寅亮之言也。 上虞縣丞婁寅亮上書言宗社大計,欲選太祖諸孫「伯」字行下有賢德者視秩親王,使

先是,直柔嘗短呂頤浩於上前,頤浩與秦檜皆忌之,由是二人俱罷,璜責監專州酒 知樞密院事。侍御史沈與求論直柔附會辛道宗、永宗兄弟得進,並論其所薦右司

六年,丁所生母憂。起復資政殿學士、知鎭江府,辭不赴。起知衢州。 以失入死罪,落職

稅,而直柔以本官提舉洞霄宮

議。」乃遣轓還,約浚至杭。 若誅鋤必受禍。今二公一旦爲國家去數十年之患,天下蒙福甚大。然主上春秋鼎盛,天下 郞 負謗天下?」傅按劍大怒,幡辭氣不屈。 不聞其過,豈可遽傳位于襁褓之子?且前日名爲傳位,其實廢立,二公本心爲國,柰何以此 士往說之。 張浚以御營參贊軍事留平江。 馮 康 國字元通,本名幡,遂寧府人。爲太學生,負氣節。 時臟客沒所,慷慨請行,浚遣之至炕,說傳、正彥曰:「自古宦官亂政,根株相連, 苗、劉作亂,浚外倡帥諸將合兵致討,念傅等居中,欲得辯 正彥乃善諭之曰:「張侍郎欲復辟固善,然須用 建炎中,高宗次杭州,禮部侍 面

心,甚悔前書之輕易也。」傅等見之喜,觸得免。 不畏。」王世修欲拘留臟,會浚謬爲書遺幡云:「適有客自炕來,方知二公於社稷初無不利之 曰:「昨張侍郎書不委曲,二公大怒,已發兵出炕矣,君尙敢來耶? 浚復遣||「審移書傅等,告以禍福使改。 既又復傳書,誦言其罪。 」
「長則不來, 輜至,傅黨馬柔吉 就之 來則

俄勤王之兵大集,傅等始懼、幡知其可動,乃說宰相朱勝非,以今日之事,當以淵聖皇 百 三 十 四 馮 康

列

第

名康

| 解又請 |帝為 主 |褒博、 一,睿 聖 皇帝 正 彦 如趙普故事,遂皆賜鐵券。 宜復爲大元 師,少主爲皇太姪,太后垂簾。 詔 補幡奉議郎、守兵部員外郎,賜 勝非令與傅、正 **彦議,皆許諾。** 五. 品服 ", 更

罷之。 造制書, 兩官,爲荆湖宣諭 高宗 起知萬州 坐貶秩二等。 反正 ,以

張浚宣撫川、陝,浚辟康國主管機宜文字。 、湖北轉運判官 使。 康國之行也, 紹興三年,浚召還,與康國俱赴行在。 上幸浙東,不暇降詔旨, 康國 後至蜀, 遣康國 浚旣黜,御史常同因論 [以自意爲之,言者劾以擅 入奏事, 康國 詔 進

此。 月,分兵就糧; 折 重 一,科折權衡與稅平准,故無偏重。 盍從舊法。」詔以其言下四川憲司祭不如法者。又言:「蜀苦陸運,當論<mark>吳</mark>玠, 浚相,入爲都官員外郎。 兼選守牧治梁、洋,招集流散,耕鑿就緒,則漕運可省。此保閩之良策也。」 康國言:「四川稅色,祖宗以來,正稅 近年監司總漕悉改舊法,取數務多,失業逃亡皆由 重者科折輕,正 稅輕者科 非防 秋 於

愛人才、厚風俗也。」遷右司員外郎,除直顯謨閣、知夔州。 朋黨論 一諫 以浚故有論 大 夫,如罷一宰相,則凡所 |列,望陛下察之。」|高宗曰:「朝廷用人,止當論其才與否耳。 薦引,不問才否一時罷黜,乃朝廷使之爲朋黨,非所 丁母憂,起復,撫諭吳玠軍,除都 頃臺諫好以 以

浚

去相位,康國乞補外。

趙鼎言於高宗曰:「自張浚罷,蜀士不自安,今留者十餘人,臣

大主管川陝茶馬,卒。

柔阨於秦檜、呂頤浩,馮康國說折二凶,皆有用之才也。 論曰:鄧肅、李邴、滕康當危急存亡之秋,皆侃侃正色,知無不言。 張守論事明遠,富直

校勘記

[]] 史康民 原作「史康明」,據繫年要錄卷八七、北盟會編卷一三八改。

(三) 選材能 「選」原作「遺」,據繁年要錄卷七改。

(三) 乞用父任減年遷官 爲諸將殿最 「諸將」原作「諸州」,據張守毘陵集卷一 「任」字原脫,據汪藻深溪集卷二六滕子濟墓誌銘補。 應認論事额子、李幼武四朝名臣言行錄別

集下卷一 張守條改。 列

傳 第

百

三 十

四

校 勘 記

宋史卷三百七十六

列傳第一百三十五

常同》 張致遠 薛徽言 陳淵 魏矼 潘良貴 呂本中

常同字子正,邛州臨邛人,紹聖御史安民之子也。登政和八年進士第。 **靖**康初,除大

觸 |怒權臣,擯斥至死。 今其子孫不能自振,殷甚憫之。」召同至行在,至則爲大宗丞。 高宗南渡,辟浙帥機幕。建炎四年,詔:「故監察御史常安民、左司諫江公望,抗節剛直, 理司直,以敵難不赴,辟元帥府主管機宜文字,尋除太常博士。

蒙,豢成夷虜之禍。今國步艱難,而分別締交、背公死黨者,固自若也。 廷之尊;重報私怨,寧復公議之顧。 正 相攻五十餘年。章惇唱於紹聖之初,蔡京和於崇寧之後,元祐臣僚,竀逐貶死,上下蔽 紹興元年,乞郡,得柳州。三年,召還,首論朋黨之禍:「自元豐新法之行,始分黨與,邪 臣以爲欲破朋黨,先明是非,欲明是非,先辨邪正,則 恩歸私門, 不知朝

列傳第

百三十五

常

同

黨, 今日 謗, 實 公道 聞 類,勿爲 協心 竄 有 察共 開 此 砈 im 大夫獨宗京 諭 小人所惑。」 뗽 流 朋 奸 **國** 死,而後禍 附之私, 邪 同對以:「禍亂未成,元祐臣僚固不能以自明。今可謂是非定矣, 息矣。」上曰:「朋黨亦難破。」同對:「朋黨之結,蓋緣邪正 小人之黨,挾私害公。 則邪 亂成。 黼等傾邪不正之論。 正分而朋黨破矣。」上曰:「君子小人皆有黨。」同又對曰:「君子之 今在朝之士,猶謂元祐之政不可行, 爲黨則 朋黨 同,而所以爲黨則異。 如此, 公論何自而出。願陛下始終主張善 元祐子孫不可用。」上曰: 且 不分, 如元祐臣僚,中遭讒 但 尙猶如 觀 其言 此,蓋

亦用 且 無心腹禁旅,可備緩急,頃者苗、 神策軍以復京師,是其效也。 又奏:「自古禁旅 、所寄, 必參錯相制。漢有南北軍,周勃用南軍入北軍以安劉氏,唐李晟 劉之變,亦可 今國家所 仗, 惟劉 鑒矣。」除殿中 光 世、韓世忠、張俊三將之兵耳。 ·侍御 史。

資 狠 尚 師傅,今兩軍幕屬贊畫無狀,乞先黜責。」上以章示 氣 時 韓世忠屯鎮江, 無所忌憚,一旦有急,其能 劉光世 屯建康,以私 相 爲唇齒乎? 忿欲 交兵。 望分是非, 兩 軍 同 奏。「光世等不思待遇之恩, 正 或 典。 昔漢諸侯王 有 過,循 m 驕

謂 功 出衆人,非一頤浩之力。 呂 頭 **浩再相**,同論 其十事, 縱使有功,宰相代天理物,張九齡所謂不以賞功者也。」頤浩 且曰:「陛下未欲遽罷 頤浩者, 豈非 以其有復 辟 之功 乎? 臣

龍相 論知樞密院宣撫川陝張浚喪師失地,遂詔浚福州居住。 同與辛炳在臺同好惡,上皆

重之

金使李永壽等入見,同言:「先振國威,則和戰常在我;若一意議和,則和戰常在彼。」

|因語及武備日:「今養兵已二十萬。」|同奏:「未聞二十萬兵而畏人者也。

澤等,而械宗誠赴行在。同奏:「敵雖議和,而兩界人往來未嘗有禁,偽齊尙能置歸受館,立 賞以招吾民,今乃却澤,人心自此離矣。况宗誠起土豪,不用縣官財賦,募兵自養,爲國障 捍,今因受澤而械之,以沮士氣,非策也。」詔處來歸者於淮南,釋宗誠罪。 偽齊宿遷令張澤以二千人自拔來歸,泗州守徐宗誠納之,韓世忠以聞。 朝論令世忠却

蔡卜之徒積惡造謗,痛加誣詆,是非顚倒,循致亂危。在紹聖時,則章惇取王安石日錄私書 四年,除起居郎、中書舍人、史館修撰。先是,同嘗上疏論神、哲二史曰:「章惇、蔡京、

悉出 皆得其實。」上深嘉納。 修,又復悠悠。 改修神宗實錄;在崇寧後,則察京盡焚毀時政記、日歷,以私意修定哲宗實錄。其間所載, 一時姦人之論,不可信於後世。恭惟宣仁保佑之德,豈容異辭,而察確貪天之功,以爲 厚誣聖后,收恩私門。 望精擇史官,先修哲宗實錄,候書成,取神宗朱墨史考證修定,庶毀譽是非 至是,命同修撰,且諭之曰:「是除以卿家世傳聞多得事實故也。」一 陛下卽位之初,嘗下詔明宣仁安社稷大功,令國史院摭實刊

列傳

百三

十五

常

同

仁者,因生誣謗。欲辨白其事,須重修實錄,具以保立勞效,昭示來世,此殷選卿意也。」同乞 日 **|**奏事 上 愀然日:「向昭慈嘗言,宣仁有保佑大功,哲宗自能言之,正 爲 宮中 有 不 得志於宣

命 靇 意參,同併封還二命。 俄除集英殿修撰、知衢州,以疾辭,除徽猷閣待制、提舉江州太 張 俊乞復其田產稅役,令一卒持書瑞昌,而凌悖其令郭彥參,彥參繫之獄。 俊訴于朝, 以所得聖

語宣付史館,仍記于實錄卷末。

各幾 困。 言:「江、浙 初 · 田 野 何, 玠頃年嘗講 淮 年 益 加 秋, 令制、漕、 關 困 遠,宜遣 .於月樁錢,民不聊生。」上爲減數千緡。 ,百姓足而 以禮部侍郎召還。 屯田 帥 重臣出按兩准,詢 司 خ 願 條具 國 聞其積穀 亦足矣。」乃遣樞密使王庶視師,同乞以此奏付庶,詢究罷 以 聞,然後按 未數日,除御史中丞。 **総幾何**, 人情利病,察官吏侵擾,縱民耕墾,勿收租 \實講究,以紓民力。」又言:「國家養兵,不爲不多, 減饋運 幾何, 在楚,張俊在建康, 又言:「吳玠屯師興、利,而 車駕自建康回臨安,同奏:「旋蹕之 趙開、李迨相繼爲都 岳飛 在江州, 漕, 税。 西川人力已 先後饋運 吳玠 數年之 在 叉

蜀

相

去隔

遠,

情不

相

通。

今陛下遣樞臣

王庶措置邊防,宜令庶會集將

帥、渝

以

國

體,協心

患

在

於偏

聚

m

不同

. 力,

自

用

而

不同

心

今韓世忠

共議禦敵,

常令諸軍相接以常山蛇勢,一意國家,無分彼此,緩急應援,皆有素定之術。」詔

付王庶出示諸將。

同乞郡,除顯謨閣直學士、知湖州。 復召,請祠,詔提舉江州太平觀。 紹興二十年卒。

謁告歸,知其情,還白執政,請鋤其根枿,於是捕嚮、棠及制置司屬官施宜生付獄。 樞密院計議官。 官,改廣束轉運判官。 政事孟庾爲福州宣撫使討賊,韓世忠副之,辟致遠爲隨軍機宜文字。 張致遠字子猷,南劍州沙縣人。宣和三年,中進士第。宰相范宗尹薦其才,召對,擢爲 建寇范汝爲已降,循懷反側,而招安官謝嚮、陸棠受賊將,陰與之通。 招撫劇盜會袞等,賊衆悉降。 賊平, 除兩 所 斯 轉 運 判 詔參知 致遠

錢,致遠上疏言:「折納絹錢本欲少寬民力,而比舊增半,是欲乘民之急而厚其斂也。」從之。 紹興四年, 以監察御史召。 未至,除殿中侍御史。 時江西帥胡世將請增和買絹折納

贊其决。 三司使、 金人與劉豫分道入寇,宰相趙鼎勸高宗親征,朝士尚以爲疑,白鼎審處。 副, 遷侍御史。 以常平茶鹽合爲一官,令計經常,量入爲出, 言:「聚財養兵,皆出民力,善理財者,宜固邦本。 先務省節, 請罷権 次及經理。」詔戶部 福 致遠入對,獨 建鹽,精擇

講究。

之。使州縣無妄用,歸其餘於監司;監司無妄用,歸其餘於朝廷,朝廷無橫費,日積月聚, 下,願詔大臣力務省節,明禁僭侈,自宮禁始,自朝廷始。 五年,除戶部侍郎,進吏部侍郎,尋復爲戶部侍郎。 言:「陛下欲富國強兵,大有爲於天 額員可減者減之,司 屬 可併者併

惟軍須是慮,中興之業可致也。」除給事中。

廣等降,致遠選留四百人,置營城外,餘遣還業。復遣廣討他郡諸盜,數月悉平。 尋以老母丐外,以<u>顯</u>謨閣待制知台州。 朝廷以海寇鄭廣未平,改知福州。 六年八月,

致遠 八年正月,再召爲給事中。出知廣州。 一鯁亮有學識,歷臺省、侍從,言論風旨皆卓然可觀。 尋以顯謨閣待制致仕。十七年卒,年五十八。 趙鼎嘗謂其客曰:「自鼎再相,

除政 府外,從官如張致遠、常同、胡寅、張九成、潘良貴、呂本忠、魏矼皆有士望,他日所守當

不渝。」識者謂鼎爲知人云。

|永米以振,而以經制銀市米償之,所刺舉二十人。 在 選 中,以權監察御 薛 徽言字德老,温州人。登進士第,爲樞密院計議官。紹興二年,遣使分行諸路,徽言 史宣諭 湖南。 時 郴、道、桂陽旱飢,徽言請于朝,不待報卽論漕臣發衡、 使還,他使皆進擢,宰相呂頤浩以徽言擅

易守臣,而移用經制銀,出知興國軍。入爲郎,遷右司,擢起居舍人。

和,徽言直前引義固爭,反復數刻。 時秦檜與金人議和, 徽言與吏部侍郎晏敦復等七人同拜疏爭之。 中寒疾而卒。 高宗念之,賻絹百匹,特與遺表恩。 日, **檜於上前論**

密院編修官。會李綱以前宰相爲江南西路安撫制置大使,辟爲制置司機宜文字。 郎張致遠言:「淵乃瓘之諸孫,有文有學,自瓘在時,器重特甚,垂老流落,負材未試。」充樞 陳淵字知默,南劍州沙縣人也。紹興五年,給事中廖剛、中書舍人胡寅朱震、權戶部侍 七年,詔侍從舉直言極諫之士,胡安國以淵應。召對,改官,賜進士出身。九年,除監

疑者,三省得以共議,戶部得以執奏,則前日之弊息矣。」 宰得以越式而論之。若事事以式,雖不會猶會也。臣願陛下凡有錫賚,法之所無而於例有 法治之, 用旣衆,而所入實寡,此臣所甚懼也。獨官『唯王及后、世子不會』,說者謂不得以有司之 祭御史,尋遷右正言。入對,論"「比年以來,恩惠太濫, 賞給太厚, 頒賚賜予之費太過。 所 非周公作法開後世人主侈用之端也。臣謂冢宰以九式均節財用,有司雖不會,冢

淵面對, 列 傳 第 因論程頤、王安石學術同異,上曰:「楊時之學能宗孔、孟,其三經義辨甚當 百 三 十 正 陳 淵 魏 缸 一一六二九

穿鑿。」淵曰:「穿鑿之過尙小,至於道之大原,安石無一不差。推行其學,遂爲大害。」上曰: 揚雄善惡混之言,至於無善無惡,又溺於佛,其失性遠矣。」 暗其原。 「差者何謂?」淵曰:「聖學所傳止有論、孟、中庸,論語主仁,中庸主誠,孟子主性,安石皆 淵曰:「楊時始宗安石,後得程顥師之,乃悟其非。」上曰:「以三經義解觀之,具見安石 其言吐庸, 則謂中庸所以接人, 高明所以處己。 孟子七篇, 專發明性善, 而安石取 仁道至大,論語隨問隨答,惟樊遲問,始對曰:『愛人。』愛特仁之一端,而安石遂以

兼崇政殿說書,以祖名辭。 有從賊之醜,乞寖其職名。」不報。 鄭億年復資政殿學士、奉朝請,召見于內殿。淵言:「億年故相居中之子,雖爲從官,而 改宗正少卿,以何鑄論罷。主管台州崇道觀。十五年,卒。 億年,右僕射秦檜之親黨也,由是檜怒之。除秘書少監

|和三年,上含及第。 魏矼字邦達,和州歷陽人,唐丞相知古後也。少穎悟。時方尚王氏新說,矼獨守所學。 建炎四年,召赴闕,詔改宣教郎,除詳定一司勑令所删定官。

宗問輔臣所以消弭之道,韓琦以明賞罰爲對。 紹興元年,遷樞密院計議官,遷考功郎。 會星變,矼因轉對,言:「治平間,彗出東方,英 比年以來,賞之所加,有未參選而官已升朝

者。」力言大臣黜陟不公,所以致異。上識其忠,擢監察御史,遷殿中侍御史。 有未經任而輒爲正郎者,罰之所加, 有未到任而例被衝替者, 有罪犯同而罰有輕重

執事之間有朋附奔競之徒未汰乎。搢紳有公忠宿望及抱道懷藝、有猷有守之士未用乎? 德而魯不能用,季孫有惡而不能去,故天降之咎。 今朝廷之上有姦慝邪佞之人未逐乎?百 在位之人,畏人軋己,方且蔽賢,未聞推誠盡公,旁招俊义。宜鑒定、哀之失,甄別邪正,亟加 臨安火,延燒數千家,獻諛者謂非災異。在言:「春秋定、哀間數言火災,說者謂孔子有

乞申嚴其禁,以謹履霜之戒。」於是屢杖脊配瓊州。 如此,豈得不過爲之慮。建炎詔令禁內侍不得交通主兵官及預朝政,違者處以軍法。 內侍李廙飮韓世忠家,刃傷弓匠,事下廷尉。 遷侍御史,賜矼五品服

法也。 機務不决,軍政不修,除授挾私,賢士解體。」又疏其五罪,詔令勝非持餘服。 令之出,必先錄黃。 時朱勝非獨相,矼論:「勝非無所建明,惟知今日進呈一二細故,明日啓擬一二故人,而 竊聞近時三省、樞密院,間有不用錄黃而直降指揮者,亦有雖畫黃而不下六部者,望 其過兩省, 則給舍得以封駮,其下所屬,則臺諫得以論 列。 又言:「國家命 此萬世良

並依舊制。」

亦將 力循 忠、張俊三大將權均勢敵,又懷私隙,莫肯協心。 有利其身。」光世許之,遂勸其貽書二帥、示以無他,二帥復書交歡。 懼不支,况軍自爲心,將何以戰?爲諸公計,當思爲國雪恥,釋去私 挾金人入寇,宰相趙鼎决親征之議,矼請扈從,因命督江 **紅首至** 一光世軍 中, 上諸 諭之曰:「賊衆我寡,合 軍。 隙,不獨 光世以書聞,由此 時劉 有利 光世、韓世 於國,

諸將,力圖攻取。會金屢敗遁去,使亦不造。 上至平江,魏良臣、王繪、己使金回,約再遣使,且有恐迫語。 遷秘書少監 衆戦

屢捷,軍聲大振

州。 尋召還,丐祠,不允,除權吏部侍郎。 矼 在職七閱月,論事凡百二十餘章。尋乞補外,除直龍圖閣、知泉州,以親老辭, 知建

敵。」 矼 缸 八年,金使入境,命在充館件使,在言:「頃任御史,嘗論和議之非,今難以專論。」秦檜 日:相公固以誠待敵,第恐敵人不以誠待相公耳。」檜不能屈,乃改命吳表臣

歸,何藉於金國乎。傳聞奉使之歸,謂金人悉從我所欲。必無難行之禮,以重困我,陛下何 需者何 詔 金侦入境,欲屈己就和,令侍從、臺諫條奏來上。一矼言:「臣素不熟敵情,不知使人所 陛下所以屈己者何事。 賊豫爲金人所立,爲之北面,陛下承祖宗 基業,天命所

情大可見矣。欲望速召大將,各帶近上統制官數人同來,詳加訪問,以塞他日意外之憂。 所謂國人者,不過萬民、三軍爾。 搢紳與萬民一體,大將與三軍一體,今陛下詢于搢紳,民 大將以爲不可,則其氣益堅,何憂此敵。」 下治亂之機,酌之羣情,擇其經久可行者行之,其不可從者,以國人之意拒之,庶無後悔。 過自 如之何而可寢?雖欲息民,如之何而可息?非計之得也。陛下旣欲爲親少屈,更願審思天 便生兵隙。 取侮乎?如或不可從之事,爣輕許之,他時反爲所制,號令廢置將出其手,一有不從, 予奪在彼、失信在我、非計之得也。雖使還我空地、如之何而可保?雖欲寢兵、

四任。 未幾,丁父憂。 丁內艱以卒。 免喪,除集英殿修撰、知宣州,不就。 改提舉太平興國宮,自是奉祠,凡

他方以爵祿鈎知名士,良貴屹然特立,親故數爲

京致願交意,良貴正色謝絕。 潘 良貴字子賤,婺州金華人。 以上舍釋褐爲辟雍博士,遷秘書郎。 時宰相蔡京與其子 除主客郞中,

尋提舉准南東路常平。

靖康元年,召還。 第 百三十 賜對, Ξī 潘 飲宗問孰可秉鈞軸者,良貴極言:「何奧、唐恪等四人不可用, 良 自

他 日 必誤 社 稷 陛 下若欲 扶危持顯之相,非博詢於下僚, 明揚於微陋, 未見其子 可。」語徹

外,當國者指爲狂率,黜監信州汭口排岸。

其言,改除工部。 又乞封宗室賢者於山東、河北,以壯 高宗 心即位, 召爲左司 良貴以不得其言,求去,主管明道宮。 諫。 旣見, 國體, 請誅僞黨,使叛命者受刃國門,即敵 巡幸維揚,養兵威以圖恢復。 人不 黃潛善、汪伯彥 敢輕議宋鼎。 悪

謂 其牢籠,又何以立朝。」卽日乞補外,以直龍圖閣知嚴州。 語人曰:「宰相進退一世人才,以爲賢邪,自當擢用,何可握手密語,先示私恩。 良貴曰:「旦夕相引入兩省。」良貴正色對曰:「親老方欲乞外,兩省官 起為 越數年,除提點則湖南路刑獄,主管江州太平觀,除考功郎, 中書舍人。 到官兩月,請祠,主管亳州明道 遷左司。 非良貴可爲也。」 宰相呂頤浩從 若士大夫受 退

一子諲 子 會戶 諲 部 復語,久不止,良貴 以 無益 侍郎向子諲入見,語言煩褻,良貴故善子諲,是日攝起居,立殿上,徑至楊前厲聲 之談 人煩 聖聽 叱之退者再。 」子諲欲退, 高宗色變,閣門倂彈之,於是二人俱待罪。 高宗顧良貴曰:「是朕問之。」又論 子諲! 有旨 Ħ. 款

良貴求去,以集英殿修撰提舉江州太平觀。 起知明州。 期年,除徽猷閣待制、提舉亮 良貴

放罪

子韲

無罪可待

州 明道宮。 旣歸,不出者十年。 李光得罪,良贵坐嘗與通書,降三官。 卒,年五十七。

檜諷 令求郡,良貴曰:「從臣除授合辭冤,今求之於宰相,辭之於君父,良貴不敢爲也。」其諫 皃 貴剛介淸苦, 壯老一節。 爲博士時,王黼、張邦昌俱欲妻以女,拒之。晚家居貧甚,秦

疏

多焚藁,僅存雜著十五卷,新安朱熹爲之序。

仁太后及哲宗臨奠,諸童穉立庭下,宣仁獨進本中,摩其頭曰:「孝於親,忠於君,兒勉焉。」 呂本中学居仁,元祐宰相公著之曾孫、好問之子。幼而敏悟,公著奇愛之。公著薨,宣

同。 以公著遺表恩,授承務郎。 祖 希哲師程頤,本中聞見習熟。少長,從楊時、游酢、尹焞遊,三家或有疑異,未嘗苟 紹聖間,黨事起,公著追貶,本中坐焉。

靖康 改元,遷職方員外郎,以父嫌奉祠。 丁父憂,服除,召爲祠部員外郞,以疾告去。再直

元符中,主濟陰簿、秦州士曹掾(三),辟大名府帥司幹官。

宣和六年,除樞密院編修官。

秘閣,主管崇道觀。

列傳第

百三十

五

呂本

坤

以 潛邸舊人,不用保任特給之。本中言:「若以異恩別給,非所謂『宮中府中當爲一體』者。」 紹興六年,召赴行在,特賜進士出身,擢起居舍人兼權中書舍人。內侍李琮失料曆,上

上見繳還,甚悅,令宰臣諭之曰:「自今有所見,第言之。」

權臣當國之時,士大夫無遺類久矣。願酌處常罰,毋令姦臣得以藉口於後世。」從之。 或有枉濫,何由盡知。異時察其非辜,雖欲抆拭,其可得乎。若祖宗以來此刑嘗用、則紹聖 監階州草場苗亘以贓敗,有詔從黥,本中奏:「近歲官吏犯贓,多至黥籍,然四方之遠,

詳審 庶勸 以待緩急,則江南自守之計備矣。」 朝廷於進取未有秋毫之實,所下詔命,已傳賊境,使之得以爲備,非策也。」又奏:「江左形勢 今江南、兩浙科須日繁,閭里告病,倘有水旱乏絕,姦宄竊發,未審朝廷何以待之?近者臣 有不可動之勢,伺彼有釁,一舉可克。若徒有恢復之志,而無其策,邦本未強,恐生他患。 如九江、鄂渚,荆南諸路,當宿重兵,臨以重臣。 不相侔,言不酬,事不濟,則脫身而去。 .興師問罪者,不可勝數,觀其辭固甚順,考其實不可行。 刑政,開直言之路,俾人人得以盡情。然後練兵謀帥,增師上流,固守淮甸,使江南先 七年、上幸建康、本中奏曰:「當今之計,必先爲恢復事業,求人才,卹民隱,講明法度, 朝廷施設失當,誰任其咎?鷙鳥將擊,必匿其形,今 吳時謂西陵、建平、國之藩表,願精擇守帥, 大抵獻言之人,與朝廷利害絕

嚴穴幽隱未能招致,乃起諶以統兵之任,何邪?」命遂寢。引疾乞祠,直龍圖閣、知台州,不 內侍鄭諶落致仕,得兵官。 本中言:「陛下進臨江滸,將以有爲,今賢士大夫未能顯用,

就,主管太平觀。召爲太常少卿。

不在此,在吾治政得失,兵財強弱,願詔有司令無乏可也。」 之供,本中言:「使人之來,正當示以儉約,客館獨聚若務充悅,適啓戎心。 且成敗大計,初 八年二月,遷中書舍人。三月,兼侍講。 六月, 棄權直學士院。 金使通和,有司議行人

射,本中草制,有曰:「合曆、楚之成,不若尊王而賤霸;散件、李之黨,未如明是以去非。」膾 大怒,言于上曰:「本中受鼎風旨, 伺和議不成, 爲脫身之計。」風御史蕭振劾罷之。 提舉太 不從。趙鼎素主元祐之學,謂本中公著後,又范沖所薦,故深相知。會哲宗實錄成,鼎遷僕 初,本中與秦檜同爲郎,相得甚歡。。膾旣相,私有引用,本中封還除目,膾勉其書行,卒

平觀,卒。學者稱爲東萊先生,賜諡文淸。

于世。 論 有詩二十卷得黃庭堅陳師道句法,春秋解一十卷、童蒙訓三卷、師友淵源錄五卷,行 日:傳有之:「不有君子,其何能國。」紹興之世,呂頤浩、秦檜在相位,雖有君子,豈得

盡其志,宋之不能圖復中原,雖曰天命,豈非人事乎?若常同、張致遠、薛徽言、陳淵、魏矼、 呂 本 中 校 勘 記 一一六三七

列

第

百 Ξ + 五

潘良貴、呂本中,其才猷皆可以經邦,其風節皆可以厲世,然皆論議不合,奉祠去國,可爲永

嘅矣。

校勘記

(二) 王繪 原作「王綸」,據本書卷二七高宗紀、繫年要錄卷八一改。

(三) 元符中主濟陰簿秦州士曹掾 官,政和五年調興仁濟陰簿,繼爲泰州士曹。」疑此處有脫 按李幼武四朝名臣言行錄別集下卷七呂本中條作: 誤。 元符中復

宋史卷三百七十七

列傳第一百三十六

向子諲 王庠 王衣 陳規 季陵 盧知原 弟法原 陳桷 李璆 李朴

受,子諲以聞,詔許自論决。障大怒,劾以他事勒停。 補假承奉郎,三遷知開封府咸平縣。豪民席勢犯法,獄具上,尹盛章方以獄空覬賞,却不 向子諲字伯恭,臨江人,敏中玄孫,欽聖憲肅皇后再從姪也。 元符三年,以后復辟恩,

以應奉往來,啓閉無節,堰閘率不存。 者,內侍主其議,無敢可否,發運司檄子諲行。 而欲濬之使平,决不可。 宣和初,復官,除江、准發運司主管文字。 曩有司三日一啓閘,復作澳儲水,故水不乏。 今復故制,嚴禁約,則無患。」使者用其言,漕復通,進 子諲言:「自江至淮數百里,河高江、淮數丈, 淮南仍歲旱,漕不通,有欲濬河與江、淮平 比年行直達之法,加

列

召 除 准 南 轉運判官。 以戶部奏諸路起發上供不及數,降一官

郡守馮 繋達 及本 所牒 犯 亳州 于獄 遷 司 報之,約日索戰,語極不 直 詢 錢穀之在濟州者, 龍 提舉范仲使拘之以俟王命。 圖 遣子濟請康王率諸將渡河,出其不意以救 諲 閣 自勤王所以書遺金人,言兵勢逆順,令退保河外。 右司員 、江淮發運 、外郎,不就,以直祕閣爲京畿轉運 以助軍 副 遜,諸道兵畏縮不進。 使。 費。 子諲言:「去歲劉順奉淵聖蠟韶,令監 張邦昌僭位, 造人持敕書往 邦昌 又使其甥劉達資手書來、 時康 二帝; 副使,尋棄發運副使。建炎元年,金 王 次濟州 遣將王儀統勤王 廬州問其家安否,子諲檄 ,子諲遣進士李植獻金帛 金人遽以亳、宋等州守禦 子諲不啓封焚之,械 司帥守募兵勤王 兵至城下。 一,臣

諸路 淮東 聞。 卽 鏤 監 九月, 板 復欲起天下之兵,而諸路翫 臣當 路,臣 徧 司 向承蠟詔廢格 檄所部,而六路之間漠無 時 子諲 親 恨 率諸 無 罷,以素爲李綱所善,故黃潛善斥之。 利 莂 司,粗成紀律。 辽 不勤王, 加加 其頸。 習故常, 恬不 及名爲 ※應者; 今京城失守,二帝 然諸 勤王 司 間有團結起發者,類 '猶有占各錢物,莫肯供億,殊不念君 而 ·知畏, 稽緩 將 播 者 何恃 遷, 悉加顯黜。」命諸路提刑司 **儵賞罰** 以濟艱難 如 兒戲, 姑以 不行, 哉? 恐金 願 明 避責 人再爲邊 父幽 詔 大臣 而 究實以 處 按 圍 思, 刻 坂 惟

明年,知襲慶府,道梗不能赴。

初,

邦昌爲平章軍國事,子諲乞致仕避之,坐言者降三

光世軍合淝,以乏餉告,亟退師。 官, 制,徙兩浙路爲都轉運使,除戶部侍郎。 罷,遂致仕。 願憐其無救而陷于賊,復加收用。」起知廣州。 許受招,始釋子諲。 既而援兵不至,成忿子諲扼己,摊衆而南,子諲率親兵拒之。 之,成聽命。 吏奪南楚門遁,城陷。坐敵至失守落職罷。轉運副使賈收言子諲督兵巷戰,又收潰卒復 城,顧謂曰:「君宗室,不可效此曹苟簡。」|聿之感激流涕。|金人圍八日,登城縱火,子諲率官 入治事,帝亦以子諲與他守臣望風遁者殊科,詔復職 起復知潭州。 金人破江西,移兵湖南,子諲聞警報,率軍民以死守。 詔提舉江州太平觀。 紹興元年,移鄂州,主管荆湖東路安撫司。 一子諲又遣將西扼衡陽,南守宜章,成逡巡不敢南向者百餘日,諸郡遂得割穫。 尋起知江州,改江東轉運使,進祕閣修撰。 禁卒爲亂,縱火掠市,出瀏陽縣,子諲遣通判孟彥卿等追及攸縣平之。 成不服,執子諲歸。 胡安國方避地湖南,以書抵秦檜,言:「子諲忠節,可以扶持三綱, 子諲馳至合淝,具見糧以聞,光世由是得罪。 會宣撫司都統制馬擴江遣人持吳敏檄諭成,成 時恐賊度嶺,故就用子諲守之。又以言者 劇盜曹成據攸縣,子諲軍于安仁,遣使招 江東當餉劉光世軍,適劉豫入寇, 宗室成忠郎書之隸東壁,子諲巡 會官軍潰,度不可遏,單騎入 進徽猷閣待

列傳

第一百三十六

向子

諲

陳規

一六四

受。」忤秦檜意,乃致仕。 金使議和將入境,子諲不肯拜。密部,乃上章言:「自古人主屈己和戎,未聞甚於此時,宜却勿 愛子諲也。」上意稍解,批論同,同言不已,於是三人俱罷。 |成言:「士大夫所以嘉子諲者,以其能眷眷於善類。今以子諲故逐柱史,又逐中司,非所以 退者再。上色變,欲抵良貴罪。中丞常同言:「良貴無罪,願許子諲補外。」上倂怒同 聽。」子諲欲退,上謂良貴曰:「是朕問之也。」又論子諲款語。 國 [報聘及奠朱震事, 入見,論京都舊事,頗及珍玩。 反復良久。 良貴徑至楊前厲聲叱之曰:「子諲不宜以無益之談久煩聖 起居郞潘良貴故善子諲,聞其言甚怒。 子諲以徽猷閣直學士知平江府。 子諲復語,久不止,良貴叱之 既而子諲奏金 張九

昌僞詔至,虹縣令已下迎拜宣讀如常式,獨武尉徐端益不拜而走。 事定,子諲言於朝,易端 益文資。 子諲相家子,能修飭自見於時。 退閒十五年,號所居曰「薌林」。卒,年六十八。 友愛諸弟,置義莊,贍宗族貧者。初,漕淮南時, 張邦

徒祝進、汪在去爲盜,犯隨、郢、復等州。 陳規字元則,密州安丘人。 中明法科。 |規爲安陸令, 以勤王兵赴汴, 至||疾州, 道梗而還。 靖康末,金人入侵,殺鎭海軍節度使劉延慶,其

會配進攻德安府,守棄城遁,父老請規攝守事。 規遣射士張立率兵討進,却之。 既而在復

與進合,以砲石鵝車攻城東,規連戰敗之,二人懼,引衆去。

德安府、復州、漢陽軍鎭撫使,賜三品服,俄升徽猷閣待制。 城,遣其黨李居正、黃進入城求犒, **進技窮,以百人自衞,抵濠上求和。** 視其營壘,曰:「此詐也。」亟爲備。 建炎元年,除直龍圖閣、知德安府。李孝義、張世以步騎數萬薄城,陽稱受詔招,規登城 夜半,孝義兵圍城,遂大敗之。 規斬進,授居正兵爲前鋒, 規出城與交臂語,進感之,折箭爲誓而去。 大破之。 與羣盜楊進相持十八日, 升祕閣修撰。 董平引衆窺 尋除

聞。 助之,須臾皆盡,橫拔砦去。 活一城,不亦可乎?」規竟不予。 家財勞軍,士氣益振。 仲引兵窺之,爲王彦所敗。 李橫圍城,造天橋,塡濠,鼓譟臨城。 時風仲剽略裏、漢間,其副霍明屯兵野上,規請于朝, |横遣人來,願得妓女罷軍,規不許。 |仲怒,從數百騎來譙||明殺之,奔||劉豫,以書招規,規械其使以 會豪橋陷,規以六十人持火槍自西門出,焚天橋,以火牛 規帥軍民禦之,砲傷足,神色不變,圍急糧 就以明守郢。 諸將曰:「圍城七十日矣,以一婦 張浚都督行蜀道, 盡 一, 出

鎭撫使當罷, 升徽猷閣直學士,詔赴行在,改顯謨閣直學士,徙知池州、沿江安撫使。 諸將跋扈,請用偏裨以分其勢。」上皆納之。遷龍圖閣直學士,改知廬州,尋 入對,首言:

列傳第

百三十

六

陳規

一大四四

.赴行在,以疾辭,提舉江州太平觀。 復起知德安府,坐失察吏職,鐫兩官。

規 背城一戰,死中求生可也。」 叱 擁精兵且至,策將安出?」諸將或謂今已累捷,宜乘勢全師而歸。 |規曰:「朝廷養兵十五年, 也。」錡然之,果劫中其砦,殲其兵甚衆。 金人告急於 兀朮。 規大饗將士,酒半問曰:「兀朮 于河者甚衆。規曰:「敵志屢挫,必思出奇困我,不若潛兵斫營,使彼晝夜不得休,可養吾銳 大王者提重兵踵至,規躬擐甲胄,與錡巡城督戰,用神臂弓射之,稍引退,復以步兵邀擊,溺 分命諸將守四門,且明斥候,募土人鄉導間諜。布設粗畢,金遊騎已薄城矣。 及,老幼先亂,必至狼狽,不獨廢前功,致兩淮侵擾,江、浙震驚。平生報君,反成誤國,不如 IE |欲爲緩急用,况屢挫其鋒,軍聲稍振。 |規已分一死,進亦死,退亦死,不如進爲忠也。」|嬌 出迎,坐未定,傳金人已入京城,即告崎城中有粟數萬斛,勉同爲死守計。相與登城區畫, ·諸將曰:「府公文人猶誓死守,况汝曹耶! 兼金營近三十里,兀朮來援,我軍一動,金人追 金 人歸河南地,改知順昌府,葺城壁,招流亡,立保伍。 會劉錡領兵赴京留守過郡境, 既至,金龍虎

懼色, 折箭 爲誓,丼兵十 而 軍殊死鬥。 兀朮至、親循城、責諸酋用兵之失、衆跪曰:「南兵非昔比。」 兀朮下令晨飯府庭,且 餘萬攻城,自將鐵浮屠軍三千遊擊。規與錡行城,勉激諸將,流矢及衣無 時方劇暑, 規謂錡毋多出軍、第更隊易器,以逸制勞,蔑不勝矣。

晨 奏功,詔褒諭之,遷樞密直學士。 |輒堅壁不出,何金兵暴烈日中,至未申,氣力疲,則城中兵爭奮,斬獲無算,兀朮宵遁。 規至順昌, 卽廣糴粟麥實倉廩。 會計議司移粟赴河上,規

請以金帛代輸,至是得其用,成錡功者,食足故也。

曰:「帥事,機宜董之,郡城,通判董之。」語畢而卒,年七十。 移 知廬州氽淮西安撫,旣至,疾作。 有旨修郡城,規在告, 贈右正議大夫。有攻守方略 更抱文書入臥內, 規力疾起

所屯之田,皆相險隘立堡砦,寇至則堡聚捍禦,無事則乘時田作,射士皆分半以耕屯田。 嘉獎之,仍下其法於諸鎭。自紹興以來,文臣鎭撫使有威聲者,惟規而已。 歸者以田還之。凡屯田事,營田司兼行,營田事,府縣官兼行,皆不更置官吏,條列以聞,詔 戶所營之田,水田畝賦粳米一斗,陸田賦麥豆各五升。滿三年無逋輸,給爲永業。 初,規守[德安時,嘗條上營屯田事宜,欲倣古屯田之制,合射士民兵,分地耕墾。 軍士 流民自 民

者感泣。 婦 甚開雅,怪而詢之,乃雲夢張貢士女也,亂離夫死無所託,鬻身求活,規卽輟女奩嫁之,聞 規端毅寡言笑,然待人和易。 規功名與諸將等,而位不酬勞,時共惜之。乾道 以忠義自許,尤好振施,家無贏財。嘗爲女求從婢,得一 八年,詔刻規德安守城錄頒天下

爲諸守將法。

立廟

德安,賜額「賢守」,追封忠利侯,後加封智敏。

列傳

官怒,譖之執政,謫知舒城縣。 建炎二年,守尙書右司員外郎、太常少卿。金人南侵,帝幸杭州,朝廷儀物皆委棄之,陵奉 |季陵字延仲,處之龍泉人。登政和二年上舍第,三遷太學博士。 未幾,除太常寺簿,遷比部員外郎。 高宗卽位,從至揚州。 論學術邪正異同,長

九廟神主負之以行,拜起居郞,遷中書舍人。

之憤不雪,赤子之寃莫報,不謀之咎,臣意盜賊當之。道路之言謂鑾輿不久居此,自臣臆 滸,安奉後時。不肅之咎,臣意宗廟當之。比年盜賊例許招安,未幾再叛,反墮其計。忠臣 示有尊也。 徵曰, 肅時雨若, 謀時寒若, 咎徵曰, 狂恆雨若, 急恆寒若。自古天子之出, 必載廟主行, 手,可爲戒矣。比聞復召藍珪,黨與相賀,聞者切齒,此宦寺之習未革有以干陽也。 盛;宮閫無女謁之私,惟宦寺之習未革。今將帥擁兵自衞,浸成跋扈,苗、劉竊發。 師一至,凌轢官吏,莫敢誰何?此將帥之權太盛有以干陽也。 固不足怪。惟先格王,正厥事,則在我者其可忽邪?臣觀廟堂無擅命之臣,惟將帥之權太 三年六月,淫雨,詔求直言。 陵言:「金人累歲侵軼,生靈塗炭,怨氣所積,災異之來, 前日倉卒迎奉,不能如禮。旣至錢塘,置太廟於道宮,薦享有闕,留神御於河 宦寺縱橫,上下共憤,卒碎賊 洪範休 勤王之

度,决無是事,假或有之,不幾於狂乎。軍興以來,旣結保甲,又改巡社,旣招弓手,又募民

兵,民力竭矣,而猶誅求焉,不幾於急乎?此皆陰道太盛所致。」帝嘉納之。

按營壘,召諸道兵以爲援,留將相大臣,相率死守,勿效前日百官跣足奔竄,以扈蹕爲名,棄 陵 城池以予敵,使生靈墮塗炭,財用塡溝壑。」 封還錄黃。 時除梁揚祖爲發運使,給事中劉寧止言其不可,乃以起居郎綦崇禮權給事中, 又言:「防秋已迫,願陛下先定兵衞及扈從之臣,萬一敵勢猖獗,便當整駕親 書讀,

行,落職與祠。數月,復職,除知温州,又改中書舍人,皆力辭。 時張浚爲川、陝等路宣撫處置使,陵論其太專,忤旨,罷爲徽猷閣待制、知太平州,未

幾自 之心。 年議幸蜀,人以爲不可,朝廷以爲可,故弛備江、淮,經營關、陝。 存者,人心未厭而已。前年議渡江,人以爲可,朝廷以爲不可,故諱言南渡而降詔回 |楊之變,朝廷不及知而功歸宦寺;|錢塘之變,朝廷不能救而功歸將帥,是致此曹有輕朝士 大駕未有駐蹕之地,賢人皆無經世之心,兵柄分而將不和,政權 重者,往往卷懷 范宗尹薦其才,命知臨安府,復爲中書舍人。入對,言:「事有可深慮者四,尚可恃者一: 黃潛善好自用不能用人,呂頤浩知使能不 退縮。 今天下不可謂無兵,劉光世、韓世忠、張俊各招亡命以張軍勢, 知任賢。 自張慤、許景衡飲恨而死, 以今觀之,敦得孰失?惟 !去而主益弱;所恃以僅 凡知

列 傳 第

百 =

+ 六

季 陵

各効 刑當罪,施設注措無不當理,天下不心服者未之有也。」 詔屢降,憂民之言屢聞,丁寧切至,終莫之信。臣謂動民以行不以言,陛下爵當賢,祿當功, 陛下宜有以結之。今欲薄斂以裕民財,而用度方闕,輕徭以紓民力,而師旅方興。罪己之 皆傷於太專,臣恐自陝以西不知有陛下矣。 邪?官吏責以辦事,便宜可也,乃若安置從臣,得無忌器之嫌邪?以至賜姓氏,改寺額,此 之;張浚在陝右,無敢言者。 小勞以 公報主 恩。 然勝不相遜, 敗不相救, 大敵一至, 人自為謀耳。 夫軍事恐失機會,便宜可也, 乃若自降詔書, 得無竊命之嫌 惟祖宗德澤在人心未忘,所望以中興者此耳, 周望在浙西,人能言

論 糧不素積,又不設險,何以禦之?臣願陛下更擇賢副,預爲經畫以待。 存亡, 淮甸,無復去意,患在朝夕,可謂急矣。若頤浩旣去,勝非未至,敵人南向,兵不素練, |朱勝非除江西帥,未行。||陵言:「金人往年休士馬於||燕山,次年移||河北,又次年移||京東, 朝謀夕行,當如拯溺,豈可不惜分陰。」詔劉洪道趣往池州, 措置防江。除戶部 今日非論安危,實

其罪大者言之,崇寧、大觀以來,黨助巨奸,由詭道以饕寵榮者不知幾何人。」邦昌亂朝,不 皆喜攻之,瑕疵旣彰,不復可用,縱加抆拭,攻者踵來,雖君相制命,亦不能爲之地。 范宗尹嘗仕僞楚,故凡受僞命者皆錄用。 陵因上疏曰:「前日士大夫名節不立,論事者 臣試舉

. 郎

沈與求劾陵承望宰執風旨,罷官,提舉杭州洞霄宮。 能,量付以事, 亦不幸耳。 能 死節者不知幾何人。苗、劉專殺,拱手受制不知幾何人。以義責之固不容誅,以情恕之 弄筆墨者,文致其罪,旣得惡名,誰敢引薦。 勿因一眚廢其終身,仍詔臺諫爲國愛人,勿復言。」詔牓其疏於朝堂。侍御史 臣願明詔宰執,於罪戾中選擇實

議者一。虜掠婦女,軍中多有,養旣不足,寧冤作過,當議者二。所至州軍,邀求犒賞,守令 其直幾何? 予民則莫售; **惲生事,竭取民以奉之,當議者三。 詭名虛券,隨在批請,枉費官物,當議者四。 或假關節,** 夫疆兵不在冗食, 今統領家口隨行, 一聞賊至, 擇精銳者護送老小, 其自隨者祗辦走耳, 當 |陜贍之,劉光世一軍以淮、浙贍之,李綱一軍以湖廣贍之,上供之物得至司農、太府者無幾 輿服御之費十去七八,百官有司之費十去五六,猶無益於國者,軍太冗也。 勝本,初無鬥心,賊至則僞言退保,賊去則盛言收復,遇敗以千爲一,遇勝以一爲千。 或行賄賂,寄名軍籍,規冒功賞,當議者五。 曰『借』,其實奪之。兵將衣食不取其飽煖,取其豐美,器械不取其堅利,取其華好。 紹 興元年,復右文殿脩撰。 遇軍興,事事責辦,有不足者,預借後年之賦。 師旅糧草,非彊取於民則莫給。舊例和買,無本可支者久矣,新行和 二年,詔內外官言事。 願詔有司專意講求,革因循以作士氣,則軍政 陵言:「軍興以來,朝廷誥牒,非彊以 雖名曰『和』,實彊取之; 張浚一軍以川、 糴,能償 務末 雖名

列傳第

百三

十六

季陵

虚知原

一六五〇

立。」復徽猷閣待制,帥廣。

先是,惠州有狂男子聚衆數千,僭號作亂。 陵入境,誘其徒曾袞,令以功贖罪,不旬日

擒之。 在官三年卒,年五十五,贈中大夫。 有文集十卷。

州防禦使,陵草其制,時論亦以此少之。 攻張浚,則謂在蜀失於太專,自陝以西將不知有陛下。君子皆不謂然也。 陵善言事,奏疏可觀。 然附范宗尹, 則謂凡受僞命者皆當進用, 臺諫不當復以爲言; 幸醫王繼先授榮

副使。 原因疏言之,臟怒,罷去。久之,起提點京東刑獄,改江西轉運副使,過闕入奏,徽宗勉之曰: 盧知原字行之,湖州德淸人。以父任知歙縣,因近臣薦,赴都堂審察,累遷梓州路轉運 時承平旣久,戎備皆弛,知原招補兵籍,築城亙二十餘里。王黼當國,費出無藝, 知

直祕閣,爲江、淮、荆、浙等路發運使。 先是,綱運阻於重江,吏卒並緣爲姦。 高宗卽位,復龍圖閣、知温州。 時葉濃陷建州,楊勍陷處州,知原繕甲兵、增城浚隍,聲 升祕閣脩撰,提舉河北。 知原悉意經理,故先諸道上京師,進一官,尋除 以言者劾,褫職歸吏部

「卿在蜀道,功效甚休。」遂賜三品服

勢隱然。 安撫使。 帝東幸,知原繇海道轉粟及金繒十餘萬 至台州 召見,稱獎,擢右文殿脩撰、管內

在郡四年,民繪像祠之。

閣待制、知臨安府。 師討范汝爲,召爲添差兩浙轉運使。 諫官唐煇 言:「知原爲政乖謬。」詔復爲都督府參謀官。 罷,提舉太平觀。 都督孟庾辟爲參謀, 章再上,遂以舊 改徽猷

奉祠。 紹興十一年十月卒。 弟法原。

服。 爲吏部尙書,以官秩次第履歷總爲一書,功過殿最,開卷瞭然,吏不能欺。 法原字立之。 自知雍丘縣積官太府少卿,賜同上舍出身。 使遼還, 遷司農卿, 賜三品

罷爲 顯謨閣 待制

置 副 一使,進端明殿學士、川陝宣撫副使。 紹 興元年,提舉臨安洞霄宮。 張浚承制起知夔州,尋爲龍圖閣學士、川陝等路宣撫虎

隴 未幾,河東經制使王瓊以乏食班師,法原開關納之,與瓊同破斌,復興州。 叛兵 金 、欲窺蜀,法原 人攻關輔,叛將史斌陷興州,諸郡多應者。 極意拊循、嚴爲備禦, 傳檄諸路, 法原命諸將堅壁, 言戰者斬, 人心稍安。 視山川 險阻分地置將:自 方巨盜充斥,秦、 衆以爲怯。

洮、岷至階、成, 列 傳 第 翮 百 師 \equiv 古主之,屯通川 + 六 盧 知 原 陳 文、龍至威、茂, 桷 劉錡主之,屯巴西。 一六五一 前後屢捷,上所

倚重。

會 兀朮攻關爲吳玠所敗。 法原素與玠不睦, 玠因奏功訟法原不濟師, 不餽糧, 不銓錄

立功將士。 帝手詔詰問,法原自辯甚力,上頗不直之,憂恚,卒于軍。

於世,故並用之也。 始, 法原爲川、陝宣撫使,上從容謂知原曰:「段方以川、陝付法原。」 蓋兄弟皆以材見稱

陳桷字季壬,温州平陽人。 以上含貢辟雍。 政和二年,廷對第三,授文林郎、冀州兵曹

參軍,累遷尙書虞部員外郞。

奏,以前奏不實待罪,朝廷以볝知變,釋之。 奔潰,闔城震駭。|桷入亂兵中,諭以禍福,賊氣沮,邀|桷奏帥臣自斃,|桷詭從其請,間道馳 宣和七年,提點福建路刑獄。 福州調發防秋兵,資糧不滿望,殺帥臣,變生倉卒, **飯兵旣調行,乃道追殺首惡二十餘人,一方以**

建炎四年五月,復除福建路提刑,尋以疾乞祠,主管江州太平觀。

當專講治道之本、脩政事以攘敵國,不當以細故勤聖慮如平時也。」又言:「刺史縣令滿天 紹興三年,召爲金部員外郎,升郎中。 時言事者率毛舉細務,略大利害。 桷抗言:「今

下,不能皆得人,乞選監司,重其權,久其任。」除太常少卿。 又陳攻守二策,在於得人心,脩

車馬、衣服、器械定爲差等,重侈靡之禁。八年,遷福建路轉運副使。 五年, 除直龍圖閣、知泉州。 明年,改兩浙西路提刑。 乞置鄉縣三老以厚風俗,凡宮

常。 列,不必相遠,庶幾名位有倫,仰稱陛下嚴奉祖宗謨訓之意。」又言:「祫祭用太牢,此祀典之 議者疑其不倫。 猷皆設學士、待制,雜壓著令,龍圖在朝請大夫之上,至徽猷在承議郎之上,每閣相去稍遠, 駐蹕之初,未能備禮,止用一羊,乞檢會紹興六年詔旨,復用太牢。」 十年,復召爲太常少卿。適編類徽宗御書成,詔藏敷文閣,鸺以爲:「舊制自龍圖至徽 直數文閣者綴徽猷則與諸閣小異,降之則班列太卑,欲參酌取中,並爲一

具典故,專任己意,懷姦附麗,與吏部尙書吳表臣、禮部尙書蘇符、郞官方雲翼丁仲寧、太常 等議以國本未立,宜厚其禮以繫天下望,乃以皇子出閤禮例上之,或以爲太重。詔以不詳 十一年,除權禮部侍郎,賜三品服。 尋以桷提舉江州太平觀。 普安郡王出閣,奉詔與吏部、太常寺討論典故。,桷

戶數視承平時纔二十之一,而賦須尙多,乞重行蠲減。明年,金、房兵叛,桷遣將平之而後以 五年,知襄陽府,充京西南路安撫使。 襄、漢兵火之餘,民物凋瘵,桷請于朝,以今之

屬王普蘇籍

並罷。

列 傳

第一

百三十六

陳

李 恋

聞。漢水决溢,漂蕩廬舍,躬率兵民捍築隄岸,賴以無虞。以疾乞祠,除祕閣脩撰、提舉江州 太平興國宮。 二十四年,改知廣州,充廣南東路經略安撫使,未至而卒,年六十四

孫峴,以詞學擢第,官中書舍人、直學士院。 禮不阿忤意,遽罷,其節有足稱。自號「無相居士」。有文集十六卷。子汝楫、汝賢、汝諧。 無不躐登顯要。 | **桷**寬洪醞籍,以誠接物,而恬於榮利。當秦檜用事,以永嘉爲寓里,士之夤緣攀附者, **桷以立螭之舊,爲人主所知,出入頓挫,晚由奉常少卿擢權小宗伯,復以議**

茶,復彊民輸舊額,貧無所出,被繫者數百人,璆至,卽日盡釋之。 李璆字西美,汴人。登政和進士第,調陳州教授,入爲國子博士,出知房州。時旣權官

切諫,大略謂:「太祖以聖武得天下,將士皆百戰之餘,以是而取燕雲,宜易爲力。然趙普輩 無蚁贊其决者,蓋識天下大勢,且重民命故也。今承太平之業,父老幸不識兵,雖不得滅雲 宣和三年,廷議將取燕,璆聞之,曰:「百辟卿士,一倡共和,國家安危,其幾在是。」上疏

明年,赦還爲郎,尋試中書舍人。建言元帖名臣子孫、久被廢錮,宜少寬之。宦官譚稹

地,何闕於漢。」疏奏不省。及燕旣平,責監英州淸溪鎭。

七海海 出 [師河北,以無功廢,將復進用,璆不肯書行。會山東盜起,州縣不能制,至河北無見糧,軍 璆條奏十事,忤大臣意,罷。 紹興四年,以集英殿脩撰知吉州。 江西兵素剽悍,璆

始視事,有相挻爲亂者,亟捕誅首謀者,撫循其餘,大布恩信,境內遂安。

可紀。 竟受其利,眉人感之,繪像祠于堰所。間遭歲饑,民徙,發倉振活,無慮百萬家,治蜀之政多 民賴以安。三江有堰,可以下灌眉田百萬頃,久廢弗修,田萊以荒。逐率部刺史合力修復, 累遷徽猷閣直學士、四川安撫制置使。成都舊城多毀圮,璆至,首命修築。俄水大至, 有淸溪集二十卷。

授,程頤獨器許之。移虔州教授。以嘗言隆祐太后不當廢處瑤華宮事,有詔推鞫。 濟之死,使人危言動之,朴泰然無懼色。 旋追官勒停,會赦,注汀州司戶。 忌者欲

乎? 某事豈便於民乎。」朴曰:「承旨知而不言,無父風也。」純禮泣下。 徽宗卽位, 翰林承旨范純禮自言待罪四十六日, 不聞玉音, 謂朴曰:「某事豈便於國

右司 一諫陳瓘薦朴,有旨召對、朴首言:「熙寧、元豐以來,政體屢變、 始出一二大臣所學

列

傳第

百三十

六

李朴

不同, 直,他執政三擬官,皆持之不下,復以爲虔州敎授。 己,而惟王氏之聽,敗壞心術,莫大於此。 儒,罷爲肇慶府四會令。 後乃更執圓方,互相排擊,失今不治,必至不可勝救。」又言:「今士大夫之學不求諸 願韶勿以王氏爲拘,則英材輩出矣。」蔡京惡朴鯁 又嗾言者論朴爲元祐學術,不當領師

玩。 郎, 郎,半歲凡五遷至國子祭酒,以疾不能至。高宗卽位,除祕書監,趣召,未至而卒,年六十 **赠寶文閣待制,官其子孫二人。** 知臨江軍淸江縣、廣東路安撫司主管機宜文字。欽宗在東宮聞其名,及卽位, 有奸民言邑東地產金寶,立額買撲,破田疇,發墟墓,厚賂乃已,朴至,請罷之。 改承事 除著作

用,其可已矣。」蓋敍其平生云。有章頁集二十卷行于世。 引真臘取安南之計,以息邊患,人稱其智。|朴嘗自誌其墓日:「以天爲心,以道爲體,以時爲 載邪?」居官所至有聲。在廣南,止其帥孫竢以文具勤王,不若發常賦助邊。破漕使鄭良 形於色,然終不害也。中書侍郎馮熙載欲邂逅見朴,朴笑曰:「不能見蔡京、焉能邂逅 |朴自爲小官,天下高其名。|蔡京將彊致之,俾所厚道意,許以禁從,|朴力拒不見, 京怒 馮熙

百五十五家,蠲歲額三十萬斤。嘗攝興州,改川茶運,置茶鋪免役民,歲課亦辦。 父夢易,登皇祐第,力成父志,言於州縣不聽,言於刺史,言於三司,三司以聞,還籍沒者三 民煎輸,多至破產,惟有祿之家得免。伯琪請於州,均之官戶,而仕者誣訴之,賫恨以歿。 王庠字周彦,榮州人。累世同居,號「義門王氏」。祖伯琪,以義聲著于鄉州。 有鹽井籍 部刺史恨

擠,母撫柩誓言,期我兄弟成立贈復父官,乃許歸葬,相與勉之。且制科先君之遺意也,吾 其議不出已,以他事中之,鐫三秩,罷歸而卒。母向氏,欽聖憲肅后之姑也。 有志焉。」遂閉戶,窮經史百家書傳注之學,尋師千里,究其旨歸。蚤歲上范純仁、蘇轍、張 古,乃知後世見六經之易,忽之不行也。」賦復曰:「經說一篇,誠哉是言。」 商英書,皆持中立不倚之論,呂陶、蘇轍皆器重之。嘗以經說寄蘇軾,謂:「二帝三王之臣皆 志於道,惟其自得之難,故守之至堅。自凡、孟作六經,斯道有一定之論,士之所養,反不逮 庠幼穎悟,七歲能屬文,嚴如成人。年十三,居父喪,哀憤深切,謂弟序曰:「父以直道見 元站 中,呂陶以賢良方正直言極諫科薦之,庠以宋邦傑學成未有薦者,推使先就,陶 未幾,當紹聖諸臣用事,遂罷制科,庠嘆曰:「命也,無愧先訓,以之行已

崇寧壬午歲,應能書,爲首選。 京師蝗,庠上書論時政得失,謂"「中外壅蔽,將生寇戎 聞

而

益加敬。

列 傳

第

百

三十

六

王 庠

王

衣

之患。」張舜民見之,歎其危言。下第徑歸,奉親養志,不應舉者八年。

序升朝,贈父官,始克葬,葬而母卒。 陶、王吉嘗薦舉,黃庭堅、張舜民、王鞏、任伯雨爲交游,不可入舉求仕,願屛居田里。」以弟 今母年六十,乃奉韶,豈本心乎?」時嚴元祐黨禁,庠自陳:「蘇軾、蘇轍、范純仁爲知己,呂 大觀庚寅,行舍法於天下,州復以庠應詔。庠曰:「昔以母年五十二求侍養,不復願仕,

之姊。庠卒,孝宗諡日賢節。 詠,皆愛君憂國之言。太后念其姑,嘗欲官,庠以遜其弟、姪及甥,且以田均給庶兄及前母 「處士」。尋改潼川府敎授,賜出身及章服,一日四命俱至,竟力辭不受。 雖處山林,唱酬賦 終喪復舉八行,事下太學,大司成考定爲天下第一,詔旌其門。朝廷知其不可屈,賜號

宣和間以恩倖至徽猷閣直學士。庠浮沉其間,各建大第, 或者謂其晚節隱操少

多元

升寺正。 衣 字子裳,濟南壓城人。以門蔭仕,中明法科,歷深、冀二州法曹掾,入爲大理評 林靈素得幸,將毁釋氏以逞其私。 襄州僧杜德寶毀體然香,有司觀望靈素意,捕

以聞。 爲陝西都轉運司主管文字、詳定一司敕令所删定官、通判襲慶府、知濠州,未行,召爲刑部 衣閱之曰:「律自傷者杖而已。」靈素求內批,坐以害風敎竄流之,停衣官,尋予祠。

員外郎。

寺,衣奉韶鞫之。 高宗矍然曰:「卿言極是,朕慮不及此也。」即詔自傅、正彦妻子外皆釋之。 范瓊有罪下大理 先付大理獄, 衣顧吏曰:「囚詞服矣。」遂賜死,釋其親屬將佐。 建炎初,爲司勳郎中,遷大理少卿。三年,韓世忠執苗傅、劉正彥,獻俘,檻車幾百兩, 將盡尸諸市。 瓊不伏,衣責以靖康圍城中逼遷上皇,擅殺吳革,迎立張邦昌事,瓊稱死 |衣奏曰:「此曹在律當誅,顧其中婦女有顧買及鹵掠以從者。」

欲誅之。||衣曰:「「球固可殺,然非其所隱匿,則盡爲敵有,何從復歸國家乎?」乃寬之。 四年,升大理卿。 初,帶御器械王球爲龍德宮都監,盡盜本宮寶玉器玩,事覺,帝大怒,

事也,若一切取伏,是以威迫之,不使自直,非法意也。乞三問未承者,聽辨。」從之。 先是,百司愆戾,付寺劾之,至三問取伏狀,被劾者懼對,莫敢辨。 太奏曰:「伏與辨二 同詳

定一司敕令,删雜犯死罪四十七條,書成,帝嘉其議法詳明。

部侍郎,爲言者所格。 紹興元年,權刑部侍郎。二年,除集英殿脩撰,奉祠。旣而趙令時應詔薦之,復召爲刑 四年,卒于家。」衣質直和易,持法不阿,議者賢之。

列

第一

百三十六

王

衣

校

勘記

一一六五九

ーー 大六〇

不訹權威, 季陵言事不諱,二盧兄弟並用,以材見稱,陳桷守禮知變,李璆爲政有惠,咸足紀焉。 論曰: 一向子諲以相家之子克飭臣節,陳規以文儒之臣有聲鎭守, 圧庠志高而晚節頗衰, 王衣明恕而用刑不刻, 雖或器識不齊, 可謂拔乎流俗者焉。 亦皆不曠其職 李朴

校勘記

也歟

一馬擴 原作「馬廣」,據北盟會編卷一五〇、繫年要錄卷五一改。

宋史卷三百七十八

列 傳第一百三十七

衞膚敏 劉珏 胡舜陟 沈晦 止 弟寧止 胡交修

劉一

秦 崇禮

衞膚敏字商彥,華亭人。 以上舍生登宣和元年進士第,授文林郎、南京宗子博士,尋改

教授。

假給事中以行,及慶源府,逢許亢宗還,語金國事,曰:「彼且大入,其勢不可往。」膚敏 報愈急,衆懼不敢進,膚敏叱曰:「吾將君命以行,其可止乎?」既至金國,知其兵已舉,殊不 彼若不來,則以幣置境上而已。」帝可其奏。旣至滅,金賀使果不至,遂置幣而返。七年,復 天寧節五日,金人未聞入賀,而反先之以失國體,萬一金使不來,爲朝廷羞。請至燕山侯之, 六年,召對,改宣教郎、祕書省校書郎,命假給事中賀金主生辰。 膚敏奏曰:「彼生辰後 至燕,

列

傳

第一百三十七

衞

庵 敏

爲屈。 踰時,卒單跪以受。 金人積不說,中道羈留且半年。 復,卒易以璽。 及將 及受書,欲令雙跪,膚敏曰:「雙跪乃北朝禮,安可令南朝人行之哉!」爭辨 金人所答國書,欲以押字代璽,膚敏力爭曰:「押字豈所以交鄰國。」論難往

何? 金人氣折,始曰:「唯所欲。」膚敏長揖而入。旣坐,金人出誓書示之,膚敏却不視,曰:「遠使 人臣也,一介之使雖賤,亦人臣也。兩國之臣相見,而用君臣之禮,是北朝一國有二君也。」 久不聞朝廷事,此書眞僞不可知。」因論用兵事,又以語折之,幾復爲所留。 」曰:「有例。」膚敏笑曰:「例謂趨伏羅拜,此禮焉可用?北朝止一君耳,皇子郎君雖貴, 至涿州新城,與斡離不遇,遣人約相見,拒之不可,遂語之曰:「必欲相見,其禮當如

欲改 仍舊。」乃復稱接件使。 解宣問使,膚敏曰:「國家厚遇高麗久矣,今邊事方作,不可遽削其禮,失遠人心,願姑 靖康初,始還,進三官,遷東部員外郎。 會高麗遣使來賀,命假太常少卿往接之。 既至明州,會京師多難,乃便宜稱詔厚賜使者,遺還。 朝論

許以 留守汴京,車駕早幸江寧。」帝頗納之。 一世襲,使各堅守。 建炎元年,復命, 自劾矯制之罪,高宗嘉賞。 陝西、山東、淮南諸路,並令增陴浚隍,徙民入城爲淸野計。 遷衞尉少卿。 建議「兩河諸郡宜降蠟書,

遷起居舍人,言:「前日金人憑陵,都邑失守,朝臣欲存趙氏者不過一二人而已,其他皆

宗即位 及金 使,添 爲,求其擊朱泚如段秀實者無有也。今陛下踐祚之初,苟無典刑,何以立國?凡前日屈節 用樂。 可猶 其他皆委質求榮,不以爲愧,甚者爲叛臣稱功德,說符命,主推戴之議,草勸進之文,無所不 閣待制,太后兄子 宮室,菲飲食,惡衣服,減嬪御,斥聲樂,以至歲時上壽,春秋錫宴,一切罷之,雖饗郊廟亦不 敵人,委質僞命者,宜差第其罪,大則族,次則誅,又其次竄殛,下則斥之遠方,終身不齒,豈 屈 者,皆由三省乃得奉行,或戾祖宗成憲者,皆許執奏。」時內侍李志道以赦恩復保慶軍承宣 言:「行在 節受辱,不以爲恥,甚者爲敵人斂金帛,索妃嬪,無所不至,求其能詐楚如紀信者無有也。 **淠洞** |人僞立叛臣,僭竊位號,在廷之臣逃避不從及約寇退歸位趙氏者,不過一二人而已。 差 必俟兩 入內都 『胾,使塵班列哉?」又言:「今二帝北遷,寰宇痛心,願陛下愈自貶損,不忘報雪,卑 頗興土木之役,非所以示 命起之。 :宮還闕,然後復常,庶幾精誠昭格天地,感動人心。」 知 孟忠厚顯謨閣直學士。 ,膚敏極論罷之。 膚敏言:「自古帝王未有求閹寺於閉退而 ,四方,乞罷樂承慶院、升暘宮(1)。」又奏:「凡黜陟自中出 初,欽宗內侍昭慶軍承宣使容機,圍城中時 膚敏 言:「非祖宗法。」煥尋換武 用者。」遂寢。 拜右諫議大夫兼侍讀, 職,忠厚 后父邢煥除徽猷 乞致仕,高 自若

林學 俄 遷 光言:『以臣爲是,則方平當罷; 膚敏中書舍人,膚敏懇奏日:「昔司 以臣爲非,則臣當貶。 馬光論張方平不當參 今兩無所問而遷臣,臣所 知 政事,自御史 遷翰

列

第

百三

十七

衞

敏

未渝。」 綸而已。」凡命令不合公議者,率封還之。 及忠厚改承宣使,詔后族勿除從官,膚敏始拜命。又言:「中書根本之地,舍人所掌,不特演 舉而三失矣。」帝命宰相論膚敏曰:「朝廷以次遷官,非因論事也。」膚敏循不拜,居家逾月, 今陛下順太母以非法非所謂孝,處忠厚以非分非所謂恩,不用臣言而遷其官非所謂賞, 臣 .雖不肖,願附於司馬光。」又言:「事母后莫若孝,待戚屬莫若恩,勸臣下莫若賞。

英殿修撰提舉洞霄宮。或謂膚敏在後省論事,爲黃潛善、汪伯彥所惡,故因事斥之。 會膚敏知貢舉,有進士何烈對省試策,謬稱「臣」,諫官李處遯乞正考官鹵莽之罪,以集

得疾,然猶力疾扈蹕至臨安。 錢塘亦非帝王之都,宜須事定亟還金陵。」因陳所以守長江之策,帝善其言。 不言,有請不以時對。」膚敏謝曰:「臣頃嘗三爲陛下言,揚州非駐蹕之地,乞早幸江寧。 三年春,召赴行在。 時帝次平江。 膚敏入見,言及時事泣下,帝亦泣曰:「卿今宜知無 俄除刑部侍郎,未拜,謁告歸華亭就醫,許之,遷禮部 翌日,再對,歸 侍 郎。

膚敏稱 疾坐觀成敗,無人臣節」。及卒,始明其非僞云。 年四十九,特贈大中大夫。子仲

久疾臥舟中,不能朝,時苗、劉之變,帝未反正,宰相朱勝非言於隆祐太后,以

英、仲傑、仲循。

初,膚敏

有罪 始 固 欲 博 蹈 劉 士論 信任踰曩昔而 古人行也。 珏 字希范,湖州長興人。登崇寧五年進士第。初游太學,以書遺中書舍人鄒浩曰:「公 取士之失, 冤所居官, 在諫省斥宮掖之非, 遠遷嶺表, 豈逆計禍福, 邀後日報哉, 今庶政豈盡修明,百官豈盡忠實,從臣繼去,豈盡非才,言官屢逐,豈盡 | 拱默不言,天下之士竊有疑焉,願有以慰塞羣望。」

」指得書愧謝之。

和叫

年,擢監察御史,坐言事

知舒州,留爲尚書主客員外郞。

宰臣 臣 皆親受父命,未嘗 如請 或許子孫 上尊號,至德宗 帝 導皇帝升自 靖康 坐, 扶 初,議皇帝朝謁 即宰執等退立西隅。」遷太常少卿。 掖。 皇帝 [東階,拜於殿上,則有君之尊,有父之敬。 踵行之,後世以爲非。」 議遂 再行册禮,肅宗即位於靈武,故明皇遣韋見素就册之,宜政授傳國璽,羣 朝謁, 上皇儀,欲以家人禮見於內庭,珏請皇帝設大小次,俟上皇御坐, 宜令環衞士卒侍立於殿西, 寢。 討論 皇帝受册寶故事,珏言:「唐太宗、明皇 宰執、三衙、侍從等官扶侍於殿上。 又謂:「君於大臣或賜劍履 上殿,

所以 權 開言者之路, 指 日 而徯太平也。 命令旣當,未嘗數改,任用旣公,率皆稱職,賞必視功, 此 者內降數出, 三省罕有可否, 此御筆之開端也。 政 必核 教子弟既有其 實, 此 天下

除

中

書舍人。

陳十開端之戒曰:「陛下卽位罷

御筆,止營繕,登俊乂,詘

虚誕,戢

內侍之

列

百

三 十

4:

劉珏

議,此大臣不和之開端也。內路之帥擅作聖旨指揮,行郡之守稱爲外任監當,此臣 數易之開端也。三省、密院議論各有所見,啓擬各舉所知,持不同不比之說,忘同寅協恭之 原委之貪吏,此任用失當之開端也。 所,又徹而新之,長入祗侯之班,勢若可緩,亟而成之,此營繕之開端 恩,金兵扣闞,禮房之吏亦進秩,此爵賞僭濫之開端也。是十者雖未若前日之甚,其端已 之韶累下,未可行者多,是爲空文無實德,此政事失信之開端也。隨龍第賞,冠帶之工亦推 以次行下,或戒以不得再繳,臺諫言事失當,率責爲遠小監當,此言路壅塞之開端也。 之開端也。董局務者廣辟官屬,侍帷幄者分爭殿廬,此內侍恣橫之開端也。 止之,可以馴致治平,因而循之,雖有智者不能善其後矣。」 花石等濫賞,既治復止,馬忠統兵, 也。 累行累召,此 河陽付之庸才,涇 兩省繳奏多命 下誕謾 恤

馮獬言 網以 去秋蔡靖屢以金人點集爲言,度獨謂不應有此,遂不設備,請竄度嶺表。」詔予宮祠。 觀文殿學士知揚州,安扶又持不可,珏言:「韓琦好水之敗,韓絳西州之敗, 詹度都堂稟議,中書舍人安扶持不可,改命珏書行,珏言:「伐燕之役,度以書贊童貫大 綱 勇於 珏 持 報國,銳於用 雨端,爲 網游 說,提舉亳州明道宮 (兵,聽用不審,數有敗衄,宜降黜以示懲戒。」網改宮祠。 皆不免 吏部侍郎

建炎元年,復召爲中書舍人,至泗州,上書言:「金人尚有屯河北者,萬一猖獗而南,六

以待敵。 飛豈能無警,乞早賜行幸。西兵驍勇,宜留以爲衞。 下。」時李綱已議營南陽,珏未知也。 可同居一省,帝遣張慤諭旨,珏論如初。 汪伯彥、黃潛善皆主幸東南,帝遂如揚州。 既至,極言南陽兵弱財單,乘輿無所取給,乞駐蹕金陵 詔潛厚提舉醴泉觀。 潛善兄潛厚除戶部尚書,珏言兄弟不 西京舟船,恐金人藉以爲用,並令東

閣待制,珏封還,言舊制外戚未有為兩禁官者,詔煥換武階。帝曰:「忠厚乃隆祐太后族,官 體
殷優奉太后之意。」
违持益堅,
忠厚尋亦換武階。 以隆祐太后時有御筆,議者以爲內降數出。蓋除授不歸中書,工役領之內侍,此人言所以 籍籍也。 遷給事中,論內降、營繕二事曰:「陛下以前朝房院而建承慶院,議者以爲營造寖廣; 營繕悉歸有司,中旨皆許執奏,則衆論息矣。」孟忠厚除顯謨閣直學士,邢煥徽猷

安,以珏爲龍圖閣直學士、知宣州。 俄復爲吏部侍郎。 可恃,維揚城池未修,軍旅多闕,卒有不虞,何以待之?」已而金人果乘虛大入,帝亟如臨 遷吏部侍郎,同修國史,言:「淮甸備敵,兵食爲先,今以降卒爲見兵,以糴本爲見糧,無

畫之方,明斥堠,設險阻,節大府之出,廣大農之入,檢察戰艦而習之,則守禦詳盡,人心安, 申詔大臣,悉屛細務,唯謀守禦。自京及|荆、淮之郡,置大帥,屯勁兵。命沿江之守,各上措 以久雨詔求言,压疏論消天變、收人心數事,詞極激切,並陳荆、陝、江、淮守禦之略:「願

第一

百三十七

劉珏

天意回,大業昌矣。」遷吏部尚書。

前冬幸淮甸,供帳弊舊,道路險狹,未嘗介意。今聞櫃、信以來,除治道路,科率民丁, 論蔡京罪,乞厚加恩。 張延壽論||珏罪,||珏亦上書自劾,踰||嶺俟命,落職,提舉江州||太平觀。 悉罷。」金人攻吉州,分兵追太后,舟至太和縣,衞兵皆潰,珏奉太后退保虔州。 籍及上書廢錮人,追復故官,錄用子孫,施行未盡者,珏悉奏行之。又言常安民、張克公嘗 少監,貶衡州。紹興元年,許自便。明年,以朝散大夫分司西京。 星火,廣市羊豕,備造服用,使農夫不得穫,齊民不得休,非陛下儉以避難之意也。 二子。八年,追復龍圖閣學士。 隆祐太后奉神主如江西,詔珏爲端明殿學士、權同知三省樞密院事從行。 至洪州,疏言修治巡幸道路之役,略曰:「陛下遭時艱難,躬履儉約, 有吳興集二十卷、集議五卷、兩漢蒙求十卷。 卒于梧州,年五十五。 延壽論不已, 時詔元祐黨 責授秘 監察御 乞降詔 急如 官其 書 史

祖宗成憲,南臺御史始有不言事者。 以言爲職,故自唐至本朝皆論時事,擊官邪,與殿中侍御史同。 胡舜陟字汝明,徽州績溪人。登大觀三年進士第,歷州縣官,爲監察御史。 多事之時,以開言路爲急。乞下本臺,增入監察御史 崇寧間,大臣欲便已,遂變 奏:「御 史

言事之文,以復祖宗之制。」以內艱去。

計,兵可練,栗可積,獨將爲難得,請詔內外之臣,並舉文武官才堪將帥者。」又奏:「上殿班 先臺後諫,祖宗法也,今臺臣在諫臣下,乞今後臺諫同日上殿,以臺諫雜壓爲先後。J 成邊思,幾傾社稷,自歸明官趙良嗣始,請戮之以快天下。」遂誅良嗣。又奏:「今邊境備禦之 服闋,再爲監察御史。 奏:「河北金兵已遁,備禦尤不可不講。」欽宗卽位,又言:「今結

護定受易於郭確,究極象數,逆知人事,洞曉諸葛亮八陣法,宜厚禮招之。」 之後深知聖人之道者,孟子而已。願詔東宮官奠舊制,先讀論語,次讀孟子。」又奏:「涪陵 遷侍御史。奏「向者晁說之乞皇太子講孝經,讀論語,間日讀爾雅而廢孟子。夫孔子

時准西盜賊充斥,廬人震恐,日具舟楫爲南渡計。一舜陟至,修城治戰具,人心始安。 高宗卽位,舜陟論宰相李綱之罪,帝不聽。 言者論其嘗事僞廷,除集英殿修撰、知廬

其抄掠者,琪宵遁,舜陟伏兵邀擊,得其輜重而歸。 衆請以粟遺之,舜陟曰:「吾非有所愛,顧賊心無厭,與之則示弱,彼無能爲也。」乃時出兵擊

爲盜蘄、壽間,舜陟遣文舜破之。 濟南僧劉文舜聚黨萬餘,保舒州投子山縱剽,舜陟遣介使招降之。時丁進、李勝合兵

列傳第一百三十七 胡舜陟

北,以護行宮。 張 返週自 1 濠州 帝壯其言,擢徽猷閣待制,充淮西制置使。 · 奄至梁縣,舜陟使毁竹里橋,伏兵河西,伺其半渡擊敗之。 范瓊自壽春渡淮,貽書責膽軍錢 又請以身守江

帛,舜陟渝以逆順,瓊乃去。

廬、壽鎭撫使, 府,充沿江都制置使。 改知靜江府,詔措置市戰馬。 軍興後,淮 改准西安撫使。 西八郡,羣盜攻蹂無全城,舜陟守廬二年,按堵如故,以徽猷閣待制知建 踰年,改知臨安府, 御史中丞常同奏舜陟兇暴傾險,罷之。 至廬州,潰兵王全與其徒來降,舜陟散財發粟, 復爲徽猷閣待制,充京畿數路宣撫使。 流民漸歸。 尋罷

獄中。 觀 非訓朝政。 先是,舜陟與源有隙,舜陟 後 十八年,復爲廣西經略。 **檜素惡舜**陟, 入其說,奏遣大理寺官袁拂、燕仰之往推劾,居兩旬, 因討郴賊, 以知邕州俞儋有贓,爲運副呂源所按,事連舜陟,提舉太平 勠源沮軍事,源以書抵<u>秦</u>檜,訟舜陟受金盜馬, 辭不服,死

言:「舜陟受金盜馬,事涉曖昧,其得人心,雖古循吏無以過。」帝謂檜曰:「舜陟從官,又罪不 |舜眇有惠愛,邦人聞其死,爲之哭。 妻江氏訴于朝, 韶通判德慶府洪元英宪實。 元英

至死,勘官不可不懲。」遂送牌、仰之吏部。

郞 金人攻汴京,借給事中從肅王|樞出質斡離 沈晦字元用, 錢塘人, 翰林學士沈遘孫。 宣和間進士廷對第一 不 軍 金人再攻也, ,除校書郞, 與之俱南。 京城陷,邦 遷著作佐

如揚州,將召爲中書舍人,侍御史張守論晦爲布衣時事,帝曰:「頃在金營見其慷慨,士人細如揚州,將召爲中書舍人,侍御史張守論晦爲布衣時事,帝曰:「頃在金營見其慷慨,士人細 立,請金人歸 高宗卽位,言者論 馮獬等,晦因得還,眞爲給事 晦雖使金艱苦,而封駁之職 不 可以賞勞,除集英殿修撰、 知信州。

中。

行,豈足爲終身累邪?」不果召。

知明州,移處州

昌僞

制、 制。 欲斬邦(三),已而釋之。時浙東防遏使傳崧卿在城中, 知宣州,移知建康府。 以言者論晦妄用便宜指揮行事, 帝如會稽,移守婺州。 甫踰月,以御史常同論罷。 賊成 阜入寇, 晦用教授孫邦策, 率民兵數百出城與戰, 降集英殿修撰、 提舉臨安府洞霄宮。 單騎往說鼻,鼻遂降。 尋復徽猷閣待 進徽猷閣待 大敗,晦

郡以 千餘 若 星 舟師守江,步兵守隘,彼難自渡。 里,若令鎭江、建康、太平、池、鄂五郡各有兵一二萬,以本郡財賦易官田給之,敵至,五 五郡,則兵分勢弱,或以偏師綴我大軍南侵,則五郡尾而邀之,敵安敢遠去。 紹興四年,起知鎭江府、雨浙 西路安撫使,過行在面對,言:「藩帥之兵可用。今沿江 假使能渡,五郡合擊,敵雖善戰,不能 一日破諸城也。 此制稍

列 傳 第

百三

+

七

沈 蹠

劉

止

兵法,期年後,京口便成強藩」。時方以韓世忠屯軍鎭江,不果用。 定,三年後移江北,糧餉、器械悉自隨。」又自乞「分兵二千及召募敢戰士三千,參用昭義步

劉麟入寇,世忠拒于揚州,晦乞促張俊兵爲世忠援。 趙鼎稱晦議論激昂,帝曰:「晦誠

舉臨安府洞霄宮,起爲廣西經略兼知靜江府。 可嘉,然股知其人言甚壯,膽志頗怯,更觀臨事,能副所言與否?」然晦不爲世忠所樂,尋提

邊患。 公晟孤 先是,南州蠻會莫公晟歸朝,歲久,用爲本路鈴轄羈縻之,後遁去,旁結諸峒蠻,歲出爲 立,不復犯邊。 晦選老將羅統戍邊,招誘諸酋,喻以威信,皆詣府請降,晦犒遺之,結誓而去。 晦在郡,歲買馬三千匹,繼者皆不能及。 進徽猷閣直學士,召赴行 自是

在,除知衢州,改潭州,提舉太平興國宮,卒。

晦膽氣過人,不能盡循法度,貧時尤甚,故累致人言。 然其當官才具,亦不可掩云。

常。」不就。 一止字行簡,湖州歸安人。七歲能屬文,試太學,有司欲舉八行,一止曰:「行者士之 登進士第,為越州教授。 參知政事李邴薦爲詳定一司敕令所删定官。

劉

紹興初,召試館職,其略曰:「事不克濟者,患在不爲,不患其難,聖人不畏多難,以因難

厭服。 訟,官吏遷降,土木營建之務,未見所當急也。」又謂:「人才進用太遽, 仕者或不由銓選, 朝 道 變,欲得通時務者,同列皆患無其人,一止出一卷曰:「是宜爲首。」啓號乃張九成也,衆皆 而 士入而不出,外官雖有異能,不見召用,非軍事而起復,皆倖門不塞之故。 文刊定頒行,庶幾絕姦吏弄法受財之弊。」從之。 失者小人之心耳,何病焉。」 人心』。夫所謂失人心者,必刑政之苛,賦役之多,好惡之不公,賞罰之不明;若皆無是,則所 綱未振,民困財竭,故置司講究,然未聞有所施行,得無有以疑似之說欺陛下,曰『如此將失 且諭近臣以所言剴切知治道,欲驟用,執政不樂,除祕書省校書郎。考兩浙類試,以科舉方 圖 切聽其省記,所欲與則陳與例,欲奪則陳奪例,與奪在其牙頰,患可勝言哉!請以省記之 則孤,小人雖寡勢易蔓,不加察,則小人伺隙而入以敗政矣。」又言:「陛下憫宿蠹未除,頹 事耳。 時庶事草創,有司以吏所省記爲法,吏並緣爲奸,一止曰:「法令具在,吏猶得舞文, 矧 秦檜請置修政局,一止言:「宜王內修政事,修其外攘之政而已。今之所修,特簿書獄 遷監察御史。上疏謂:「天下之治,衆君子成之而不足,一小人敗之而有餘,君子雖衆 如其不爲,俟天命自回,人事自正,敵國自屈,盜賊自平,有是哉?」高宗稱善, 踰年而書成。 請選近臣曉財

列傳

第

百三十

七

劉

止

一六七三

利者, 倣劉晏法 瀕江置司以制國用, 鄉村置義倉以備水旱, 增重監 司之選。」 後多採用

朝惟 張澂、李梲耳。」因極陳堂吏宦官之蠹,執政植私黨,無憂國心。 遷 起居郎。 奏事 , 帝迎語曰:「朕親擢也, 繇六察遷二史, 祖宗時有幾?」一止謝:「先 翌日器, 主管台州崇

道觀。 莫將賜出身除起居郎,一止奏:「將以上書助和議,驟自太府丞綴從班,前此未有,臣乃 召爲 **祠部郎、知<u>袁州,改</u>浙東路提點刑獄,爲秘書少監,復除起居郎,擢中書舍人兼侍**

與將

同命

,願倂臣罷之。」不報

却之? 爲罷之。 罪,天下 郡,無以示天下。」孟忠厚乞試郡,一止言:「后族業文如忠厚雖可爲郡,他日有援例者、何以 遷給事· ·共知,以郡守而例執 汪伯彥知宣州入覲,詔以元帥府舊人,特依見任執政給奉, 於凡 中。 貴近之請,雖小事亦論執不置。 徐偉達者,嘗事張邦昌爲郎,得知池州,一止言:「偉達旣仕僞廷,今付以 一致,殆與異時非待制而視待制,非兩府而 御 史中丞廖剛謂其僚曰:「臺當有言者,皆爲 視兩府者類矣。」帝皆 一止言:「伯彥誤國之

居瑣闥百餘日,繳奏不已,用事者始忌,奏:「一止同周葵薦呂廣問,迎合李光。」罷,提

劉君先矣。」

後八年,請老,復職,致仕。 舉江州太平觀。 進敷文閣待制。 秦檜死,召至國門,以病不能拜,力辭,進直學士,致仕。 御史中丞何若奏:「一止朋附光,偃蹇慢上。」落職,罷祠。 卒年八

止冲澹寡欲,嘗誨其子曰:「吾平生通塞,聽於自然,唯機械不生,故方寸自有樂地。」

詩自成家, 詞也,豈過情溢美、怒鄰駡坐之爲哉。」其草顏魯公孫特命官制甚偉,帝歎賞,爲手書之。 博學無不通,爲文不事纖刻,制誥坦明有體,書詔一日數十輒辦,嘗言:「訓誥者,賞善罰惡 呂本中、陳與義讀之曰:「語不自人間來也。」有類藁五十卷。子戀、嶅,從弟

運使,寧止再疏論駁。 忠義,退而具軍須以佐勤王。除左司郎官,辭。帝復位,除右司郎官、給事中。 改兩浙轉運判官。 寧止字無虞,登宣和進士甲科,除太學錄、校書郎。建炎初,爲浙西安撫大使司參議, 苗傅、劉正彥之變,寧止自毗陵馳詣京口、金陵,見呂頣浩、劉光世,勉以 梁揚祖爲發

功,直龍圖閣,進祕閣修撰,主管崇道觀,提點江、潍等路坑冶鑄錢,知鎭江府兼沿江安撫,進 以添差江、淮、荆湖制置發運副使扈從隆祐太后幸江西,尋爲兩浙轉運副使。 錄勤王

列傳第

百

Ξ

十七七

劉

止

胡交修

軍,以爲行府屬。除吏部侍郎,進徽猷閣直學士、知秀州,升顯謨閣,提舉太平觀,卒。 本司,庶防秋時沿江號令歸一,可以固守。」權戶部侍郎,總領三宣撫司錢糧。 右文殿修撰。 寧止言:「京口控扼大江,爲浙西門戶,請分常州、江陰軍及崑山 、常熟二縣隸 張浚 都督諸

清、||岑敏云。 勤王之舉,呂頤浩紀其有輸忠贊謀之勞。寧止與一止、岑皆羣從昆弟,帝嘗稱寧止忠、一止 石日錄,復賢良方正科,用司馬光十科薦士法,做唐制宰執論事以諫寫侍立,皆其顯顯者。 寧止有文名,慷慨喜論專。 有教忠堂類藁十卷。 當艱難時,上疏言闕失,指切隱微,多人所難言。 乞禁王安

中翟 政,除右文殿修撰、知湖州 政和六年,遷太常博士、都官郎,徙祠部,遷左司官,拜起居舍人、起居郎。 汝文同知貢舉,得其文曰:「非吾所能及也。」置之首選,除編類國朝會要所檢閱文字。 胡交修字已楙,常州晉陵人。登崇寧二年進士第,授泰州推官,試詞學兼茂科。 昭慈太后垂簾聽

詔守臣津發,尋進給事中、直學士院兼侍講。入對,首論天下大勢日:「淮南當吾膺,將士遇敵 建炎初,以中書舍人召,辭不至,改徽猷閣待制、提舉杭州洞霄宮。 三年,復以舍人召,

先奔,無藩籬之衞。-湖、廣帶吾脅,羣盜乘間竊發,有腹心之憂。
江、浙肇吾基,根本久未 秦、蜀張吾援,指臂不相救。宜詔二三大臣修政事,選將帥,蒐補卒乘,以張國勢,撫綏

納之,反其田里,無急征暴斂,啓其不肖之心,耕桑以時,各安其業,穀帛不可勝用,而財可 充牣,雄視一方。盜賊猶能爾,况以中興二百郡地,欲強兵以禦寇,不能爲翟興輩之所爲 豐,財豐則可以裕國矣。日者濯興連西路,董平據南楚,什伍其人,爲農爲兵,不數年,積粟 爲盜區,皆吾就稻之地。操弓矢,帶刀劍,椎牛發冢,白晝爲盜,皆吾南畝之民。陛下撫而 歸。其不變者,黨與攜落,亦爲吏士所係獲,而盜可弭,盜弭則可以保民矣。沃野千里,殘 陛下下寬大之詔,開其自新之路,禁苛慝之暴,豐其衣食之源,則悔悟者更相告語歡呼而 床有故絮,雖儀、秦說之不能使爲盜,惟其凍餓無聊,日與死迫,然後忍以其身棄之於盜賊。 疲瘵,以固國本。」 帝又出手詔,訪以弭盜保民、豐財裕國、強兵禦戎之要,交修疏言:「昔人謂甔有麥飯,

此將帥之責,何足以辱王師?」議遂格,盜尋遁。 李成盜江、淮,廷議欲親征,交修謂:「羣盜猖狂,天子自將,勝之則不武,不勝則貽天下

」世以爲名言

周杷守常州,坐殘虐免。 會大旱,帝問逐修致旱之由,對以殆梠佚罰之故,乃以梠屬

第

百三十

-Li

胡

交修

尋以徽

\ 猷閣待制提舉太平觀

遣大理寺丞胡蒙詣常按驗。 交修無所結,然羣從多抵

縣論 留獄 追逮 大辟 六年〔三〕,召爲給事中、刑部侍郎、翰林學士、知制誥兼侍讀。久之,遷刑部尚書。汀州 者尚六百人,交修言:「若待六百人俱至,則瘐死者衆矣,請以罪狀明白者論 十人,獄已上,知州事鄭強驗問,無一人當死,交修乞治縣令冒賞殺無辜罪 如律, 寧化

疑則

從輕。」詔皆如其言。

矣。」時議大舉,交修曰:「今妄言無行之徒,爲迎合可喜之論,吾無以考驗其實,遽信之以舉 捕 費,無鼓鑄之勞,一夫挾紙日作十數萬,眞贋莫辨,售之不疑,一觸憲網, 事:豈不誤國哉?」帝覽之矍然。 人皆附 禍及 朝論欲以四川交子行之諸路,交修力陳其害,謂:「崇寧大錢覆轍可鑒,當時大臣建議, 和,未幾錢分兩等,市有二價,姦民盜鑄,死徙相屬。 無辜。 歲月之後,公私之錢盡歸藏鎚之家,商賈不行,市井蕭條,比及悔悟,恐無及 翌日,出其奏示大臣曰:「交修眞一士之諤諤也。」 以今交子校之大錢, 破家壞產, 無銅炭之 以賞告

温 ·帥席益旣去,帝問交修孰可守蜀者,對以臣從子世將可用,遂以世將爲樞密直

四川安撫制置使。世將在蜀五年,號爲名帥。

Ĥ 重兵聚關外以守蜀,餉道險遠。漕舟自嘉陵江而上,春夏漲而多覆,秋冬涸而多膠。

後、九月以前,第存守關正兵,餘悉就糧他州,如此則守關者水運可給,分戍者陸運可**免。**」 紹興初,宣撫副使吳玠始行陸運,調成都、潼川、利州三路夫十萬,縣官部送,徽賞爭先,十 斃三四。 至是交修言:「養兵所以保圖也,民不堪命則腹心先潰,何以保圖?臣愚欲三月以

帝命學士院述一交修意,韶)好行之。

議徽宗配享功臣,交修奏:「韓忠彥建中靖國初爲相,賢譽翕然,時號『小元祐』。」從之,

人大允服。

學士、知合州。却私請,免上供以萬計,領州數月卒。 待西北之士;別爲號於南宮,以收五路之才。」詔令禮部討論。 翰林學士兼侍講。時河南新復,交修奏:「京西、陝右取士之法,乞如祖宗時設諸科之目,以 以便養。帝曰:「卿去,行復召矣。」改提舉江州太平興國宮。九年六月召還,除兵部尙書、 八年夏,以親老,除實文閣學士、知信州。入辭,上欲留侍經筵,力言母老,願奉祠里中 逾年,復請補外,除端明殿

從父宗愈至交修、世將,皆在禁林。中興以後,學士三入者自交修始。交修裒次爲書,號四 世絲綸集,以侈一門之遇。 |交修簡重寡言,進止有度,爲文不事琢雕,坦然明白,在詞苑號爲稱職。自其從祖宿、 至於事繼母以孝聞,撫二弟極其友愛,遇恩以次補官,若交修

者, 其文行之兼副者歟!

胡交修

秦崇

綦崇禮字叔厚,高密人,後徙繼之北海(E)。祖及父皆中明經進士科。 崇禮幼穎邁,十

歲能作邑人墓銘,父見大鷲曰:「吾家積善之報,其在茲乎!」

中書舍人,賜三品服,進用之速,近世所未有,高宗猶以爲得之晚。 部員外郎,尋爲起居郎、攝給事中。召試政事堂,爲制誥三篇,不淹晷而就,辭翰奇偉。 稱其工。登重和元年上舍第,調溫縣主簿,爲太學正,遷博士,改宣教郎、祕書省正字,除工 初入太學,諸生溺於王氏新說,少能詞藝者。 徽宗幸太學,崇禮出二表,祭酒與同列大 拜

內外按堵如故。 強,號難治,屬有互寇起建州,聲撼鄰境,人心動搖,崇禮牧民禦衆,一如常日,訖盜息,環城 試尙書吏部侍郎,時從官惟崇禮與汪藻,尋兼直學士院。以徽猷閣直學士知漳州,其俗悍 色,志士傾心。」又曰:「英爽不忘,想生氣之猶在;姦諛已死,知朽骨之尚寒。」同列推重,除 「處心不欺,養氣至大。言期寤意,引裾嘗犯於雷霆,計不顧身,去國再遷於嶺徼。 車駕如平江,有旨鄒浩追復龍圖閣待制,崇禮當行詞,推帝所以褒恤遺直之意,有曰: **奉臣動**

徙知明州,召爲吏部侍郎兼權直學士院。時有詔侍從官日輪一員,具前代及本朝事關

安,以浙西爲根本,宜固江、准之守,然後可以圖興復。圖在萬里外,當召用其士夫,慰安遠 非舊典,且又越職,望令講讀官三五日一進。」乃命學士與兩省官如前詔。 治體者一二事進入,崇禮言:「祖宗以來選用儒臣,以奉講讀。 人之心。」時兵革後,省曹簿書殘毁幾盡,崇禮再執銓法,熟於典故,討論沿革,援據該審,吏 若令從官一例獻其所聞,既 又言:「駐蹕臨

不得容其私。後有詔重刊七司條敕,崇禮所建明,悉著爲令。

譽。二者有關於風俗甚大,是不可不察也。」 亂,惟一己之毀譽足恤。 然效力於國,其實甚難,世未必貴;竊名於己,其爲則易,且以得 名之美在身。忠於國者,不計一己之毀譽,惟天下之治亂是憂,潔其身者,不顧天下之治 傳金人倂兵趣川、陝,蓋以向來江左用兵非敵之便,故二三歲來悉力窺蜀。 其意以謂圖若 不守,江、浙自搖,故必圖之,非特報前日吳玠一敗而已。今日利害,在獨兵之勝負。」又奏: 「君之有臣,所以濟治。臣効實用,則君享其功;臣竊虛名,則君受其弊。實用之利在國,虛 移兵部侍郎,仍進直學士院。御筆處分召至都堂,令條具進討固守利害。 崇禮奏:「諜

熙寧間,富弼以元勳始令特帶節鉞致仕、其後繼者曾公亮、文彥博,他人豈可援以爲例。」詔 仕,告由舍人院出,崇禮言:「祖宗時,凡節鉞臣僚得謝,不以文武,並納節別除一官致仕。 九月,御筆除翰林學士,自靖康後,從官以御筆除拜自此始。楊惟忠、邢煥以節度使致

列傳第

百三十七

蒸炭禮

ーー六八二

自今如祖宗故典。

宗實錄,崇寧間蔡京提舉編修,增飾語言,變亂是非,難以便據舊錄修定,欲乞訪求故臣之 家文獻事迹參照。」又奏:「知湖州汪藻編類元符庚辰至建炎已酉三十年事迹, 成文字赴本所。」並從之。先是,漢奉詔訪求甚備,未及修纂,崇禮取而專之。 「神宗實錄墨本,元祐所修已是成書,朱本出蔡卞手,多所附會,乞將朱墨本參照修定。」哲]兼侍讀兼史館修撰。時有旨重修神宗、哲宗正史。兵火之後,典籍散亡,崇禮奏:

意明,不私美,不寄怨,深得代言之體。 守令姓名詳列于屏,簡在帝心,則人知盡心職業。」再入翰林凡五年,所撰詔命數百篇,文簡 里之境得一良令,則百里之民說。牧民之吏咸得其良,則治功成矣。苟能劾當時之事,以 嘗進唐太宗錄刺史姓名於屛風故事,曰:「連千里之封得一良守,則千里之民安, 環百

帝還,七州晏然不知羽檄之遽。期年,上印綬,退居合州。卒年六十,贈左朝議大夫。 |醴以近臣承寧方面,謂:「浙東一道爲行都肘腋之地,備禦不可不謹。」密疏於朝,得便宜從 事。於是繕城郭,厲甲兵,輸錢帛以犒王師,簡舟艦以扼海道,疚心夙夜,殆廢食寢。及春, 以寶文閣直學士知紹興府。劉豫導金人入侵,揚、楚震擾,高宗躬御戎衣次吳會。崇

崇禮妙齡秀發,聰敏絕人,不爲崖岸斬絕之行。廉儉寡欲,獨覃心辭章,洞曉音律,酒

所得恩澤,其家畏懼不敢陳,士大夫亦無敢爲其任保。 **酣氣**振,長歌慷慨,議論風生,亦一時之英也。 之。及再相,矯詔下台州就崇禮家索其藁,自於帝前納之,且將修怨。 要,極潤色論思之選。 旦當書命之任,明白洞達,雖武夫遠人曉然知上意所在云。 端方亮直,不憚強禦,秦檜罷政,崇禮草詞顯著其惡無所隱,檜深憾 中年頓剉場屋,晚方登第,以縣主簿驟升華 樓鑰嘗敍其文,以爲氣格渾然天成, 會崇禮已沒,故身後

關失,雖或好惡多不同,亦皆一時之表表者。 又有助於治化者焉。 論曰:建炎、紹興之際,網羅俊彥,布于庶職,如衞膚敏以下七人者,其論議時政,指陳 矧一止、寧止兄弟之忠淸,交修、崇禮之詞翰,

校勘記

(1) 升陽宮 卷五 一篇層敏條、繫年要錄卷一一改。 原作「昇陽宮」,據汪藻浮溪集卷二五衞膚敏墓誌銘、 李幼武四朝名臣言行錄別集下

= 晦 列 欲 傳 斬邦 第 百三十 此下原衍「策」字,據上文及繫年要錄卷三〇刪。 七 校 勘 記

(三) 六年 承上文,當指建炎六年,但建炎無六年。據繫年要錄卷六九、七七、八五、九五、一〇〇及

宋中興學士院題名錄,下文胡交修歷任各職分別在紹興三年、四年、五年、六年,此處紀年有

脫誤。下文「八年」應爲「紹興八年」。

(四)後徒維之北海

「濰」原作「維」,據本書卷八五地理志、元豐九城志卷一改。

宋史卷三百七十九

列傳第一百三十八

韓公裔

章誼

韓肖胄

陳公輔

張觷

胡松年

曹勛

李稙

杭州通判。 |章誼字宜叟, 建州浦城人。 建炎初,陳通寇錢塘,城閉,部使者檄誼聚杭州七縣弓兵,以張聲勢。 登崇寧四年進士第,補懷州司法參軍,歷潭、台二州教授、 會王淵討

賊,誼隨淵得入城,賊平,旋加撫定,人皆德之。

息。 事 何 若將鼓亂邪? 帝幸臨安,苗、劉爲變,帝御樓,宰臣百執事咸在,人心恟恟。 奉使二浙, 貿易祠牒以濟軍用,以稽遲罷。 」希孟却立屏息,帝嘉之。 事定,竄希孟吉陽軍,誼遷二秩,擢倉部員外 未幾,召爲駕部員外郎,遷殿中侍 帝問羣臣曰:「今日之 御史。

列傳第

百

三十八

章

誼

張浚宣撫陝西, 誼奏:「自趙哲退敗, 事任已重, 處斷太專, 當除副貳, 使之自助。」何樂

贈官,誼論其「折衝無謀,守禦無策,乃中國招禍之首」。乞寢免。

用命哉!」 以一戰。斥候不明,金人奄至,踰江而東,此宰相黃潛善、汪伯彥過也。前年,移蹕建康,兵 謂:「金人累歲南侵,我亦累歲奔走,蓋謀國之臣誤陛下,也。 比者駐蹕揚州,有兵數十萬,可 有糧賦,必漕運轉輸,不可爲盜賊侵據之用。四者各付能臣,分路以辦,重賞嚴罰,誰敢不 概戰守之具; 有險阻,必資郡縣防守之力; 有兵將,必駕馭撫循,不可爲將帥自衞之資; 也。 練將勇,據長江之險,可守矣。舟師不設,二相異意,金人未至,瓊海而南,此宰相呂頤浩過 大爲陣脚,次爲戰船,小爲傳令,皆可爲戰守之備。」詔<u>淮南三宣撫措置</u>。 不知今年守戰之策安所從出。執政大臣誰爲陛下任此事者。臣愚謂有江海, 邵青自太平乘舟抵平江,所至釼掠。 **誼請置水軍於駐蹕之地,且言:「古舟師有三等, 誼又獻戰守四策**, 必資舟

之更,則盜可弭;敵寇未遏,以未得折衝禦侮之臣;財賦未裕,以未得掌財心計之臣。

詔集議明堂配享,胡直儒(1)等請合祭天地,而以太祖、太宗配。 誼言:「稽之經旨則未

此四者,任人不任法,則政治可得而治矣。」

詔。 宜配帝於明堂,以比周之文王。仁宗皇祐二年,始行明堂合祭天地,並配祖宗,乃一時變 合,參之典故則未盡,施之事帝則未爲簡嚴。今國家旣以太祖配天於郊,比周之后稷,則太宗 至嘉祐七年,再行宗祀,已悟皇祐之非,乃罷配享,仍徹地亓之位,故有去並侑煩文之 如嘉祐之詔,則太祖地亓已不與祭,元豐正祀典之詔,則悉罷羣祀。 臣等謂將來明堂

降指揮,自成一書。如此則銓曹有可守之法,姦更無舞文之弊,書成而吏銓有所執守矣。」 令補外。」專除權吏部侍郎,乞··「詔有司編類四選通知之條,與一司專用之法,兼以前後續 紹興二年,除大理卿。宰相奏知平江府,帝曰:「誼儒者,賴其奏讞平恕,使民不冤,勿

太饗,宜專祀昊天上帝,而以太宗配。」後不果行。

聽惑而不孚,欲因事申明,則法屢變而難守。乞詔監司、郡守與承用官司,參考祖宗舊典, 其綱條之舉,則仍於舊貫。今在有司,爲日旣久,州縣推行,漸見牴牾。欲承疑遵用,則衆 各摭新哲之闕遺,條具以聞,然後命官審訂删去,著爲定法。」

改刑部侍郎兼詳定一司敕令, 證奏: 「比修紹興敕令格式, 其忠厚之意, 則本於祖宗,

市井之人,殿班親軍,倚以侍衞者,曾無千百。願陛下酌漢、唐南北禁衞之意,修本朝遴選 祖宗所置殿班親軍,處禁門之內,皆極天下之選。今日神武兵萃於五軍,多逃亡之餘, 遷徽猷閣直學士、樞密都承旨,誼奏:「漢有南北兩屯,唐有南北兩衞,皆天子自將之

列

班直之法, 選五軍及諸州各爲一衞,合取萬人,分爲兩衞,則禁衞增嚴,王室大競矣。」

時議難之,欲遣大臣爲報使。 實告,乃還。至南京,劉豫留之,以計得歸。帝嘉勞之,擢刑部尙書。 里銜命,兼迎兩宮,必俟得請。」金人乃令蕭慶授書,倂以風聞事實誼,諡詰其所自,金人以 通問使,給事中孫近副之。置至雲中,與點罕、兀室論事,不少屈。 四年, 金遣李永壽、王翊來,求還劉豫之俘,及西北人在東南者,又欲畫江以益 ' 參政席益以母老辭,薦誼爲代,加誼龍 金人諭 圖閣學士,充軍前奉表 **亟**還,誼 日:「萬 劉豫。

內則 討論 提舉則右曹之屬也。 補 助之法,戶部仰以不乏者也。今川、廣、荆湖土貢歲輸,不入王府者累年矣,皆發運使失職 發運置司之地, 也。 戶部,外則諸路轉運使、副,東南麥輸最盛,則又置發運,以督諸路供輸之入,皆有移用 是多,帝親征,王師大捷於淮陰,誼扈從。還臨安,遷戶部尚書,誼言:「祖宗設官理財, 頃因定都汴京,故發運使置司眞、泗,今駐吳會,則發運當在荆湖南、北之間。 選能臣以充其任。」又言:「戶部左右曹之設,諸路運司則左曹之屬也, 若復發運司,於諸路各置轉運使副二員,以一員檢察常平,以應右曹

場增直以糴,米商輻輳,其價自平。部使者以狀聞,詔遷官一等。六年,移守下江。時將臨 五 年,以 疾 請 郡,除龍圖閣學士、知温州。 適歲大旱,米斗千錢,誼用劉晏招商之法,置 之選,則戶

部

財用

無陷失矣。」

幸,供億繁夥,誼處之皆當於理。 召對,賜帶笏,帝曰:「此不足以償卿之勞,其勿謝。」

多,朝廷必欲家給牛種、人給錢糧以勸耕,則財力不足。今三大將各屯一路,如各捐數縣地 明年,移蹕建康,復爲戶部尙書。

七年,帝還臨安,以誼爲端明殿學士、江南東路安撫大使、 知建康府兼行宮留守。 未

均給將士,收其餘以省轉輸,非小補也。」

幾,提舉亳州明道宮,代還。八年卒,年六十一,諡忠恪。

老,股當自諭之。」誼聞命, 論歸之。立朝論事,奏疏無慮數十百篇,皆經國濟時之策。初,席益薦誼使金,帝曰:「誼亦母 歸,大似往年太學謁告時爾。」及還, | 誼寬厚長者,故事臺官言事,非挾怨以快己私,即用仇家言爲人報復, | 誼獨存大體,士 略無難色,戒其家人勿使母知。 母竟不知其使金也。 將行,告母曰:「是行不數月卽

駒、駟、驒、麻、駉、馳、駰。

歷開封 韓肖胄字似夫,相州安陽人。 府司錄。 與府尹同對殿中,徽宗問其家世,賜同上舍出身,除衞尉少卿,賜三品服。 曾祖琦,祖忠彦,再世爲相。父治。 **肖胄以蔭補承務郎**,

列傳第

尋假給 事中、充賀遼國生辰使。旣還,時治守相州,請祠。 **肖胄因乞補外侍疾**,詔除

直 相四年,王師傅燕,肖胄策幽薊且有變,宜陰爲守備。 秘閣、知相州,代其父任。 陛辭,帝曰:「先帝詔韓氏世官于相,卿父子相代,榮事也。」在 已而金騎入境,野無所掠而 去。

屏蔽 於江淮。 建炎二年,知江州,入爲祠部郎,遷左司。 嘗言:「中原未復,所恃長江之險,淮南實爲 沃野千里,近多荒廢,若廣修農事,則轉餉可省,兵食可足。」自是置局建康,行屯田 又應詔陳五事,曰:遠斥堠, 戢戍兵, 防海道, 援中原, 修軍政。 擢工部侍郎。

戰守計, 肖胄條奏千餘言, 帝稱其所對事理簡當。 吏部尚書席益歎曰:「援古證今,切於時 時川、陝馬綱路通塞不常,肖胄請於廣西邕州置司,互市諸蕃馬,詔行之。 時召侍從問

用,非世官不能也。」

漕司 外,迫以軍期,吏緣爲姦,斂取百端。復爲寇所迫逐,田桑失時,寇去復業,未及息肩,催科 軍覈實之法,重將帥冒請之罪,則兵數得實,餉給不虛,省費裕國,此其大者。生民常賦之 能悉,失一窠名,則此項遂亡。願詔諸路漕司、括州縣出納,可罷罷之,可倂倂之,立爲定籍。 司,今戶部惟有上供之目而已。問諸路窠名於戶部,戶部不能悉,問諸州窠名於漕司,漕司不 總諧州,戶部總諸路,則無失陷矣。經費之大,莫過養兵。今人亡而冒請者衆,願立諸 紹興二年,詔百官各言省費裕國、強兵息民之策,肖胄言:「天下財賦窠名,舊悉隸三

最,強兵息民,此其先者。」時多所采納。 之吏已呼其門矣。 願詔郡邑,招集流散,官貸之種,俟及三年,始責其賦,置籍書之,以課殿 又請復天地、日月、星辰、社稷之祀,於是下有司定

一歲祭禮

請陣亡惟許本家用恩例,異姓候經任收使,遂無不均,且嚴六部出入之禁,而請託不行。 文之弊始革。 遷東部侍郎,時條例散失,東因爲姦,肖胄立重賞,俾各省記,編爲條目,以次行之,舞 陣亡補官,得占射差遣,而在部常調人,守待不能注授,且有短使重難。 肖胄

世受國恩,當受命卽行,勿以我老爲念。」帝稱爲賢母,封榮國夫人。 或半年不返命,必復有謀,宜速進兵,不可因臣等在彼而緩之也。」將行,母文語之曰:「汝家 致和戰未有定論。然和乃權時之宜,他日國家安彊,軍聲大振,誓當雪此讎恥。今臣等行, |金會||粘罕專執政,方恃兵強,持和戰離合之策,行人皆危之。 | 肖胄入奏曰:「大臣各循己見, 三年,拜端明殿學士、同簽書樞密院事,充通問使,以胡松年副之,肖胄慨然受命。時

至是始遣人偕來。肖胄先北使入對,與朱勝非議不合,力求去,以舊職知温州,提舉臨安府

五年,詔問前宰執戰守方略,肖胄言:「女眞等軍皆畏服西兵勁銳善戰(三),今三帥所統 列 傳 第 百三十八 韓 胄 一一六九一

洞霄宫。

常州, 爲農者十之五六,擇其非甚精銳者,使之力耕,農隙則試所習之技藝,秋成則均以所種 糧,捐其賦租,必將接跡而至。」又奏:「江之南岸, 曠土甚多,沿江大將各分地而屯,軍 先命總帥,分以精銳,自成一軍,號令旣一, 移二將於江北,使藩籬可固。」又言:「諸大將之兵,自主庭戶,更相讎疾。 千里,不若擇文武臣僚按行計度,求險阻之地,屯兵積糧,則形勢相接。 多西人, 人入骨,當以安集流亡,招懷歸附爲先,今淮南、江東西荒田至多,若招境上之人,授田給 撫使,然將屯置司,乃在江上,所遣偏裨分守,不過資以輕兵,勢孤力弱,難以責其固志。當 或募江北流徒及江南無業願遷之人分給之,創爲營屯。 召赴行在,提舉萬壽觀,尋除簽書樞密院事 吳玠繼有捷奏,軍聲益振,敵意必搖,攻戰之利,臣固知之。自開、寢至江、淮,綿亘數 則諸將疇敢不聽命。畿甸、山東、關河之民怨金 止則固守, 今淮東、西雖命宣 出則攻討。」 若欲並遣進攻,宜 之禾 起知

語塞。 和議已定,復命肖胄爲報謝使。 既至,金遣人就館議事,肖胄隨問隨答,衆皆聳聽。 接伴者逆於境, 謂當稱謝恩使。 其還,給氈車及頓遞宴設,自 肖胄論難三四反,遂

不食、所得恩澤、皆先給宗族。卒,年七十六,盜元穆。 除資政殿學士、知紹興府。尋奉祠,與其弟膺胄寓居于越幾十年。 事母以孝聞,弟不至 肖胄始

者奴事之,公輔絕不與交。 累遷權應天府少尹,除秘書郎 陳公輔字國佐,台州臨海人。 。 | 動有兄喪,諸生欲往弔,公輔不予告。 | 勔不悅,諷權要移公輔越 政和三年,上舍及第,調平江府教授。 朱勔方嬖倖,當官

以聖訓,俾務一心以安國家。」 時吳敏、李綱不協,公輔奏:「陛下初臨萬機,正賴其同心合謀,而二臣不和,已有其跡,願諭 權倖、慷慨論事者,列之臺諫,則所任得人,禮義廉恥稍稍振起,敵國聞之,豈不畏服哉! 者,處臺諫之任,臣知其决不能言宰相大臣之過。願擇人臣中朴茂純直,能安貧守節、不附 |驥爲太宰||李邦彥引用,謝克家、孫覿爲纂修蔡攸引用,及邦彥作相,又附麗以進。 此四 端康初,二府多宣和舊人,公輔言:「<u>蔡京、王黼用事二十餘年,臺諫皆緣以進,唐重、師</u> 人

國,終未行遣。 徽宗 孟夏享景靈宮, 渡江未還,人情疑懼,公輔力陳父子之義,宜遣大臣迎奉。 今朝 廷公卿百執事半出其門,必有庇之者。」詔謫京崇信軍節度副使,德安 **遂幸陽德、佑神觀。** 公輔諫不當如平時事宴游,論:「蔡京父子懷奸誤 欽宗嘉之, 擢爲右司

列傳

第

百三

+

八

陳公輔

府安置。 又奏:朱勔罪惡,都城之民皆謂已族滅其家,乞勿許其子姓隨上皇入京。」

監合州稅 方復祖宗法度,馮澥不宜更論熙寧、元豐之政。語觸時宰,遂與應求、程稱、李光俱得罪,斥 書生,不知軍旅,遣援太原,乃爲大臣所陷,必敗事。其二言余應求不當以言遠謫。其三言 時有指公輔爲字綱之黨,鼓唱士庶伏闕者。公輔自列,因辭位,後陳三事:其一言李綱

高宗卽位,召還,除尙書左司員外郎。 明年,始達維揚。 初,李綱得政,公輔自外除郎,

未至而綱罷,改南劍州,尋予宮觀。

以存身。』使公卿大夫皆師安石之言,宜其無氣節忠義也。」復授左司諫,言:「中興之治在 合於孔子無可無不可之義。』五季之亂,馮道事四姓八君,安石乃曰:『道在五代時最善避難 者不讀史、漢。王莽之篡,楊雄不能死,又仕之,更爲劇秦美新之文。安石乃曰:『雄之仕, 使學者不治療談; , , , , , 漢載成敗安危、, 存亡理亂,, 爲聖君賢相、忠臣義士之龜鑑, 安石使學 心,三經、字說詆誣聖人,破碎大道,非一端也。春秋正名分,定褒貶,俾亂臣賊子懼,安石 石政事雖不善,學術尚可取。臣謂安石學術之不善,尤甚於政事,政事害人才,學術害人 天下國家,平時旣無忠言直道,緩急詎肯伏節死義,豈非王安石學術壞之邪?議者尙謂安 紹興六年,召爲吏部員外郎。 疏言:「今日之禍,實由公卿大夫無氣節忠義,不能維持

得天得人,以孝感天,以誠得民。」帝喜其深得諫臣體,賜三品服,令尙書省寫圖進入,以便

掎角之形。 公輔上疏陳攻守之策,且乞選大臣鎮淮西,增兵將守要害,使西連雳、岳,東接楚、泗,皆有 對官,令審計、官告、糧料、権貨、監倉及茶場等官,有已見,許面對。 公輔感帝知遇,益罄忠鯁,言:「正心在務學,治國在用人,朝廷之禍在朋黨。」仍乞增輪 時有詔將駐蹕 一建康,

配,宜罷臨軒策士。又乞權罷講筵,事不行。 徽宗計至,公輔請宮中行三年之喪,視朝服淡黃,羣臣未可純吉服,明堂未當以徽宗

提舉江州太平觀,尋知處州。升徽猷閣待制,乃提舉太平觀。 文集二十卷、奏議十二卷,行於世。 遷尙書禮部侍郎。會趙鼎言進退人才乃其職分,疏稍侵公輔,因力請祠。除集英殿修撰、 公輔論事剴切,疾惡如讎,惟不右程頤之學,士論惜之。 ' 卒,年六十六,贈太中大夫。有

張覺字柔直,福州人。舉進士,爲小官,不與世詭隨。時察京當國,求善訓子弟者,覺

列

教令讀書徐行,未聞敎以走也。」譽曰:「天下被而翁破壞至此,且夕賊來,先至而家,汝曹惟 度凝然,異於他師,諸生已不能堪,忽謂之曰:「汝曹曾學走乎?」諸生駭而問曰:「嘗聞先生 也。」卽見層深語,層慷慨言曰:「宗廟社稷,危在旦夕。」「原斂容問計,層曰:「宜亟引耆德老 楊時薦,於是召時 成置諸左右,以開道上心。羅天下忠義之士,分布內外,爲第一義爾。」原因扣其所知,遂以 有善走,庶可逃死爾。」諸子大驚,亟以所聞告京,曰:「先生心恙。」 京矍然曰:「此非汝所知

也。」士安得之大喜,遂馳報諸司,謂已斬徹。未幾,徹二子果引衆聲言復父讎,編素來攻。 走。 遣第三隊人往代,第四至五六隊亦如之。更迭交戰,士卒飽而力不乏。 統制官任士安駐軍城西,不肯力戰,觷獨率州兵與之戰,分爲數隊,令城中殺羊牛豕作肉 於是士安與州兵夾攻,大敗之,城賴以全。 串,仍多具飯。 **屠後守南劍州,遷福建路轉運判官。** 將戰,則食第一隊人,旣飽,遣之入陣,便食第二隊人,度所遣兵力將困 未行,會范汝爲陷建州,遣葉徹摊衆寇南劍。 徹中流矢死,衆敗 一, 卽

又有欲築紹興園神廟垣,召匠計之,云費八萬緡,屬教之自築一丈長,約算之可直二萬,即 再知處州,嘗欲造大舟,幕僚不能計其直,屠敎以造一小舟,量其尺寸,而十倍算之。

以二萬與匠者。 董役內官無所得,乃奏紹興空乏難濟,太后遂自出錢,費三十二萬緡。以

後廟食邵武。

直龍圖閣知虔州〔三〕,蕩平餘寇,進秘閣脩撰,卒。

胡松年字茂老,海州懷仁人。幼孤貧,母粥機織,資給使學,讀書過目不忘,尤邃於易。

讀。爲殿試參詳官,以沈晦第一,徽宗大悅曰:「朕久聞晦名,今乃得之。」遷中書舍人。 政和二年,上舍釋褐,補維州教授。八年,賜對便殿,徽宗偉其狀貌,改校書郎兼資善堂贊

密奏中原利害,召赴行在,出知平江府。未入境,貪吏解印斂跡,以興利除害十七事揭于都 市,百姓便之。 時方有事燕雲,松年累章謂邊釁一開,有不勝言者。咈時相意,提舉太平觀。建炎間, 加徽猷閣待制。奏防江利害:一日立國無藩籬之固,二日遣將無首尾之援,

備。 還朝,力稱其抗義守正,遂被褒贈,已大咈士論。今恪子琢自陳其父不獲伸迎請二帝之謀, 唐恪追復觀文殿學士,松年缴奏曰:「靖康之禍,何奧輕脫寡謀,宜爲罪首。去年秦檜 召爲中書舍人。言武昌、九江、建昌、京口、吳江、錢塘、明、越宜各屯水戰士三千以爲 宜詔有司詳考實狀,庶不爲虛美,以示激勸。」

三日不攻敵技之所短。

飮藥而死。此事凛然,追蹤古人。

願 陛下親出勞軍,即行伍蒐簡之,必有可爲時用者。」又奏:「恢復中原,必自山東始,山東歸 除 給 事 中。 會選將帥,松年奏:「富貴者易爲善,貧賤者難爲功,在上之人識擢何如爾。

通問 |松年日:「聖主萬壽。」豫日:「聖意何在?」|松年日:「主上之意, 必復故疆而後已。」 使還, 拜 使。 尚書 王倫使金還,言金人欲再遣重臣來計議,以松年試工部尚書爲韓肖胄副,充大金奉表 時使命久不通,人皆疑懼,松年毅然而往。 至汴京, 劉豫令以臣禮見,肖胄未答,

欲歸之民心,三日震疊強敵,使不敢窺江、浙,四日牽制劉豫不暇營襄、漢。 問,其情叵測,當飭將士謹疆埸可也。」又條戰艦四利:一曰張朝廷深入之軍勢,二曰固山東 岳 飛收復襄、漢,令松年籌度守禦事。 松年奏:「乞飛班師,徐窺劉豫意向,若豫 置不

實效。 勢,馭將帥使知畏,撫士卒使知勸,收予奪之柄,祭毀譽之言,無以小疵棄人才,無以虛文廢 乞令統率軍馬別爲任使,庶幾外閩漸多名將,不獨仗倚三四人而已。」 除端明殿學士、簽書樞密院事。首奏八事:立規摹以定中興之基,振紀綱以尊朝廷之 又薦張敵萬:「向在淮南誘敵深入,步騎四集,悉陷於淖,無得解者,金人至今膽落。

諜報劉豫於登、萊、海、密具舟楫,准陽、順昌積芻栗,欲憑藉金人侵我邊鄙。 議者謂

韓、 家渡,以張兩軍之勢,仍以兵五千屯明州、平江,控禦江海。或無人可遣,臣願疾馳以赴其 政事,專治戰艦,張浚專治軍器。 松年曰:「議論旣定,力行乃有效,若今日行,明日止,徒紛 急。」詔遣松年往江上,與諸將會議進討,因覘賊情。 蘇、秀、明、越 (B) 最爲要衝,乞選精兵萬人,命一大臣往駐建康,親督世忠、光世守采石、馬 劉、岳各當一面,可保無虞。松年奏:「三人聲勢初不相屬,緩急必不相救。况海道闊遠, 帝决意親征,遂次平江,命松年權參 知

也。 納。 年六十。 俄以疾提舉洞霄宮,卜居陽羨,雖居閒不忘朝廷事,屢言和糴科斂、防秋利害,帝皆嘉 六年,病革,呼其子曰:「大化推移,有所不免。」乃就枕,鼻息如雷,有頃卒,人謂不死

紛無益。」

多財,則損其志,况俸廩,主上所以養老臣也。」自持囊至執政,所舉自代,皆一時聞人,所薦 「弗請則已,白之是沽名也。」喜賓客,奉入不足以供費,或請節用爲子孫計。 松年平生不喜蓄財,每除官例賜金帛,以軍興費廣, 無所陳請, 或勸其白于朝,日: 松年日:「賢而

松年獨鄙之,至死不通一書,世以此高之。 方秦檜秉政,天下識與不識,率以疑忌置之死地, 故士大夫無不曲意阿附爲自安計。

以至公,權勢莫能奪。

列傳第

一百三十

八

胡松年

曹助

1 1 七00

曹勛字公顯,陽翟人。父組,宣和中,以閤門宣贊舍人爲睿思殿應制,以占對開敏得

勛用恩補承信郎,特命赴進士廷試,賜甲科,爲武吏如故。

賢妃、邢夫人信,命勛間行詣王。又諭勛:「見康王第言有清中原之策,悉舉行之,毋以我爲 念。」又言「藝祖有誓約藏之太廟,不殺大臣及言事官,違者不祥」。 曰:「不知中原之民推戴康王否?」翌日,出御衣書領中曰:「可便卽眞,來救父母。」幷持韋 靖康初,爲閤門宣贊舍人、勾當龍德宮,除武義大夫。從徽宗北遷,過河十餘日, 謂勛

五年, 募死 |土航海入||金國|東京,奉||徽宗由海道歸,執政難之,出||勋于外,凡九年不得遷秩。 勛自燕山遁歸。建炎元年七月,至南京,以御衣所書進入。高宗泣以示輔臣。 除江西兵馬副都監,勛以遠次爲請,改浙東,言者論其不閑武藝,專事請求,竟奪 勛建議 紹

未幾,落階官爲容州觀察使,充金國報謝副使,召入內殿,帝洒泣,渝以懇請親族之意。及 尊官右職持節而來,蓋欲亟 十一年,兀朮遣使議和,授勛成州團練使,副劉光遠報之。及淮,遇兀朮,遣還,言當遣 和也。 勛還,遷忠州防禦使。 金使蕭毅等來, 命勛爲接件使。

新命

見金主,正使何鑄伏地不能言,勛反覆開論,金主首肯許還梓宮及太后。 勛歸,金遣高居安

等衞送太后至臨安,命勛充接伴使。 遷保信軍承宣使、樞密副都承旨。

鄰國恭順,和好無他,人譏其妄。 二十九年,拜昭信軍節度使,副王綸至為稱謝使。 孝宗朝加太尉、提舉皇城司、開府儀同三司。 時金主亮已定侵准計, 勛與綸還, 淳熙元年

卒,贈少保。

李稙字元直,泗州臨淮人。幼明敏篤學,兩舉于鄉。從父中行客蘇軾門,太史晁無咎

見之曰:「此國士也。」以女妻焉。

| 靖康初,高宗以康王開大元帥府。

湖南向子諲轉運京畿,時羣盜四起,餉道阨絕,環視

軍餉而已。」承制授承直郎,留之幕府。 而至,士氣十倍,首加勞問。腫占對詳敏,高宗大悅,親賜之食,曰:「得一士如獲拱璧,豈特 忠義二萬餘衆,自准入徐趨濟,凡十餘戰,卒以計達。時高宗駐師與野,聞東南一布衣統衆 左右無足遣者。有以腫薦,遂借補迪功郎,使督四百艘,總押犒師銀百萬、糧百萬石,招募

植三上表勸進"「願蚤正大寶,以定人心,以應天意。」三降手札獎諭。 植感激知遇,

列傳

無不盡,爲汪伯彥、黃潛善所忌。 高宗旣卽位,爲東南發運司幹辦公事,尋以奉議郞知潭州

湘陰。 縣經楊么蕩析,植披荆棘,立縣治,發廩粟,振困乏,專以撫摩爲急

戰 艦,習水戰,分軍馬爲左右翼,大破彥舟伏兵,誅馬友,二盜平。後以破賊功上於朝,轉朝 丞相張浚督師江上,知稙才,薦爲朝奉郎、鄂州 通判。 大盜馬友、孔彥舟未平,随請修

奉大夫、通判荆南府。秩滿,除尙書戶部員外郎。

時秦檜當國 凡 , 帥府舊僚率皆屛黜, 浚亦去國。 随即丐祠奉親,寓居長沙之醴陵

九年,杜門不仕。

曰:「朕故人也。」方有意大用,以母老,每辭,願便養,除知 檜 死, 子諲以戶部尚書居邇列,語及龍飛舊事,識随姓名,除戶部郎中。 推陽軍。丁母憂,歸葬,哀毀廬墓, 植始入見,帝

有白鷺朱草之祥。 服闋,參政錢端禮薦差知瓊州。 劉錡遺之書曰:「忠臣孝子,元直兼之矣。」 **陛辭,帝慨然曰:「卿老矣,瓊管遠在海外。」**改 知徽州。

|徽俗崇尚淫祠、種首以息邪說、正人心爲事,民俗爲變。 轉朝請大夫、直秘閣,改知鎭江

遷江、淮、荆洲都大提點坑冶鑄錢公事。

随措畫有方,廷議倚重。 踰年,金人敗盟,朝廷將大舉,以稙漕運有才略,授直數文閣、京西河北路計度轉運使。 乾道元年,遷提刑江西。 二年,直寶文閣、江南東路轉運使兼知建

胰軍府兼本路安撫使,主管行宮留守司事。

直指事宜,不爲浮泛。 選強壯,以重軍勢,度地險阨,以保居民,避敵所長,擊其所短; 植 上書極言防江十策,其略曰:「保荆、襄之障,以固本根;審中軍所處,以俟大舉; 疏上,帝嘉其言,以太府卿召赴闞,有疾不克上道,遂以中奉大夫、 ·金人降者宜加賞勸。」皆 蒐

寶文閣學士致仕,還湘。

和議爲恨。 子五人,汝虞知桃源縣,汝士朝奉大夫、知黃州,汝工知昌化軍 時胡安國父子家南嶽下,劉錡家湘潭,相與往還講論,言及國事, 年七十有六卒。 有文集十卷,題日臨淮集,廬陵胡銓爲之序。 必憂形于色, 諡忠襄。 始終以

民戕 明至相,磁人無知者,自是親愛愈篤。 自稱僞官,議者又謂|邦昌不可信,王怒將誅|淵,公裔曰:「神器自歸,天命也。」王遂受璽,命 奉使王雲,隨王車入州廨,公裔復諭退之。 韓公裔字子展,開封人。 |金兵犯京,王出使,公裔從行。 初以三館吏補官,掌韋賢妃閣牋奏,尋充康王府內 渡河,將官劉浩、吳湛私門,公裔諭之乃解。 及兵退,張邦昌遣人同王舅韋淵來獻傳國璽。 王之將南也,與公裔謀,間道潛師夜起,遲 知客。 次磁州,軍 時淵

列

傳第

百

三十八

韓

公畜

公裔掌之。公裔力救淵,釋其罪。

於睢陽受命。」時前軍已發,將趨彭城,會天大雷電,不能前,王異之,夜半抗聲語公裔日: 元祐后 詔王入承大統,府僚謂金兵尚近,宜屯彭城。公裔言:「國家肇基睢陽,王亦宜

明日如睢陽,决矣。」旣卽帝位,公裔累遷武功大夫、貴州防禦使。

後以事忤黃潛善,適帝幸維揚,公裔丐去,潛善以爲避事,遂降三官,爰吏部。帝幸越,

念其舊勞,召復故官、幹辦皇城司,仍帶御器械,累遷至廣州觀察使、提舉估神觀。

于帝,銜之。 放供,秦檜以公裔帥府舊人,奏令修書官就質其事。俄除保康軍承宣使,檜疑其捨已而求 公裔給事藩邸三十餘年,恩寵優厚,每置酒慈寧宮,必召公裔。 右諫議大夫汪勃希檜意,劾罷公裔,遂與外祠,在外居住,而帝眷之不衰。 會修玉牒,元帥府事多

孝宗語其忠勞,因詔所居郡善視之。 容軍節度使,尋致仕。 |檜死,即復提舉<u>佑神觀,賜第和寧門西,帝曰"「朕與東朝欲常見卿,故以自近</u>耳。」升華 後華容軍復爲岳陽軍,公裔遂換岳陽軍節度使。 乾道二年卒,年七十五,贈太尉、諡恭榮,官其親族八 高宗既內禪,嘗與

人。 高宗賜金帛甚厚。

公裔律身稍謹,不植勢,不市恩,又敢與黃潛善、秦檜異,斯亦足取云。

尚程頤之學,何邪? 張屬斥<u>蔡京之禍,薦楊時之賢,其趣操正矣,况平寇有術,而不自以爲</u> 之計已决,猶日鄰國恭順無他,何其見幾之不早邪?若李稙、韓公裔早著忠盡,爲天子故 功乎?|松年鄙|秦|檜而不交,知命通方,固不易得。|而|曹勛崎嶇兵間,稍著勞勃,然|金人入侵 |輔得諫臣之體,其劾|蔡京、王黼之黨,論吳敏、李綱之隙,是矣。 然旣辨安石學術之害,而不 人,能與黃潛善、秦檜爲異,閉門不出,待時而動,斯亦知所向方者哉! 論 曰:章誼有蹇諤之節,肖胄席父祖之蔭,二人多所論建,奉使不辱,亦可取矣。 陳公

校勘記

胡直儒 宋會要禮二五之八四、繁年要錄卷四三作「胡直孺」。

(三) 善戰 「善」原作「喜」,據繁年要錄卷八七改。

(三) 虔州 原作「處州」,據繫年要錄卷一一二、一二〇改。

越 閩,浮鄭達吳,浪槳風帆,千艘萬艫」之稱(輿地紀勝卷一〇引王十朋賦),正與胡奏所謂海道要 無關;卷八八地理志兩浙路有蘇、秀、明、越四州,當時分別爲沿江沿海要地,越州更有「航甌舶 原作「趙」。按本書卷八六地理志,趙州屬河北西路,與胡松年奏請控禦江海以防劉豫南侵

列

傳

百三十八

校勘記

衝相合,「趙」當爲「越」之誤,因改。

(色) 王綸 原作「王倫」,據本書卷三二髙宗紀、卷三七二王綸傳改,下文「勛與綸還」語同。

宋史卷三百八十

列傳第一百三十九

何鑄 羅汝楫子願附 王次翁 蕭振 范同 楊愿 樓炤 勾龍如淵 薛丽

郎。 於孝,感物之道莫過於誠。誠孝旣至,則歸梓宮於陵寢,奉兩宮於魏闕,紹大業,復境土,又 何難焉。」帝嘉納之。 御史中丞廖剛薦鑄操履勁正,可備拾遺補闕之選。即命對。 |何鑄字||伯壽,|餘杭人。登||政和五年進士第,歷官州縣,入爲諸王宮大小學教授、秘書 |鑄首陳:「動天之德莫大

儇不莊,慢易無禮者,爲行已之失。 乞大明好惡,申飭中外,各務正其心術,毋或欺誕。」 蓋 言不由中而首尾鄕背,行險自售而設意相傾者,爲事君之失。 懷險巇之謀,行刻薄之政,輕 拜監察御史,尋遷殿中侍御史。上疏論:「士大夫心術不正,徇虚以掠名,託名以規利。

列

僔

第一百三十九

侗

癴

一一七〇七

神莫 思。願陛下事無大小,精思熟慮,求其至當而行。如是,則事無過舉矣。」尋拜御史中丞。 疏 有 所 奏,其事 指 大於得四海之歡心。 也。 ·遂已。 時 遷温州 擢右諫議大夫。論:「中興之功,在於立志,天下之事濟與否,在於思與不 諸宮殿神像于湖州,有司迎奉,所過騷然。 浙東旱荒,若加勤動,恐道路怨咨。乞務從簡約,不得過爲騷擾。」 鑄言:「孝莫大於寧神,寧

貴上變,逮飛繫大理獄,先命鑄鞫之。鑄引飛至庭,詰其反狀。飛袒而示之背,背有舊湼 語塞,改命万俟卨。飛死獄中,子雲斬於市 也。」鑄曰:「鑄豈區區爲一岳飛者,強敵未滅,無故戮一大將,失士卒心,非社稷之長計。」檜 「盡忠報國」四大字,深入膚理。旣而閱實俱無驗,鑄察其寃,白之膾。膾不悅曰:「此上意 先是,秦檜力主和議,大將岳飛有戰功,金人所深忌,檜惡其異己,欲除之,脅飛故將王

希烈 臣不可祈請。」乃以鑄爲端明殿學士、簽書樞密院事爲報謝使。鑄曰:「是行猶顏眞卿使李 徽州 也,然君命不可辭。」旣返命,繪諷万俟卨使論鑄私岳飛爲不反,欲竄諸嶺夷,帝不從, 時金遣蕭毅、邢具瞻來議事,檜言:「先帝梓宮未反,太后鑾輿尚遷朔方,非大

舉萬壽觀兼侍讀,召赴行在,力辭。 時 有使金者還,言金人問鑄安在,會用否。 乃再遣使金,使事秘而不傳。既歸報,帝復許以大用, 於是復使知温州。 未幾,以端明殿學上提

又力請祠,除資政殿學士、知徽州。 居數月,提舉江州太平興國宮。卒,年六十五。

偏歷臺諫,所論如趙鼎、李光、周葵、范沖、孫近諸人,未免迎望風旨,議者以此少之。 至於 |鑄孝友廉儉。旣貴,無屋可居,止寓佛寺。其辨岳飛之寬,亦人所難。 然紹興己未以後,

|慈寧歸養,梓宮復還,雖|鑄祈請之力,而|金謀蓋素定矣。

我師屢捷,金欲和益堅。 先是,金諸將皆已厭兵欲和,難自己發,故使檜盡室航海而歸,密有成約。 至是,遺鑄銜命,蓋檜之陰謀,以鑄嘗爭岳飛之獄,而飛竟死,使金 紹興以後,

知之而其議速諧也。

鑄死四十餘年,諡<u>通惠,其家辭焉。</u>嘉定初,改諡恭敏。

燈讀之。禮部別頭試第一,授恩州司理參軍,歷婺州教授、辟雍博士,出知道州。 王次翁字慶曾,濟南人。聚徒授業,齊、魯多從游者。入太學,貧甚,夜持書就旁舍借

帥檄漕司預鳩糧獨三十萬以備調發,次爾即以具報,吏愕胎,次爾曰:「兵未必發,先擾民可 多寡之數,約期受輸,不擾而集。除廣西轉運判官。時劇盜馬友、孔彥舟、曹成更據長沙, |燕雲之役,取免夫錢不及期,輒以乏興論。|次緣檄取屬邑丁籍,視民產高下以爲所輸

列

第

一百三十

九

王次

祠,歸寓于婺。

一一七一〇

吾以一路常平上供計之,不啻三十萬。」已而賊不犯境。 召對,論事不合,出知處州,乞

呂頤浩帥長沙,辟爲參謀官。頃之,力乞致仕。 秦檜召還,道出婺,次翁見之。

部員外郎,遷秘書少監,除起居舍人,遷中書舍人。劉光世除使相,奏以文資蔭其子,次翁 言:「頤浩與次翁同郡,頤浩再相,次翁貧困至此。」檜笑曰:「非其類也。」檜居朝,遂以爲吏

執奏缴還。

遜語,次翁乞斬通以肅軍,且言:「著令,寸鐵入皇城者有常刑。」遂罷內敎。 門受旨升轉,次翁言:「閻門徑自畫旨,不由三省,非祖宗法。」寢弗命。呼延通因內敎出不 「法令沮于下,而不知朝廷之尊,漸不可長。」帝令詰宣撫司。宣贊舍人陳諤、孫崇節即閤 改御史中丞。論趙鼎不法,罷知泉州。 部差李泗爲鄂州巡檢,而湖北宣撫使不可,次豫言: 除工部侍郎兼侍講。 蜀闕帥,宰執擬次爲以聞。帝以次爲明經術,留兼資善堂翊善。

措置有睽。 韓世忠與劉光世、張俊與劉錡皆不相能,次翁言:「世忠於光世因言議有隙,俊於錡由 竊恐崎保一孤壘,光世軍處窮,獨慘與世忠不肯急援。 願遣使切責,因用郭子

儀、李光弼以忠義泣別相勉者感動之。」

金人敗盟入侵,次翁爲秦檜言於帝曰:「前日國是,初無主議,事有小變則更用他相,後

密使, 罷兵柄。 列 傳 第 次翁歸語其子伯庠曰:「吾與秦相謀之久矣。」 百三十 Ĵυ 一七一

爲至 來者未必賢於前人,而排斥異黨,收召親故,紛紛非累月不能定,於國事初無補。 初罷政,二人擯斥累年。 戒 ,無使小人異議乘間而入。」檜德之。 至是,次翁希恰旨,言:「吏部之有審量,皆暴揚君父過舉,得無傷 先是, 膾兄子與其內兄三晚皆以恩幸得官, 願陛下以 檜

陛下孝治。 初, 次翁旣論罷趙鼎,鼎歸會稽,上書言時政。 乞悉罷建炎、紹興前後累降指揮。」由是二人驟進。 |檜忌||飛復用,乃令|次爲又言之,乞顯置

化軍。 于法。 右諫 且言:「特進乃宰相階官,鼎雖謫降,而 議大夫何鑄 又論鼎罪重罰輕, 降朝奉大夫, 階官如故,是未嘗罷相也。」遂降散官,謫居興 移潭州。 檜意猶未厭, 次
多
又
論
:

責,然朝奉大夫視中大夫品秩不相遼,潭州比興化尤爲善地,以此示罰, 鼎聞邊警, 喜見顔色。 繩以漢法,當伏不道之誅;責以春秋, 當坐誅意之罰。 人將玩刑。」再移 雖再行貶

潮州安置

金人敗于柘皋,帝曰:「將帥成不戰劫敵之功,乃輔弼奇謀指縱之力。」除一子 次翁 除參 知政 事。 兩浙轉運司牒試,主司觀望,膾與次爲子姪預選者數人,士論大駭。 職 名。

直省官曰:「姑待岳少保來。」益令堂廚豐其燕具,如此展期以待者六七日。 | 恰召三大將論功行賞,岳飛未至。| 檜與| 次緣謀,以明日率| 世忠、| 俊置酒湖上,欲出, 飛旣至,皆除樞 則語

王 솟 范 同

乃入。次翁以未得膾命,且懼膾疑其私相結納,欲攘其位,堅不肯償,相持境上凡三日,中 太后回鑾, 次翁爲奉迎扈從禮儀使。 初, 太后貸金于金使以犒從者,至境,金使責償

外憂慮,副使王喚哀金與之。太后歸,泣訴于帝曰:「王次翁大臣,不顧國家利害,萬一有變, 則我子母不相見矣。」帝震怒,欲暴其罪誅之。次翁先白鱠謂所以然者,以未嘗禀命,故不

敢專。檜大喜,力爲營救,奏爲報謝使以避帝怒。

差浙東者又數人,皆膾爲開陳也。恰擅國十九年,凡居政府者,莫不以微忤出去,終始不二 年歸,居明州。恰憐之,餽問不絕。十九年,卒,年七十一,贈宣奉大夫,諸子壻親戚族人添 者,惟次翁爾。 使還,帝立中宮,奏爲册寶副使,帝終惡之。層論次爲辭位,遂以資政殿學士奉祠,引

和議。 見者多流涕。 |范同字||擇善,||建康人。登||政和五年第,再中宏詞科,累官至東部員外郎。與|秦檜力主 紹興八年,假太常少卿接件金使蕭哲、張通古入境,同北向再拜,問金主起居,軍民 除中書門下省檢正諸房公事,權吏部侍郎兼實錄院修撰,遷給事中。

十一年,檜再主和議,患諸將難制,同獻計於檜,請皆除樞府、罷其兵權。 |檜喜,乃密奏

一七一三

使,飛副使,並宣押赴樞府治事。 以柘皋之捷,召三大將赴行在,論功行賞。 張俊與檜意合,且覺朝廷欲罷兵權,即首納所統兵。 同入對,帝命與林待聘分草三制,世忠、俊樞密 帝召

同入對,復以同爲翰林學士,俄拜參知政事兼修實錄。

棚 爲遷葬之議,自建康至信州,調夫治道,怨嗟籍籍。 人中貪天功以爲已有。」遂罷與祠。 檜意未已, 卨再論, 責授左朝奉郎、秘書少監, 謫居 同始贊和議,爲膾所引,及在政府,或自奏事,膾忌之。 近朝廷收天下兵柄,歸之宥密,同輒於 万俟卨因論:「同貳政之初,

十四年,復朝奉大夫,提舉江州太平觀,移池州。 十八年,復太中大夫、知太平州。

筠州

年五十二。

請迎復元祐皇后。又奔濟州元帥府勸進,辟爲屬。 楊愿字原仲。 宣和末,補太學錄。二帝北遷,金人聞愿名,索之,愿匿民間。 上書執

秦檜薦之,召改 高宗卽位,以元帥府結局恩,授修職郎,御營司辟機宜文字。 福密院編脩官。 登紹興二年進士第,遷計議官。召試館職,罷。 歷新昌縣丞、越州判官。 主管崇道

挒 回 第

> 百

+ 九

楊 愿

觀,復除秘書郎。議者謂外任未終,故通判明州

郎 遷右司,起居舍人兼權中書舍人。 檜旣專政,召爲秘書丞。 未幾,拜監察御史。 初脩玉牒,特以命愿,愿言:「玉牒當載靖康推戴趙氏 臺長言愿資淺,當先歷郞官,改司封員外

事,以秦檜建議本末書之。」

傳宣,瞱不迎拜,愿以禮折之,皆聽服。及還,就充送件使。 十三年,權直學士院,充金國賀正旦接件使。 金使完顏曄〇八境,猶欲據主席, 十四年,爲御史中丞。 踰月,升 中使

是。」光 下任相如此,蓋得治道之要。」又論史事,恰曰:「靖康圍城中,失節者相與作私史,公肆擠 清貧,不可無祿。」膾疑閱薦之,以語愿,愿又嗾文會攻問去。藤州守臣言遷客李光作詩諷 端明殿學士、簽書樞密院事兼參知政事,仍兼脩玉牒 刺時政,愿在中司,傅會其說,謂:「光縱橫傾險,子弟賓客往來吳、越,誘人上書,動搖 曰:「九成以唱異惑衆,爲臺臣所論,予郡,乃力乞祠。觀其意,終不爲陛下用。」帝曰:「九成 愿以爲誚己,訴于檜,誠御史李文會劾之。高問侍經筵,帝問張九成安否,翌日,又問檜,膾 十五年罷,提舉太平觀。初,愿與張擴並居西掖,一時書命,藉擴潤色。擴詠二毫筆詩, 與檜論事,因曰:「殷謂進用士大夫,一相之責也。一相旣賢,則所薦皆賢。」愿曰:「陛 再移謫瓊海。 文會旣升西府,愿覘膾意稍厭,卽數其害政,罷之。後二日,愿遂補其 國

以其父在東宮,勢傾一時,士皆靡然從之,以徼後福,獨檜守正不易。」蓋自檜再居相位,每 排。」帝曰:「卿不推異姓,宜其不容。」愿曰:「檜非獨是時不肯雷同,宣和間耿延禧爲學官,

薦執政,必選世無名譽、柔佞易制者。愿希膾意迎合,附下罔上,至是斥去,天下快之。

又三年,起知宣州。玉牒書成,加資政殿學士,移建康府。二十二年,卒,年五十二。

初,愿守宣城,表弟王炎調蘄水令,過之,醉中謂愿曰:「嘗於呂丞相處得公頃歲所通

宴監司,大合樂,守卒皆怠,淡卽靑溪得客舟以行,愿憂撓而卒。 書,其間頗及秦丞相之短,尙記憶否?」愿聞之,色如死灰,遂留淡不聽去。 會愿移守金陵,

錄、推寧府司儀曹事,改尙書考功員外郎。 樓炤字仲暉,婺州永康人。登政和五年進士第,調大名府戶曹,改西京國子博士、辟雍

供省吏員,今縱未能損其所素有,安可置其所本無乎?」 力。」於是移蹕臨安。擢右司郞中。時銓曹患員多闞少,自倅貳以下多添差。炤言:「光武 淮南爲屛蔽,權都建康,漸圖恢復。力未可以保淮南,則因長江爲險阻,權都吳會,以養國 帝在建康,炤謂:「今日之計,當思古人量力之言,祭兵家知己之計。力可以保淮南,則以

列傳

第一百三十九

樓炤

明

察御史以上可任監司、郡守者一二人。」詔從之,命中書、門下置籍。 省相度措置,卒施行之。又言:「監司、郡守,係民甚切。乞令侍從官各舉通判資序或嘗任監 或兼度支。今宰相之事難行,若參做唐制,使戶部長貳兼領諸路漕權,何不可之有? 年,遷起居郞。言:「今暴師日久,財用匱乏。 可以總大計之出入,外則可以制諸道之盈虛,如劉晏自按租庸,以知州縣錢穀利病。」 紹 興二年,秦檜罷相,炤亦以言者論去。 考唐故事,以宰相領鹽鐵轉運使, 六年,召爲左司員外郎,尋遷殿中侍御史。 或判戶部, 詔三 內則

權起居舍人何掄書黃行下,於是燾與炤皆請補外,以秘閣脩撰知温州。 與勾龍如淵並命。 七年,宰相張浚之兄滉賜出身與郡,中書舍人張燾封還,乃命炤行,炤又封還,而竟爲 如淵入對,帝謂之曰:「卿與樓炤皆股所親擢。」尋遷給事中兼直學 未幾, 除 中書舍

革爲范瓊所害,敢、大受爲劉豫所殺,乞賜褒恤。」又奏:「陝西諸路陷劉豫,郡縣有不從僞之 南之境土,歸我輿圖;戢宇內之丰戈,用全民命。」尋兼侍讀,除端明殿學士、簽書樞密院 人,所籍貲產,並令勘驗給還。」炤至東京,檢視宮室,尋詣水安軍謁陵寢,遂至長安。 繼命往陝西宣諭德意。炤奏:「京城統制吳革、知環州田敢、成忠郎盧大受皆以節義, 九年,以金人來和肆赦,炤草其文,曰:「乃上穹開悔禍之期,而大金報許和之約。 割河

浩帥 屯,控守要害。」於是隣、政二軍獨屯內地。炤又會諸路監司于鳳翔,皆言蜀邊屯駐大軍之 信,今移軍陝右,則蜀口空虛。 趣延,楊政帥熙河蘭鞏,吳粦帥鳳翔。 會李世輔自夏國欲歸朝,炤以書招之,世輔以二千人赴行在。 金若自南山擣濁,要我陝右軍,則我不戰自屈。 炤欲盡移川口諸軍於陝西, 隣曰:「金人反覆難 尋至鳳翔,以便宜命郭 當依山爲

久,坐困四川民力,乃下其議,語在胡世將傳。

士知紹興府,過關入見,除簽書樞密院事兼權參知政事。 |炤還朝,以親老求歸省于|明州,許之,命給假迎侍,仍賜以金帶。 尋爲李文會、詹大方所劾,與祠。 十四年,以資政殿學

久之,除知宣州,徙廣州,未行而卒,年七十三。 後諡 護婦。

自尊大,或者論其好貨失將士心云。 炤早附蔡京改秩,爲臺諫所論。 其後立朝至位二府,皆與秦檜同時。 其宣諭陝西,妄

勾龍如淵字行父,永康軍導江人〔三。勾姓本出古勾芒,高宗卽位,避御名,更勾龍氏。

政和 八年,登上舍第。沉浮州縣二十年,以張浚薦,召試館職。

紹興六年,除秘書省校書郎。歷著作佐郎、祠部員外兼禮部、起居舍人。 嘗進所爲文三

第

一百三十

九

勾龍

如淵

十篇,帝曰:「卿文極高古,更令平易盡善。」後因進對,帝復言:「文章平易者多淺近,淵深者

多艱澁,惟用意淵深而造語平易,此最難者。」

|淵言:「陛下旣罷||鼎,則用人才須聳動四方,當速召君子,顯黜小人。」帝曰:「君子謂誰?」 曰:「孫近、李光。」「小人謂誰?」曰:「呂本中。」先是,祠臣曾開以老病辭不草國書,帝欲用 如淵代之,而趙鼎薦本中,故如淵憾之。 八年,兼給事中、同知貢舉,除中書舍人兼侍讀,兼直學士院。面命草趙鼎罷相制,如

膾木專,故及之。除御史中丞。 下明諭之。」帝曰:「前此未常有以此告朕者,卿見秦檜亦宜語此。」時檜方得君,如淵猶恐委 不能盡誠,陛下祭其不誠,又從而疑之,安有君臣之間、動相疑間而能久於其位者。願陛 臣論一事不從,尙未之覺,至再至三,遂以爲陛下疏之,或疑他人有以間之。旣以懷疑,卽 陛下所欲爲,勢有未可,大臣亦當明白辯論。然必陛下先與大臣言及此意,若不先言,卽大 又言:「臣觀朝廷事,非君臣情通,未易能濟。大臣於事稍有過差,陛下訓飭之可也。

謀曰:「相公爲天下大計,而邪說橫起,盍不擇人爲臺諫,使盡擊去,則相公之事遂矣。」膾大 先是,檜力主和,執政、侍從及內外諸臣皆以爲非是,多上書諫止者,檜患之。如淵爲檜

喜,即擢如淵中司。

渡江,二初也;移蹕建康,三初也;自建康復還臨安,四初也。 如淵言:「凡事必有初,及其初而爲之則易,無其端而發之則難。 自趙鼎相,劉大中、王庶相 陛下卽位,一初也;

繼去,今復獨任一相,召一二名士,凡事有當行而弊有當去者,又一初也。臣願以正紀綱、辨 邪正、明賞罰、謹名器、審用度、厚風俗、去文具七者爲獻。」

他容臣一一爲陛下別白之。」於是出庾知嚴州。又連論庶、大中,皆罷之。 孟庾之召,王庶之去,已有『一解不如一解』之語。願陛下不惜」孟庾一人,以正今日公論,其 直而去。劉大中以不孝得罪,乃竊朝廷美職而去。」帝曰:「卿胡不論?」對曰:「目今士論見 曰:「如趙鼎爲相,盡隳紀綱,乃竊賢相之名而去。王庶在樞府,盡用奸計,乃以和議不合,賣 又言:「孟庾召節在途,士論不與。」帝曰:「朕欲遣令使金國,在廷莫更有小人否?」對

吏曰:「有。」

這起都堂與宰執議取書事,宰執皆以爲然。帝親筆召如淵、

李誼入對。明日, 取其書納禁中。於是同諫長請對,又呼臺吏問:「朝廷有大議論,許臺諫見宰執商議乎?」 金國遣二使來議和,許歸河南地。使者踞甚,議受書之禮不决,外議洶洶。 如淵建議

詔宰執就館見金使,受其書納入,人情始安。

實出於愛君;庭臣、將之遷,雖曰議論之合,而其迹終近於希進。今國論旣定,好惡黜陟, 九年,奏召還會開、范同,而罷施庭臣、莫將,以謂:「開、同之出,雖曰語言之過,而其心

傳第一百三十九

勾龍

如淵

- 1七二〇

所宜深謹。」又論張邦昌時僞臣因赦復職非是。 帝日: 「卿言是也, 股亦欲置此數匹夫不

問。」對曰:「將恐無以示訓。」其後卒不行。

臣謂如淵有指斥語,帝謂秦檜曰:「以殷觀之,庭臣之罪小,如淵之罪大。」檜請斥庭臣而徙 初,而臣反若有讒愬於其間者。」帝曰:「朕素不喜讒,卿其勿疑。」如淵嘗與施庭臣忿爭,庭 後秦檜在和議可否未决之間欲求去,陛下頗罪之,臣再三爲檜辨析。 歸。」帝不許。 如淵,待其求去然後補外。 必 至於壞,而宣對之日,稍有將順,則遂至於屈。臣於二者,粗有報國之忠。 忽一日,如淵言:「和議之際,臣粗自效,如臣到都堂,若不遏朝廷再遣使之議,則和議 如淵疑帝有疏之之意,又奏曰:「臣向薦君臣腹心之論, 帝不可,於是與庭臣皆罷。 今陛下與檜君臣 陛下大以爲然。 臣親老, 願求 其 如

晏敦復上疏專以三人爲言。 |寧府,帝曰:「此人用心不端。」遂已。 初,如淵與莫將及庭臣皆力主和議,如淵緣此擢中司,而將及庭臣緣此皆峻用。 如淵入言路,即劾二人,至是興庭臣俱罷。其後櫓擬如淵知遂 兩奉祠,卒,年六十二。 張燾、

如淵始以張浚薦召,而終乃翼秦檜擠趙鼎,讎呂本中,逐劉大中、王庶,心迹固可見矣。

子佃、僎、似。

雲,定著釋奠先聖誤用下丁,弼據禮是正,州以聞,韶從其議。 薛弼字直老,温州永嘉人。 登政和二年進士第,調懷州刑曹、杭州教授。 監左藏東庫。內侍王道使奴 初頒五禮新

從旁視絹美惡,多取之,弼白版曹窮治,人嚴憚之。

乞罷歸,改三門、白波輦運,尋主管明道宮,提舉准東鹽事,改湖南運判。 人果再入。始命刑部侍郎宋伯友提舉河防,弼以點檢糧草從之,爲計畫甚切,皆不能用,乃 「姚平仲不可恃。」未幾而敗。 |靖康初,金兵攻||汴京,李綱定議堅守,衆不悅。 | 綱救||太原(至), | 弼言:「'| | 金必再至, | 綱不當去,宜先事||河北。」||金 |弼意與||綱同,圍解,遷光祿寺丞。 嘗言:

楊么據洞庭,寇鼎州,王躞久不能平,更命岳飛討之。」公陸耕水戰,樓船十餘丈,官軍

以聞,帝惻然,命給錢六萬緡、廣西常平米六萬斛、鄂州米二十萬斛振之,且使講求富弼青 精騎直擣其壘,則破壞在目前矣。」飛曰:「善。」 兼旬,積寇盡平,進直秘閣。 鬥也。今大旱,湖水落洪,若重購舟首,勿與戰,逐筏斷江路,藁其上流,使彼之長坐廢,而 徒仰視不得近。飛謀益造大舟,弼曰:「若是,則未可以歲月勝矣。且彼之所長,可避而不可 時道殣相望,弼

王彥自荆移襄,遷延不卽赴。 **彦所將八字軍皆中原勁卒,朝廷患其恣横,以弼直**徽猷 州荒政,民賴以甦。

傳

第一

百三十

九

薛

骊

——七二

閣 代之。 彦 殊不意 ,關徑入府受將吏謁,大駭。 丽曲折譬曉,彥感悟,即日 出境。

弼謂 除 丘 語將曰:「太尉力乞張公,而詔使隨至,岳軍素整,今而譁鬨,是汝曹累太尉也。」諸 飛參謀官。 飛母死, 遁於<u>廬山,張宗元攝</u>飛事。 飛將張憲移疾, 部曲 恟 洶 生異

將以診: 憲,憲佯悟曰:「相公腹心,惟參謀知之。」衆乃定。 除戶部郎官,再知荆南

桃 源 劇盜. |伍俊旣招安,復謀叛,提點刑獄||万俟卨不能制,乃以委開, | 關許||俊以靖州

俊喜 曰:「我得」時,則地過|桃源遠矣。」|俊至,則斬以徇。 遷秘閣脩撰、陝西轉運使,以左司郎

日召知虔州,移黄州。

同措 賊。 視 民作山砦自保。 日 患 置。 軍可一 ,聞于朝。 時 自是歲費錢三萬六千餘緡、米九千石,凡四年而賊平。 福州 未及行,韶升關集英殿脩撰,與將兩易。 當十。」乃奏虎臣爲副將,敏爲巡檢,選丁壯千人,號「奇兵」,日給糗糧 大盜有號「管天下」、「伍黑龍」、「滿山紅」之屬,其衆甚盛,鈴轄李貴爲賊所獲, 事下腕議,腕謂:「昔守章貢,有武夫周虎臣、陳敏者,丁壯各數百, 守臣莫將議委潭、泉、汀、建,募強壯游手各千人爲效用,與殿司統制張淵 弼至郡, 丽知廣州,擢數文閣待制。 漕臣以游手易聚難散,恐爲他 皆能戰, 責 以滅

初,秦檜居永嘉,弼游其門。 弼在湖北除盜,歸功于万俟卨。 檜誣岳飛下吏,高以中司 年六十三。

輷 獄 |飛父子及||憲皆死。||朱芾、||李若虚亦坐嘗爲||飛謀議,奪職,惟|| 随得免,且爲||檜用,屢更事

任,通籍從官,世以此少之。

鄓。 奏命官犯公罪,勿取特旨以終惠臣子,又戶口凋耗,宜少寬養子之禁。 羅汝楫字彥濟,徽州歙縣人。登政和二年進士第,監登聞鼓院,遷大理丞、刑部員外

拜監察御史。未踰月,遷殿中侍御史。 與中丞何鑄交章論岳飛,罷其樞筦。朱芾、李若

彦猷、李若樸獨喧然以衆議爲非,欲從輕典。皆坐黜。 之,汝楫劾其無忌憚當斥,且令庶徙居。 虚嘗爲飛議曹,主帥有異意而不能諫;又言(□),飛獄具,寺官聚斷,咸謂死有餘罪,寺丞何 劉子羽知鎭江,上言:「和好非久遠計,宜及閑暇爲 王庶謫道州,郡丞孫行儉以官廨居

備。」膾怒,風汝楫論罷之。

宗法。」於是詔天下斷死刑,守以下引囚問姓名、鄕里然後决。又言:「國家駐蹕臨安,淮南 不可置度外,當重防海之寄,守長江之要,革竄名賞籍以勸有功。」 時撫州有兩陳四繫獄,誤論輕罪者死,汝楫誦其冤,且言:「獨罪獄官而守倅不坐,非祖

遷起居郎兼侍講。 帝問"「或謂春秋有貶無褒,此誼是否?」對曰"「春秋上法天道,春

列

第

百三十

九

羅汝揖

蕭振

明。 生秋殺,若貶而無褒,則天道不具矣。」帝稱善,嘗曰:「自王安石廢春秋學,聖人之旨寖以不 近世得其要者,惟胡安國與卿耳。」兼權中書舍人,除右諫議大夫。

官,中外悚懼,多束裝待遣。」汝楫言:「皆不當罪,宜以景寧事黨爲戒。」議遂寢。 有南雄守奏對:「太后之歸,和議之力也,當盡按前言和不便者。」時相是之,驟用爲臺

司。 國信使。 子灝、籲、頡、頌、願、頫,皆有文。 遷御史中丞。舊例,中丞、侍御史不並置,乃更侍御史。汝楫求去益力,遷吏部尙書,充 除龍圖閣學士、知嚴州。秩滿,請祠,居喪未終而卒,年七十。 累贈開府儀同三

像前。人疑飛之憾不釋云。 二十卷。知鄂州,有治績,以父故不敢入岳飛廟。一日,自念吾政善,姑往祠之,甫拜,遽卒于 願字端良,博學好古。法案、漢爲詞章,高雅精鍊,朱熹特稱重之。有小集七卷,爾雅翼

釋卷,其師謂其父曰:「此兒遠大器也。」未冠,游郡庠,旣冠,升太學。 時有號「三賢」者,推 蕭振字德起,温州平陽人。幼莊重,不好弄。稍長,能自謀學。嘗奉父命董農役隴畝,手不

振爲首。登政和八年進士第,調信州儀曹。

守復檄振如初。 欲危振,傲振攝貴溪、弋陽二邑。旣而王師至衢,又傲振督軍餉,振治辦無闕。 見而喜之,欲以軍中俘馘授振爲賞,振辭曰:「豈可不冒矢石而貪人之功乎!」諸邑盜未息, 時州郡奉神霄宮務侈靡,振不欲費財勞民,與守議不合。 振悉意區處,許其自新,賊多降者。守以贓去,振獨爲辦行,守愧謝之。 會方臘寇東南,距信尤近,守 大將劉光世

一個詢其故,振曰:「今執政多私其親,願爲時革弊。」」景衡然之。

時振婦翁許景衡以給事中召,振祝之曰"「公至朝幸勿見薦。」景

調發州兵曹兼功曹。

門入。振聞卽往,羣卒皆羅拜呼曰:「某等屈抑,願兵曹理之。」振使之言,厲色叱曰:「細事 習武以備,蓄異謀者稍懼。有一兵官素得軍士心,守疑而罷之,羣卒數百人被甲挺刃,斬儀 歸,告其親曰:「家世業農,幸有田可力以奉甘旨,振不願仕。」或薦于朝,授婺州教授,改秩, 信,事悉與謀。嘗議城守,振請以錢數萬緡庸工板築,未數月,城壘屹然,一毫無擾。任滿 車駕南巡,大兵咫尺,汝速死耶!可急釋械,當爲汝言。」衆拜謝而去。郡守由是益相 時盜賊所在猖獗,婆卒揚言欲叛以應賊,官吏震恐。振選諸邑土兵強勇者幾千人,日

以執政薦召對,敷奏數事,皆中時病,帝大喜,拜監察御史。明年多,以親老乞補外,章

51

百三

十九

蕭振

之事陛下也。」遂除提點浙西刑獄,尋召爲宗正少卿,俄擢侍御史。 面奏曰:「臣事親之日短,事陛下之日長。」指心自誓:「今日之事父母,乃他日

既出,振謂人曰:「如趙丞相不必論,盍自爲去就。」鼎遂罷。 振本趙鼎所薦,後因秦檜引入臺,時<u>劉大中與</u>鼎不主和議,振途劾大中以搖鼎。

心, 生。」檜 宜遣 豈不知股 聖孝愈光矣。」帝歎其忠。 「使撫諭,示以朝廷息兵寬民意。雖兩國通好,戰禦之備宜勿弛。」帝曰:「卿欲奉親求便, 後振知紹興府,改兵部,除徽猷閣待制、知湖州。陛辭,奏曰:「國家講和,恐失諸將心, 有親哉?」振曰:「臣之親所係者一夫也,陛下之親所係者天下也。 將行,白檜曰:「宰相如一元氣,不可有私,私則萬物爲之不 陛下以天下爲

'」/檜屬以私事,又不克盡從。 二十二年至,以楊煒在獄供涉,鐫徽猷待制,謫居池州 |振至州,||檜欲取羨餘,|振遺||檜書,謂:「財用在天下,如血氣之在一身,移左以實右,則病 以親老乞祠,提舉太平觀。 後知台州。 海寇勢張,振至,克

同薦之。屬吏密語振曰:「煒嘗以書責李參政及太師,昌時義不當舉,待制亦不可舉。」 振 台州,而燒治邑有聲,每大言無顧忌,振擊節稱善,遂薦煒改秩,又移書於檜從子秦昌時,俾 初、煒將上書,責李光徇秦檜議和。 時振爲侍御史,煒見振道書意,振然其言。 及振知

曰:「吾業已許之、豈可中輟。」遂因燒獄中供前事而貶。

御史劾振要譽,復謫池陽。而總計者以譖得蜀帥,旣而專用羅織掊克其民,民益思振。 糴米八萬斛以足軍食,以其直歸計所。 明年,詔除敷文閣待制、知成都府、安撫制置使いる。 總計者利在掊克,即先告膾,謂振唱爲闕乏之語,風 軍儲適闕,倉吏以窘告,振奏留對

退日:「四川善政,前有胡世將,今有蕭振。」進秩四等,加數文閣學士。卒于成都府治,年七 故,振曰:「承縱弛,革之當嚴,今繼苛劾,非寬則民力瘁矣。」帝嘉振治行,謂宰臣沈該、湯思 十二。|振兩爲圖守,威行惠孚,死之日,民無老稚,相與聚哭於道。遺表至,帝悼惜之,賻銀 **檜死,語得聞,帝大感悟,亟遣振還成都,父老懽呼圖道。 版至,一切以寬治。或問其**

時,見過客與掌渡者爭,多溺死。振造大舟,傭工以濟,人感其德,相與名其江爲蕭家渡云。 五百兩、絹五百匹,贈四官。 振好獎善類,端人正士多所交識,其間有卓然拔出者,迄爲名臣。 振居瀕江, 自父微

有文集二十卷。子腻、忱。

論曰:何鑄、王次翁以下數人者,附麗秦檜,斥逐忠良,以變富貴,而次翁尤爲柔媚,故檜 列 傳 第 百三十 Ĵί 蕭 振 校 勘 記 一一七二七

獨憐之, 其在位最久。 孔子所謂鄙夫患得患失無所不至者,此輩是已。 鑄能伸岳飛之枉,

雖爲可尚,然又爲之使金而通問焉,蓋墮其術而不悟者,檜之計深哉

校勘記

- (1) 完顏曄 原作「完顏畢」,據本書卷三〇高宗紀、繫年要錄卷一五〇改。
- [三] 導江 原作「道江」,據本書卷八九地理志「永康軍」條、輿地紀勝卷一五 一改。
- 綱救太原 「救」原作「求」,據葉適水心先生文集卷二二薛公墓誌銘、本書卷三五八李綱傳改。
- 叉言 按繫年要錄卷一四四,上文論朱李、下文論何李,都是羅汝楫所言,此二字疑在上文「朱
- 芾<u>李</u>若虚嘗爲飛曹」語上。
- (金) 二十二年 紀元。 按繫年要錄卷一六三、十朝綱要卷二四都作紹興二十二年十月庚辰,此處失書紹興
- (公)安撫制置使 「制置」二字原倒,據本書卷三一高宗紀、繫年要錄卷一六四改。

